

लीन्ह नीच मारीचहि संगी। भयउ तुरत सोइ कपट कुरंगा ॥
करि छल मूढ़ हरी वैदेही। प्रभु प्रभाउ तस बिदित न तेही ॥
मृग बधि बंधु सहित हरि आए। आश्रमु देखि नयन जल छाए ॥
बिरह बिकल नर इव रघुराई। खोजत बिपिन फिरत दोउ भाई ॥
कबहुँ जोग बियोग न जाकैं। देखा प्रगट बिरह दुखु ताकैं ॥

दो०—अति बिचित्र रघुपति चरित जानहिं परम सुजान ।

जे मतिमंद बिमोह बस हृदयँ धरहिं कछु आन ॥४९॥

संभु समय तेहिं रामहि देखा। उपजा हियँ अति हरषु बिसेषा ॥
भरि लोचन छविसिंधु निहारी। कुसमय जानि न कीन्ह चिन्हारी ॥
जय सच्चिदानंद जग पावन। अस कहि चलेउ मनोज नसावन ॥
चले जात सिव सती समेता। पुनि पुनि पुलकत कृपानिकेता ॥
सती सो दसा संभु कै देखी। उर उपजा संदेहु बिसेषी ॥
संकर जगतबंध जगदीसा। सुर नर मुनि सब नावत सीसा ॥
तिन्ह नृपसुतहि कीन्ह परनामा। कहि सच्चिदानंद परधामा ॥
भए मगन छवि तासु बिलोकी। अजहुँ प्रीति उर रहति न रोकी ॥

दो०—ब्रह्म जो व्यापक बिरज अज अकल अनीह अमेद ।

सो कि देह धरि होइ नर जाहि न जानत बेद ॥५०॥

बिष्णु जो सुरहित नरतनु धारी। सोउ सर्वग्य जथा त्रिपुरारी ॥
खोजइ सो कि अग्य इव नारी। ग्यानधाम श्रीपति असुरारी ॥
संभुगिरा पुनि मृषा न होई सिव सर्वग्य जान सब कोई ॥

अस संसय मन भयउ अपारा । होइ न हृदयँ प्रबोध प्रचारा ॥
 जद्यपि प्रगट न कहेउ भवानी । हर अंतरजामी सब जानी ॥
 सुनहि सती तव नारि सुभाऊ । संसय अस न धरिअ उर काऊ ॥
 जासु कथा कुंभज रिषि गाई । भगति जासु मैं मुनिहि सुनाई ॥
 सोइ मम इष्टदेव रघुवीरा । सेवत जाहि सदा मुनि धीरा ॥
 छं०—मुनि धीर जोगी सिद्ध संतत बिमल मन जेहि ध्यावहीं ।
 कहि नेति निगम पुरान आगम जासु कीरति गावहीं ॥
 सोइ रामु व्यापक ब्रह्म भुवन निकाय पति माया धनी ।
 अवतरेउ अपने भगत हित निजतंत्र नित रघुकुलमनी ॥

सो०—लाग न उर उपदेसु जदपि कहेउ सिवँ बार बहु ।

बोले बिहसि महेसु हरिमाया बलु जानि जियँ ॥५१॥

जौं तुम्हरें मन अति संदेहू । तौ किन जाइ परीछा लेहू ॥
 तब लगि बैठ अहउँ बटछाहीं । जब लगि तुम्ह ऐहहु मोहि पाहीं ॥
 जैसे जाइ मोह भ्रम भारी । करेहु सो जतनु बिबेक विचारी ॥
 चलीं सती सिव आयसु पाई । करहिं विचारु करौं का भाई ॥
 इहाँ संभु अस मन अनुमाना । दच्छसुता कहूँ नहिं कल्याना ॥
 मोरेहु कहें न संसय जाहीं । विधि विपरीत भलाई नाहीं ॥
 होइहि सोइ जो राम रचि राखा । को करि तर्क बढ़ावै साखा ॥
 अस कहि लगे जपन हरिनामा । गई सती जहँ प्रभु सुख घामा ॥

दो०—पुनि पुनि हृदयँ विचारु करि धरि सीता कर रूप ।

लछिमन दीख उमाकृत बेषा । चकित भए भ्रम हृदयँ बिसेषा ॥
 कहि न सकत कछु अति गंभीरा । प्रभु प्रभाउ जानत मति धीरा ॥
 सती कपटु जानेउ सुरस्वामी । सबदरसी सब अंतरजामी ॥
 सुमिरत जाहि मिटइ अग्याना । सोइ सरबग्य रामु भगवाना ॥
 सती कीन्ह चह तहँहुँ दुराऊ । देखहु नारि सुभाव प्रभाऊ ॥
 निज माया बलु हृदयँ बखानी । बोले बिहसि रामु मृदु बानी ॥
 जोरि पानि प्रभु कीन्ह प्रनामू । पिता समेत लीन्ह निज नामू ॥
 कहेउ बहोरि कहाँ वृषकेतू । विपिन अकेलि फिरहु केहि हेतू ॥

दो०—राम बचन मृदु गूढ सुनि उपजा अति संकोचु ।

सती सभीत महेस पहिँ चलीं हृदयँ बड़ सोचु ॥५३॥

मैं संकर कर कहा न माना । निज अग्यानु राम पर आना ॥
 जाइ उतरु अत्र देहउँ काहा । उर उपजा अति दारुन दाहा ॥
 जाना राम सतीं दुखु पावा । निज प्रभाउ कछु प्रगटि जनावा ॥
 सतीं दीख कौतुकु मग जाता । आगें रामु सहित श्री भ्राता ॥
 फिरि चितवा पाछें प्रभु देखा । सहित बंधु सिय सुंदर बेषा ॥
 जहँ चितवहिं तहँ प्रभु आसीना । सेवहिं सिद्ध मुनीस प्रबीना ॥
 देखे सिव विधि बिष्णु अनेका । अमित प्रभाउ एक तें एका ॥
 बंदत चरन करत प्रभु सेवा । विविध बेष देखे सब देवा ॥

दो०—सती बिधात्री इंदिरा देखीं अमित अनूप ।

जेहिं जेहिं बेष अजगदि सुख तेहिं तेहिं तज अनुकूप ॥५४॥

देखे जहँ तहँ रघुपति जेतें। सक्तिन्ह सहित सकल सुर तेते ॥
 जीव चराचर जो संसारा। देखे सकल अनेक प्रकारा ॥
 पूजहिं प्रभुहि देव बहु बेषा। राम रूप दूसर नहिं देखा ॥
 अवलोके रघुपति बहुतेरे। सीता सहित न बेष घनेरे ॥
 सोइ रघुवर सोइ लछिमनु सीता। देखि सती अति भई समीता ॥
 हृदय कंप तन सुधि कछु नाहीं। नयन मूढ़ि बैठीं मग माहीं ॥
 बहुरि बिलोकेउ नयन उधारी। कछु न दीख तहँ दच्छकुमारी ॥
 पुनि पुनि नाइ राम पद सीसा। चलीं तहाँ जहँ रहे गिरीसा ॥
 दो०—गई समीप महेस तब हँसि पूछी कुसलात ।

लीन्हि परीछा कवन बिधि कहहु सत्य सब बात ॥५५॥

मासपारायण, दूसरा विधाम

सतीं समुझि रघुबीर प्रभाऊ। भय बस सिव सन कीन्ह दुराऊ ॥
 कछु न परीछा लीन्हि गोसाईं। कीन्ह प्रनामु तुम्हारिहि नाई ॥
 जो तुम्ह कहा सो मृषा न होई। मोरें मन प्रतीति अति सोई ॥
 तब संकर देखेउ धरि ध्याना। सतीं जो कीन्ह चरित सबु जाना ॥
 बहुरि राममायहि सिरु नावा। प्रेरि सतिहि जेहिं झूठ कहावा ॥
 हरि इच्छा भावी बलवाना। हृदयँ विचारत संभु सुजाना ॥
 सतीं कीन्ह सीता कर बेषा। सिव उर भयउ बिषाद बिसेषा ॥
 जाँ अब करउँ सती सन प्रीती। मिटइ भगति पथु होइ अनीती ॥
 दो०—परम पुनीत न जाइ तजि किएँ प्रेम बड़ पापु ।

प्रगाटि न कहत महेसु कछु हृदयँ अधिक सतापु ॥५६॥

तब संकर प्रभु पद सिरु नावा । सुमिरत रामु हृदयँ अस आवा ॥
 एहि तन सतिहि भेट मोहि नार्ही । सिव संकल्पु कीन्ह मन माहीं ॥
 अस बिचारि संकर मतिधीरा । चले भवन सुमिरत रघुबीरा ॥
 चलत गगन भै गिरा सुहाई । जय महेस भलि भगति द्वाडै ॥
 अस पन तुम्ह बिनु करइ को आना । राम भगत समरथ भगवाना ॥
 सुनि नभगिरा सती उर सोचा । पूछा सिवहि समेत सकोचा ॥
 कीन्ह कवन पन कहहु कृपाला । सत्यधाम प्रभु दीनदयाला ॥
 जदपि सती पूछा बहु भाँती । तदपि न कहेउ त्रिपुर आराती ॥

दो०—सती हृदयँ अनुमान किय सद्यु जानेउ सर्वग्य ।

कीन्ह कपटु मै संभु सन नारि सहज जड़ अग्य ॥५७(क)॥

सो०—जलु पय सरिस बिकाइ देखहु प्रीति कि रीति भलि ।

बिलग होइ रसु जाइ कपट खटाई परत पुनि ॥५७(ख)॥

हृदयँ सोचु समुझत निज करनी । चिंता अमित जाइ नहिं बरनी ॥
 कृपासिंधु सिव परम अगाधा । प्रगट न कहेउ मोर अपराधा ॥
 संकर रुख अवलोकि भवानी । प्रभु मोहितजेउ हृदयँ अकुलानी
 निज अघ समुझि न कछु कहि जाई । तपइ अवाँ इव उर अधिकाई
 सतिहि ससोच जानि वृषकेतू । कहीं कथा सुंदर सुख हेतू ॥
 बरनत पंथ विविध इतिहासा । विस्वनाथ पहुँचे कैलासा ॥
 तहँ पुनि संभु समुझि पन आपन । बैठे बट तर करि कमलासन ॥

दो०—सती बसहि कैलास तब अधिक सोचु मन माहि ।

मरमु न कोऊ जान कछु जुग सम दिवस सिराहि ॥५८॥

नित नव सोचु सती उर भारा । कब जैहउँ दुख सागर पारा ॥
मैं जो कीन्ह रघुपति अपमाना । पुनि पतिवचनु मृषा करि जाना
सो फलु मोहि विधाताँ दीन्हा । जो कछु उचित रहा सोइ कीन्हा
अब विधि अस बूझिअ नहि तोही । संकर बिमुख जिआवसि मोही
कहि न जाइ कछु हृदय गलानी । मन महुँ रामहि सुमिर सयानी ॥
जौ प्रभु दीनदयालु कहावा । आरति हरन बेद जसु गावा ॥
तौ मैं विनय करउँ कर जोरी । छूटउ बेगि देह यह मोरी ॥
जौ मोरें सिव चरन सनेहू । मन क्रम बचन सत्य ब्रतु एहू ॥

दो०—तौ सब दरसी सुनिअ प्रभु करउ सो बेगि उपाइ ।

होइ मरनु जेहिं बिनहिं श्रम दुसह बिपत्ति बिहाइ ॥५९॥

एहि बिधि दुखित प्रजेसकुमारी । अकथनीय दारुन दुखु भारी ॥
बीतैं संबत सहस सतासी । तजी समाधि संभु अविनासी ॥
राम नाम सिव सुमिरन लागे । जानेउ सतीं जगतपति जागे ॥
जाइ संभु पद बंदनु कीन्हा । सनमुख संकर आसनु दीन्हा ॥
लगे कहन हरिकथां रसाला । दच्छ प्रजेस भए तेहि काला ॥
देखा बिधि विचारि सब लायक । दच्छहि कीन्ह प्रजापति नायक ॥
बड़ अधिकार दच्छ जब पावा । अति अभिमानु हृदयँ तब आवा
नाहि कोउ अस जनमा जग माहीं । प्रभुता पाइ अहि मद नाहीं ॥

दो०—दच्छ लिए मुनि बोलि सब करन लगे बढ़ जाग ।

नेवते सादर सकल सुर जे पावत मख भाग ॥६०॥
किंनर नाग सिद्ध गंधर्वा । बधुन्ह समेत चले सुर सर्वा ॥
विष्णु विरंचि महेसु बिहाई । चले सकल सुर जान बनाई ॥
सती बिलोके व्योम विमाना । जात चले सुंदर विधि नाना ॥
सुर सुंदरी करहि कल गाना । सुनत श्रवन छूटहि मुनि ध्याना ॥
पूछेउ तब सिव कहैउ बखानी । पिता जग्य मुनि कछु हरषानी ॥
जौ महेसु मोहि आयसु देहीं । कछु दिन जाइ रहौ मिस एहीं ॥
पति परित्याग हृदय दुखु भारी । कहइ न निज अपराध विचारी ॥
बोली सती मनोहर बानी । भय संकोच प्रेम रस सानी ॥

दो०—पिता भवन उत्सव परम जौ प्रभु आयसु होइ ।

तौ मैं जाउँ कृपायतन सादर देखन सोइ ॥६१॥

कहेहु नीक मोरेहुँ मन भावा । यह अनुचित नहिं नेवत पठावा ॥
दच्छ सकल निज सुता बोलाई । हमरें वयर तुम्हउ बिसराई ॥
ब्रह्मसभाँ हम सन दुखु माना । तेहि तैं अजहुँ करहि अपमाना ॥
जौ बिनु बोलें जाहु भवानी । रहइ न सीछु सनेहु न कानी ॥
जदपि मित्र प्रभु पितु गुर गेहा । जाइअ बिनु बोलेहुँ न सँदेहा ॥
तदपि बिरोध मान जहँ कोई । तहाँ गएँ कल्याण न होई ॥
भाँति अनेक संभु समझावा । भावी बस न ग्यानु उर आवा ॥
कह प्रभु जाहु जो बिमहि बोलै । नहिं मलि बात हमारे भाँदै ॥

दो०— कहि देखा हर जतन बहु रहइ न दच्छकुमारि ।

दिष्ट मुख्य गन संग तब बिदा कीन्ह त्रिपुरारि ॥६२॥

पिता भवन जब गई भवानी । दच्छ त्रास काहुँ न सनमानी ॥
सादर भलेहि मिली एक माता । भगिनीं मिलीं बहुत मुसुकाता ॥
दच्छ न कछु पूछी कुसलाता । सतिहि विलोकि जरे सब गाता ॥
सतीं जाइ देखेउ तब जागा । कतहुँ न दीख संभु कर भागा ॥
तब चित चढ़ेउ जो संकर कहेऊ । प्रभु अपमानु समुझि उर दहेऊ ॥
पाछिल दुखु न हृदयँ अस व्यापा । जस यह भयउ महा परितापा ॥
जद्यपि जग दारुन दुख नाना । सब तैं कठिन जाति अवमाना ॥
समुझि सो सतिहि भयउ अति क्रोधा । बहु विधि जननी कीन्ह प्रबोधा
दो०—सिव अपमानु न जाइ सहि हृदयँ न होइ प्रबोध ।

सकल सभहि हठि हटकै तब बोलीं बचन सक्रोध ॥६३॥

सुनहु सभासद सकल मुनिंदा । कही सुनी जिन्ह संकर निंदा ॥
सो फलु तुरत लह्य सब काहुँ । भली भाँति पछिताव पिताहुँ ॥
संत संभु श्रीपति अपत्रादा । मुनिअ जहाँ तहँ असि मरजादा ॥
काटिअ तासु जीभ जो बसाई । श्रवन मूदि न त चलिअ पराई ॥
जगदातमा महेसु पुरारी । जगत जनक सब के हितकारी ॥
पिता मंदमति निंदत तेही । दच्छ सुक्र संभव यह देही ॥
तजिहउँ तुरत देह तेहि हेतू । उर धरि चंद्रमौलि वृषकेतू ॥
अस कहि जाग अगिनि तनु जारा । भयउ सकल मख दाहाकार ॥

दो०—सती मरनु सुनि संभु गन लगे करन मख खीस ।

जग्य बिधंस बिलोकि भृगु रच्छा कीन्हि मुनीस ॥ ६४ ॥

समाचार सब संकर पाए । बीरभद्रु करि कोप पठाए ॥
जग्य बिधंस जाइ तिन्ह कीन्हा । सकल सुरन्ह बिधिवत फलु दीन्हा
भै जगबिदित दच्छ गति सोई । जसि कछु संभु बिमुख कै होई ॥
यह इतिहास सकल जग जानी । ताते मैं संछेप बखानी ॥
सती मरत हरि सन वर मागा । जनम जनम सिव पद अनुरागा ॥
तेहि कारन हिमगिरि गृह जाई । जनमीं पारबती तनु पाई ॥
जब तैं उमा सैल गृह जाई । सकल सिद्धि संपति तहँ छाई ॥
जहँ तहँ मुनिन्ह सुआश्रम कीन्हे । उचित बास हिम भूधर दीन्हे ॥

दो०—सदा सुमन फल सहित सब द्रुम नव नाना जाति ।

प्रगटीं सुंदर सैल पर मनि आकर बहु भाँति ॥ ६५ ॥

सरिता सब पुनीत जलु बहहीं । खग मृग मधुप सुखी सब रहहीं ॥
सहज वयरु सब जीवन्ह त्यागा । गिरि पर सकल करहिं अनुरागा ॥
सोह सैल गिरिजा गृह आएँ । जिमि जनु रामभगतिके पाएँ ॥
नित नूतन मंगल गृह तासू । ब्रह्मादिक गांवहिं जसु जासू ॥
नारद समाचार सब पाए । कौतुकहीं गिरि गेह सिधाए ॥
सैलराज बड़ आदर कीन्हा । पद पखारि बर आसनु दीन्हा ॥
नारि सहित मुनि पद पिरु नाचा । चरन सलिल सबु भवनु सिंचावा
निज सौभाग्य बहुत गिरि बरना । सुता बालि मेली मुनि चरना ॥

दो०—त्रिकालग्य सर्वग्य तुम्ह गति सर्वत्र तुम्हारि ।

कहहु सुता के दोष गुन मुनिवर हृदयँ बिचारि ॥६६॥

कह मुनि बिहसि गूढ़ मृदु बानी । सुता तुम्हारि सकल गुन खानी ॥
 सुंदर सहज सुसील सयानी । नाम उमा अंबिका भवानी ॥
 सब लच्छन संपन्न कुमारी । होइहि संतत पियहि पिआरी ॥
 सदा अचल एहि कर अहिवाता । एहि तैं जसु पैहहि पितु माता ॥
 होइहि पूज्य सकल जग माहीं । एहि सेवत कछु दुर्लभ नाहीं ॥
 एहि कर नामु सुमिरि संसारा । त्रिय चढ़िहहि पतिव्रत असिंधारा
 सैल सुलच्छन सुता तुम्हारी । सुनहु जे अब अवगुन दुइ चारी
 अगुन अमान मातु पितु हीना । उदासीन सब संसय छीना ॥

दो०—जोगी जटिल अकाम मन नगन अमंगल बेष ।

अस स्वामी एहि कहँ मिलिहि परी हस्त असिरेख ॥६७॥

मुनि मुनि गिरा सत्य जियँ जानी । दुख दंपतिहि उमा हरषानी ॥
 नारदहूँ यह भेदु न जाना । दसा एक समुझब बिलगाना ॥
 सकल सखीं गिरिजा गिरिमैना । पुलक सरीर भरे जल नैना ॥
 होइ न मृषा देवरिषि भाषा । उमा सो बचनु हृदयँ धरि राखा
 उपजेउ सिव पद कमल सनेहू । मिलन कठिन मन भा संदेहू ॥
 जानि कुअवसर प्रीति दुराई । सखी उछँग बैठी पुनि जाई ॥
 शक्ति न होइ देवरिषि बानी । सोचहि दंपति सखीं सयानी ॥
 उर धरि धीर कहइ गिरिराज । कहहु नाथ का करिअ उपाज ॥

दो०—कह मुनीस हिमवंत सुनु जो बिधि लिखा लिलार ।

देव दनुज नर नाग मुनि कोउ न मेटनिहार ॥६८॥
तदपि एक मैं कहउँ उपाई । होइ करै जौं दैउ सहाई ॥
जस बरु मैं बरनेउँ तुम्ह पाहीं । मिलिहि उमहि तस संसय नाहीं ॥
जे जे धर के दोष बखाने । ते सब सिव पहिं मैं अनुमाने
जौं बिबाहु संकर सन होई । दोषउ गुन सम कह सबु कोई ॥
जौं अहि सेज सयन हरि करहीं । बुध कछु तिन्ह कर दोषु न धरहीं
भानु कृसानु सर्व रस खाहीं । तिन्ह कहँ मंद कहत कोउ नाहीं ॥
सुभ अरु असुभ सलिल सब बहई । सुरसरि कोउ अपुनीत न कहई ॥
समरथ कहँ नहिं दोषु गोसाई । रवि पावक सुरसरि की नाई ॥
दो०—जौं अस हिसिषा करहिं नर जब बिबेक अभिमान ।

परहिं कल्प भरि नरक महुँ जीव कि ईस समान ॥६९॥
सुरसरि जल कृत बारनि जाना । कबहुँ न संत करहिं तेहि पाना ॥
सुरसरि मिलें सो पावन जैसैं । ईस अनीसहि अंतरु तैसैं ॥
संभु सहज समरथ भगवाना । एहि बिबाहँ सब बिधि कल्याना ॥
दुराराध्य पै अहहिं महेसू । आसुतोष पुनि किऐँ कलेसू ॥
जौं तपु करै कुमारि तुम्हारी । भाविउ मेटि सकहिं त्रिपुरारी ॥
जद्यपि बर अनेक जग माहीं । एहि कहँ सिव तजि दूसर नाहीं ॥
बर दायक प्रनतारति भंजन । कृपासिंधु सेवक मन रंजन ॥
इच्छित फल बिनु सिव अवराध । लहिअ न कोटि जाग जप साध ॥

दो०—अस कहि नारद सुमिरि हरि गिरिजहि दीन्हि असीस ।

होइहि यह कल्यान अब संसय तजहु गिरीस ॥७०॥

कहि अस ब्रह्मभवन मुनि गयऊ । आगिल चरित सुनहु जस भयऊ
पतिहि एकांत पाइ कह मैना । नाथ न मैं समुझे मुनि बैना ॥
जौ घर घर कुलु होइ अनूपा । करिअ बिबाहु सुता अनुरूपा ॥
न त कन्या घर रहउ कुआरी । कंत उमा मम प्रानपिआरी ॥
जौ न मिलिहि घर गिरिजहि जोगू । गिरि जइ सहज कहिहि सबु लोगू
सोइ बिचारि पति करेहु बिबाहू । जेहि न बहोरि होइ उर दाहू ॥
अस कहि परी चरन धरि सीसा । बोले सहित सनेह गिरीसा ॥
घर पावक प्रगटै ससि माहीं । नारद बचनु अन्यथा नाहीं ॥

दो०—प्रिया सोचु परिहरहु सबु सुमिरहु श्रीभगवान ।

पारबतिहि निरमयउ जेहि सोइ करिहि कल्यान ॥७१॥

अब जौ तुम्हहि सुता पर नेहू । तौ अस जाइ सिखावनु देहू ॥
करै सो तपु जेहि मिलहिं महेसू । आन उपायँ न मिटिहि कलेसू
नारद बचन सगर्भ सहेतू । सुंदर सब गुन निधि वृषकेतू ॥
अस बिचारि तुम्ह तजहु असंका । सबहि भाँति संकर अकलंका ॥
सुनि पति बचन हरषि मन माहीं । गई तुरत उठि गिरिजा पाहीं ॥
उमहि बिलोकि नयन भरे बारी । सहित सनेह गोद बैठारी ॥
बारहि बार लेति उर लाई । गदगद कंठ न कछु कहि जाई ॥
जगत मातु सबंग्य भवानी । मातु सुखद बोलै मृदु बानी ॥

दो०—सुनहि मातु मैं दीख अस सपन सुनावउँ तोहि ।

सुंदर गौर सुबिप्रबर अस उपदेसेउ मोहि ॥७२॥
करहि जाइ तपु सैलकुमारी । नारद कहा सो सत्य विचारी ॥
मातु पितहि पुनि यह मत भावा । तपु सुख प्रद दुख दोष नसावा
तपबल रचइ प्रपंचु विधाता । तपबल विष्णु सकल जग त्राता ॥
तपबल संभु करहिं संघारा । तपबल सेषु धरइ महिभारा ॥
तप आधार सब सृष्टि भवानी । करहि जाइ तपु अस जियँ जानी ॥
सुनत बचन बिसमित महतारी । सपन सुनायउ गिरिहि हँकारी ॥
मातु पितहि बहुविधि समुझाई । चली उमा तप हित हरषाई ॥
प्रियं परिवार पिता अरु माता । भए बिकल मुख आव न बाता ॥

दो०—बेदसिरा सुनि आइ तब सबहि कहा समुझाइ ।

पारबती महिमा सुनत रहे प्रबोधहि पाइ ॥७३॥
उर धरि उमा प्रानपति चरना । जाइ विपिन लागीं तपु करना ॥
अति सुकुमार न तनु तप जोगू । पति पद सुमिरि तजेउ सबु भोगू ॥
नित नव चरन उपज अनुरागा । बिसरी देह तपहिं मनु लागा ॥
संबत सहस मूल फल खाए । सागु खाइ सत बरष गवाँए ॥
कछु दिन भोजनु बारि बतासा । किए कठिन कछु दिन उपबासा ॥
बेल पाती महि परइ सुखाई । तीनि सहस संबत सोइ खाई ॥
पुनि परिहरे सुखानेउ परना । उमहि नामु तब भयउ अपरना ॥
देखि उमहि तप खीन करीस । ब्रह्मसिरा मै गगन गभीरा ॥

दो०—भयउ मनोरथ सुफल तव सुनु गिरिराजकुमारि ।

परिहरु दुसह कलेस सब अब मिलिहहिं त्रिपुरारि ॥७४॥

अस तपु काहुँ न कीन्ह भवानी । भए अनेक धीर मुनि ग्यानी ॥
अब उर धरहु ब्रह्म बर बानी । सत्य सदा संतत सुचि जानी ॥
आवै पिता बोलावन जबहीं । हठ परिहरि घर जाएहु तबहीं ॥
मिलहिं तुम्हहि जब सप्त रिषीसा । जानेहु तब प्रमान बागीसा ॥
सुनत गिरा बिधि गगन बखानी । पुलक गात गिरिजा हरषानी ॥
उमा चरित सुंदर मैं गावा । सुनहु संभु कर चरित सुहावा ॥
जब तैं सती जाइ तनु त्यागा । तब तैं सिवमन भयउ बिरागा ॥
जपहिं सदा रघुनायक नामा । जहँ तहँ सुनहिं राम गुन ग्रामा ॥

दो०—चिदानंद सुखधाम सिव बिगत मोह मद काम ।

बिचरहिं महि धरि हृदयँ हरि सकल लोक अभिराम ॥७५॥

कतहुँ मुनिन्ह उपदेसहिं ग्याना । कतहुँ राम गुन करहिं बखाना ॥
जदपि अकाम तदपि भगवाना । भगत बिरह दुख दुखित सुजाना ॥
एहि बिधि गयउ कालु बहु वीती । नित नै होइ राम पद प्रीती ॥
नेमु प्रेमु संकर कर देखा । अविचल हृदयँ भगति कै रेखा ॥
प्रगटे रामु कृतग्य कृपाला । रूप सील निधि तेज बिसाला ॥
बहु प्रकार संकरहि सराहा । तुम्ह बिनु अस ब्रह्म को निरबाहा ॥
बहुबिधि राम सिवहि समुझावा । पारबती कर जन्म सुनावा ॥
अति पुनीत गिरिजा कै करनी । बिस्तर सहित कृपानिधि बरनी ॥

दो०—अब बिनती मम सुनहु सिव जौं मो पर निज नेहु ।

जाइ बिबाहहु सैलजहि यह मोहि मार्गे देहु ॥ ७६॥
 कह सिव जदपि उचित अस नाहीं । नाथ बचन पुनि मेटि न जाहीं॥
 सिर धरि आयसु करिअ तुम्हारा । परम धरमु यह नाथ हमारा ॥
 मातु पिता गुर प्रभु कै बानी । बिनहिं विचार करिअ सुभ जानी
 तुम्ह सब भाँति परम हितकारी । अग्या सिर पर नाथ तुम्हारी ॥
 प्रभु तोषेउ सुनि संकर बचना । भक्ति बिबेक धर्म जुतरचना ॥
 कह प्रभु हर तुम्हार पन रहेऊ । अब उर राखेहु जो हम कहेऊ ॥
 अंतरधान भए अस भाषी । संकर सोइ मूरति उर राखी ॥
 तबहिं सप्तरिषि सिव पहिं आए । बोले प्रभु अति बचन सुहाए ॥
 दो०—पारबती पहिं जाइ तुम्ह प्रेम परिच्छा लेहु ।

गिरिहि प्रेरि पठएहु भवन दूरि करेहु संदेहु ॥ ७७॥
 रिषिन्ह गौरि देखी तहँ कैसी । मूरतिमंत तपस्या जैसी ॥
 बोले मुनि सुनु सैलकुमारी । करहु कवन कारन तपु भारी ॥
 नेहि अवराधहु का तुम्ह चहहू । हम सन सत्य मरमु किन कहहू ॥
 कहत बचन मनु अति सकुचाई । हँसिहहु सुनि हमारि जइताई ॥
 मनु हठ परा न सुनइ सिखावा । चहत बारि पर भीति उठावा ॥
 नारद कहा सत्य सोइ जाना । विनु पंखन्ह हम चहहिं उड़ाना ॥
 देखहु मुनि अबिवेकु हमारा । चाहिअ सदा सिवहि भरतारा ॥
 दो०—सुनत बचन बिहसे रिषय गिरिसंभव तव देह ।

नारद कर उपदेशु सुनि कहहु बसेउ किसु गेह ॥ ७८॥

दच्छसुतन्ह उपदेसेन्हि जाई। तिन्ह फिरि भवनु न देखा आई॥
 चित्रकेतु कर घर उन घाला। कनककसिपु कर पुनि अस हाला
 नारद सिख जे सुनहिं नर नारी। अवसि होहिं तजि भवनु भिखारी
 मन कपटी तन सजन चीन्हा। आपु सरिस सबही चह कीन्हा॥
 तेहि कैं बचन मानि बिस्वासा। तुम्ह चाहहु पति सहज उदासा॥
 निर्गुन निलज कुबेष कपाली। अकुल अगेह दिगंबर व्याली॥
 कहहु कवन सुखु अस बरु पाँएँ। भल भूलिहु ठग के बौराएँ॥
 पंच कहैं सिवैं सती बिबाही। पुनि अवडेरि मराएन्हि ताही॥
 दो०—अब सुख सोवत सोचु नहिं भीख मागि भंव खाहिं।

सहज एकाकिन्ह के भवन कबहुँ कि नारि खटाहिं ॥७९॥

अजहूँ मानहु कहा हमारा। हम तुम्ह कहूँ बरु नीक बिचारा॥
 अति सुंदर सुचि सुखद सुसीला। गावहिं वेद जासु जस लीला॥
 दूषन रहित सकल गुन रासी। श्रीपति पुर बैकुंठ निवासी॥
 अस बरु तुम्हहि मिलाउव आनी। सुनत बिहसि कह बचन भवानी
 सत्य कहेहु गिरिभव तनु एहा। हठ न छूट छूटै बरु देहा॥
 कनकउ पुनि पषान तैं होई। जारेहुँ सहजु न परिहर सोई॥
 नारद बचन न मैं परिहरऊँ। बसउ भवनु उजरउ नहिं डरऊँ
 गुर कैं बचन प्रतीति न जेही। सपनेहुँ सुगम न सुख सिधि तेही॥

दो०—सहादेव अवगुन भवन बिप्नु सकल गुन धाम।

जेहि कर मनु रम जाहि सन तेहि तेही सन काम ॥८०॥

जौं तुम्ह मिलतेहु प्रथम मुनीसा । सुनतिउँ सिख तुम्हारि थरि सीसा
 अब मैं जन्मु संभु हित हारा । को गुन दूपन करै विचारा ॥
 जौं तुम्हरे हठ हृदयँ विसेषी । रहि न जाइ विनु किएँ बेरपी ॥
 तौ कौतुकिअन्ह आलसु नाहीं । वर कन्या अनेक जग माहीं ॥
 जन्म कोटि लगि रगर हमारी । वरउँ संभु न त रहउँ कुआरी ॥
 तजउँ न नारद कर उपदेसू । आपु कहहिँ सत बार नहेसू ॥
 मैं पा परउँ कहइ जगदंबा । तुम्ह गृह गवनहु भयउ विलंबा ॥
 देखि प्रेमु बोले मुनि ग्यानी । जय जय जगदंबिके भवानी ॥
 दो०—तुम्ह माया भगवान सिव सकल जगत पितु मातु ।

नाइ चरन सिर मुनि चले पुनि पुनि हरषत गातु ॥८९॥
 जाइ मुनिन्ह हिमवंतु पठाए । करि बिनती गिरजहिँ गृहल्याए ॥
 बहुरि सप्तरिषि सिव पहिँ जाई । कथा उमा कै सकल सुनाई ॥
 भए मगन सिव सुनत सनेहा । हरषि सप्तरिषि गवने रोहा ॥
 मनु थिर करि तव संभु सुजाना । लगे करन रघुनायक ध्याना ॥
 तारकु असुर भयउ तेहि काला । भुज प्रताप बल रोज बिसाला ॥
 तेहि सब लोक लोकपति जीते । भए देव सुख संपति रीते ॥
 अजर अमर सो जीति न जाई । हारे सुर करि विविध लराई ॥
 तब बिरंचि सन जाइ पुकारे । देखे बिधि सब देव दुखारे ॥

दो०—सब सन कहा बुझाइ बिधि दनुज निधन तब होइ ।

संभु सुक्र समूत सुत एहि जीतइ रन सोइ ॥९०॥

मोर कहा सुनि करहु उपाई। होइहि ईस्वर करिहि सहाई ॥
 सतीं जो तजी दच्छ मख देहा। जनमी जाइ हिमाचल गोहा ॥
 तेहिं तपु कीन्ह संभु पति लागी। सिव समाधि बैठे सबु त्यागी ॥
 जदपि अहइ असमंजस भारी। तदपि बात एक सुनहु हमारी ॥
 पठवहु कामु जाइ सिव पाहीं। करै छोभु संकर मन माहीं ॥
 तब हम जाइ सिवहि सिर नाई। करवाउब बिबाहु बरिआई ॥
 एहि बिधि भलेहि देवहित होई। मत अति नीक कहइ सबु कोई ॥
 अस्तुति सुरन्ह कीन्हि अति हेतू। प्रगटेउ विषमबान झपकेतू ॥
 दो०—सुरन्ह कही निज बिपति सब सुनि मन कीन्ह बिचार।

संभु बिरोध न कुसल मोहि बिहसि कहेंउ अस मार ॥८३॥

तदपि करब मैं काजु तुम्हारा। श्रुति कह परम धरम उपकारा ॥
 पर हित लागि तजइ जो देही। संतत संत प्रसंसहिं तेही ॥
 अस कहि चलेउ सबहि सिरु नाई। सुमन धनुष कर सहित सहाई ॥
 चलत मार अस हृदयँ बिचारा। सिव बिरोध ध्रुव मरनु हमारा ॥
 तब आपन प्रभाउ बिस्तारा। निज बस कीन्ह सकल संसारा ॥
 कोपेउ जबहिं बारिचरकेतू। छन महुँ मिटे सकल श्रुति सेतू ॥
 ब्रह्मचर्ज ब्रत संजम नाना। धीरज धरम ग्यान बिग्याना ॥
 सदाचार जप जोग बिरागा। समय बिबेक कटकु सबु भागा ॥

छं०—भागैउ बिबेकु सहाय सहित सो सुभट संजुग महि सुरे।

सदग्रथ पवत कदरन्हि महुँ जाइ तेहि अवसर दुरे ॥

होनिहार का करतार को रखवार जग खरभर परा ।

दुइ माथ केहि रतिनाथ जेहि कहूँ कोपि कर धनु सरु धरा॥

दो०—जे सजीव जग अचर चर नारि पुरुष अस नाम ।

ते निज निज मरजाद तजि भए सकल बस काम ॥८४॥

सब के हृदयँ मदन अभिलाषा । लता निहारि नवहिँ तरु साखा ॥

नदीं उमगि अंबुधि कहूँ धाई । संगम करहिँ तलाव तलाई ॥

जहँ असि दसा जइन्ह कै बरनी । को कहि सकइ सचेतन करनी ॥

पसु पच्छी नभ जल थलचारी । भए कामबस समय बिसारी ॥

मदन अंध व्याकुल सब लोका । निसि दिनु नहिँ अवलोकहिँ कोका

देव दनुज नर किंनर ब्याला । प्रेत पिशाच भूत बेताला ॥

इन्ह कै दसा न कहेउँ बखानी । सदा काम के चेरे जानी ॥

सिद्ध बिरक्त महामुनि जोगी । तेपि कामबस भए बियोगी ॥

छं०—भए कामबस जोगीस तापस पावँरन्हि की को कहै ।

देखहिँ चराचर नारिमय जे ब्रह्ममय देखत रहे ॥

अबला बिलोकहिँ पुरुषमय जगु पुरुष सब अबलामयं ।

दुइ दंड भरि ब्रह्मांड भीतर कामकृत कौतुक अयं ॥

सो०—धरी न काहूँ धीर सब के मन मनसिज हरे ।

जे राखे रघुबीर ते उबरे तेहि काल महुँ ॥८५॥

उभय धरी अस कौतुक भयउ । जौ लगि काम संभु पहिँ गयउ ॥

सिवहि बिलोकि ससंकेउ मारु । भयउ जयायति सब संसारु ॥

भए तुरत सब जीव सुखारे । जिमि मद उत्तरि गएँ मतवारे ॥
 रुद्रहि देखि मदन भय माना । दुराधरष दुर्गम भगवाना ॥
 फिरत लाज कछु करि नहिं जाई । मरनु ठानि मन रचेसि उपाई ॥
 प्रगटेसि तुरत रुचिर रितुराजा । कुसुमित नव तरु राजि बिराजा ॥
 बन उपवन बापिका तड़ागा । परम सुभग सब दिसा विभागा ॥
 जहँ तहँ जनु उमगत अनुरागा । देखि मुएहुँ मन मनसिज जागा ॥
 छं०—जागइ मनोभव मुएहुँ मन बन सुभगता न परै कही ।

सीतल सुगंध सुमंद मारुत मदन अनल सखा सही ॥

बिकसे सरन्हि बहु कंज गुंजत पुंज मंजुल मधुकरा ।

कलहंस पिक सुक सरस रव करि गान नाचहि अपछरा ॥

दो०—सकल कला करि कोटि बिधि हारेउ सेन समेत ।

चली न अचल समाधि सिव कोपेउ हृदयनिकेत ॥८६॥

देखि रसाल बिटप बर साखा । तेहि पर चढ़ेउ मदनु मन माखा

सुमन चाप निज सर संधाने । अति रिस ताकिं श्रवन लगि ताने

छाड़े बिषम बिसिख उर लागे । छूटि समाधि संभु तब जागे ॥

भयउ ईस मन छोभु बिसेषी । नयन उधारि सकल दिसि देखी ॥

सौरभ पल्लव मदनु बिलोका । भयउ कोपु कंपेउ त्रैलोका ॥

तब सिव तीसर नयन उधारा । चितवत कामु भयउ जरि छारा ॥

हाहाकार भयउ जग भारी । डरपे सुर भए असुर सुखारी ॥

समुझि कामसुखु सोचहि भोगी । भए अकटक साधक जीगी ॥

छं०—जोगी अकंटक भए पति गति सुनत रति मुरुछित भई ।
रोदति बदति बहु भाँति करुना करति संकर पहि गई ॥
अति प्रेम करि बिनती बिबिध बिधि जोरि कर सन्मुख रही
प्रभु आसुतोष कृपाल सिव अबला निरखि बोले सही ॥

दो०—अब तैं रति तव नाथ कर होइहि नासु अनंगु ।

बिनु बपु व्यापिहि सबहि पुनि सुनु निज मिलन प्रसंगु ॥ ८७ ॥
जब जदुबंस कृष्ण अवतारा । होइहि हरन महा महिभारा ॥
कृष्ण तनय होइहि पति तोरा । बचनु अन्यथा होइ न मोरा ॥
रति गवनी सुनि संकर धानी । कथा अपर अब कहउँ बखानी ॥
देवन्ह समाचार सब पाए । ब्रह्मादिक बैकुण्ठ सिधाए ॥
सब सुर बिष्णु बिरंचि समेता । गए जहाँ सिव कृपानिकेता ॥
पृथक पृथक तिन्ह कीन्हि प्रसंसा । भए प्रसन्न चंद्र अवतंसा ॥
बोले कृपासिंधु वृषकेतू । कहहु अमर आए केहि हेतू ॥
कह बिधि तुम्ह प्रभु अंतरजामी । तदपि भगति बस बिनवउँ स्वामी ॥
दो०—सकल सुरन्ह के हृदयँ अस संकर परम उछाहु ।

निज नयनन्हि देखा चहाँहि नाथ तुम्हार बिबाहु ॥ ८८ ॥
यह उत्सव देखिअ भरि लोचन ' सोइ कछु करहु मदन मद मोचन
कामु जारि रति कहूँ बर दीन्हा । कृपासिंधु यह अति भल कीन्हा ॥
सासति करि पुनि कराहैं पसाऊ । नाथ प्रभुन्ह कर सहज सुभाऊ ॥
पारबती तपु कीन्ह अपारा । करहु तासु अब अंगीकारा ॥

मुनि बिधि बिनय समुझि प्रभु बानी । ऐसेइ होउ कहा सुखु मानी ॥
 तब देवन्ह दुंदुभीं बजाई । बरषि सुमन जय जय सुर साई ॥
 अवसर जानि सतरिषि आए । तुरतहिं बिधि गिरिभवन पठाए
 प्रथम गए जहँ रहीं भवानी । बोले मधुर बचन छल सानी ॥
 दो०—कहा हमार न सुनेहु तब नारद कें उपदेस ।

अब भा झूठ तुम्हार पन जारेउ कामु महेस ॥८९॥

मासपारायण, तीसरा विश्राम

मुनि बोलीं मुसुकाइ भवानी । उचित कहेहु मुनिबर बिग्यानी ॥
 तुम्हरें जान कामु अब जारा । अब लगि संभु रहेसविकारा ॥
 हमरें जान सदा सिव जोगी । अज अनवद्य अकाम अभोगी ॥
 जौ मैं सिव सेये अस जानी । प्रीति समेत कर्म मन बानी ॥
 तौ हमार पन सुनहु मुनीसा । करिहहिं सत्य कृपानिधि ईसा ॥
 तुम्ह जो कहा हर जारेउ मारा । सोइ अति बड़ अबिबेकु तुम्हारा
 तात अनल कर सहज सुभाऊ । हिम तेहि निकट जाइ नहिं काऊ
 गएँ समीप सो अवसि नसाई । असि मन्मथ महेस की नाई ॥
 दो०—हियँ हरषे मुनि बचन सुनि देखि प्रीति बिस्वास ।

चले भवानिहि नाइ सिर गए हिमाचल पास ॥९०॥

सबु प्रसंगु गिरिपतिहि सुनावा । मदन दहन सुनि अति दुखु पावा
 बहुरि कहेउ रति कर बरदाना । सुनि हिमवंत बहुत सुखु माना ॥
 हृदयँ बिचारि संभु प्रभुताई । सादर मुनिबर लिए बोलाई ॥

सुदिनु सुनखतु सुघरी सोचाई । बेगि बेदविधि लगन धराई ॥
पत्री सप्तरिषिन्ह सोइ दीन्ही । गहि पद विनय हिमाचल कीन्ही
जाइ विधिहि तिन्ह दीन्ही सो पाती । वाचत प्रीति न हृदयँ समाती
लगन वाचि अज सबहि सुनाई । हरषे मुनि सब सुर समुदाई ॥
सुमन वृष्टि नभ बाजन बाजे । मंगल कलस दसहुँ दिसि साजे ॥
दो०—लगे सँवारन सकल सुर बाहन बिबिध विमान ।

होहिं सगुन मंगल सुभद करहिं अपहरा गान ॥९१॥

सिवहि संभुगन करहिं सिंगारा । जटा मुकुट अहि मौरु सँवारा ॥
कुंडल कंकन पहिरे ब्याला । तन विभूति पट केहरि छाला ॥
ससि ललाट सुंदर सिर गंगा । नयन तीनि उपनीत मुजंगा ॥
गरल कंठ उर नर सिर माला । असिव बेष सिवधाम कृपाला ॥
कर त्रिसूल अरु डमरु विराजा । चले बसहँ चढ़ि बाजहिं बाजा ॥
देखि सिवहि सुरत्रिय मुसुकाहीं । बर लायक दुलहिनि जग नाहीं ॥
बिष्णु विरंचि आदि सुरब्राता । चढ़ि चढ़ि बाहन चले बराता ॥
सुर समाज सब भाँति अनूपा । नहिं बरात दूलह अनुरूपा ॥
दो०—बिष्णु कहा अस बिहसि तब बोलि सकल दिसिराज ।

बिलग बिलग होइ चलहु सब निज निज सहित समाज ९२

बर अनुहारि बरात न भाई । हँसी करैहहु पर पुर जाई ॥

बिष्णु बचन सुनि सुर मुसुकाने । निज निज सेन सहित बिलगाने ॥

मनहा मन महेसु मुसुकाहीं । हरि के सिंग बचन नहिं जाई ॥

अति प्रिय बचन सुनत प्रिय केरे । भृंगिहि प्रेरि सकल गन टेरे ॥
 सिव अनुसासन सुनि सब आए । प्रभु पद जलज सीस तिन्ह नाए ॥
 नाना बाहन नाना वेषा । बिहसे सिव समाज निज देखा ॥
 कोउ मुखहीन बिपुल मुख काहू । विनु पद कर कोउ बहु पद बाहू
 बिपुल नयन कोउ नयन बिहीना । रिष्टपुष्ट कोउ अति तन खीना ॥
 छं०—तन खीन कोउ अति पीन पावन कोउ अपावन गति धरें ।

भूषन कराल कपाल कर सब सद्य सोनित तन भरें ॥
 खर स्वान सुअर सकाल मुख गन वेष अगनित को गनै ।
 बहु जिनस प्रेत पिसाच जोगि जमात बरनत नहि बनै ॥

सो०—नाचहि गावहि गीत परम तरंगी भूत सब ।

देखत अति बिपरीत बोलहि बचन बिचित्र बिधि ॥९३॥

जस दूलहु तसि बनी बराता । कौतुक विविध होहि मग जाता ॥
 इहाँ हिमाचल रचेउ बिताना । अति विचित्र नहि जाइ बखाना
 सैल सकल जहँ लगि जग माहीं । लघु बिसाल नहि बरनि सिराहीं ॥
 बन सागर सब नदीं तलावा । हिमगिरि सब कहूँ नेवत पठावा
 कामरूप सुंदर तन धारी । सहित समाज सहित बर नारी ॥
 गए सकल तुहिनाचल गेहा । गावहि मंगल सहित सनेहा ॥
 प्रथनहि गिरि बहु गृह सँवराए । जथाजोगु तहँ तहँ सब छाए ॥
 पुर सोभा अवलोकि सुहाई । लागइ लघु विरंचि निपुनाई ॥

छं०—लघु लाग बिधि को निपुनता अवलोकि पुर सोभा सही ।

बन बाग कूप तड़ाग सरिता सुभग सब सक को कही ॥

मंगल बिपुल तोरन पताका केतु गृह गृह सोहहीं ।
बनिता पुरुष सुंदर चतुर छवि देखि मुनि मन मोहहीं ॥
दो०—जगदंबा जहँ अवतरी सो पुरु बरनि कि जाइ ।

रिद्धि सिद्धि संपत्ति सुख नित नूतन अधिकाइ ॥९४॥

नगर निकट बरात मुनि आई । पुर खरभरु सोभा अधिकाई ॥
करि बनाव सजि बाहन नाना । चले लेन सादर अगवाना ॥
हियँ हरषे सुर सेन निहारी । हरिहि देखि अति भए सुखारी ॥
सिव समाज जब देखन लागे । बिडरि चले बाहन सब भागे ॥
धरि धीरजु तहँ रहे सयाने । बालक सब लै जीव पराने ॥
गएँ भवन पूछहिं पितु माता । कहहिं बचन भय कंपित गाता ॥
कहिअ काह कहि जाइ न बाता । जम कर धार किधौ बरिआता ॥
बरु बौराह बसहँ असवारा । ब्याल कपाल विभूषन छारा ॥

छं०—तन छार ब्याल कपाल भूषन नगन जटिल भयंकरा ।

सँग भूत प्रेत पिसाच जोगिनि बिकट मुख रजनीचरा ॥

जो जिअत रहिहि बरात देखत पुन्य बड़ तेहि कर सही ।

देखिहि सो उमा बिबाहु घर घर बात असि लरिकन्ह कही ॥

दो०—समुझि महेस समाज सब जननि जनक मुसुकाहिं ।

बाल बुझाए बिबिध बिधि निडर होहु डर नाहिं ॥९५॥

लै अगवान बरातहि आए । दिए सबहि जनवास सुहाए ॥

मैंना सुम आरती सैवारी संग सुमंगल गावहिं चारी ॥

कंचन थार सोह बर पानी। परिछन चली हरहि हरषानी॥
 विकट वेष रुद्रहि जब देखा। अबलन्ह उरभयभयउ विसेषा॥
 मागि भवन पैठीं अति त्रासा। गए महेसु जहाँ जनवासा॥
 मैना हृदयँ भयउ दुखु भारी। लीन्ही बोलि गिरीसकुमारी॥
 अधिक सनेहँ गोद बैठारी। स्याम सरोज नयन भरे बारी॥
 जेहिंविधि तुम्हहिरूपु अस दीन्हा। तेहिं जड़ वरु बाउर कस कीन्हा

छं०—कस कीन्हा वरु बौराह विधि जेहिं तुम्हहि सुंदरता दई।
 जो फलु चाहिअ सुरतरुहिं सो बरवस बबूरहिं लागई॥
 तुम्ह सहित गिरि तँ गिरौं पावक जरौं जलनिधि महुँ परौं।
 घर जाउ अपजसु होउ जग जीवत बिबाहु न हौं करौं॥

दो०—भई बिकल अबला सकल दुखित देखि गिरिनारि।

करि बिलापु रोदति बदति सुता सनेहु सँभारि॥९६॥

नारद कर मैं काह बिगारा। भवनु मोर जिन्ह बसत उजारा॥
 अस उपदेसु उमहि जिन्ह दीन्हा। बौरे बरहि लागि तपु कीन्हा॥
 साचेहुँ उन्ह कै मोह न माया। उदासीन धनु धामु न जाया॥
 पर घर घालक लाज न भीरा। बाँझ कि जान प्रसव कै पीरा॥
 जननिहि बिकल बिलोकि भवानी। बोली जुत बिबेक मृदु बानी॥
 अस बिचारि सोचहि मति माता। सो न टरइ जो रचइ बिधाता॥
 करम लिखा जौ बाउर नाहु। तौ कत दोसु लगाइअ काहु॥
 तुम्ह सन मिटहि कि विधि के अका। मातु व्यर्थ जनि लहु कलका॥

छं०—जनि लेहु मातु कलंकु करुना परिहरहु अवसर नहीं ।
दुखु सुखु जो लिखा लिलार हमरें जाब जहँ पाउब तहीं ॥
सुनि उमा बचन बिनीत कोमल सकल अबला सोचहीं ।
बहु भाँति बिधिहि लगाइ दूषन नयन बारि बिमोचहीं ॥

दो०—तेहि अवसर नारद सहित अरु रिषि सप्त समेत ।
समाचार सुनि तुहिनगिरि गवने तुरत निकेत ॥९७॥

तब नारद सबही समुझावा । पूरुष कथाप्रसंगु सुनावा ॥
मयना सत्य सुनहु मम बानी । जगदंबा तव सुता भवानी ॥
अजा अनादि सक्ति अविनासिनि । सदा संभु अरधंग निवासिनि ॥
जग संभव पालन लय कारिनि । निज इच्छा लीला बपु धारिनि ॥
जनमीं प्रथम दच्छ गृह जाई । नामु सती सुंदर तनु पाई ॥
तहँहुँ सती संकरहि बिवाहीं । कथा प्रसिद्ध सकल जग माहीं ॥
एक बार आवत सिव संग । देखेउ रघुकुल कमल पतंगा ॥
भयउ मोहु सिव कहा न कीन्हा । भ्रम बस बेषु सीय कर लीन्हा ॥

छं०—सिय बेषु सतीं जो कीन्हा तेहि अपराध संकर परिहरीं ।
हर बिरहँ जाइ बहोरि पितु कें जग्य जोगानल जरीं ॥
अब जनमि तुम्हरे भवन निज पति लागि दारुन तपु किया ।
अस जानि संसय तजहु गिरिजा सर्वदा संकर प्रिया ॥

दो०—सुनि नारद के बचन तब सब कर मिटा बिषाद ।

छन महु व्यापेउ सकल दुर धर धर यह संवाद ॥९८॥

तब मयना हिमवंतु अनंदे। पुनि पुनि पारवती पद बंदे ॥
 नारि पुरुष सिसु जुवा सयाने। नगर लोग सब अति हरपाने ॥
 लो होन पुर मंगलगाना। सजे सबहिं हाटक घट नाना ॥
 भाँति अनेक भई जेवनारा। सूपसास्त्र जस कछु व्यवहारा ॥
 सो जेवनार कि जाइ बखानी। बसहिं भवन जेहिं मातु भवानी ॥
 सादर बोले सकल बराती। विष्णु विरंचि देव सब जाती ॥
 विविधि पाँति बैठी जेवनारा। लागे परसन निपुन सुआरा ॥
 नारिवृंद सुर जेवँत जानी। लगिँ देन गारिँ मृदु बानी ॥

छं०—गारिँ मधुर स्वर देहिं सुंदरि विंग्य बचन सुनावहीँ ।
 भोजनु करहिं सुर अति बिलंबु बिनोदु सुनिसचु पावहीँ ॥
 जेदँत जो बढ्यो अनंदु सो सुख कोटिहूँ न प' कह्यो ।
 अचवाँइ दीन्हे पान गवने बास जहँ जाको रह्यो ॥

दो०—बहुरि मुनिन्ह हिमवंत कहुँ लगन सुनाई आइ ।

समय बिलोकि बिबाह कर पठए देव बोलाइ ॥९९॥

बोलि सकल सुर सादर लीन्हे। सबहि जथोचित आसन दीन्हे ॥
 बेदी बेद विधान सँवारी। सुभग सुमंगल गावहिं नारी ॥
 सिंघासनु अति दिव्य सुहावा। जाइ न बरनि विरंचि बनावा ॥
 बैठे सिव विप्रन्ह सिरु नाई। हृदयँ सुमिरि निज प्रभु रघुराई ॥
 बहुरि मुनीसन्ह उमा बोलाई। करि सिंगारु सखीँ लै आई ॥

देखत रूप सकल सुर मोह। बरनै छवि अस जग कवि को है ॥

जगदंबिका जानि भव भामा । सुरन्ह मनहिं मन कीन्ह प्रनामा ॥
सुंदरता मरजाद भवानी । जाइ न कोटिहुँ बदन बखानी ॥

छं०—कोटिहुँ बदन नहिं बनै बरनत जग जननि सोभा महा ।
सकुचहिं कहत श्रुति सेष सारद मंदमति तुलसी कहा ॥
छबिखानि मातु भवानि गवनीं मध्य मंडप सिव जहाँ ।
अवलोकिसकहिं न सकुच पति पद कमल मनु मधुकरुतहाँ

दो०—मुनि अनुसासन गनपतिहि पूजेउ संभु भवानि ।

कोउ सुनि संसय करै जनि सुर अनादि जियँ जानि ॥१००॥

जसि बिवाह कैविधि श्रुति गाई । महामुनिन्ह सो सब करवाई ॥
गहि गिरीस कुस कन्या पानी । भवहि समरणीं जानि भवानी ॥
पानिग्रहन जव कीन्ह महेसा । हियँ हरषे तब सकल सुरेसा ॥
वेदमंत्र मुनिवर उच्चरहीं । जय जय जय संकर सुर करहीं ॥
बाजहिं बाजन विविध बिधाना । सुमन वृष्टि नभ भै बिधि नाना ॥
हर गिरिजा कर भयउ बिबाहू । सकल भुवन भरि रहा उछाहू ॥
दासीं दास तुरग रथ नागा । धेनु बसन मनि बस्तु बिभागा ॥
अन्न कनकभाजन भरि जाना । दाइज दीन्ह न जाइ बखाना ॥

छं०—दाइज दियो बहु भाँति पुनि कर जोरि हिमभूधर कह्यो ।

का देउँ पूरनकाम संकर चरन पंकज गहि रह्यो ॥

सिव कृपासागर ससुर कर संतोषु सब भाँतिहि कियो ।

पुनि गह पद पाथोज मयनी प्रेम परिपूरन हियो ॥

दो०—नाथ उमा मम प्रान सम गृहकिंकरी करेहु ।

छमेहु सकल अपराध अब होइ प्रसन्न बरु देहु ॥१०१॥

बहु विधि संभु सासु समुझाई । गवनी भवन चरन सिरु नाई ॥
जननीं उमा बोलि तब लीन्ही । लै उछंग सुंदर सिख दीन्ही ॥
करेहु सदा संकर पद पूजा । नारि धरमु पति देउ न दूजा ॥
बचन कहत भरे लोचन बारी । बहुरि लाइ उर लीन्हि कुमारी ॥
कत विधि सृजिं नारि जग माहीं । पराधीन सपनेहुँ सुखु नाहीं ॥
भै अति प्रेम बिकल महतारी । धीरजु कीन्ह कुसमय बिचारी ॥
पुनि पुनि मिलति परति गहि चरना । परम प्रेमु कछु जाइ न बरना ॥
सब नारिन्ह मिलि भेटि भवानी । जाइ जननि उर पुनिलपटानी ॥

छं०—जननिहि बहुरि मिलि चली उचित असीस सब काहूँ दई ।

फिरि फिरि बिलोकति मातु तन तब सखीं लै सिव पहिँ गई ॥

जाचक सकल संतोषि संकरु उमा सहित भवन चले ।

सब अमर हरवे सुमन बरषि निसान नभ बाजे भले ॥

दो०—चले संग हिमवंतु तब पहुँचावन अति हेतु ।

बिबिध भाँति परितोषु करि बिदा कीन्ह वृषकेतु ॥१०२॥

तुरत भवन आए गिरिराई । सकल सैल सर लिए बोलाई ॥

आदर दान विनय बहुमाना । सब कर बिदा कीन्ह हिमवाना ॥

जबहिं संभु कैलासहिं आए । सुर सब निज निज लोक सिधाए ॥

जगत मातु पितु संभु भवानी । सहिँ सिपाह सब कहँ प्रसानी ॥

करहिं विविध विधि भोग विलासा । गनन्ह समेत बसहिं कैलासा ॥
हर गिरिजा बिहार नित नयऊ । एहि विधि विपुल काल चलि गयऊ
तब जनमेउ षट्बदन कुमारा । तारकु असुर समर जेहि मारा ॥
आगम निगम प्रसिद्ध पुराना । षन्मुख जन्मु सकल जग जाना ॥

छं०—जगु जान षन्मुख जन्मु कसुं प्रतापु पुरुषारथु महा ।
तेहि हेतु मैं वृषकेतु सुत कर चरित संछेपहिं कहा ॥
यह उमा संभु बिबाहु जे नर नारि कहहिं जे गावहीं ।
कल्याण काज बिबाह मंगल सर्वदा सुखु पावहीं ॥

दो०—चरित सिंधु गिरिजा रमन बेद न पावहिं पारु ।

बरनै तुलसीदासु किमि अति मतिमंद गवाँरु ॥१०३॥

संभु चरित सुनि सरस सुहावा । भरद्वाज मुनि अति सुखु पावा ॥
बहु लालसा कथा पर घाढ़ी । नयनन्हि नीर रोमावलि ठाढ़ी ॥
प्रेम बिबस मुख आव नवानी । दसा देखि हरषे मुनि ग्यानी ॥
अहो धन्य तव जन्मु मुनीसा । तुम्हहि प्रान सम प्रिय गौरीसा ॥
सिव पद कमल जिन्हहि रति नार्हीं । रामहि ते सपनेहुँ न सोहार्हीं ॥
बिनु छल बिस्वनाथ पद नेहू । राम भगत कर लच्छन एहू ॥
सिव सम को रघुपति व्रतधारी । बिनु अघतजी सती असिनारी ॥
पनु करि रघुपति भगति देखाई । को सिव सम रामहि प्रिय भाई ॥

दो०—प्रथमहिं मैं कहि सिव चरित बूझा मरमु तुम्हार ।

सुचि सेवक तुम्ह राम के रहित समस्त विकार ॥१०४॥

मैं जाना तुम्हार गुन सीला । कहउँ सुनहु अब रघुपति लीला ॥
 सुनु मुनि आजु समागम तोरें । कहि न जाइ जस सुखु मन मोरें ॥
 राम चरित अति अमित मुनीसा । कहि न सकहिं सत कोटि अहीसा ॥
 तदपि जथाश्रुत कहउँ बखानी । सुमिरि गिरापति प्रभु धनुपानी ॥
 सारद दारुनारि सम स्वामी । रामु सूत्रधर अंतरजामी ॥
 जेहिपर कृपा करहिं जनु जानी । कबि उर अजिर नचावहिं बानी ॥
 प्रनवउँ सोइ कृपाल रघुनाथा । बरनउँ विसद तासु गुन गाथा ॥
 परम रम्य गिरिवरु कैलासू । सदा जहाँ सिव उमा निवासू ॥
 दो०—सिद्ध तपोधन जोगिजन सुर किंनर मुनिबृंद ।

बसहिं तहाँ सुकृती सकल सेवहिं सिव सुखकंद ॥१०५॥

हरिहर विमुख धर्म रति नाहीं । ते नर तहँ सपनेहुँ नहिं जाहीं ॥
 तेहि गिरि पर बट बिटप बिसाला । नित नूतन सुंदर सब काला ॥
 त्रिविध समीर सुसीतलि छाया । सिव विश्राम बिटप श्रुति गाया ॥
 एक बार तेहि तर प्रभु गयऊ । तरु बिलोकि उर अति सुखु भयऊ ॥
 निज कर डसि नागरिपु छाला । बैठे सहजहिं संभु कृपाला ॥
 कुंद इंदु दर गौर सरीरा । भुज प्रलंब परिधन मुनिचीरा ॥
 तरुन अरुन अंबुज सम चरना । नख दुति भगत हृदय तम हरना ॥
 भुजग भूति भूषन त्रिपुरारी । आननु सरद चंद छवि हारी ॥

दो०—जटा मुकुट सुरसरित सिर लोचन नलिन बिसाल ।

बीजकंद लावच्यनिधि सोइ बालबिधु भाल ॥१०६॥

बैठे सोह कामरिपु कैसैं । धरें सरीर सांतरसु जैसैं ॥
 पारवती भल अवसर जानी । गई संभु पहिं मातु भवानी ॥
 जानि प्रिया आदर अति कीन्हा । वाम भाग आसनु हर दीन्हा ॥
 बैठौ सिव समीप हरषाई । पूरुव जन्म कथा चित आई ॥
 पति हियँ हेतु अधिक अनुमानी । बिहसि उमा बोली प्रियवानी ॥
 कथा जो सकल लोक हितकारी । सोइ पूछन चह सैलकुमारी ॥
 बिस्वनाथ मम नाथ पुरारी । त्रिभुवन महिमा बिदित तुम्हारी ॥
 चर अरु अचर नाग नर देवा । सकल करहिं पद पंकज सेवा ॥

दो०—प्रभु समरथ सर्वग्य सिव सकल कला गुन धाम ।

जोग ग्यान बैराग्य निधि प्रनत कलपतरु नाम ॥१०७॥

जौ मो पर प्रसन्न सुखरासी । जानिअ सत्य मोहि निज दासी ॥
 तौ प्रभु हरहु मोर अग्याना । कहि रघुनाथ कथा विधि नाना ॥
 जासु भवनु सुरतरु तर होई । सहि कि दरिद्र जनित दुखु सोई ॥
 ससि भूषन अस हृदयँ विचारी । हरहु नाथ मम मति भ्रम भारी ॥
 प्रभु जे मुनि परमारथवादी । कहहिं राम कहँ ब्रह्म अनादी ॥
 सेस सारदा बेद पुराना । सकल करहिं रघुपति गुन गाना ॥
 तुम्ह पुनि राम राम दिन राती । सादर जपहु अँग आराती ॥
 रामु सो अवध नृपति सुत सोई । की अज अगुन अलख गति कोई ॥

दो०—जौ नृप तनय त ब्रह्म किमि नारि बिरहँ मति भोरि ।

दाखि चरित महिमा सुनत अपमति बुद्धि अति भोरि ॥१०८॥

जौं अनीह ब्यापक बिभु कोऊ । कहहु बुझाइ नाथ मोहि सोऊ ॥
 अग्य जानि रिस उर जनि धरहु । जेहि बिधि मोह मिटै सोइ करहु ॥
 मैं बन दीखि राम प्रभुताई । अति भय विकल न तुम्हहि सुनाई
 तदपि मलिन मन बोधु न आवा । सो फलु भली भाँति हम पावा ॥
 अजहूँ कछु संसउ मन मोरें । करहु कृपा बिनवउँ कर जोरें ॥
 प्रभु तब मोहि बहु भाँति प्रबोधा । नाथ सो समुझि करहु जनि क्रोधा
 तब कर अस विमोह अब नाहीं । रामकथा पर रुचि मन माहीं ॥
 कहहु पुनीत राम गुन गाथा । भुजगराज भूषन सुरनाथा ॥
 दो०—बंदउँ पद धरि धरनि सिरु बिनय करउँ कर जोरि ।

बरनहु रघुबर बिसद जसु श्रुति सिद्धांत निचोरि ॥१०९॥

जदपि जोषिता नहिं अधिकारी । दासी मन क्रम वचन तुम्हारी ॥
 गूढ़उ तत्त्व न साधु दुरावहिं । आरत अधिकारी जहँ पावहिं ॥
 अति आरति पूछउँ सुरराया । रघुपति कथा कहहु करि दाया ॥
 प्रथम सो कारन कहहु बिचारी । निर्गुन ब्रह्म सगुन वपु धारी ॥
 पुनि प्रभु कहहु राम अघतारा । बालचरित पुनि कहहु उदारा ॥
 कहहु जथा जानकी बिवाहीं । राज तजा सो दूषन काहीं ॥
 बन बसि कीन्हे चरित अपारा । कहहु नाथ जिमि रावन मारा ॥
 राज बैठि कीन्हीं बहु लीला । सकल कहहु संकर सुखसीला ॥

दो०—बहुरि कहहु करुनायतन कीन्ह जो अचरज राम ।

प्रजा सहित रघुबंसमनि किमि भवने जिय धाम ॥११०॥

पुनि प्रभु कहहु सो तत्त्व बखानी । जेहि विग्यान मगन मुनि ग्यानी ॥
 भगति ग्यान विग्यान विरागा । पुनि सब बरनहु सहित विभागा ॥
 औरउ राम रहस्य अनेका । कहहु नाथ अति विमल बिबेका ॥
 जो प्रभु मैं पूछा नहिं होई । सोउ दयाल राखहु जनि गोई ॥
 तुम्ह त्रिभुवन गुर बेद बखाना । आन जीव पाँवर का जाना ॥
 प्रह्ल उमा कै सहज सुहाई । छल विहीन सुनि सिव मन भाई ॥
 हर हियँ रामचरित सब आए । प्रेम पुलक लोचन जल छाए ॥
 श्रीरघुनाथ रूप उर आवा । परमानंद अमित सुख पावा ॥
 दो०—मगन ध्यानरस दंड जुग पुनि मन बाहेर कीन्ह ।

रघुपति चरित महेस तब हरषित बरनै लीन्ह ॥१११॥

झूठेउ सत्य जाहि बिनु जानें । जिमि भुजंग बिनु रजु पहिचानें ॥
 जेहि जानें जग जाइ हेराई । जागें जथा सपन भ्रम जाई ॥
 बंदउँ बालरूप सोइ रामू । सब सिधि सुलभ जपत जिसु नामू ॥
 मंगल भवन अमंगल हारी । द्रवउ सोदसरथ अजिर बिहारी ॥
 करि प्रनाम रामहि त्रिपुरारी । हरषि सुधा सम गिरा उचारी ॥
 धन्य धन्य गिरिराजकुमारी । तुम्ह समान नहिं कोउ उपकारी ॥
 पूँछेहु रघुपति कथा प्रसंगा । सकल लोक जग पावनि गंगा ॥
 तुम्ह रघुबीर चरन अनुरागी । कीन्हिहु प्रह्ल जगत हित लागी ॥

दो०—राम कृपा तें पारबति सपनेहुँ तव मन माहिं ।

तदपि असंका कीन्हिहु सोई । कहत सुनत सब कर हित होई ॥
 जिन्ह हरिकथा सुनी नहिं काना । श्रवन रंघ्र अहिभवन समाना ॥
 नयनन्हि संत दरस नहिं देखा । लोचन मोरपंख कर लेखा ॥
 ते सिर कटु तुंवारि समतूला । जेन नमत हरि गुर पद मूला ॥
 जिन्ह हरिभगति हृदयँ नहिं आनी । जीवत सब समान तेइ प्रानी ॥
 जो नहिं करइ राम गुन गाना । जीह सो दादुर जीह समाना ॥
 कुलिस कठोर निदुर सोइ छाती । सुनि हरि चरित न जो हरषाती ॥
 गिरिजा सुनहु राम कै लीला । सुर हित दनुज विमोहनसीला ॥
 दो०—रामकथा सुरधेनु सम सेवत सब सुख दानि ।

सतसमाज सुरलोक सब को न सुनै अस जानि ॥ ११३ ॥

रामकथा सुंदर कर तारी । संसय विहग उड़ावनिहारी ॥
 रामकथा कलि बिटप कुठारी । सादर सुनु गिरिराजकुमारी ॥
 राम नाम गुन चरित सुहाए । जनम करम अगनित श्रुति गाए ॥
 जथा अनंत राम भगवाना । तथा कथा कीरति गुन नाना ॥
 तदपि जथा श्रुत जसि मति मोरी । कहिहउँ देखि प्रीति अति तोरी ॥
 उमा प्रलज तव सहज सुहाई । सुखद संतसंमत मोहि भाई ॥
 एक बात नहिं मोहि सोहानी । जदपि मोह बस कहेहु भवानी ॥
 तुम्ह जो कहा राम कोउ आना । जेहि श्रुति गाव घरहिं सुनि व्याना ॥

दो०—कहिहिं सुनहिं अस अखस नर अखे से मोह पिखाच ।

पाषंडी हरि पद निमुख जानाई हठ न छाच ॥ ११४ ॥

अग्य अकोविद अंध अभागी । काई विषय मुकुर मन लागी ॥
लंपट कपटी कुटिल विसेषी । सपनेहुँ संतसभा नहिं देखी ॥
कहहिं ते वेद असंमत बानी । जिन्ह केँ सूझ लाभु नहिं हानी ॥
मुकुर मलिन अरु नयन बिहीना । राम रूप देखहिं किमि दीना ॥
जिन्ह केँ अगुन न सगुन बिबेका । जल्पहिं कल्पित वचन अनेका ॥
हरिमाया बस जगत भ्रमाहीं । तिन्हहि कहत कछु अघटित नाहीं ॥
बातुल भूत विवस मतवारे । ते नहिं बोलहिं वचन बिचारे ॥
जिन्ह कृत महामोह मद पाना । तिन्ह कर कहा करिअ नहिं काना ॥

सो०—अस निज हृदयँ बिचारि तजु संसय भजु राम पद ।

सुनु गिरिराज कुमारि अम तम रवि कर बचन मम ॥११५॥

सगुनहि अगुनहि नहिं कछु भेदा । गावहिं मुनि पुरान बुध बेदा ॥
अगुन अरूप अलख अज जोई । भगत प्रेम बस संगुन सो होई ॥
जो गुन रहित सगुन सोइ कैसैं । जलु हिम उपल बिलग नहिं जैसैं ॥
जासु नाम भ्रम तिमिर पतंगा । तेहि किमि कहिअ बिमोह प्रसंगा ॥
राम सच्चिदानंद दिनेसा । नहिं तहँ मोह निसा लवलेसा ॥
सहज प्रकासरूप भगवाना । नहिं तहँ पुनि बिग्यान बिहाना ॥
हरष बिषाद ग्यान अग्याना । जीव धर्म अहमिति अभिमाना ॥
राम ब्रह्म व्यापक जग जाना । परमानंद परेस पुराना ॥

हो०—पुरुष प्रसिद्ध प्रकास निधि प्रगट परावर नाथ ।

रघुकुलमनि मम स्वामि सोइ कहिखिँ बाण्ड भाय ॥११६॥

निज भ्रम नहिं समुझहिं अग्यानी । प्रभु पर मोह धरहिं जड़ प्रानी ॥
 जथा गगन घन पटल निहारी । झाँपेउ भानु कहहिं कुविचारी ॥
 चितव जो लोचन अंगुलि लाएँ । प्रगट जुगल ससि तेहि के भाएँ ॥
 उमा राम बिषइक अस मोहा । नभ तम धूम धूरि जिमि सोहा ॥
 बिषय करन सुर जीव समेता । सकल एक तैं एक सचेता ॥
 सब कर परम प्रकासक जोई । राम अनादि अवधपति सोई ॥
 जगत प्रकास्य प्रकासक रामू । मायाधीस ग्यान गुन धामू ॥
 जासु सत्यता तैं जड़ माया । भास सत्य इव मोह सहाया ॥
 दो०—रजत सीप महुँ भास जिमि जथा भानु कर बारि ।

जदपि मृषा तिहुँ काल सोइ भ्रम न सकइ कोउ टारि ॥११७॥
 एहि बिधि जग हरि आश्रित रहई । जदपि असत्य देत दुख अहई ॥
 जौ सपनैं सिर काटै कोई । बिनु जागैं न दूरि दुख होई ॥
 जासु कृपाँ अस भ्रम मिटि जाई । गिरिजा सोइ कृपाल रघुराई ॥
 आदि अंत कोउ जासु न पावा । मति अनुमानि निगम अस गावा
 बिनु पद चलइ सुनइ बिनु काना । कर बिनु करम करइ बिधि नाना
 आनन रहित सकल रस भोगी । बिनु बानी बकता बड़ जोगी ॥
 तन बिनु परस नयन बिनु देखा । ग्रहइ घान बिनु बास असेषा ॥
 असि सब भाँति अलौकिक करनी । महिमा जासु जाइ नहिं बरनी ॥
 दो०—जेहि इमि गावहिं बेद बुध जाहि धरहिं मुनि ध्यान ।

सोइ दूसरथ सुत भगत हित कोसलपति भगवान ॥११८॥
 कासी मरत जंतु अवलोका । जासु नाम बल करउ विसोका ॥

सोइ प्रभु मोर चराचर स्वामी । रघुबर सब उर अंतरजामी ॥
 बिबसहुँ जासु नाम नर कहहीं । जनम अनेक रचित अघ दहहीं ॥
 सादर सुमिरन जे नर करहीं । भव बारिधि गोपद इव तरहीं ॥
 राम सो परमात्मा भवानी । तहँ भ्रम अति अबिहित तव बानी ॥
 अस संसय आनत उर माहीं । ग्यान विराग सकल गुन जाहीं ॥
 सुनि सिव के भ्रम भंजन बचना । मिटि गै सब कुतरक कै रचना ॥
 भइ रघुपति पद प्रीति प्रतीती । दारुन असंभावना बीती ॥
 दो०—पुनि पुनि प्रभु पद कमल गहि जोरि पंकरुह पानि ।

बोलीं गिरिजा बचन बर मनहुँ प्रेम रस सानि ॥ ११९ ॥

ससि कर सम सुनि गिरा तुम्हारी । मिटा मोह सरदातप भारी ॥
 तुम्ह कृपाल सबु संसउ हरेऊ । राम स्वरूप जानि मोहि परेऊ ॥
 नाथ कृपाँ अब गयउ विषादा । सुखी भयउँ प्रभु चरन प्रसादा ॥
 अब मोहि आपनि किंकरि जानी । जदपि सहज जड़ नारि अयानी ॥
 प्रथम जो मैं पूछा सोइ कहहू । जौ मो पर प्रसन्न प्रभु अहहू ॥
 राम ब्रह्म चिनमय अबिनासी । सर्व रहित सब उर पुर बासी ॥
 नाथ धरेउ नरतनु केहि हेतू । मोहि समुझाइ कहहु वृषकेतू ॥
 उमा बचन सुनि परम विनीता । रामकथा पर प्रीति पुनीता ॥
 दो०—हियँ हरषे कामारि तब संकर सहज सुजान ।

बहु बिधि उमहि प्रसंसि पुनि बोले कृपानिधान ॥ १२० (क) ॥

नवाह्नपारायण, पहला विश्राम

सासपारायण, चौथा विश्राम

सो०—सुनु सुभ कथा भवानि रामचरितमानस बिमल ।

कहा भुसुंढि बखानि सुना बिहग नायक गरुड ॥ १२० (ख) ॥

सो संबाद उदार जेहि बिधि भा आगें कहब ।

सुनहु राम अवतार चरित परम सुंदर अनघ ॥ १२० (ग) ॥

हरि गुन नाम अपार कथा रूप अगनित अभित ।

मैं निज मति अनुसार कहउँ उमा सादर सुनहु ॥ १२० (घ) ॥

सुनु गिरिजा हरि चरित सुहाए । विपुल विसद निगमागम गाए ॥

हरि अवतार हेतु जेहि होई । इदमित्थं कहि जाइ न सोई ॥

राम अतर्क्य बुद्धि मन बानी । मत हमार अस सुनहि सयानी ॥

तदपि संत मुनि वेद पुराना । जस कछु कहहिं स्वमति अनुमाना ॥

तस मैं सुमुखि सुनावउँ तोही । समुझि परइ जस कारन मोही ॥

जब जब होइ धरम कै हानी । बाढ़हिं असुर अधम अभिमानि ॥

करहिं अनीति जाइ नहिं बरनी । सीदहिं बिप्र धेनु सुर धरनी ॥

तब तब प्रभु धरि विविध सरीरा । हरहिं कृपानिधि सजन पीरा ॥

दो०—असुर मारि थापहिं सुरन्ह राखहिं निज श्रुति सेतु ।

जग बिस्तारहिं बिसद जस राम जन्म कर हेतु ॥ १२१ ॥

सोइ जस गाइ भगत भव तरहीं । कृपासिंधु जन हित तनु धरहीं ॥

राम जनम के हेतु अनेका । परम विचित्र एक तैं एका ॥

जनम एक दुइ कहउँ बखानी । सावधान सुनु सुमति भवानी ॥

द्वारपाल हरि के प्रिय दोऊ । जय अरु विजय जान सब कोऊ ॥

विप्र श्राप तैं दूनउ भाई। तामसअसुर देह तिन्ह पाई॥
 कनककसिपु अरु हाटकलोचन। जगत विदित सुरपति मद मोचन
 विजई समर वीर विख्याता। धरि बराह वपु एक निपाता॥
 होइ नरहरि दूसर पुनि मारा। जन प्रह्लाद सुजस बिस्तारा॥
 दो०—भए निसाचर जाइ तेइ महावीर बलवान।

कुंभकरन रावन सुभट सुर बिजई जग जान ॥१२२॥

मुकुत न भए हते भगवाना। तीनि जनम द्विज वचन प्रवाना॥
 एक बार तिन्ह के हित लागी। धरेउ सरीर भगत अनुरागी॥
 कस्यप अदिति तहाँ पितु माता। दसरथ कौसल्या विख्याता॥
 एक कलप एहि विधि अवतारा। चरित पवित्र किए संसारा॥
 एक कलप सुर देखि दुखारे। समर जलंधर सन सब हारे॥
 संभु कीन्ह संग्राम अपारा। दनुज महाबल मरइ न मारा॥
 परम सती असुराधिप नारी। तेहि बल ताहि न जितहि पुरारी॥
 दो०—छल करि टारेउ तासु व्रत प्रभु सुर कारज कीन्ह।

जब तेहि जानेउ मरम तब श्राप कोप करि दीन्ह ॥१२३॥

तासु श्राप हरि दीन्ह प्रमाना। कौतुकनिधि कृपाल भगवाना॥
 तहाँ जलंधर रावन भयऊ। रन हति राम परम पद दयऊ॥
 एक जनम कर कारन एहा। जेहि लगि राम घरी नरदेहा॥
 प्रति अवतार कथा प्रभु केरी। सुनु मुनि बरनी कबिन्ह घनेरी॥
 नारद श्राप दीन्ह एक बारा। कलप एक तेहि लगि अवतारा॥

गिरिजा चकित भई सुनि बानी । नारद बिष्णुभगत पुनि ग्यानी ॥
कारन कवन श्राप मुनि दीन्हा । का अपराध रमापति कीन्हा ॥
यह प्रसंग मोहि कहहु पुरारी । मुनि मन मोह आचरज भारी ॥

दो०—बोले बिहसि महेस तब ग्यानी मूढ़ न कोइ ।

जेहि जस रघुपति करहिं जब सो तस तेहि छन होइ ॥ १२४ (क) ॥

सो०—कहउँ राम गुन गाथ भरद्वाज सादर सुनहु ।

भव भंजन रघुनाथ भजु तुलसी तजि मान मद ॥ १२४ (ख) ॥

हिमगिरि गुहा एक अति पावनि । बह समीप सुरसरी सुहावनि ॥

आश्रम परम पुनीत सुहावा । देखि देवरिषि मन अति भावा ॥

निरखि सैल सरि विपिन विभागा । भयउ रमापति पद अनुरागा ॥

सुमिरत हरिहि श्राप गति बाधी । सहज बिमल मन लागि समाधी ॥

मुनि गति देखि सुरेस डेराना । कामहि बोलि कीन्ह सनमाना ॥

सहित सहाय जाहु मम हेतू । चलेउ हरषि हियँ जलचर केतू ॥

सुनासीर मन महँ असि त्रासा । चहत देवरिषि मम पुर बासा ॥

जे कामी लोलुप जग माहीं । कुटिल काक इव सबहि डेराहीं ॥

दो०—सूख हाड लै भाग सठ स्वान निरखि मृगराज ।

छीनि लेहू जनि जान जड़ तिमि सुरपतिहि न लाज ॥ १२५ ॥

तेहि आश्रमहि मदन जब गयऊ । निज मागँ बसंत निरमयऊ ॥

कुसुमित विविध फल पद पुराणा । कूजहिं कोकिल गुंजहिं भुंगा ॥

चली सुहावनि त्रिविध बयारी । काम कसानु बड़ावनिहारी ॥

रंभादिक सुरनारि नबीना । सकल असमसर कला प्रबीना ॥
 करहिं गान बहु तान तरंगा । बहुविधि क्रीडहिं पानि पतंगा ॥
 देखि सहाय मदन हरषाना । कीन्हैसि पुनि प्रपंच विधि नाना ॥
 काम कला कछु मुनिहि न व्यापी । निज भयँ डरेउ मनोभवं पापी ॥
 सीम कि चाँपि सकइ कोउ तासू । बड़ रखवार रमापति जासू ॥
 दो०—सहित सहाय सभीत अति मानि हारि मन मैन ।

गहेसि जाइ मुनि चरन तब कहि सुठि आरत बैन ॥ १२६ ॥
 भयउ न नारद मन कछु रोषा । कहि प्रिय बचन काम परितोषा ॥
 नाइ चरन सिरु आयसु पाई । गयउ मदन तब सहित सहाई ॥
 मुनि सुसीलता आपनि करनी । सुरपति सभाँ जाइ सब बरनी ॥
 मुनि सब कैं मन अचरजु आवा । मुनिहिं प्रसंसि हरिहि सिरु नावा
 तब नारद गवने सिव पाहीं । जिता काम अहमिति मन माहीं ॥
 मार चरित संकरहि सुनाए । अतिप्रिय जानि महेस सिखाए ॥
 बार बार बिनवउँ मुनि तोही । जिमि यह कथा सुनायहु मोही ॥
 तिमि जनि हरिहि सुनावहु कबहूँ । चलेहुँ प्रसंग दुराएहु तबहूँ ॥
 दो०—संभु दीन्ह उपदेस हित नहिं नारदहि सोहान ।

भरद्वाज कौतुक सुनहु हरि इच्छा बलवान ॥ १२७ ॥

राम कीन्ह चाहहिं सोइ होई । करै अन्यथा अस नहिं कोई ॥
 संभु बचन मुनि मन नहिं भाए । तब बिरंचि के लोक सिधाए ॥
 एक बार करतल बर बीना । गावत हरि गुन गान प्रबीना ॥

छीरसिंधु गवने मुनिनाथा । जहँ बस श्रीनिवास श्रुतिमाथा ॥
 हरषि मिले उठि रमानिकेता । बैठे आसन रिषिहि समेता ॥
 बोले बिहसि चराचर राया । बहुते दिनन कीन्हि मुनि दाया ॥
 काम चरित नारद सब भाषे । जद्यपि प्रथम बरजि सिवँ राखे ॥
 अति प्रचंड रघुपति कै माया । जेहि न मोह अस को जग जाया ॥
 दो०—रुख बदन करि बचन मृदु बोले श्रीभगवान ।

तुम्हरे सुमिरन तें भिटहिँ मोह मार मद मान ॥१२८॥

मुनु मुनि मोह होइ मन ताकें । ग्यान बिराग हृदय नहिँ जाकें ॥
 ब्रह्मचरज व्रत रत मतिधीरा । तुम्हहिँ कि करइ मनोभव पीरा ॥
 नारद कहेउ संहित अभिमाना । कृपा तुम्हारि सकल भगवाना ॥
 करुनानिधि मन दीख बिचारी । उर अंकुरेउ गरब तरु भारी ॥
 बेगि सो मैं डारिहउँ उखारी । पन हमार सेवक हितकारी ॥
 मुनि कर हित मम कौतुक होई । अवसि उपाय करवि मैं सोई ॥
 तब नारद हरि पद सिर नाई । चले हृदयँ अहमिति अधिकाई ॥
 श्रीपति निज माया तब प्रेरी । सुनहु कठिन करनी तेहि केरी ॥
 दो०—बिरचेउ मग महुँ नगर तेहिँ सत जोजन बिस्तार ।

श्रीनिवासपुर तें अधिक रचना बिबिध प्रकार ॥१२९॥

बसहिँ नगर सुंदर नर नारी । जनु बहु मनसिजरति तनुधारी ॥

तेहिँ पुर बसइ सीलनिधि राजा । अपावित हय गाय सोन सम्राजा ॥

सत सुरेस सम बिभव बिलासा । रूप तेज बल नीति निवासा ॥

विश्वमोहनी तासु कुमारी। श्री विमोह जिसु रूप निहारी॥
 सोइ हरिमाया सब गुन खानी। सोमा तासु कि जाइ बखानी॥
 करइ स्वयंवर सो नृपबाला। आए तहँ अगनित महिपाला॥
 मुनि कौतुकी नगर तेहिं गयऊ। पुरवासिन्ह सब पूछत भयऊ॥
 सुनि सब चरित भूपगृहँ आए। करि पूजा नृप मुनि बैठाए॥
 दो०—आनि देखाई नारदहि भूपति राजकुमारि।

कहहु नाथ गुन दोष सब एहि के हृदयँ बिचारि ॥१३०॥

देखि रूप मुनि बिरति बिसारी। बड़ी वार लगि रहे निहारी॥
 लच्छन तासु बिलोकि भुलाने। हृदयँ हरष नहिं प्रगट बखाने॥
 जो एहि वरइ अमर सोइ होई। समर भूमि तेहि जीत न कोई॥
 सेवहिं सकल चराचर ताही। वरइ सीलनिधि कन्या जाही॥
 लच्छन सब बिचारि उर राखे। कछुक बनाइ भूप सन भाषे॥
 सुता सुलच्छन कहि नृप पाहीं। नारद चले सोच मन माहीं॥
 करौं जाइ सोइ जतन बिचारी। जेहि प्रकार मोहि वरै कुमारी॥
 जप तप कछु न होइ तेहि काला। हे विधि मिलइ कवन विधि बाला
 दो०—एहि अवसर चाहिअ परम सोभा रूप बिसाल।

जो बिलोकि रीझै कुअरि तब मेलै जयमाल ॥१३१॥

हरि सन मागौं सुंदरताई। होइहि जात गहरु अति भाई॥
 मोरें हित हरि सम नहिं कोऊ। एहि अवसर सहाय सोइ होऊ॥
 बहुविधि बिनय कीन्हि तेहि काला। प्रगटेउ प्रभु कौतुकी कृपाला॥

प्रभु बिलोकि मुनि नयन जुड़ाने । होइहि काजु हिँ हारधाने ॥
 अति आरति कहि कथा सुनाई । करहु कृपा करि होहु सहाई ॥
 आपन रूप देहु प्रभु मोही । आन भाँति नहिँ पावौ ओही ॥
 जेहि बिधि नाथ होइ हित मोरा । करहु सो बेगिदास मैं तोरा ॥
 निज माया बल देखि बिसाला । हियँ हँसि बोले दीनदयाला ॥
 दो०—जेहि बिधि होइहि परम हित नारद सुनहु तुम्हार ।

सोइ हम करब न आन कछु बचन न मृषा हमार ॥ १३२ ॥

कुपय माग रुज व्याकुल रोगी । बैद न देइ सुनहु मुनि जोगी ॥
 एहि बिधि हित तुम्हार मैं ठयऊ । कहि अस अंतरहित प्रभु भयऊ ॥
 माया बिबस भए मुनि मूढ़ा । समुझी नहिँ हरि गिरा निगूढ़ा ॥
 गवने तुरत तहाँ रिषिराई । जहाँ स्वयंवर भूमि बनाई ॥
 निज निज आसन बैठे राजा । बहु बनाव करि सहित समाजा ॥
 मुनि मन हरष रूप अति मोरें । मोहि तजि आनहि बरिहि न भोरें ॥
 मुनि हित कारन कृपानिधाना । दीन्ह कुरूप न जाइ बखाना ॥
 सो चरित्र लखि काहुँ न पावा । नारद जानि सबहिँ सिर नावा ॥

दो०—रहे तहाँ दुइ रुद्र गन ते जानहिँ सब भेउ ।

बिप्रबेष देखत फिरहिँ परम कौतुकी तेउ ॥ १३३ ॥

जेहिँ समाज बैठे मुनि जाई । हृदयँ रूप अहमिति अधिकाई ॥
 तहँ बैठे महेस गन दोऊ बिप्रबेष गति लखन न कोऊ ॥
 करहिँ कूटि नारदहि सुनाई । नीकि दीन्हि हरि सुंदरताई ॥

रीझिहि राजकुअँरि छवि देखी । इन्हहि वरिहि हरि जानि बिलेखी ॥
मुनिहि मोह मन हाथ पराएँ । हँसहि संभु गन अति सचु पाएँ ॥
जदपि मुनिहि मुनि अटपटि बानी । समुझि न परइ बुद्धि भ्रम नानी ॥
काहुँ न लखा सो चरित बिसेषा । सो सरूप नृपकन्याँ देखा ॥
मर्कट बदन भयंकर देही । देखत हृदयँ क्रोध भा तेही ॥
दो०—सखीं संग लै कुअँरि तब चलि जनु राज नराल ।

देखत फिरइ महीप सब कर सरोज जयनाल ॥ १३४ ॥

जेहि दिसि बैठे नारद फूली । सो दिसि तेहि न बिलेकी भूली ॥
पुनि पुनि मुनि, उकसहि अकुलही । देखि दसा हर गन मुसुकाही ॥
वरि नृपतनु तहँ गयउ कृपाला । कुअँरि हरषि मेलेउ जयनाल ॥
दुलहिनि लै गे लच्छिनिवासा । नृप समाज सब भयउ निरासा ॥
मुनि अति विकल मोहँ मति नाठी । मनि गिरि गई छूटे जनु गौठी ॥
तब हर गन बोले मुसुकाई । निज मुख मुसुर बिलोकहु जाई ॥
अस कहि दोउ भागे भयँ भारी । बदन दीख मुनि धारि निहारी ॥
बेषु बिलोकि क्रोध अति बाढ़ा । तिन्हहि सराप दीन्ह अति गाढ़ा ॥

दो०—होहु निसाचर जाइ तुम्ह कपटी पापी दोउ ।

हँसेहु हगहि सो लेहु फल बहुरि हँसेहु मुनि कोउ ॥ १३५ ॥

पुनि जल दीख रूप निज पावा । तदपि हृदयँ संतोष न आवा ॥

फरकत अधर कोप मन माही । सपादि नले कमलापादि पाही ॥

देहउँ श्राप कि मरिहउँ जाई । जगत मोरि उपवास कराई ॥

बीचहिं पंथ मिले दनुजारी। संग रमा सोइ राजकुमारी॥
 बोले मधुर वचन सुरसाई। मुनि कहँ चले विकल की नाई॥
 सुनत वचन उपजा अति क्रोधा। माया बस न रहा मन बोधा॥
 पर संपदा सकहु नहिं देखी। तुम्हरेँ इरिषा कपट बिसेषी॥
 मथत सिंधु रुद्रहि बौरायहु। सुरन्ह प्रेरि बिष पान करायहु॥
 दो०—असुर सुरा बिष संकरहि आपु रमा भनि चारु ।

स्वारथ साधक कुटिल तुम्ह सदा कपट व्यवहारु ॥ १३६ ॥

परम स्वतंत्र न सिर पर कोई। भावइ मनहि करहु तुम्ह सोई॥
 भलेहि मंद मंदेहि भल करहु। बिसमय हरष न हियँ कछु धरहु॥
 डहकि डहकि परिचेहु सत्र काहु। अति असंक मन सदा उछाहु॥
 करम सुभासुभ तुम्हहि न बाधा। अब लगि तुम्हहि न काहुँ साधा॥
 भले भवन अब बायन दीन्हा। पावहुगे फल आपन कीन्हा॥
 बंचेहु मोहि जवनि धरि देहा। सोइ तनु धरहु श्राप मम एहा॥
 कपि आकृति तुम्ह कीन्हि हमारी। करिहहिं कीस सहाय तुम्हारी॥
 मम अपकार कीन्ह तुम्ह भारी। नारि बिरहँ तुम्ह होब दुखारी॥
 दो०—श्राप सीस धरि हरषि हियँ प्रभु बहु बिनती कीन्हि ।

निज माया कै प्रबलता करषि कृपानिधि लीन्हि ॥ १३७ ॥

जब हरि माया दूरि निवारी। नहिं तहँ रमा न राजकुमारी॥
 तब मुनि अति समीत हरि चरना। गहे पाहि प्रनतारति हरना॥
 मूषा होउ मम श्राप कृपाला। मम इच्छा कह दीनदयाला॥

मैं दुर्बचन कहे बहुतेरे । कह मुनि पाप मिटिहि किमि मेरे ॥
जपहु जाइ संकर सत नामा । होइहि हृदयँ तुरत विश्रामा ॥
कोउ नहिं सिव समान प्रिय मोरें । असि परतीति तजहु जनि भोरें ॥
जेहि पर कृपा न करहिं पुरारी । सो न पाव मुनि भगति हमारी ॥
अस उर धरि महि विचरहु जाई । अब न तुम्हहि माया निअराई ॥
दो०—बहुविधि मुनिहि प्रबोधि प्रभु तब भए अंतरधान ।

सत्यलोक नारद चले करत राम गुन गान ॥१३८॥

हर गन मुनिहि जात पथ देखी । विगतमोह मन हरष विसेषी ॥
अति समीत नारद पहिं आए । गहि पद आरत वचन सुनाए ॥
हर गन हम न विप्र मुनिराया । बड़ अपराध कीन्ह फल पाया ॥
श्राप अनुग्रह करहु कृपाला । बोले नारद दीनदयाला ॥
निसिचर जाइ होहु तुम्ह दोऊ । वैभव विपुल तेज बल होऊ ॥
भुजबल बिस्व जितव तुम्ह जहिआ । धरिहहिं बिष्णु मनुज तनु तहिआ ॥
समर मरन हरि हाथ तुम्हारा । होइहहु मुकुत न पुनि संसारा ॥
चले जुगल मुनि पद सिर नाई । भए निसाचर कालहि पाई ॥
दो०—एक कल्प एहि हेतु प्रभु लीन्ह मनुज अवतार ।

सुर रंजन सज्जन सुखद हरि भंजन भुवि भार ॥१३९॥

एहि विधि जनम करम हरि केरे । सुंदर सुखद विचित्र घनेरे ॥
कल्प कल्प प्रति प्रभु अवतरहीं । चारु चरित नाना विधि करहीं ॥
तब तब कथा मुनीसन्ह गाई । परम पुनीत प्रबंध बनाई ॥

बिबिध प्रसंग अनूप बखाने। करहिं न सुनि आचरजु सयाने॥
 हरि अनंत हरिकथा अनंता। कहहिं सुनिहिं बहुबिधि सब संता॥
 रामचंद्र के चरित सुहाए। कल्प कोटि लागि जाहिं न गाए॥
 यह प्रसंग मैं कहा भवानी। हरिमायाँ मोहहिं मुनि ग्यानी॥
 प्रभु कौतुकी प्रनत हितकारी। सेवत सुलभ सकल दुख हारी॥
 सो०—सुर नर मुनि कोउ नाहिं जेहि न मोह माया प्रबल।

अस बिचारि मन माहिं भजिअ महामाया पतिहि ॥१४०॥

अपर हेतु सुनु सैलकुमारी। कहउँ विचित्र कथा बिस्तारी॥
 जेहि कारन अज अगुन अरूपा। ब्रह्म भयउ कोसलपुर भूपा॥
 जो प्रभु बिपिन फिरत तुम्ह देखा। बंधु समेत धरें मुनिबेष्टा॥
 जासु चरित अवलोकि भवानी। सती सरीर रहिहु बौरानी॥
 अजहुँ न छाया मिटति तुम्हारी। तासु चरित सुनु भ्रम रुज हारी॥
 लीला कीन्हि जो तेहिं अवतारा। सो सब कहिहउँ मति अनुसारा॥
 भरद्वाज सुनि संकर बानी। सकुचि सप्रेम उमा मुसुकानी॥
 लगे बहुरि बरनै वृषकेतू। सो अवतार भयउ जेहि हेतू॥
 दो०—सो मैं तुम्ह सन कहउँ सब सुनु मुनीस मन लाइ।

राम कथा कलि मंल हरनि मंगल करनि सुहाइ ॥१४१॥

स्वायंभू मनु अरु सतरूपा। जिन्ह तैं भै नरसृष्टि अनूपा॥
 दंपति धरम आचरन नीका। अजहुँ गाव श्रुति जिन्ह कै लीका॥
 नृप उच्चानपाद सुत तासु। ध्रुव हरिभगत भयउ सुत जासु॥

लघु सुत नाम प्रियव्रत ताही। वेद पुरान प्रसंसहिं जाही॥
 देवहूति पुनि तासु कुमारी। जो मुनि कर्दम कै प्रिय नारी॥
 आदिदेव प्रभु दीनदयाला। जठर धरेउ जेहिं कपिल कृपाला॥
 सांख्य सास्त्र जिन्ह प्रगट बखाना। तत्त्व विचार निपुन भगवाना॥
 तेहिं मनु राज कीन्ह बहु काला। प्रभु आयसु सब विधि प्रतिपाला
 सो०—होइ न बिषय विराग भवन बसत भा चौथपन ।

हृदय बहुत दुख लाग जनम गयउ हरि भगति बिनु॥१४२॥

बरबस राज सुतहि तब दीन्हा। नारि समेत गवन बन कीन्हा॥
 तीरथ बर नैमिष विख्याता। अति पुनीत साधक सिधि दाता॥
 ब्रसहिं तहाँ मुनि सिद्ध समाजा। तहँ हियँ हरषि चलेउ मनु राजा॥
 पंथ जात सोहहिं मतिधीरा। ग्यान भगति जनु धरें सरीरा॥
 पहुँचे जाइ धेनुमति तीरा। हरषि नहाने निरमल नीरा॥
 आए मिलन सिद्ध मुनि ग्यानी। धरम धुरंधर नृपरिषि जानी॥
 जहँ जहँ तीरथ रहे सुहाए। मुनिन्ह सकल सादर करवाए॥
 कृस सरीर मुनिपट परिधाना। सत समाज नित सुनहिं पुराना॥
 दो०—द्वादस अच्छर मंत्र पुनि जपहिं सहित अनुराग ।

बासुदेव पद पंकरूह दंपति मन अति लाग ॥१४३॥
 करहिं अहार साक फल कंदा। सुमिरहिं ब्रह्म सच्चिदानंदा॥
 पुनि हृदि हेतु करन तप लागे। बारि अधार मूल फल त्यागे॥
 उर अभिलाष निरंतर होई। देखिअ नयन परम प्रभु सोई॥

अगुन अखंड अनंत अनादी । जेहि चितहिं परमारथवादी ॥
 नेति नेति जेहि वेद निरुपा । निजानंद निरुपाधि अनूपा ॥
 संभु विरंचि विष्णु भगवाना । उपजहिं जासु अंस तैं नाना ॥
 ऐसेउ प्रभु सेवक बस अहई । भगत हेतु लीलातनु गहई ॥
 जौ यह बचन सत्य श्रुति भाषा । तौ हमार पूजिहि अभिलाषा ॥
 दो०—एहि बिधि दीते बरष षट सहस बारि आहार ।

संबत सप्त सहस्र पुनि रहे समीर अधार ॥१४४॥

बरष सहस दस त्यागेउ सोऊ । ठाढ़े रहे एक पद दोऊ ॥
 बिधि हरि हर तप देखि अपारा । मनु समीप आए बहु वारा ॥
 मागहु बर बहु भाँति लोभाए । परम धीर नहिं चलहिं चलाए ॥
 अस्थिमात्र होइ रहे सरीरा । तदपि मनाग मनहिं नहिं पीरा ॥
 प्रभु सर्वग्य दास निज जानी । गति अनन्य तापस नृप रानी ॥
 मागु मागु बरु भै नम वानी । परम गभीर कृपामृत सानी ॥
 मृतक जिआवनि गिरा सुहाई । श्रवन रंघ्र होइ उर जव आई ॥
 दृष्टपुष्ट तन भए सुहाए । मानहुँ अवहिं भवन ते आए ॥

दो०—श्रवन सुधा सम बचन सुनि पुलक प्रफुल्लित गात ।

बोले मनु करि दंडवत प्रेम न हृदयँ समात ॥१४५॥

सुनु सेवक सुरतरु सुरधेनू । बिधि हरि हर बंदित पद रेनू ॥
 सेवत पुलक सकल सुखदायक । प्रणतपाल सत्पात्र नायक ॥

जौ अनाथ हित हम पर नेहू । तौ प्रसन्न होइ यह बर देहू ॥

जो सरूप बस सिव मन माहीं । जेहि कारन मुनि जतन कराहीं ॥
जो भुसुंडि मन मानस हंसा । सगुन अगुन जेहि निगम प्रसंसा ॥
देखहि हम सो रूप भरिलोचन । कृपा करहु प्रनतारति मोचन ॥
दंपति बचन परम प्रिय लागे । मृदुल विनीत प्रेम रस पागे ॥
भगत बल्लभ प्रभु कृपानिधाना । बिस्ववास प्रगटे भगवाना ॥
दो०—नील सरोरुह नील मनि नील नीरधर स्याम ।

लाजहि तन सोभा निरखि कोटि कोटि सतकाम ॥१४६॥

सरद मयंक वदन छवि सींवा । चारु कपोल चिबुक दर ग्रीवा ॥
अधर अरुन रद सुंदर नासा । विधु करनिकर विनिंदक हासा ॥
नव अंबुज अंबक छवि नीकी । चितवनि ललित भावैती जी की ॥
भृकुटि मनोज चाप छवि हारी । तिलक ललाट पटल दुतिकारी ॥
कुंडल मकर मुकुट सिर भ्राजा । कुटिल केस जनु मधुप समाजा ॥
उर श्रीवत्स रुचिर वनमाला । पदिक हार भूषन मनिजाला ॥
केहरि कंधर चारु जनेऊ । बाहु विभूषन सुंदर तेऊ ॥
करि कर सरिस सुभग भुजदंडा । कटि निषंग कर सर कोदंडा ॥
दो०—तडित विनिंदक पीत पट उदर रेख बर तीनि ।

नाभि मनोहर लेति जनु जमुन भँवर छवि छीनि ॥१४७॥

पद राजीव वरनि नहि जाहीं । मुनि मन मधुप बसहि जेन्ह माहीं ॥
ग्राम पाग सोभावि अनुकूल । आदिसक्ति छविनिधि जगमूला ॥
जासु अंस उपजहि गुनखानी । अगनित लच्छि उमा ब्रह्मानी ॥

मृकुटि बिलास जासु जग होई । राम बाम दिसि सीता सोई ॥
 छविसमुद्र हरि रूप बिलोकी । एकटक रहे नयन पट रोकी ॥
 चितवहिं सादर रूप अनूपा । तृप्ति न मानहिं मनु सतरूपा ॥
 हरष बिबस तन दसा भुलानी । परे दंड इव गहि पद पानी ॥
 सिर परसे प्रभु निज कर कंजा । तुरत उठाए करुनापुंजा ॥
 दो०—बोले कृपानिधान पुनि अति प्रसन्न मोहि जानि ।

मागहु बर जोइ भाव मन महादानि अनुमानि ॥१४८॥

सुनि प्रभु बचन जोरि जुग पानी । धरि धीरजु बोली मृदु बानी ॥
 नाथ देखि पद कमल तुम्हारे । अब पूरे सब काम हमारे ॥
 एक लालसा बड़ि उर माहीं । सुगम अगम कहि जाति सो नाहीं ॥
 तुम्हहि देत अति सुगम गोसाईं । अगम लाग मोहि निज कृपनाई ॥
 जथा दारिद्र बिबुधतरु पाई । बहु संपति मागत सकुचाई ॥
 तासु प्रभाउ जान नहिं सोई । तथा हृदयँ मम संसय होई ॥
 सो तुम्ह जानहु अंतरजामी । पुरवहु मोर मनोरथ स्वामी ॥
 सकुच बिहाइ मागु नृप मोही । मोरें नहिं अदेय कछु तोही ॥
 दो०—दानि सिरोमनि कृपानिधि नाथ कहउँ सतिभाउ ।

चाहउँ तुम्हहि समान सुत प्रभु सनकवनदुराउ ॥१४९॥

देखि प्रीति सुनि बचन अमोले । एवमस्तु करुनानिधि बोले ॥
 आपु सरिस खोजौ कहँ जाई । नृप तव तवय होय मैं आई ॥
 सतरूपहि बिलोकि कर जोरें । देबि मागु बरु जो रुचि तोरें ॥

जो बरु नाथ चतुर नृप मागा । सोइ कृपाल मोहि अति प्रिय लागा
प्रभु परंतु सुठि होति ढिठाई । जदपि भगत हित तुम्हहि सोहाई
तुम्ह ब्रह्मादि जनक जग स्वामी । ब्रह्म सकल उर अंतरजामी ॥
अस समुझत मन संसय होई । कहा जो प्रभु प्रवान पुनि सोई ॥
जे निज भगत नाथ तव अहहीं । जो सुख पावहिं जो गति लहहीं ॥
दो०—सोइ सुख सोइ गति सोइ भगति सोइ निज चरन सनेहु ।

सोइ बिबेक सोइ रहनि प्रभु हमहि कृपा करि देहु ॥१५०॥

सुनि मृदु गूढ़ रुचिर वररचना । कृपासिंधु बोले मृदु वचना ॥
जो कछु रुचि तुम्हरे मन माहीं । मैं सो दीन्ह सब संसय नाहीं ॥
मातु बिबेक अलौकिक तोरें । कबहुँ न मिटिहि अनुग्रह मोरें ॥
बंदि चरन मनु कहेउ बहोरी । अवर एक विनती प्रभु मोरी ॥
सुत बिषइक तव पद रति होऊ । मोहि वड़ मूढ़ कहै किन कोऊ ॥
मनि बिनु फनि जिमि जल बिनु मीना । मम जीवन तिमि तुम्हहि अधीना ॥
अस बरु मागि चरन गहि रहेऊ । एवमस्तु करुनानिधि कहेऊ ॥
अब तुम्ह मम अनुसासन मानी । बसहु जाइ सुरपति रजधानी ॥
सो०—तहँ करि भोग बिसाल तात गएँ कछु काल पुनि ।

होइहहु अवध भुआल तब मैं होब तुम्हार सुत ॥१५१॥

इच्छामय नरबेष सँवारें । होइहउँ प्रगट निकेत तुम्हारें ॥
असुख सहित देह धरि ताता । करिहउँ चरित भगत मुखदाता
जे सुनि सादर नर बड़भागी । भव तरिहहिं ममता मद त्यागी ॥

आदिसक्ति जेहि जग उपजाया । सोउ अवतरिहि मोरि यह माया॥
 पुरउव मैं अभिलाष तुम्हारा । सत्य सत्य पन सत्य हमारा॥
 पुनि पुनि अस कहि कृपानिधाना । अंतरधान भए भगवाना॥
 दंपति उर धरि भगत कृपाला । तेहि आश्रम निवसे कछु काला॥
 समय पाइ तनु तजि अनयासा । जाइ कीन्ह अमरावति वासा॥
 दो०—यह इतिहास पुनीत अति उमहि कही वृषकेतु ।

भरद्वाज सुनु अपर पुनि राम जनम कर हेतु ॥१५२॥

मासपारायण, पाँचवाँ विश्राम

सुनु मुनि कथा पुनीत पुरानी । जो गिरिजा प्रति संभु बखानी॥
 बिस्व बिदित एक कैकय देसू । सत्यकेतु तहँ बसइ नरेसू॥
 धरम धुरंधर नीति निधाना । तेज प्रताप सील बलवाना॥
 तेहि केँ भए जुगल सुत वीरा । सब गुन धाम महा रनधीरा॥
 राज धनी जो जेठ सुत आही । नाम प्रतापमानु अस ताही॥
 अपर सुतहि अरिमर्दन नामा । भुजबल अतुल अचल संग्रामा॥
 भाइहि भाइहि परम समीती । संकल दोष छल बरजित प्रीती॥
 जेठे सुतहि राज नृप दीन्हा । हरि हित आपु गवन बन कीन्हा॥

दो०—जब प्रतापरबि भयउ नृप फिरी दोहाई देस ।

प्रजा पाल अति बेदबिधि कतहुँ नहीं अघ लेस ॥१५३॥

नृप हितकारक सचिव सयाना । नाम धरमरुचि सुक समाना॥
 सचिव सयान बंधु बलबीरा । आपु प्रतापपुंज रनधीरा॥

सेन संग चतुरंग अपारा । अमित सुभट सब समर जुझारा ॥
 सेन बिलोकि राउ हरषाना । अरु बाजे गहगहे निसाना ॥
 बिजय हेतु कटकई बनाई । सुदिन साधि नृप चलेउ बजाई ॥
 जहँ तहँ परीं अनेक लराई । जीते सकल भूप बरिआई ॥
 सप्त दीप भुजवल बस कीन्हे । लै लै दंड छाड़ि नृप दीन्हे ॥
 सकल अवनि मंडल तेहि काला । एक प्रतापमानु महिपाला ॥
 दो०—स्ववस बिस्व करि बाहुबल निज पुर कीन्ह प्रवेसु ।

अरथ धरम कामादि सुख सेवइ समयँ नरेसु ॥१५४॥
 भूप प्रतापमानु बल पाई । कामधेनु भै भूमि सुहाई ॥
 सब दुख बरजित प्रजा सुखारी । धरमसील सुंदर नर नारी ॥
 सचिव धरमरुचि हरि पद प्रीती । नृप हित हेतु सिखव नित नीती ॥
 गुर सुर संत पितर महिदेवा । करइ सदा नृप सब कै सेवा ॥
 भूप धरम जे बेद बखाने । सकल करइ सादर सुख माने ॥
 दिन प्रति देइ विविध बिधि दाना । सुनइ सास्त्र बर बेद पुराना ॥
 नाना बापीं कूप तड़ागा । सुमन बाटिका सुंदर वागा ॥
 विप्रभवन सुरभवन सुहाए । सब तीरथन्ह विचित्र बनाए ॥
 दो०—जहँ लगि कहे पुरान श्रुति एक एक सब जाग ।

बार सहस्र सहस्र नृप किए सहित अनुराग ॥१५५॥

हृदयँ न कछु फल अनुसंधाना । भूप विवेकी परम सुजाना ॥
 करइ जे धरम करम मन बानी । बासुदेव अर्पित नृप गवानी ॥

चढ़ि बर बाजि बार एक राजा । मृगया कर सब साजि समाजा ॥
 बिध्याचल गभीर बन गयऊ । मृग पुनीत बहु मारत भयऊ ॥
 फिरत विपिन नृप दीख बराहू । जनु बन दुरेउ ससिहि ग्रसि राहू ॥
 बड़ बिधु नहिं समात मुख माहीं । मनहुँ क्रोध बस उगिलत नाहीं ॥
 कोल कराल दसन छवि गाई । तनु बिसाल पीवर अधिकाई ॥
 घुरुघुरात हय आरौ पाँएँ । चकित बिलोकत कान उठाएँ ॥
 दो०—नील महीधर सिखर सम देखि बिसाल बराहू ।

चपरि चलेउ हय सुदुकि नृप हाँकि न होइ निबाहू ॥१५६॥
 आवत देखि अधिक रव बाजी । चलेउ बराह मरुत गति भाजी ॥
 तुरत कीन्ह नृप सर संधाना । महि मिलि गयउ बिलोकत बाना ॥
 तकि तकि तीर महीस चलावा । करि छल सुअर सरीर बचावा ॥
 प्रगटत दुरत जाइ मृग भागा । रिस बस भूप चलेउ सँग लागा ॥
 गयउ दूरि घन गहन बराहू । जहँ नाहिन गज बाजि निबाहू ॥
 अति अकेल बन बिपुल कलेसू । तदपि न मृग मग तजइ नरेसू ॥
 कोल बिलोकि भूप बड़ धीरा । भागि पैठ गिरिगुहाँ गभीरा ॥
 अगम देखि नृप अति पछिताई । फिरेउ महाबन परेउ भुलाई ॥
 दो०—खेद खिन्न छुद्धित तृषित राजा बाजि समेत ।

खोजत व्याकुल सरित सर जल बिनु भयउ अचेत ॥१५७॥

फिरत विपिन आश्रम एक देखा । तहँ बस नृपति कपट मुनिबेषा ॥

जासु देस नृप लीन्ह छड़ाइ । समर सेन ताजि गयउ पराई ॥

समय प्रतापभानु कर जानी । आपन अति असमय अनुमानी ॥
 गयउ न गृह मन बहुत गलानी । मिला न राजहि नृप अभिमानी ॥
 रिस उर मारि रंक जिमि राजा । बिपिन बसइ तापस कै साजा ॥
 तासु समीप गवन नृप कीन्हा । यह प्रतापरवि तेहिं तब चीन्हा ॥
 राउ तृषित नहिं सो पहिचाना । देखि सुबेष महामुनि जाना ॥
 उतरि तुरग तैं कीन्ह प्रनामा । परमचतुर न कहेउ निज नामा ॥
 दो०—भूपति तृषित बिलोकि तेहिं सरबरु दीन्ह देखाइ ।

मज्जन पान समेत हय कीन्ह नृपति हरषाइ ॥१५८॥
 गै श्रम सकल सुखी नृप भयऊ । निज आश्रम तापसलै गयऊ ॥
 आसन दीन्ह अस्त रवि जानी । पुनि तापस बोलेउ मृदु बानी ॥
 कोतुम्ह कस बन फिरहु अकेलें । सुंदर जुबा जीव परहेलें ॥
 चक्रवर्ति के लच्छन तोरें । देखत दया लागि अति मोरें ॥
 नाम प्रतापभानु अवनीसा । तासु सचिव मैं सुनहु मुनीसा ॥
 फिरत अहेरें परेउँ भुलाई । बड़ैं भाग देखेउँ पद आई ॥
 हम कहैं दुर्लभ दरस तुम्हारा । जानत हौं कछु भल होनिहारा ॥
 कह मुनि तात भयउ अँधिआरा । जोजन सत्तारि नगरु तुम्हारा ॥
 दो०—निसा घोर गंभीर बन पंथ न सुनहु सुजान ।

बसहु आजु अस जानि तुम्ह जाणहु होत बिहान ॥१५९(क)॥

मुलसी जसि भवतव्यता तैसी मिलइ सहाइ ।

आपुनु आवइ ताहि पाहि ताहि तहाँ ले जाइ ॥१५९(ख)॥

भलेहिं नाथ आयसु धरि सीसा । बाँधि तुरग तरु बैठ महीसा ॥
 नृप बहु भाँति प्रसंसेउ ताही । चरन बाँदि निज भाग्य सराही ॥
 पुनि बोलेउ मृदु गिरा सुहाई । जानि पिता प्रभु करउँ ढिठाई ॥
 मोहि मुनीस सुत सेवक जानी । नाथ नाम निज कहहु बखानी ॥
 तेहि न जान नृप नृपहि सो जाना । भूप सुहृद सो कपट सयाना ॥
 बैरी पुनि छत्री पुनि राजा । छल बल कीन्ह चहइ निज काजा ॥
 समुझि राजसुख दुखित अराती । अवाँ अनल इव सुलगइ छाती ॥
 सरल बचन नृप के सुनि काना । बयर सँभारि हृदयँ हरषाना ॥
 दो०—कपट बोरि बानी मृदुल बोलेउ जुगुति समेत ।

नाम हमार भिखारि अब निर्धन रहित निकेत ॥१६०॥

कह नृप जे विग्यान निधाना । तुम्ह सारिखे गलित अभिमाना ॥
 सदा रहहिं अपनपौ दुराएँ । सब बिधि कुसल कुबेष बनाएँ ॥
 तेहि तैं कहहिं संत श्रुति टेरेँ । परम अकिंचन प्रिय हरि करेँ ॥
 तुम्ह सम अधन भिखारि अगेहा । होत विरंचि सिवहि संदेहा ॥
 जोसि सोसि तव चरन नमामी । मो पर कृपा करिअ अब स्वामी ॥
 सहज प्रीति भूपति कै देखी । आपु विषय विस्वास बिसेषी ॥
 सब प्रकार राजहि अपनार्ह । बोलेउ अधिक सनेह जनार्ह ॥
 सुनु सतिभाउ कहउँ महिपाला । इहाँ बसत बीते बहु काला ॥

दो०—अब लगि मोहि न मिलेउ कोउ मैं न जनार्ह काहु । .

लोकमान्यता अनल सम कर सप कानन दाहु ॥१६१॥ (क)

सो०—तुलसी देखि सुवेपु भूलहिं मूढ़ न चतुर नर ।

सुंदर केकिहि पेखु बचन सुधासम असन अहि ॥१६१(ख)॥

तार्ते गुपुत रहउँ जग माहीं । हरि तजि किमपि प्रयोजन नाहीं ॥
प्रभु जानत सब बिनहिं जनाएँ । कहहु कवनि सिधिलोक रिझाएँ ॥
तुम्ह सुचिसुमति परम प्रिय मोरें । प्रीति प्रतीति मोहि पर तोरें ॥
अब जौ तात दुरावउँ तोही । दारुन दोष घटइ अति मोही ॥
जिमि जिमि तापसु कथइ उदासा । तिमि तिमि नृपहि उपज बिस्वासा ॥
देखा स्वबस कर्म मन बानी । तब बोला तापस बगध्यानी ॥
नाम हमार एकतनु भाई । सुनि नृप बोलेउ पुनि सिरु नाई ॥
कहहु नाम कर अरथ बखानी । मोहि सेवक अति आपन जानी ॥
दो०—आदिसृष्टि उपजी जबहिं तब उत्पति मै मोरि ।

नाम एकतनु हेतु तेहि देह न धरी बहोरि ॥१६२॥

जनि आचरजु करहु मन माहीं । सुत तप तैं दुर्लभ कछु नाहीं ॥
तपबल तैं जग सृजइ बिधाता । तपबल बिष्णु भए परित्राता ॥
तपबल संभु करहिं संघारा । तप तैं अगम न कछु संसारा ॥
भयउ नृपहि सुनि अति अनुरागा । कथा पुरातन कहै सो लागा ॥
करम धरम इतिहास अनेका । करइ निरूपन बिरति बिबेका ॥
उदभव पालन प्रलय कहानी । कहेसि अमित आचरज बखानी ॥
सुनि महीप तापस बस भयऊ । आपन नाम कहन तब लयऊ ॥
कह तापस नृप जानउँ तोही । कीन्हेहु कपट लाल मोही ॥

सो०—सुनु महीस असि नीति जहँ तहँ नाम न कहहि नृप ।

मोहि तोहि पर अति प्रीति सोइ चतुरता बिचारितव ॥ १६३ ॥

नाम तुम्हार प्रताप दिनेसा । सत्यकेतु तव पिता नरेसा ॥
 गुर प्रसाद सब जानिअ राजा । कहिअ न आपन जानिअकाजा ॥
 देखि तात तव सहज सुधाई । प्रीति प्रतीति नीति निपुनाई ॥
 उपजि परी ममता मन मोरें । कहउँ कथा निज पूछे तोरें ॥
 अत्र प्रसन्न मैं संसय नाहीं । मागु जो भूप भाव मन माहीं ॥
 सुनि सुवचन भूपति हरषाना । गहि पद विनय कीन्हि बिधि नाना
 कृपासिंधु मुनि दरसन तोरें । चारि पदारथ करतल मोरें ॥
 प्रभुहि तथापि प्रसन्न बिलोकी । मागि अगम घर होउँ असोकी ॥

दो०—जरा मरन दुख रहित तनु समर जितै जनि कोउ ।

एकछत्र रिपुहीन महि राज कल्प सत होउ ॥ १६४ ॥

कह तापस नृप ऐसेइ होऊ । कारन एक कठिन सुनु सोऊ ॥
 कालउ तुअ पद नाइहि सीसा । एक बिप्रकुल छाड़ि महीसा ॥
 तपबल बिप्र सदा बरिआरा । तिन्ह के कोप न कोउ रखवारा ॥
 जौ बिप्रन्ह बस करहु नरेसा । तौ तुअ बस बिधि बिष्णु महेसा ॥
 चल न ब्रह्मकुल सन बरिआई । सत्य कहउँ दोउ भुजा उठाई ॥
 बिप्र श्राप बिनु सुनु महिपाला । तोर नास नहिं कवनेहुँ काला ॥
 हरषेउ राउ बचन सुनि तासू । नाथ न होइ मोर अब नासू ॥
 तव प्रसाद प्रभु कृपानिधाना । मो कहँ सर्व काल कस्यना ॥

दो०—एवमस्तु कहि कषटमुनि बोला कुटिल बहोरि ।

मिलव हमार भुलाव निज कहहु त हमहि न खोरि ॥ १६५ ॥

तातेँ मैं तोहि बरजउँ राजा । कहैं कथा तव परम अकाजा ॥

छठें श्रवन यह परत कहानी । नास तुम्हार सत्य मम बानी ॥

यह प्रगटें अथवा द्विजश्रापा । नास तोर सुनु भानुप्रतापा ॥

आन उपायँ निधन तव नाहीं । जौँ हरि हर कोपहिं मन माहीं ॥

सत्य नाथ पद गहि नृप भाषा । द्विज गुर कोप कहहु कोराखा ॥

राखइ गुर जौँ कोप विधाता । गुर विरोध नहिं कोउ जगत्राता ॥

जौँ न चलव हम कहे तुम्हारें । होउ नास नहिं सोच हमारें ॥

एकहिं डर डरपत मन मोरा । प्रभु महिदेव श्राप अति घोरा ॥

दो०—होहिं बिप्र बस कवन बिधि कहहु कृपा करि सोउ ।

तुम्ह तजि दीनदयाल निज हितू न देखउँ कोउ ॥ १६६ ॥

सुनु नृप विविध जतन जग माहीं । कष्टसाध्य पुनि होहिं कि नाहीं ॥

अहइ एक अति सुगम उपाई । तहाँ परंतु एक कठिनाई ॥

मम आधीन जुगुति नृप सोई । मोर जाव तव नगर न होई ॥

आजु लगेँ अरु जव तें भयऊँ । काहू के गृह ग्राम न गयऊँ ॥

जौँ न जाउँ तव होइ अकाजू । बना आइ असमंजस आजू ॥

सुनि महीस बोलेउ मृदु बानी । नाथ निगम असि नीति बखानी ॥

बड़े सनेह लघुन्ह पर करहीं । गिरि निज सिरनि सदा वृन धरहीं

जलधि अगाध मौलि बह फेनू । सतत धरनि धरत सिर रेनू ॥

दो०—अस कहि गहे नरेस पद स्वामी होहु कृपाल ।

मोहि लागि दुख सहिअ प्रभु सज्जन दीनदयाल ॥१६७॥

जानि नृपहि आपन आधीना । बोला तापस कपट प्रवीना ॥
 सत्य कहउँ भूपति सुनु तोही । जग नाहिन दुर्लभ कछु मोही ॥
 अवसि काज मैं करिहउँ तोरा । मन तन बचन भगत तैं मोरा ॥
 जोग जुगुति तप मंत्र प्रभाऊ । फलइ तबहिं जब करिअ दुराऊ ॥
 जौ नरेस मैं करौ रसोई । तुम्ह परसहु मोहि जान न कोई ॥
 अन्न सो जोइ जोइ भोजन करई । सोइ सोइ तव आयसु अनुसरई ॥
 पुनि तिन्ह के गृह जेवँइ जोऊ । तव बस होइ भूप सुनु सोऊ ॥
 जाइ उपाय रचहु नृप एहू । संवत भरि संकलप करेहू ॥

दो०—नित नूतन द्विज सहस सत बरेहु सहित परिवार ।

मैं तुम्हरे संकलप लागि दिनहिं करबि जेवनार ॥१६८॥

एहि बिधि भूप कष्ट अति थोरें । होइहहिं सकल बिप्र बस तोरें ॥
 करिहहिं बिप्र होम मख सेवा । तेहिं प्रसंग सहजेहिं बस देवा ॥
 और एक तोहि कहउँ लखाऊ । मैं एहिं बेष न आउव काऊ ॥
 तुम्हरे उपरोहित कहूँ राया । हरि आनन मैं करि निज माया ॥
 तपबल तोहि करि आपु समाना । रखिहउँ इहाँ बरष परवाना ॥
 मैं धरि तासु बेषु सुनु राजा । सब बिधि तोर सँवारव काजा ॥
 गै निसि बहुत सयन अब कीजे । मोहि तोहि भूप भेंट दिन तीजे ॥
 मैं तपबल तोहि पुरग समेता । पहुँचैहउँ सोयसहि निवेना ॥

दो०—मैं आउब सोइ बेषु धरि पहिचानेहु तब मोहि ।

जब एकांत बोलाइ सब कथा सुनावौ तोहि ॥१६९॥

सयन कीन्ह नृप आयसु मानी । आसन जाइ बैठ छल ग्यानी ॥
 श्रमित भूप निद्रा अति आई । सो किमि सोव सोच अधिकाई ॥
 कालकेतु निसिचर तहँ आवा । जेहिं सूकर होइ नृपहि भुलावा ॥
 परम मित्र तापस नृप केरा । जानइ सो अति कपट घनेरा ॥
 तेहि के सत सुत अरु दस भाई । खल अति अजय देव दुखदाई ॥
 प्रथमहिं भूप समर सब मारे । बिप्र संत सुर देखि दुखारे ॥
 तेहिं खल पाछिल बयरु सँभारा । तापस नृप मिलि मंत्र बिचारा ॥
 जेहिं रिपु छय सोइ रचेन्हि उपाऊ । भावी बसन जान कछु राऊ ॥

दो०—रिपु तेजसी अकेल अपि लघु करि गनिअ न ताहु ।

अजहुँ देत दुख रबि ससिहि सिर अवसेषित राहु ॥१७०॥

तापस नृप निज सखहि निहारी । हरषि मिलेउ उठि भयउ सुखारी ॥
 मित्रहि कहि सब कथा सुनाई । जातुधान बोला सुख पाई ॥
 अब साधेउँ रिपु सुनहु नरेसा । जौं तुम्ह कीन्ह मोर उपदेसा ॥
 परिहरि सोच रहहु तुम्ह सोई । बिनु औषध विआधि विधि खोई ॥
 कुल समेत रिपु मूल बहाई । चौथें दिवस मिलब मैं आई ॥
 तापस नृपहि बहुत परितोषी । चला महाकपटी अतिरोषी ॥
 भानुप्रतापहि बाजि समेता । पहुँचाएसि छन माझ निकेता ॥
 नृपहि नारि पहिं सयन कराई । हयगृह बाधेसि बाजि बनाई ॥

दो०—राजा के उपरोहितहि हरि लै गयउ बहोरि ।

लै राखेसि गिरि खोइ महुँ मायाँ करि मति ओरि ॥१७१॥

आपु बिरचि उपरोहित रूपा । परेउ जाइ तेहि सेज अनूपा ॥
जागेउ नृप अनभएँ बिहाना । देखि भवन अति अचरजु माना ॥
मुनि महिमा मन महुँ अनुमानी । उठेउ गवँहिं जेहिं जान न रानी ॥
कानन गयउ बाजि चढ़ि तेहीं । पुर नर नारि न जानेउ केहीं ॥
गएँ जाम जुग भूपति आवा । घर घर उत्सव बाज बधावा ॥
उपरोहितहि देख जब राजा । चकित बिलोक सुमिरि सोइ काजा
जुग सम नृपहि गए दिन तीनी । कपटी मुनि पद रह मति लीनी ॥
समय जानि उपरोहित आवा । नृपहि मते सब कहि समुझावा ॥

दो०—नृप हरषेउ पहिचानि गुरु भ्रम बस रहा न चेत ।

बरे तुरत सत सहस वर बिप्र कुटुंब समेत ॥१७२॥

उपरोहित जेवनार बनाई । छरस चारिबिधि जसि श्रुति गाई ॥
मायामय तेहि कीन्हि रसोई । विंजन बहु गनि सकइ न कोई ॥
बिबिध मृगन्ह कर आमिष राँधा । तेहि महुँ बिप्र माँसु खल साँधा ॥
भोजन कहुँ सब बिप्र बोलाए । पद पखारि सादर बैठाए ॥
परुसन जबहिं लाग महिपाला । भै अकासबानी तेहि काला ॥
बिप्रबृंद उठि उठि गृह जाहू । है बड़ि हानि अन्न जनि खाहू ॥
भयउ रसोई भूसुर माँसू । सब द्विज उठे मानि बिस्वासू ॥
भूप विकल मति मोह भुलानी । भावी बस न आव मुख बानी ॥

श्लो०—बोले बिप्र सकोप तब नहिं कछु कीन्ह बिचार ।

जाइ निसाचर होहु नृप मूढ़ सहित परिवार ॥१७३॥

छत्रबंधु तैं बिप्र बोलाई। घालै लिए सहित समुदाई ॥

ईस्वर राखा धरम हमारा। जैहसि तैं समेत परिवारा ॥

संवत मध्य नास तब होऊ। जलदाता न रहिहि कुल कोऊ ॥

नृप सुनि श्राप विकल अति त्रासा। भै बहोरि बर गिरा अकासा ॥

बिप्रहु श्राप बिचारि न दीन्हा। नहिं अपराध भूप कछु कीन्हा ॥

चकित बिप्र सब सुनि न भवानी। भूप गयउ जहँ भोजन खानी ॥

तहँ न असन नहिं बिप्र सुआरा। फिरेउ राउ मन सोच अपारा ॥

सब प्रसंग महिसुरन्ह सुनाई। त्रसित परेउ अवनीं अकुलाई ॥

श्लो०—भूपति भावी मिटइ नहिं जदपि न दूषन तोर ।

किँएँ अन्यथा होइ नहिं बिप्रश्राप अति घोर ॥१७४॥

अस कहि सब महिदेव सिधाए। समाचार पुरलोगन्ह पाए ॥

सोचहिं दूषन दैवहि देहीं। विरचत हंस काग किय जेहीं ॥

उपरोहितहि भवन पहुँचाई। असुर तापसहि खबरि जनार्इ ॥

तेहिं खल जहँ तहँ पत्र पठाए। सजि सजिसेन भूप सब धाए ॥

घेरेन्हि नगर निसान बजाई। विविध भाँति नित होइ लराई ॥

जूझे सकल सुभट करि करनी। बंधु समेत परेउ नृप धरनी ॥

सत्यकेतु कुल कोउ नहिं बाँचा। बिप्रश्राप किमि होइ असाँचा ॥

रिपु जिति सब नृप नगर बसाई। निज पुर गवने जय जसु पाई ॥

दो०—भरद्वाज सुनु जाहि जब होइ बिधाता बाम ।

धूरि मेरुसम जनक जम ताहि व्यालसम दाम ॥१७५॥

काल पाइ सुनि सुनु सोइ राजा । भयउ निसाचर सहित समाजा ॥
दस सिर ताहि बीस भुजदंडा । रावन नाम वीर बरिबंडा ॥
भूप अनुज अरिमर्दन नामा । भयउ सो कुंभकरन बलधामा ॥
सचिव जो रहा घरमरुचि जासू । भयउ विमात्र बंधु लघु तासू ॥
नाम विभीषन जेहि जग जाना । बिष्णुभगत बिग्यान निधाना ॥
रहे जे सुत सेवक नृप कैरे । भए निसाचर घोर घनेरे ॥
कामरूप खल जिनस अनेका । कुटिल भयंकर बिगत विवेका ॥
कृपा रहित हिसक सब पापी । बरनि न जाहिं विस्व परितापी ॥

दो०—उपजे जदपि पुलस्त्यकुल पावन अमल अनूप ।

तदपि महीसुर श्राप बस भए सकल अघरूप ॥१७६॥

कीन्ह विविध तप तीनिहुँ भाई । परम उग्र नहिं बरनि सो जाई ॥
गयउ निकट तप देखि बिधाता । मागहु वर प्रसन्न मैं ताता ॥
करि बिनती पद गहि दससीसा । बोलेउ बचन सुनहु जगदीसा ॥
हम काहू के मरहिं न भारें । बानर मनुज जाति दुइ बारें ॥
एवमस्तु तुम्ह बड़ तप कीन्हा । मैं ब्रह्माँ मिलि तेहि वर दीन्हा ॥
पुनि प्रभु कुंभकरन पहिं गयऊ । तेहि बिलोकि मन बिसमय भयऊ ॥
जौं एहि खल नित करब अहारू । होइहि सब उजारि संसारू ॥
सारद प्रेरि तासु माति फेरी । मागेसि नीद मास षट कैरी ॥

दो०—गए विभीषन पास पुनि कहेउ पुत्र बर मागु ।

तेहि मागेउ भगवंत पद कमल अमल अनुरागु ॥१७७॥

तिन्हहि देइ बर ब्रह्म सिधाए । हरषित ते अपने गृह आए ॥

मय तनुजा मंदोदरि नामा । परम सुंदरी नारि ललामा ॥

सोइ मयँ दीन्हि रावनहि आनी । होइहि जातुधानपति जानी ॥

हरषित भयउ नारि भलि पाई । पुनि दोउ बंधु विआहेसि जाई ॥

गिरि त्रिकूट एक सिंधु मझारी । विधि निर्मित दुर्गम अति भारी ॥

सोइ मय दानवँ बहुरि सँवारा । कनकरचित्त मनिभवन अपारा ॥

भोगावति जसि अहिकुल वासा । अमरावति जसि सक्रनिवासा ॥

तिन्ह तें अधिक रम्य अति बंका । जग विख्यात नाम तेहिलंका ॥

दो०—खाई सिंधु गभीर अति चारिहुँ दिसि फिरि आव ।

कनक कोट मनि खचित दढ़ बरनि न जाइ बनाव ॥१७८(क)॥

हरि प्रेरित जेहि कल्प जोइ जातुधानपति होइ ।

सूर प्रतापी अतुलबल दल समेत बस सोइ ॥१७८(ख)॥

रहे तहाँ निसिचर भट भारे । ते सब सुरन्ह समर संधारे ॥

अब तहँ रहहि सक्र के प्रेरे । रच्छक कोटि जच्छपति केरे ॥

दसमुख कतहुँ खबरि असि पाई । सेन साजि गढ़ घेरेसि जाई ॥

देखि बिकट भट बड़ि कटकाई । जच्छ जीव लै गए पराई ॥

फिरि सब नगर दसानन देखा । गयउ सोच सुख भयउ बिसेषा ॥

सुंदर सहज अगम अनुमानी । कीन्हि तहाँ रावन रजधानी ॥

जेहि जस जोग बाँटि गृह दीन्है । सुखी सकल रजनीचर कीन्है ॥
 एक बार कुबेर पर घावा । पुष्पक जान जीति लै आवा ॥
 दो०—कौतुकहीं कैलास पुनि लीन्हैसि जाइ उठाइ ।

मनहुँ तौलि निज बाहुबल चला बहुत सुख पाइ ॥१७९॥

सुख संपति सुत सेन सहाई । जय प्रताप बल बुद्धि बड़ाई ॥
 नित नूतन सब वाढ़त जाई । जिमि प्रतिलाभ लोभ अधिकाई ॥
 अतिबल कुंभकरन अस भ्राता । जेहि कहूँ नहिं प्रतिभट जग जाता
 करइ पान सोवइ षट मासा । जागत होइ तिहूँ पुर त्रासा
 जौं दिन प्रति अहार कर सोई । बिस्व बेगि सब चौपट होई ॥
 समर धीर नहिं जाइ बखाना । तेहि सम अमित वीर बलवाना ॥
 बारिदनाद जेठ सुत तासू । भट महुँ प्रथम लीक जग जासू ॥
 जेहि न होइ रन सनमुख कोई । सुरपुर नितहिं परावन होई ॥

दो०—कुमुख अकंपन कुलिसरद धूमकेतु अतिकाय ।

एक एक जग जीति सक ऐसे सुभट निकाय ॥१८०॥

कामरूप जानहिं सब माया । सपनेहुँ जिन्ह कैं धरम न दाया ॥
 दसमुख बैठ सभाँ एक बारा । देखि अमित आपन परिवारा ॥
 सुत समूह जनं परिजन नाती । गनै को पार निसाचर जाती ॥
 सेन विलोकि सहज अभिमानी । बोला बचन क्रोध मद सानी ॥

सुनइ सकल रजनीचर जया । हमरे बैरी बिदुष बरुथा ॥
 ते सनमुख नहिं करहिं लराई । देखि सबल रिपु जाहिं पराई ॥

तेन्ह कर मरन एक विधि होई । कहउँ बुझाइ सुनहु अब सोई ॥
द्विजभोजन मख होम सराधा । सब कै जाइ करहु तुम्ह वाधा ॥
दो०—छुधा छीन बलहीन सुर सहजेहि मिलिहहि आइ ।

तब मारिहउँ कि छादिहउँ भली भाँति अपनाइ ॥१८१॥
मेघनाद कहूँ पुनि हँकरावा । दीन्ही सिख बलु बयरु बढ़ावा ॥
जे सुर समर धीर बलवाना । जिन्ह कै लरिबे कर अभिमाना ॥
तिन्हहि जीति रन आनेसु बाँधी । उठि सुत पितु अनुसासन काँधौ ॥
एहि विधि सबही अग्या दीन्ही । आपुनु चलेउ गदा कर लीन्ही ॥
चलत दसानन डोलति अवनी । गर्जत गर्भ स्तवहिँ सुर रवनी ॥
रावन आवत सुनेउ सकोहा । देवन्ह तके मेरु गिरि खोहा ॥
दिगपालन्ह के लोक सुहाए । सूने सकल दसानन पाए ॥
पुनि पुनि सिंघनाद करि भारी । देइ देवतन्ह गारि पचारी ॥
रन मद मत्त फिरइ जग धावा । प्रतिभट खोजत कतहुँ न पावा ॥
रवि ससि पवन बरुन धनधारी । अगिनि काल जम सब अधिकारी ॥
किंनर सिद्ध मनुज सुर नागा । हठि सबही के पंथहिँ लगा ॥
ब्रह्मसृष्टि जहँ लगि तनुधारी । दसमुख बसवतीं नर नारी ॥
आयसु करहिँ सकल भयभीता । नवहिँ आइ नित चरन बिनीता ॥
दो०—भुजबल बिस्व बस्य करि राखेसि कोउ न सुतंत्र ।

मंडलीक मनि रावन राज करइ निज मंत्र ॥१८२(क)॥

देव जच्छ गंधर्व नर किंनर नाग कुमारि ।

जीति बरीं निज बाहुबल बहु सुंदर बर नारि ॥१८२(ख)॥

इंद्रजीत सन जो कछु कहेऊ । सो सब जनु पहिलेहिं करि रहेऊ ॥
 प्रथमहिं जिन्ह कहूँ आयसु दीन्हा । तिन्ह कर चरित सुनहु जो कीन्हा ॥
 देखत भीमरूप सब पापी । निसिचर निकर देव परितापी ॥
 करहिं उपद्रव असुर निकाया । नाना रूप धरहिं करि माया ॥
 जेहि बिधि होइ धर्म निर्मूला । सो सब करहिं बेद प्रतिकूला ॥
 जेहिं जेहिं देस धेनु द्विज पावहिं । नगर गाउँ पुर आगि लगावहिं ॥
 सुभ आचरन कतहुँ नहिं होई । देव बिप्र गुरु मान न कोई ॥
 नहिं हरिभगति जग्य तप ग्याना । सपनेहुँ सुनिअ न बेद पुराना ॥

छं०—जप जोग बिरागा तप मख भागा श्रवन सुनइ दससीसा ।
 आपुनु उठि धावइ रहै न पावइ धरि सब घालइ खीसा ॥
 अस अष्ट अचारा भा संसारा धर्म सुनिअ नहिं काना ।
 तेहि बहुबिधि त्रासइ देस निकासइ जो कह बेद पुराना ॥
 सो०—बरनि न जाइ अनीति घोर निसाचर जो करहिं ।
 हिंसा पर अति प्रीति तिन्ह के पापहिं कवनि मिति ॥ १८३ ॥

मासपारायण, छठा विश्राम

बाढ़े खल बहु चोर जुआरा । जे लंपट परधन परदारा ॥
 मानहिं मातु पिता नहिं देवा । साधुन्ह सन करवावहिं सेवा ॥
 जिन्ह के यह आचरन भवानी । ते जानेहु निसिचर सब प्रानी ॥
 अतिसय देखि धर्म कै लजनी । कर्म समीप धरा अकुलानी ॥
 गिरि सरि सिंधु भार नहिं मोही । जस मोहि गरुअ एक परद्रोही ॥

सकल धर्म देखइ विपरीता । कहि न सकइ रावन भय भीता ॥
धेनु रूप धरि हृदयँ बिचारी । गई तहाँ जहँ सुर मुनि झारी ॥
निज संताप सुनाएसि रोई । काहू तैं कछु काज न होई ॥

छं०—सुर मुनि गंधर्वा मिलि करि सर्वा गे बिरंचि के लोका ।
सँग गोतनुधारी भूमि बिचारी परम बिकल भय सोका ॥
ब्रह्माँ सब जाना मन अनुमाना मोर कछु न बसाई ।
जा करि तैं दासी सो अविनासी हमरेउ तोर सहाई ॥

सो०—धरनि धरइ मन धीर कह बिरंचि हरिपद सुमिरु ।
जानत जन की पीर प्रभु भंजिहि दारुन विपति ॥१८४॥

बैठे सुर सब करहिं बिचारा । कहँ पाइअ प्रभु करिअ पुकारा ॥
पुर बैकुण्ठ जान कह कोई । कोउ कह पयनिधि बस प्रभु सोई ॥
जाके हृदयँ भगति जसि प्रीती । प्रभु तहँ प्रगट सदा तेहि रीती ॥
तेहिं समाज गिरिजा मैं रहेऊँ । अवसर पाइ बचन एक कहेऊँ ॥
हरि व्यापक सर्वत्र समाना । प्रेम तैं प्रगट होहिं मैं जाना ॥
देस काल दिसि विदिसिहु माहीं । कहहु सो कहाँ जहाँ प्रभु नाहीं ॥
अग जगमय सब रहित विरागी । प्रेम तैं प्रभु प्रगटइ जिमि आगी ॥
मोर बचन सब के मन माना । साधु साधु करि ब्रह्म बखाना ॥

दो०—सुनि बिरंचि मन हरष तन पुलकि नयन बह नीर ।

छं०—जय जय सुरनायक जन सुखदायक प्रनतपाल भगवंता ।
 गो द्विज हितकारी जय असुरारी सिंधुसुता प्रिय कंता ॥
 पालन सुर धरनी अद्भुत करनी मरम न जानइ कोई ।
 जो सहज कृपाला दीनदयाला करउ अनुग्रह सोई ॥
 जय जय अबिनासी सब घट बासी व्यापक परमानंदा ।
 अबिगत गोतीतं चरित पुनीतं मायारहित मुकुंदा ॥
 जेहि लागि बिरागी अति अनुरागी बिगतमोह मुनिबृंदा ।
 निसि बासर ध्यावहिं गुन गन गावहिं जयति सच्चिदानंदा ॥
 जेहिं सृष्टि उपाई त्रिबिध बनाई संग सहाय न दूजा ।
 सो करउ अघारी चित हमारी जानिअ भगति न पूजा ॥
 जो भव भय भंजन मुनि मन रंजन गंजन बिपति बरुथा ।
 मन बच क्रम बानी छाडि सयानी सरन सकल सुरजूथा ॥
 सारद श्रुति सेषा रिषय असेषा जा कहूँ कोउ नहिं जाना ।
 जेहि दीन पिआरे बेद पुकारे द्रवउ सो श्रीभगवाना ॥
 अव बारिधि मंदर सब बिधि सुंदर गुन मंदिर सुखपुंजा ।
 मुनि सिद्ध सकल सुर परम भयातुर नमत नाथ पद कंजा ॥

दो०—जानि सभय सुर भूमि मुनि बचन समेत सनेह ।

गगनगिरा गंभीर भइ हरनि सोक संदेह ॥१८६॥

जनि डरपहु मुनि सिद्ध सुरेसा । तुम्हहि लागि धरिहुँ नर बेसा ॥

असह सहित भगुन अवतारा । लेखैं दिनद्वय बस उदसा ॥

कस्यप अदिति महातप कीन्हा । तिन्ह कहूँ मैं पूरव बर दीन्हा ॥
 ते दसरथ कौसल्या रूपा । कोसलपुरी प्रगट नरभूपा ॥
 तिन्ह कैं गृह अवतरिहउँ जाई । रघुकुलतिलक सो चारिउ भाई ॥
 नारद वचन सत्य सब करिहउँ । परम सक्ति समेत अवतरिहउँ ॥
 हरिहउँ सकल भूमि गरुआई । निर्भय होहु देव समुदाई ॥
 गगन ब्रह्मबानी सुनि काना । तुरत फिरे सुर हृदय जुड़ाना ॥
 तब ब्रह्माँ धरनिहि समुझावा । अभय भई भरोस जियँ आवा ॥
 दो०—निज लोकहि बिरंचि गो देवन्ह इहइ सिखाइ ।

बानर तनु धरि धरि सहि हरि पद सेवहु जाइ ॥१८७॥

गए देव सब निज निज धामा । भूमि सहित मन कहूँ विश्रामा ॥
 जो कछु आयसु ब्रह्माँ दीन्हा । हरषे देव बिलंब न कीन्हा ॥
 बनचर देह धरी छिति माहीं । अतुलित बल प्रताप तिन्ह पाहीं ॥
 गिरि तरु नख आयुध सब बीरा । हरि मारग चितवहिं मतिधीरा ॥
 गिरि कानन जहँ तहँ भरि पूरी । रहे निज निज अनीकरचि रूरी ॥
 यह सब रुचिर चरित मैं भाषा । अब सो सुनहु जो वीचहिं राखा ॥
 अवधपुरी रघुकुलमनि राज । बेद विदित तेहि दसरथ नाऊँ ॥
 धरम धुरंधर गुननिधि ग्यानी । हृदयँ भगति मति सारँग पानी ॥

दो०—कौसल्यादि नारि प्रिय सब आचरन पुनीत ।

पति अनुकूल प्रेम इह हरि पद कमल बिनीत ॥१८८॥

एक बार भूपति भग्य माहीं । ये गलानि मोरे सुत नाहीं ॥

गुर गृह गयउ तुरत महिपाला । चरन लागि करि बिनय बिसाला ॥
 निज दुख सुख सब गुरहि सुनायउ । कहि बसिष्ठ बहुबिधि समुझायउ
 धरहु धीर होइहहिं सुत चारी । त्रिभुवन विदित भगत भयहारी ॥
 संगी रिषिहि बसिष्ठ बोलावा । पुत्रकाम सुभ जग्य करावा ॥
 भगति सहित मुनि आहुति दीन्हें । प्रगटे अग्नि चरु कर लीन्हें ॥
 जो बसिष्ठ कछु हृदयँ विचारा । सकल काजु भा सिद्ध तुम्हारा ॥
 यह हवि बाँटि देहु नृप जाई । जथा जोग जेहि भाग बनाई ॥

दो०—तब अदस्य भए पावक सकल सभहि समुझाइ ।

परमानंद मगन नृप हरष न हृदयँ समाइ ॥१८९॥

तबहिं रायँ प्रिय नारि बोलाई । कौसल्यादि तहाँ चलि आई ॥
 अर्ध भाग कौसल्यहि दीन्हा । उभय भाग आधे कर कीन्हा ॥
 कैकेई कहँ नृप सो दयऊ । रह्यो सो उभय भाग पुनि भयऊ ॥
 कौसल्या कैकेई हाथ धरि । दीन्ह सुमित्रहि मन प्रसन्न करि ॥
 एहि बिधि गर्भसहित सब नारी । भई हृदयँ हरषित सुख भारी ॥
 जा दिन तें हरि गर्भहिं आए । सकल लोक सुख संपति छाप ॥
 मंदिर महुँ सब राजहिं रानी । सोभा सील तेज की खानी ॥
 सुख जुत कछुक काल चलि गयऊ । जेहिं प्रभु प्रगट सो अवसर भयऊ ॥

दो०—जोग लगन ग्रह बार तिथि सकल भए अनुकूल ।

चर भरु अचर हर्षजुत राम जनम सुखमूल ॥१९०॥

नौमी तिथि मधु मास पुनीता । सुकल पच्छ अभिजित हरिप्रीता ॥

मध्यदिवस अति सीत न घामा । पावन काल लोक विश्रामा ॥
 सीतल मंद सुरभि बह बाऊ । हरषित सुर संतन मन चाऊ ॥
 बन कुसुमित गिरिगन मनिआरा । खवहिं सकल सरिताऽमृतधारा ॥
 सो अवसर बिरंचि जब जाना । चले सकल सुर साजि बिमाना ॥
 गगन विमल संकुल सुर जूथा । गावहिं गुन गंधर्व बरूथा ॥
 वरषहिं सुमन सुअंजुलि साजी । गहगहि गगन दुंदुभी बाजी ॥
 अस्तुति करहिं नाग मुनि देवा । बहुविधि लावहिं निज निज सेवा ॥

दो०—सुर समूह बिनती करि पहुँचे निज निज धाम ।

जगनिवास प्रभु प्रगटे अखिल लोक विश्राम ॥१९१॥

छं०—भए प्रगट कृपाला दीनदयाला कौसल्या हितकारी ।
 हरषित महतारी मुनि मन हारी अद्भुत रूप विचारी ॥
 लोचन अभिरामा तनु घन स्यामा निज आयुध भुज चारी ।
 भूषन बनमाला नयन बिसाला सोभासिंधु खरारी ॥
 कह दुइ कर जोरी अस्तुति तोरी केहि विधि करौं अनंता ।
 माया गुन ग्यानातीत अमाना बेद पुरान भनंता ॥
 करुना सुख सागर सब गुन आगर जेहि गावहिं श्रुति संता ।
 सो मम हित लागी जन अनुरागी भयउ प्रगट श्रीकंता ॥
 ब्रह्मांड निकाया निर्मित माया रोम रोम प्रति बेद कहै ।
 मम उर सो बासी यह उपहासी सुनत धीर मति थिर न रहै
 उपजा जब ग्यामा प्रभु भुयुक्ता न चरित बहुत विधि कोन्ह चहै

कहि कथा सुहाई मातु बुझाई जेहि प्रकार सुत प्रेम लहै ॥
 माता पुनि बोली सो मति डोली तजहु तात यह रूपा ।
 कीजै सिसुलीला अति प्रियसीला यह सुख परम अनूपा ॥
 सुनि बचन सुजाना रोदन ठाना होइ बालक सुरभूपा ।
 यह चरित जे गावहि हरिपद पावहि ते न परहि भवकृपा ॥

दो०—बिप्र धेनु सुर संत हित लीन्ह मनुज अवतार ।

निज इच्छा निर्मित तनु माया गुन गो पार ॥१९२॥

सुनि सिसु रुदन परम प्रिय बानी । संभ्रम चलि आई सब रानी ॥
 हरषित जहँ तहँ धाई दासी । आनँद मगन सकल पुरबासी ॥
 दसरथ पुत्रजन्म सुनि काना । मानहुँ ब्रह्मानंद समाना ॥
 परम प्रेम मन पुलक सरीरा । चाहत उठन करत मति धीरा ॥
 जाकर नाम सुनत सुभ होई । मोरें गृह आवा प्रभु सोई ॥
 परमानंद पूरि मन राजा । कहा बोलाइ बजावहु वाजा ॥
 गुर बसिष्ठ कहँ गयउ हँकारा । आए द्विजन सहित नृपद्वारा ॥
 अनुपम बालक देखेन्ह जाई । रूप रासि गुन कहि न सिराई ॥

दो०—नंदीमुख सराध करि जातकरम सब कीन्ह ।

हाटक धेनु बसन मनि नृप बिप्रन्ह कहँ दीन्ह ॥१९३॥

ध्वज पताक तोरन पुर छावा । कहि न जाइ जेहि भाँति बनावा ॥
 सुमनबुष्टि अकास तें होई । ब्रह्मानंद मगन सब लोई ॥
 बृंद बृंद मिलि चली लोगाई । सहज सिंगार किए उठि घाई ॥

कनक कलस मंगल भरि थारा । गावत पैठहिं भूप दुआरा ॥
करि आरति नेवछावरि करहीं । बार बार सिसु चरनन्हि परहीं ॥
मागध सूत बंदिगन गायक । पावन गुन गावहिं रघुनायक ॥
सर्वस दान दीन्ह सब काहू । जेहिं पावा राखा नहिं ताहू ॥
मृगमद चंदन कुंकुम कीचा । मची सकल वीथिन्ह बिच बीचा

दो०—गृह गृह बाज बधाव सुभ प्रगटे सुषमा कंद ।

हरषवंत सब जहँ तहँ नगर नारि नर वृंद ॥१९४॥
कैकयसुता सुमित्रा दोऊ । सुंदर सुत जनमत भैं ओऊ ॥
वह सुख संपति समय समाजा । कहिन सकइ सारद अहिराजा ॥
अवधपुरी सोहइ एहि भाँती । प्रभुहि मिलन आई जनु राती ॥
देखि भानु जनु मन सकुचानी । तदपि बनी संभ्या अनुमानी ॥
अगर धूप बहु जनु अँधिआरी । उड़इ अवीर मनहुँ अरुनारी ॥
मंदिर मनि समूह जनु तारा । नृप गृह कलस सो इंदु उदारा ॥
भवन बेदधुनि अति मृदु बानी । जनु खग मुखर समयँ जनु सानी ॥
कौतुक देखि पतंग भुलाना । एक मास तेइँ जात न जाना ॥

दो०—मास दिवस कर दिवस भा मरम न जानइ कोइ ।

रथ समेत रबि थाकेउ निसा कवन बिधि होइ ॥१९५॥
यह रहस्य काहूँ नहिं जाना । दिनमनि चले करत गुन गाना ॥
देखि महोत्सव सुर मुनि नागा । चले भवन बरनत निज भागा ॥
औरउ एक कहउँ निज जोरी सुनु मित्रिजा । अति हृदय मति सोरी

काकभुसुंढि संग हम दोऊ । मनुजरूप जानइ नहिं कोऊ ॥
 परमानंद प्रेमसुख फूले । बीथिन्ह फिरहिं मगन मन भूले ॥
 यह सुभ चरित जान पै सोई । कृपा राम कै जापर होई ॥
 तेहि अवसर जो जेहि विधि आवा । दीन्ह भूप जो जेहि मन भावा ॥
 गज रथ तुरग हेम गो हीरा । दीन्हे नृप नानाविधि चीरा ॥
 दो०—मन संतोषे सबन्हि के जहँ तहँ देहिं असीस ।

सकल तनय चिर जीवहुँ तुलसिदास के ईस ॥१९६॥
 कछुक दिवस बीते एहि भाँती । जात न जानिअ दिन अरु राती ॥
 नामकरन कर अवसर जानी । भूप बोलि पठए मुनि ग्यानी ॥
 करि पूजा भूपति अस भाषा । धरिअ नाम जो मुनि गुनि राखा ॥
 इन्ह के नाम अनेक अनूपा । मैं नृप कहव स्वमति अनुरूपा ॥
 जो आनंद सिंधु सुख रासी । सीकर तैं त्रैलोक सुपासी ॥
 सो सुख धाम राम अस नामा । अखिल लोक दायक विश्रामा ॥
 बिस्व भरन पोषन कर जोई । ताकर नाम भरत अस होई ॥
 जाके सुमिरन तैं रिपु नासा । नाम सनुहन बेद प्रकासा ॥
 दो०—लच्छन धाम राम प्रिय सकल जगत आधार ।

गुरु बसिष्ठ तेहि राखा लछिमन नाम उदार ॥१९७॥
 धरे नाम गुर हृदयँ बिचारी । बेद तत्व नृप तव सुत चारी ॥
 मुनि धन जन सरबस सिव प्राणा । बाल केलि रस तेहि सुख माना ॥
 बारोहि ते बिज हित पति जानी । लछिमन राम चरन रति मानी ॥

भरत सत्रुहन दूनउ भाई। प्रभु सेवक जसि प्रीति बड़ाई ॥
 स्याम गौर सुंदर दोउ जोरी। निरखहि छवि जननीं तून तोरी ॥
 चारिउ सील रूप गुन धामा। तदपि अधिक सुखसागर रामा ॥
 हृदयँ अनुग्रह इंदु प्रकासा। सूचत किरन मनोहर हासा ॥
 कबहुँ उछंग कबहुँ बर पलना। मातु दुलारइ कहि प्रिय ललना ॥
 दो०—व्यापक ब्रह्म निरंजन निर्गुन बिगत बिनोद ।

सो अज प्रेम भगति बस कौसल्या कें गोद ॥१९८॥
 काम कोटि छवि स्याम सरीरा। नील कंज बारिद गंभीरा ॥
 अरुन चरन पंकज नख जोती। कमल दलन्ह बैठे जनु मोती ॥
 रेख कुलिस ध्वज अंकुस सोहे। नूपुर धुनि सुनि मुनि मन मोहे ॥
 कटि किंकिनी उदर त्रय रेखा। नाभि गभीर जान जेहि देखा ॥
 भुज बिसाल भूषन जुत भूरी। हियँ हरि नख अति सोभा रूरी ॥
 उर मनिहार पदिक की सोभा। बिप्र चरन देखत मन लोभा ॥
 कंबु कंठ अति चिबुक सुहाई। आनन अमित मदन छाँई ॥
 दुइ दुइ दसन अधर अरुनारे। नासा तिलक को बरनै पारे ॥
 सुंदर श्रवन सुचारु कपोला। अति प्रिय मधुर तोतरे बोला ॥
 चिक्कन कच कुंचित गमुआरे। बहु प्रकार रचि मातु सँवारे ॥
 पीत झगुलिआ तनु पहिराई। जानु पानि बिचरानि मोहि भाई ॥
 रूप सकहिं नहिं कहि श्रुति सेवा। सो जानइ सपनेहुँ जेहि देखा ॥
 दो०—सुख संदोह मोहपर ग्यान गिरा गोर्तात ।

संपति परम प्रेम बस कर सिमुचरित पुनीत ॥१९९॥

एहि विधि राम जगत पितु माता । कोसलपुर बासिन्ह सुखदाता ॥
 जिन्ह रघुनाथ चरन रति मानी । तिन्ह की यह गति प्रगट भवानी ॥
 रघुपति त्रिमुख जतन कर कोरी । कवन सकइ भव बंधन छोरी ॥
 जीव चराचर बस कै राखे । सो माया प्रभु सों भय भाखे ॥
 भृकुटि विलास नचावइ ताही । अस प्रभु छाड़ि भजिअ कहु काही
 मन क्रम बचन छाड़ि चतुराई । भजत कृपा करिहहिं रघुराई ॥
 एहि विधि सिसु विनोद प्रभु कीन्हा । सकल नगर बासिन्ह सुख दीन्हा
 लै उछंग कबहुँक हलरावै । कबहुँ पालनै घालि झुलावै ॥
 दो०—प्रेम मगन कौसल्या निसि दिन जात न जान ।

सुत सनेह बस माता बालचरित कर गान ॥२००॥

एक बार जननीं अन्हवाए । करि सिंगार पलनाँ पौढ़ाए ॥
 निज कुल इष्टदेव भगवाना । पूजा हेतु कीन्ह अस्नाना ॥
 करि पूजा नैवेद्य चढ़ावा । आपु गई जहँ पाक बनावा ॥
 बहुरि मातु तहवाँ चलि आई । भोजन करत देख सुत जाई ॥
 गै जननी सिसु पहिं भयभीता । देखा बाल तहाँ पुनि सूता ॥
 बहुरि आई देखा सुत सोई । हृदयँ कंप मन धीर न होई ॥
 इहाँ उहाँ दुइ बालक देखा । मति भ्रम मोर कि आन बिसेषा ॥
 देखि राम जननी अकुलानी । प्रभुहँसि दीन्ह मधुर मुसुकानी ॥
 दो०—देखरावा मातहि निज अद्भुत रूप अखंड ।

अगनित रवि ससि सिव चतुरानन । बहु गिरि सरित सिंधु महि कानन
काल कर्म गुन ग्यान सुभाऊ । सोउ देखा जो सुना न काऊ ॥
देखी माया सब विधि गाढ़ी । अति समीत जोरें कर ठाढ़ी ॥
देखा जीव नचावइ जाही । देखी भगति जो छोरइ ताही ॥
तन पुलकित मुख बचन न आवा । नयन मूढ़ि चरननि सिरु नावा ॥
विसमयवंत देखि महतारी । भए बहुरि सिसुरूप खरारी ॥
अस्तुति करि न जाइ भय माना । जगत पिता मैं सुत करि जाना ॥
हरि जननी बहुविधि समुझाई । यह जनि कतहुँ कहसि सुनु माई ॥
दो०—बार बार कौसल्या बिनय करइ कर जोरि ।

अब जनि कबहुँ व्यापै प्रभु मोहि माया तोरि ॥२०२॥
बाल चरित हरि बहुविधि कीन्हा । अति अनंद दासन्ह कहैं दीन्हा ॥
कलुक काल बीतें सब भाई । बड़े भए परिजन सुखदाई ॥
चूड़ाकरन कीन्ह गुरु जाई । बिप्रन्ह पुनि दछिना बहु पाई ॥
परम मनोहर चरित अपारा । करत फिरत चारिउ मुकुमारा ॥
मन क्रम बचन अगोचर जोई । दसरथ अजिर बिचर प्रभु सोई ॥
भोजन करत बोल जब राजा । नहिं आवत तजि बाल समाजा ॥
कौसल्या जब बोलन जाई । ठुमुकु ठुमुकु प्रभु चलहिं पराई ॥
निगम नेति सिव अंत न पावा । ताहिं धरै जननी हठि धावा ॥
धूसर धूरि भरें तनु आए । भूपति बिहसि गोद बैठाए ॥
दो०—भोजन करत चपल चित इत उत अवसरु पाइ ।

माजि चलै किलकत मुख दधि जोदन लपटाइ ॥२०३॥

बालचरित अति सरल सुहाए। सारद सेष संभु श्रुति गाए ॥
 जिन्ह कर मन इन्ह सन नहिं राता। ते जन वंचित किए बिधांता ॥
 भए कुमार जबहिं सब भ्राता। दीन्ह जनेऊ गुरु पितु माता ॥
 गुरगृहँ गए पढ़न रघुराई। अल्प काल विद्या सब आई ॥
 जाकी सहज स्वास श्रुति चारी। सो हरि पढ़ यह कौतुक भारी ॥
 विद्या विनय निपुन गुन सीला। खेलहिं खेल सकल नृपलीला ॥
 करतल बान धनुष अति सोहा। देखत रूप चराचर मोहा ॥
 जिन्ह वीथिन्ह विहरहिं सब भाई। थकित होहिं सब लोग लुगाई ॥

दो०—कोसलपुर बासी नर नारि बृद्ध अरु बाल ।

प्रानहु ते प्रिय लागत सब कहूँ राम कृपाल ॥२०४॥
 बंधु सखा सँग लेहिं बोलाई। बन मृगया नित खेलहिं जाई ॥
 पावन मृग मारहिं जियँ जानी। दिन प्रति नृपहिं देखावहिं आनी ॥
 जे मृग राम बान के मारे। ते तनु तजि सुरलोक सिधारे ॥
 अनुज सखा सँग भोजन करहीं। मातु पिता अग्या अनुसरहीं ॥
 जेहि विधि सुखी होहिं पुर लोगा। करहिं कृपानिधि सोइ संजोगा ॥
 वेद पुरान सुनहिं मन लाई। आपु कहहिं अनुजन्ह समुझाई ॥
 प्रातकाल उठि कै रघुनाथा। मातु पिता गुरु नावहिं माया ॥
 आयसु मागि करहिं पुर काजा। देखि चरित हरषइ मन राजा ॥

दो०—व्यापक अकल अनीह अज निर्गुन नाम न रूप ।

यह सब चरित कहा मैं गाई । आगिलि कथा सुनहु मन लाई ॥
 बिस्वामित्र महामुनि ग्यानी । वसहिं त्रिपिन सुभ आश्रम जानी ॥
 जहँ जप जग्य जोग मुनि करहीं । अति मारीच सुबाहुहि डरहीं ॥
 देखत जग्य निसाचर धावहिं । करहिं उपद्रव मुनि दुख पावहिं ॥
 गाधि तनय मन चिंता व्यापी । हरि बिनु मरहिं न निसिचर पापी ॥
 तब मुनिवर मन कीन्ह विचारा । प्रभु अवतरेउ हरन महि भारा ॥
 एहूँ मिस देखौं पद जाई । करि बिनती आनौं दोउ भाई ॥
 ग्यान विराग सकल गुन अयना । सो प्रभु मैं देखव भरि नयना ॥
 दो०—बहुविधि करत मनोरथ जात लागि नहिं बार ।

करि मज्जन सरल जल गए भूप दरबार ॥२०६॥
 मुनि आगमन सुना जब राजा । मिलन गयउ लै विप्र समाजा ॥
 करि दंडवत मुनिहि सनमानी । निज आसन बैठारेन्हि आनी ॥
 चरन पखारि कीन्हि अति पूजा । मो सम आजु धन्य नहिं दूजा ॥
 त्रिविध भाँति भोजन करवावा । मुनिवर हृदयँ हरष अति पावा ॥
 पुनि चरननि मेले सुत चारी । राम देखि मुनि देह बिसारी ॥
 भए मगन देखत मुख सोभा । जनु चकोर पूरन ससि लोभा ॥
 तब मन हरषि बचन कह राऊ । मुनि अस कृपा न कीन्हिहु काऊ ॥
 केहि कारन आगमन तुम्हारा । कहहु सो करत न लावउँ बारा ॥
 असुर समूह सतावहिं मोही । मैं जाचन आयउँ नृप तोही ॥
 अनुज समेत देहु खुनावा । निसिचर बध मैं होव सनायावा ॥

दो०—देहु भूप मन हरषित तजहु मोह अग्यान ।

धर्म सुजस प्रभु तुम्ह कौं इन्ह कहँ अति कल्याण ॥२०७॥

मुनि राजा अति अप्रिय बानी । हृदय कंप मुख दुति कुमुलानी ॥
चौथैपन पायउँ सुत चारी । विप्र बचन नहिं कहेहु विचारी ॥
मागहु भूमि धेनु धन कोसा । सर्वस देउँ आजु सहरोसा ॥
देह प्रान तैं प्रिय कछु नाहीं । सोउ मुनि देउँ निमिष एक माहीं
सब सुत प्रिय मोहि प्रान कि नाई । राम देत नहिं बनइ गोसाई ॥
कहँ निसिचर अति घोर कठोरा । कहँ सुंदर सुत परम किसोरा ॥
मुनि नृप गिरा प्रेम रस सानी । हृदयँ हरष माना मुनि ग्यानी ॥
तब बसिष्ठ बहुबिधि समुझावा । नृप संदेह नास कहँ पावा ॥
अति आदर दोउ तनय बोलाए । हृदयँ लाइ बहु भाँति सिखाए ॥
मेरे प्रान नाथ सुत दोऊ । तुम्ह मुनि पिता आन नहिं कोऊ ॥
दो०—सौंपे भूप रिषिहि सुत बहुबिधि देइ असीस ।

जननी भवन गए प्रभु चले नाइ पद सीस ॥२०८(क)॥

सो०—पुरुषसिंह दोउ बीर हरषि चले मुनि भय हरन ।

कृपासिंधु मतिधीर अखिल बिस्व कारन करन ॥२०८(ख)॥

अरुन नयन उर बाहु बिसाला । नील जलज तनु स्याम तमाला ॥
कटि पट पीत कसैं बर भाया । रुचिर चाप सायक दुहुँ हाया ॥
स्याम गौर सुंदर दोउ भाई । बिस्वामित्र महानिधि पाई ॥
प्रभु ब्रह्मन्यदेव मैं जाना । मोहि नित पिता तजेउ भगवाना

चले जात मुनि दीन्हि देखाई। सुनि ताड़का क्रोध करि धाई ॥
 एकहिं बान प्रान हरि लीन्हा। दीन जानि तेहि निज पद दीन्हा ॥
 तब रिषि निज नाथहि जियँ चीन्ही। विद्यानिधि कहूँ विद्या दीन्ही ॥
 जाते लाग न छुधा पिपासा। अतुलित बल तनु तेज प्रकासा ॥
 दो०—आयुध सर्व समर्पि कै प्रभु निज आश्रम आनि ।

कंद मूल फल भोजन दीन्ह भगति हित जानि ॥२०९॥
 प्रात कहा मुनि सन रघुराई। निर्भय जग्य करहु तुम्ह जाई ॥
 होम करन लागे मुनि शरी। आपु रहे मख कीं रखवारी ॥
 सुनि मारीच निसाचर क्रोही। लै सहाय धावा मुनिद्रोही ॥
 बिनु फर बान राम तेहि मारा। सत जोजन गा सागर पारा ॥
 पावक सर सुबाहु पुनि मारा। अनुज निसाचर कटकु सँघारा ॥
 मारि असुर द्विज निर्भयकारी। अस्तुति करहिं देव मुनि शरी ॥
 तहँ पुनि कछुक दिवस रघुराया। रहे कीन्हि बिप्रन्ह पर दाया ॥
 भगति हेतु बहु कथा पुराना। कहे विप्र जद्यपि प्रभु जाना ॥
 तब मुनि सादर कहा बुझाई। चरित एक प्रभु देखिअ जाई ॥
 धनुषजग्य सुनि रघुकुल नाथा। हरषि चले मुनिवर के साथ ॥
 आश्रम एक दीख मग माहीं। खग मृग जीव जंतु तहँ नाहीं ॥
 पूछा मुनिहि सिला प्रभु देखी। सकल कथा मुनि कहा बिसेषी ॥
 दो०—गाँतम नारि श्राप बस उपल देह धरि धीर ।

चरन कमल रज चाहति कृपा करहु रघुबीर ॥२१०॥

छं०—परसत पद पावन लोक नसावन प्रगट भई तपपुंज सही ।
 देखत रघुनायक जन सुख दायक सनमुख होइ कर जोरि रही ॥
 अति प्रेम अधीरा पुलक सरीरा मुख नहि आवइ बचन कही ।
 अतिसय बड़भागी चरननिह लागी जुगल नयन जलधार बही ॥
 धीरजु मन कीन्हा प्रभु कहूँ चीन्हा रघुपति कृपाँ भगति पाई ।
 अति निर्मल बानी अस्तुति ठानी ग्यानगम्य जय रघुराई ॥
 मैं नारि अपावन प्रभु जग पावन रावन रिपु जन सुखदाई ।
 राजीव बिलोचन भव भय मोचन पाहि पाहि सरनहि आई ॥
 मुनि श्राप जो दीन्हा अति भल कीन्हा परम अनुग्रह मैं माना ।
 देखेउँ भरि लोचन हरि भवमोचन इहइ लाभ संकर जाना ॥
 बिनती प्रभु मोरी मैं मति भोरी नाथ न मागउँ बर आना ।
 पद कमल परागा रस अनुरागा मम मन मधुप करै पाना ॥
 जेहि पद सुरसरिता परम पुनीता प्रगट भई सिंघ सीस धरी ।
 सोई पद पंकज जेहि पूजत अज मम सिर धरेउ कृपाल हरी ॥
 एहि भाँति सिधारी गौतम नारी बार बार हरि चरन परी ।
 जो अति मन भावा सो बरु पावा गै पतिलोक अनंद भरी ॥
 दो०—अस प्रभु दीनबंधु हरि कारन रहित दयाल ।

तुलसिदास सठ तेहि भजु छाड़ि कपट जंजाल ॥२११॥

मासपारायण, सातवाँ विश्राम

चले राम लछिमन मुनि संगी । गए जहाँ जग पावनि गंगा ॥
 माधिसुत सब कथा सुनाई । जेहि प्रकार सुरसरि भाई आई ॥

तव प्रभु रिषिन्ह समेत नहाए । विविध दान महिदेवन्हि पाए ॥
हरषि चले मुनि बृंद सहाया । बेगि बिदेह नगर निअराया ॥
पुर रम्यता राम जव देखी । हरषे अनुज समेत विसेषी ॥
बापीं कूप सरित सर नाना । सलिल सुधासम मनि सोपाना ॥
गुंजत मंजु मत्त रस भृंगा । कूजत कल बहुवरन बिहंगा ॥
बरन बरन बिकसे बन जाता । त्रिविध समीर सदा सुखदाता ॥

दो०—सुमन बाटिका बाग बन बिपुल बिहंग निवास ।

फूलत फलत सुपल्लवत सोहत पुर चहुँ पास ॥२१२॥

वनइ न बरनत नगर निकाई । जहाँ जाइ मन तहँई लोभाई ॥
चारु बजारु बिचित्र अँबारी । मनिमय बिधि जनु स्वकर सँवारी
धनिक बनिक बर धनद समाना । बैठे सकल बस्तु लै नाना ॥
चौहट सुंदर गर्ली सुहाई । संतत रहहिं सुगंध सिँचाई ॥
मंगलमय मंदिर सब केरें । चित्रित जनु रतिनाथ चितेरें ॥
पुर नर नारि सुभग सुचि संता । धरमसील ग्यानी गुनवंता ॥
अति अनूप जहँ जनक निवासू । बिथकहिं विबुध विलोकि बिलासू
होत चकित चित कोट विलोकी । सकल भुवन सोभा जनु रोकी ॥

दो०—धवल धाम मनि पुरट पट सुघटित नाना भाँति ।

सिय निवास सुंदर सदन सोभा किमि कहि जाति ॥२१३॥

सुभाष दास सब कुलिस कामास । भूप भीर नट बाबध भास्य ॥

वनी बिसाल बाजि गज साला । हय गयरथ संकुल सब काला ॥

सूर सचिव सेनप बहुतेरे । नृपगृह सरिस सदन सब केरे ॥
 पुर बाहेर सर सरित समीपा । उतरे जहँ तहँ विपुल महीपा ॥
 देखि अनूप एक अँवराई । सब सुपास सब भाँति सुहाई ॥
 कौसिक कहेउ मोर मनु माना । इहाँ रहिअ रघुवीर सुजाना ॥
 भलेहिं नाथ कहि कृपानिकेता । उतरे तहँ मुनिबृंद समेता ॥
 बिस्वामित्र महामुनि आए । समाचार मिथिलपति पाए ॥

दो०—संग सचिव सुचि भूरि भट भूसुर बर गुर ग्याति ।

चले मिलन मुनिनायकहि मुदित राउ एहि भाँति ॥२१४॥

कीन्ह प्रनामु चरन धरि माथा । दीन्हिअसीस मुदित मुनिनाथा ॥
 विप्रबृंद सब सादर बंदे । जानि भाग्य बड़ राउ अनंदे ॥
 कुसल प्रज्ञ कहि बारहिं बारा । बिस्वामित्र नृपहि बैठारा ॥
 तेहि अवसर आए दोउ भाई । गए रहे देखन फुलवाई ॥
 स्याम गौर मृदु बयस किसोरा । लोचन सुखद बिस्व चित चोरा ॥
 उठे सकल जव रघुपति आए । बिस्वामित्र निकट बैठाए ॥
 भए सब सुखी देखि दोउ भ्राता । बारि बिलोचन पुलकित गाता ॥
 मूरति मधुर मनोहर देखी । भयउ बिदेहु बिदेहु बिसेषी ॥

दो०—प्रेम मगन मनु जानि नृपु करि बिबेकु धरि धीर ।

बोलेउ मुनि पद नाइ सिरु गदगद गिरा गभीर ॥२१५॥

कहेहु नाथ सुंदर दोउ बालक । मुनिकुल तिलक कि नृपकुल पालक
 ब्रह्म जो निगम नेति कहि गावा । उभय वेष धरि की सोइ आवा ॥

सहज विरागरूप मनु मोरा । यकित होत जिमि चंद चकोरा ॥
ताते प्रभु पृच्छउँ सतिभाऊ । कहहु नाथ जनि करहु दुराऊ ॥
इन्हहि विलोकत अति अनुरागा । बरबस ब्रह्मसुखहि मन त्यागा ॥
कह मुनि बिहसि कहेहु नृप नीका । बचन तुम्हार न होइ अलीका ॥
ये प्रिय सबहि जहाँ लागि प्रानी । मन मुसुकाहिं रामु मुनि बानी ॥
रघुकुल मनि दसरथ के जाए । मम हित लागि नरेस पठाए ॥
दो०—रामु लखनु दोउ बंधुबर रूप सील बल धाम ।

मख राखेउ सत्रु साखि जगु जिते असुर संग्राम ॥२१६॥
मुनि तव चरन देखि कह राऊ । कहि न सकउँ निज पुन्य प्रभाऊ
सुंदर स्याम गौर दोउ भ्राता । आनँदहू के आनँद दाता ॥
इन्ह कै प्रीति परसपर पावनि । कहि न जाइ मन भाव सुहावनि
सुनहु नाथ कह मुदित बिदेहू । ब्रह्म जीव इव सहज सनेहू ॥
पुनि पुनि प्रभुहि चितव नरनाहू । पुलक गात उर अधिक उछाहू
मुनिहि प्रसंसि नाइ पद सीसू । चलेउ लवाइ नगर अवनीसू ॥
सुंदर सदन सुखद सब काला । तहाँ बासु लै दीन्ह भुआला ॥
करि पूजा सब विधि सेवकाई । गयउ राउ गृह बिदा कराई ॥
दो०—रिषय संग रघुबस मनि करि भोजनु बिश्रामु ।

बैठे प्रभु भ्राता सहित दिवसु रहा भरि जामु ॥२१७॥

लखन हृदय लालसा बिसेप्री । जाइ जनकपुर आइअ देखी ॥
प्रभु भय बहुरि मुनिहि सकुचार्ही । प्रगट न कहहि मनहिं मुसुकाहिं

राम अनुज मन की गति जानी । भगत बल्लता हियँ हुलसानी ॥
 परम विनीत सकुचि मुसुकाई । बोले गुर अनुसासन पाई ॥
 नाथ लखनु पुरु देखन चहहीं । प्रभु सकोच डर प्रगट न कहहीं ॥
 जौ राउर आयसु मैं पावौं । नगर देखाइ तुरत लै आवौं ॥
 मुनि मुनीसु कह बचन सप्रीती । कस न राम तुम्ह राखहु नीती ॥
 धरम सेतु पालक तुम्ह ताता । प्रेम बिबस सेवक सुखदाता ॥
 दो०—जाइ देखि आवहु नगर सुख निधान दोउ भाइ ।

करहु सुफल सब के नयन सुंदर बदन देखाइ ॥२१८॥

मुनि पद कमल बंदि दोउ भ्राता । चले लोक लोचन सुख दाता ॥
 बालक वृंद देखि अति सोभा । लगे संग लोचन मनु लोभा ॥
 पीत वसन परिकर कटि भाथा । चारु चाप सर सोहत हाथा ॥
 तन अनुहरत सुचंदन खोरी । स्यामल गौर मनोहर जोरी ॥
 केहरि कंधर बाहु बिसाला । उर अति रुचिर नागमनि माला ॥
 सुभग सोन सरसीरुह लोचन । वदन मयंक तापत्रय मोचन ॥
 कानन्हि कनक फूल छवि देहीं । चितवत चितहि चोरि जनु लेहीं ॥
 चितवनि चारु भृकुटि बर बाँकी । तिलक रेख सोभा जनु चाँकी ॥
 दो०—रुचिर चौतर्नीं सुभग सिर मेचक कुंचित केस ।

नख सिख सुंदर बंधु दोउ सोभा सकल सुदेस ॥२१९॥

देखन नगर भूपति आय । समाचार सुनवा सिद्ध पाए ॥
 धाए धाग काम सब त्यागी । मनहुँ रंक निधि लूटन लागी ॥

निरखि सहज सुंदर दोउ भाई। होहिं सुखी लोचन फल पाई॥
 जुवर्ती भवन झरोखन्हि लागीं। निरखहिं राम रूप अनुरागीं॥
 कहहिं परसपर वचन सप्रीती। सखि इन्ह कोटि काम छवि जीती
 सुर नर असुर नाग मुनि माहीं। सोभा असि कहूँ सुनिअति नाहीं॥
 विष्णु चारि भुज विधि मुख चारी। विकट वेष मुख पंच पुरारी॥
 अपर देउ अस कोउ न आही। यह छवि सखी पटतरिअ जाही॥

दो०—ब्रय किसोर सुषमा सदन स्याम गौर सुख धाम।

अंग अंग पर वारिअहिं कोटि कोटि सत काम ॥२२०॥

कहहु सखी अस को तनुधारी। जो न मोह यह रूप निहारी॥
 कोउ सप्रेम बोली मृदु बानी। जो मैं सुना सो सुनहु स्यानी॥
 ए दोऊ दसरथ के ढोटा। बाल मरालन्हि के कल जोटा॥
 मुनि कौसिक मुख के रखवारे। जिन्ह रन अजिर निसाचर मारे॥
 स्याम गात कल कंज बिलोचन। जो मारीच सुभुज मदु मोचन॥
 कौसल्या सुत सो सुख खानी। नामु राम धनु सायक पानी॥
 गौर किसोर बेषु बर काछें। कर सर चाप राम के पाछें॥
 लछिमनु नामु राम लघु भ्राता। सुनु सखि तासु सुमित्रा माता॥

दो०—बिप्रकाजु करि बंधु दोउ मग मुनिबधू उधारि।

आए देखन चापमुख सुनि हरषीं सब नारि ॥२२१॥

देखि राम छवि कोउ एक कहई। जोगु जानकिहि यह बरु अहई॥
 जो सखि इन्हहि देख नरनाहू। पन परिहरि हटि करइ बिबाहू॥

कोउ कह ए भूपति पहिचाने । मुनि समेत सादर सनमाने ॥
 सखि परंतु पनु राउ न तजई । विधि बस हठि अबिवेकहि भजई
 कोउ कह जौं भल अहइ विधाता । सब कहँ सुनिअ उचित फलदाता
 तौ जानकिहि मिलिहि बरु एहू । नाहिन आलि इहाँ संदेहू ॥
 जौं विधि बस अस बनै सँजोगू । तौ कृतकृत्य होइ सब लोगू ॥
 सखि हमरें आरति अति तातें । कवहुँक ए आवहिं एहि नातें ॥

दो०—नाहिं त हम कहुँ सुनहु सखि इन्ह कर दरसनु दूरि ।

यह संघटु तब होइ जब पुन्य पुराकृत भूरि ॥२२२॥

बोली अपर कहेहु सखि नीका । एहिं विआह अति हित सबही का
 कोउ कह संकर चाप कठोरा । ए स्यामल मृदुगात किसोरा ॥
 सबु असमंजस अहइ सयानी । यह सुनि अपर कहइ मृदु बानी ॥
 सखि इन्ह कहँ कोउ कोउ अस कहहीं । बड़ प्रभाउ देखत लघु अहहीं
 परसि जासु पद पंकज धूरी । तरी अहल्या कृत अघ भूरी ॥
 सो कि रहिहि विनु सिव धनु तोरें । यह प्रतीति परिहरिअ न भोरें ॥
 जेहिं विरंचि रचि सीथ सँवारी । तेहिं स्यामल बरु रचेउ बिचारी ॥
 तासु वचन सुनि सब हरप्रानीं । ऐसेइ होउ कहहिं मृदु बानीं ॥

दो०—हियँ हरषहिं बरषहिं सुमन सुमुखि सुलोचनि वृंद ।

जाहिं जहाँ जहँ बंधु दोउ तहँ तहँ परमानंद ॥२२३॥

पुर पुरव दिसि गे दोउ भाई । जहँ धनुषाख हित भूमि बनाई ॥

अति बिस्तार चारु गच दारी । बिमल वेदिका रुचिर सँवारी ॥

चहुँ दिसिकंचन मंच बिसाला । रचे जहाँ बैठहिं मंहिपाला ॥
 तेहि पाछें समीप चहुँ पासा । अपर मंच मंडली बिलासा ॥
 कछुक ऊँचि सब भाँति सुहाई । बैठहिं नगर लोग जहँ जाई ॥
 तिन्ह के निकट बिसाल सुहाए । धवल धाम बहुबरन बनाए ॥
 जहँ बैठें देखहिं सब नारी । जथाजोगु निज कुल अनुहारी ॥
 पुर बालक कहि कहि मृदु बचना । सादर प्रभुहि देखावहिं रचना ॥

दो०—सब सिसु एहि मिस प्रेमबस परसि मनोहर गात ।

तन पुलकहिं अति हरषु हियँ देखि देखि दोउ भ्रात ॥२२४॥

सिसु सब राम प्रेमबस जाने । प्रीति समेत निकेत बखाने ॥
 निज निज रुचि सब लेहिं बोलाई । सहित सनेह जाहिं दोउ भाई ॥
 राम देखावहिं अनुजहि रचना । कहि मृदु मधुर मनोहर बचना ॥
 लव निमेष महुँ भुवन निकाया । रचइ जासु अनुसासन माया ॥
 भगति हेतु सोइ दीनदयाल । चितवत चकित धनुष मखसाला ॥
 कौतुक देखि चले गुरु पाहीं । जानि बिलंबु त्रास मन माहीं ॥
 जासु त्रास डर कहुँ डर होई । भजन प्रभाउ देखावत सोई ॥
 कहि बातें मृदु मधुर सुहाई । किए विदा बालक बरिआई ॥

दो०—सभय सप्रेम बिनीत अति सकुच सहित दोउ भाइ ।

गुर पद पंकज नाइ सिर बैठे आयसु पाइ ॥२२५॥

निसि प्रवेश मुनि आयसु दीन्या । सबहीं संन्यासंदतु कीन्हा ॥
 कहत कथा इतिहास पुरानी । रुचिर रजनि जुग जाम सिरानी ॥

मुनिवर सयन कीन्हि तब जाई। लगे चरन चापन दोउ भाई॥
 जिन्ह के चरन सरोरुह लागी। करत विविध जप जोग बिरागी॥
 तेइ दोउ बंधु प्रेम जनु जीते। गुर पद कमल पलोत्त प्रीते॥
 बार बार मुनि अग्या दीन्ही। रघुवर जाइ सयन तब कीन्ही॥
 चापत चरन लखनु उर लाएँ। समय सप्रेम परम सचु पाएँ॥
 पुनि पुनि प्रभु कह सोवहु ताता। पौढ़े धरि उर पद जलजाता॥
 दो०—उठे लखनु निसि बिगत सुनि अरुन सिखा धुनि कान।

गुर तें पहिलेहि जगतपति जागे रामु सुजान ॥२२६॥

सकल सौच करि जाइ नहाए। नित्य निवाहि मुनिहि सिर नाए॥
 समय जानि गुर आयसु पाई। लेन प्रसून चले दोउ भाई॥
 भूप बागु बर देखेउ जाई। जहँ वसंत रितु रही लोभाई॥
 लागे विटप मनोहर नाना। बरन बरन बर बेलि बिताना॥
 नव पल्लव फल सुमन सुहाए। निज संपति सुर रूख लजाए॥
 चातक कोकिल कीर चकोरा। कूजत बिहग नटत कल मोरा॥
 मध्य बाग सरु सोह सुहावा। मनि सोपान विचित्र बनावा॥
 विमल सलिलु सरसिज बहुरंगा। जलखग कूजत गुंजत भृंगा॥

दो०—बागु तड़ागु बिलोकि प्रभु हरषे बंधु समेत।

परम रम्य आरासु यहु जो रामहि सुख देत ॥२२७॥

चहुँ दिसि चित्तइ पूँछि मालीमन। लगे लेन दल फूल मुदित मन ॥

तेहि अवसर सीता तहँ आई। गिरिजा पूजन जननि पठाई॥

संग सखीं सब सुभग सयानीं । गावहिं गीत मनोहर बानीं ॥
 सर समीप गिरिजा गृह सोहा । बरनि न जाइ देखि मनु मोहा ॥
 मञ्जनु करि सर सखिन्ह समेता । गई मुदित मन गौरि निकेता ॥
 पूजा कीन्हि अधिक अनुरागा । निज अनुरूप सुभग बरु मागा ॥
 एक सखी सिय संगु बिहाई । गई रही देखन फुलवाई ॥
 तेहिं दोउ बंधु बिलोके जाई । प्रेम बिबस सीता पहिं आई ॥
 दो०—तासु दसा देखी सखिन्ह पुलक गात जलु नैन ।

कहु कारनु निज हरष कर पूछहिं सब मृदु बैन ॥२२८॥
 देखन बागु कुअँर दुइ आए । बय कितोर सब भाँति सुहाए ।
 स्याम गौर किमि कहौं बखानी । गिरा अनयन नयन बिनु बानी ॥
 मुनि हर षीं सब सखीं सयानी । सिय हियँ अति उतकंठा जानी ॥
 एक कहइ नृपसुत तेइ आली । सुने जे मुनि सँग आए काली ॥
 जिन्ह निज रूप मोहनी डारी । कीन्हे स्वबस नगर नर नारी ॥
 बरनत छवि जहँ तहँ सब लोगू । अवसि देखिअहिं देखन जोगू ॥
 तासु बचन अति सियहि सोहाने । दरस लागि लोचन अकुलाने ॥
 चली अग्र करि प्रिय सखि सोई । प्रीति पुरातन लखइ न कोई ॥
 दो०—सुमिरि सीय नारद बचन उपजी प्रीति पुनीत ।

चकित बिलोकति सकल दिसि जनु सिसु मृगी समीत ॥ २२९ ॥
 कंकन किंकिनि नूपुर धुनि सुनि । कहत लखन सन रामु हृदयँ गुनि
 मानहुँ मदन दुंदुभी दीन्ही । मनसा विष्व विजय कहँ कीन्ही ॥

अस कहि फिरि चितए तेहि ओरा । सिय मुख ससि भए नयन चकोरा
 भए विलोचन चारु अचंचल । मनहुँ सकुचि निमि तजे दिगंचल
 देखि सीय सोभा सुखु पावा । हृदयँ सराहत बचनु न आवा ॥
 जनु बिरंचि सब निज निपुनाई । बिरचि बिस्व कहँ प्रगटि देखाई
 सुंदरता कहँ सुंदर करई । छविगृहँ दीपसिखा जनु बरई ॥
 सब उपमा कवि रहे जुठारी । केहिं पटतरौं विदेहकुमारी ॥
 दो०—सिय सोभा हियँ बरनि प्रभु आपनि दसा बिचारि ।

बोले सुचि मन अनुज सन बचन समय अनुहारि ॥२३०॥

तात जनकतनया यह सोई । धनुषजग्य जेहि कारन होई ॥
 पूजन गौरि सखीं लै आई । करत प्रकासु फिरइ फुलवाई ॥
 जासु विलोकि अलौकिक सोभा । सहज पुनीत मोर मनु छोभा ॥
 सो सबु कारन जान बिधाता । फरकहिं सुभद अंग सुनु भ्राता ॥
 रघुवंसिन्ह कर सहज सुभाऊ । मनु कुपंथ पगु धरइ न काऊ ॥
 मोहि अतिसय प्रतीति मन केरी । जेहिं सपनेहुँ परनारि न हेरी ॥
 जिन्ह कै लहहिं न रिपु रन पीठी । नहिं पावहिं परतिय मनु डीठी ॥
 मंगन लहहिं न जिन्ह कै नाहीं । ते नरवर थोरे जग माहीं ॥
 दो०—करत बतकही अनुज सन मन सिय रूप लोभान ।

मुख सरोज मकरंद छबि करइ मधुप इव पान ॥२३१॥

चितवति चकितचहुँ दिसि सीता । कहँ गए नृपकिसोर मनु चिता ॥
 जहँ विलोक मृग सावक नेनी । जनु तहँ बरिस कमल सि

लता ओट तव सखिन्ह लखाए । स्यामल गौर किसोर सुहाए॥
देखि रूप लोचन ललचाने । हरषे जनु निज निधि पहिचाने
थके नयन रघुपति छवि देखें । पलकन्हिहूँ परिहरीं निमेषें॥
अधिक सनेहँ देह भै भोरी । सरद ससिहि जनु चितव चकोरी
लोचन मग रामहि उर आनी । दीन्है पलक कपाट सयानी ॥
जव सिय सखिन्ह प्रेमवस जानी । कहि न सकहिं कछु मन सकुचानी
दो०—लताभवन तें प्रगट भे तेहि अवसर दोउ भाइ ।

निकसे जनु जुग विमल बिधु जलद पटल बिलगाइ॥ २३२॥
सोभा सीवँ सुभग दोउ बीरा । नील पीत जलजाम सरीरा ॥
मोरपंख सिर सोहत नीके । गुच्छ बीच बिच कुसुम कलीके
भाल तिलक श्रमविंदु सुहाए । श्रवन सुभग भूषन छवि छाए॥
बिकट भृकुटि कच घूघरवारे । नव सरोज लोचन रतनारे ॥
चारु चिबुक नासिका कपोल । हास बिलास लेत मनु मोल ॥
मुखछवि कहि न जाइ मोहि पाहीं । जो विलोकि बहु काम लजाहीं॥
उर मनिमाल कंबु कल गीवा । काम कलभ कर भुज बलसीवा ॥
सुमन समेत बाम कर दोना । सावँर कुअँर सखी सुठि लोना ॥
दो०—केहरि कटि पट पीत धर सुषमा सील निधान ।

देखि भानुकुलभूषनहि बिसरा सखिन्ह अपान ॥ २३३॥
धरि धीरजु एक आलि सयानी । सीता सन बोली गहि पानी ॥
बहुरि गौरि कइ ध्यान करेह । भूपकिसोर देखि किन लेह ॥

सकुचि सीयँ तब नयन उघारे । सनमुख दोउ रघुसिंघ निहारे ॥
 नख सिख देखि राम कै सोभा । सुमिरि पिता पनु मनु अति छोभा
 परबस सखिन्ह लखी जब सीता । भयउ गहरु सब कहहिं समीता ॥
 पुनि आउब एहि बेरिआँ काली । अस कहि मन बिहसी एक आली
 गूढ़ गिरा सुनि सिय सकुचानी । भयउ बिलंबु मातु भयमानी ॥
 धरि बड़ि धीर रामु उर आने । फिरी अपनपउ पितुबस जाने ॥

दो०—देखन मिस मृग बिहग तरु फिरइ बहोरि बहोरि ।

निरखि निरखि रघुबीर छवि बाढ़इ प्रीति न थोरि ॥२३४॥

जानि कठिन सिव चाप बिसूरति । चली राखि उर स्यामल मूरति ॥
 प्रभु जब जात जानकी जानी । सुख सनेह सोभा गुन खानी ॥
 परम प्रेममय मृदु मसि कीन्ही । चारु चित्त भीतीं लिखि लीन्ही ॥
 गई भवानो भवन बहोरी । बंदि चरन बोली कर जोरी ॥
 जय जय गिरिवरराज किसोरी । जय महेस मुख चंद चकोरी ॥
 जय गजबदन घडानन माता । जगत जननि दामिनि दुति गाता
 नहिं तव आदि मध्य अवसाना । अमित प्रभाउ बेदु नहिं जाना ॥
 भव भव बिभव पराभव कारिनि । बिस्व विमोहनि स्वयस बिहारिनि
 दो०—पतिदेवता सुतीय महुँ मातु प्रथम तव रेख ।

महिमा अमित न सकहिं कहि सहस सारदा सेष ॥२३५॥

सेवत तोहि सुलभ फल चारी । वरदायनी पुरारि पिआरी ॥
 देवि पूजि पद कमल तुम्हारे । सुरनर मुनि सब होहि सुखारे ॥

मोर मनोरथ जानहु नीकैं। बसहु सदा उर पुर सबही कैं॥
 कीन्हेउँ प्रगट न कारन तेहीं। अस कहि चरन गहे बैदेहीं॥
 बिनय प्रेम बस भई भवानी। खसी माल मूरति मुसुकानी॥
 सादर सियँ प्रसादु सिर धरेऊ। बोली गौरि हरषु हियँ भरेऊ॥
 सुनु सिय सत्य असीस हमारी। पूजिहि मन कामना तुम्हारी॥
 नारद बचन सदा सुचि साचा। सो बरु मिलिहि जाहिं मनु राचा॥
 छं०—मनु जाहिं राचेउ मिलिहि सो बरु सहज सुंदर साँवरो।
 करुना निधान सुजान सीलु सनेहु जानत रावरो॥
 एहि भाँति गौरि असीस सुनि सिय सहित हियँ हरषीं अली।
 तुलसी भवानिहि पूजि पुनि पुनि मुदित मन मंदिर चली॥
 सो०—जानि गौरि अनुकूल सियहिय हरषु न जाइ कहि।

मंजुल मंगल मूल बाम अंग फरकन लगे ॥२३६॥

हृदयँ सराहत सीय लोनाई। गुर समीप गवने दोउ भाई॥
 राम कहा सबु कौसिक पाहीं। सरल सुभाउ छुअत छल नाहीं॥
 सुमन पाइ मुनि पूजा कीन्ही। पुनि असीस दुहु भाइन्ह दीन्ही॥
 सुफल मनोरथ होहुँ तुम्हारे। रामु लखनु सुनि भए सुखारे॥
 करि भोजनु मुनिवर बिग्यानी। लगे कहन कछु कथा पुरानी॥
 विगत दिवसु गुरु आयसु पाई। संध्या करन चले दोउ भाई॥
 प्राची दिसि ससि उयउ सुहावा। सिय मुख सरिस देखि सुखु पावा॥
 बहुरि बिचार कीन्ह सम पाहीं। सीय बचन सम हिमकर पाहीं॥

दो०—जनमु सिंधु पुनि बंधु बिषु दिन मलीन सकलंक ।

सिय मुख समता पाव किमि चंदु बापुरो रंक ॥२३७॥

घटइ बढइ बिरहिनि दुखदाई । असइ राहु निज संधिहिं पाई ॥
 कोक सोकप्रद पंकज द्रोही । अवगुन बहुत चंद्रमा तोही ॥
 वैदेही मुख पटतर दीन्हे । होइ दोषु बड़ अनुचित कीन्हे ॥
 सिय मुख छवि बिधु व्याज बखानी । गुर पहिं चले निसा बड़ि जानी
 करि मुनि चरन सरोज प्रनामा । आयसु पाइ कीन्ह विश्रामा ॥
 बिगत निसा रघुनायक जागे । बंधु विलोकि कहन अस लागे ॥
 उयउ अरुन अवलोकहु ताता । पंकज कोक लोक सुखदाता ॥
 बोले लखनु जोरि जुग पानी । प्रभु प्रभाउ सूचक मृदु बानी ॥
 दो०—अरुनोदयँ सकुचे कुमुद उडगन जोति मलीन ।

जिमि तुम्हार आगमन सुनि भए नृपति बलहीन ॥२३८॥

नृप सब नखत करहिं उजिआरी । टारि न सकहिं चाप तम भारी ॥
 कमल कोक मधुकर खग नाना । हरषे सकल निसा अवसाना ॥
 ऐसेहिं प्रभु सब भगत तुम्हारे । होइहहिं दूटें धनुष सुखारे ॥
 उयउ भानु बिनु श्रम तम नासा । दुरे नखत जग तेजु प्रकासा ॥
 रवि निज उदय व्याज रघुराया । प्रभु प्रतापु सब नृपन्ह दिखाया ॥
 तव भुज बल महिमा उदघाटी । प्रगटी धनु बिघटन परिपाटी ॥
 बंधु बचन सुनि प्रभु मुसुकाने । होइ सुचि सहज पुनीत नहाने ॥
 नित्यक्रिया करि गुरु पहिं आए । चरन सरोज सुभग सिर नाए ॥

सतानंदु तव जनक बोलाए। कौसिक मुनि पहिं तुरत पठाए ॥
जनक विनय तिन्ह आइ सुनाई। हरषे बोलि लिए दोउ भाई ॥
दो०—सतानंद पद बंदि प्रभु बैठे गुर पहिं जाइ ।

चलहु तात मुनि कहेउ तव पठवा जनक बोलाइ ॥२३९॥

मासपारायण, आठवाँ विश्राम

नवाह्नपारायण, दूसरा विश्राम

सीय स्वयंवर देखिअ जाई। ईसु काहि धौं देइ बड़ाई ॥
लखन कहा जस भाजनु सोई। नाथ कृपा तव जापर होई ॥
हरषे मुनि सब सुनि बर बानी। दीन्हि असीस सबहिं सुखु मानी ॥
पुनि मुनिवृंद समेत कृपाला। देखन चले धनुषमख साला ॥
रंगभूमि आए दोउ भाई। असि सुधि सब पुरबासिन्ह पाई ॥
चले सकल गृह काज बिसारी। बाल जुवान जरठ नर नारी ॥
देखी जनक भीर मै भारी। सुचि सेवक सब लिए हँकारी ॥
तुरत सकल लोगन्ह पहिं जाहू। आसन उचित देहु सब काहू ॥
दो०—कहि मृदु बचन बिनीत तिन्ह बैठारे नर नारि ।

उत्तम मध्यम नीच लघु निज निज थल अनुहारि ॥२४०॥

राजकुअँर तेहि अवसर आए। मनहुँ मनोहरता तन छाए ॥
गुन सागर नागर बर वीरा। सुंदर स्यामल गौर सरीरा ॥
राज समाज बिराजत रुरे। उडगन महुँ जनु जुग विधु पूरे ॥

जिन्ह के रही भावना वैसी। प्रभु मूरति तिन्ह देखी सैसी ॥

देखहिं रूप महा रनधीरा । मनहुँ वीर रसु धरें सरीरा ॥
 डरे कुटिल नृप प्रभुहि निहारी । मनहुँ भयानक मूरति भारी ॥
 रहे असुर छल छोनिप वेषा । तिन्ह प्रभु प्रगट कालसम देखा ॥
 पुरवासिन्ह देखे दोउ भाई । नरभूषन लोचन सुखदाई ॥
 दो०—नारि बिलोकहिं हरषि हियँ निज निज रुचि अनुरूप ।

जनु सोहत सिंगार धरि मूरति परम अनूप ॥२४१॥

विदुषन्ह प्रभु विराटमय दीसा । बहु मुख कर पग लोचन सीसा ॥
 जनक जाति अवलोकहिं कैसैं । सजन सगे प्रिय लगहिं जैसैं ॥
 सहित विदेह बिलोकहिं रानी । सिसु सम प्रीति न जाति बखानी ॥
 जोगिन्ह परम तत्त्वमय भासा । सांत सुद्ध सम सहज प्रकासा ॥
 हरिभगतन्ह देखे दोउ भ्राता । इष्टदेव इव सब सुख दाता ॥
 रामहि चितव भायँ जेहि सीया । सो सनेहु सुखु नहिं कथनीया ॥
 उर अनुभवति न कहि सक सोऊ । कवन प्रकार कहै कवि कोऊ ॥
 एहि बिधि रहा जाहि जस भाऊ । तेहि तस देखेउ कोसल राज ॥
 दो०—राजत राज समाज महुँ कोसलराज किसोर ।

सुंदर स्यामल गौर तन बिस्व बिलोचन चोर ॥२४२॥

सहज मनोहर मूरति दोऊ । कोटि काम उपमा लघु सोऊ ॥
 सरद चंद निंदक मुख नीके । नीरज नयन भावते जी के ॥
 चितवनि चारु मार मनु हरनी । भावति हृदय जाति नहिं बरनी ॥
 कल कपोल श्रुति सुंदर लोला । चिबुक अधर सुंदर मृदु बोला ॥

कुमुदबंधु कर निंदक हाँसा । भृकुटी विकट मनोहर नासा ॥
 भाल बिसाल तिलक झलकाहीं । कच विलोकि अलि अवलि लजाहीं
 पीत चौतर्नीं सिरन्हि सुहाई । कुसुम कलीं बिच बीच बनाई ॥
 रेखें रुचिर कंबु कल गीवाँ । जनु त्रिभुवन सुषमा की सीवाँ ॥

दो०—कुंजर मनि कंठा कलित उरन्हि तुलसिका माल ।

वृषभ कंध केहरि ठवनि बल निधि बाहु बिसाल ॥२४३॥
 कटि तूनीर पीत पट बाँधें । कर सर धनुष बाम बर काँधें ॥
 पीत जग्य उपनीत सुहाए । नख सिख मंजु महाछवि छाए ॥
 देखि लोग सब भए सुखारे । एकटक लोचन चलत न तारे ॥
 हरषे जनंकु देखि दोउ भाई । मुनि पद कमल गहे तब जाई ॥
 करि विनती निज कथा सुनाई । रंग अवनि सब मुनिहि देखाई ॥
 जहँ जहँ जाहि कुअँर बर दोऊ । तहँ तहँ चकित चितव सबु कोऊ ॥
 निज निज रुख रामहि सबु देखा । कोउ न जान कछु मरमु बिसेषा ॥
 भलि रचना मुनि नृप सन कहेऊ । राजाँ मुदित महासुख लहेऊ ॥

दो०—सब मंचन्ह तें मंचु एक सुंदर बिसद बिसाल ।

मुनि समेत दोउ बंधु तहँ बैठारे महिपाल ॥२४४॥
 प्रभुहि देखि सब नृप हियँ हारे । जनु राकेस उदय भएँ तारे ॥
 असि प्रतीति सब के मन माहीं । राम चाप तोरब सक नाहीं ॥
 विनु भंजेहुँ भव धनुषु बिसाल । मेलिहि सीय राम उर माला ॥
 अस बिचारि गवनहु घर भाई । जसु प्रतापु बलु तेजु गवाई ॥

बिहसे अपर भूप सुनि बानी । जे अविवेक अंध अभिमानी ॥
 तोरेहुँ धनुषु व्याहु अवगाहा । बिनु तोरें को कुअँरि बिआहा ॥
 एक बार कालउ किन होऊ । सिय हित समर जितव हम सोऊ ॥
 यह सुनि अवर महिप मुसुकाने । धरमसील हरिभगत सयाने ॥

सो०—सीय बिआहबि राम गरब दूरि करि नृपन्ह के ।

जीति को सक संग्राम दसरथ के रन बाँकुरे ॥२४५॥
 व्यर्थ मरहु जनि गाल बजाई । मन मोदकन्हि कि भूख बुताई ॥
 सिख हमारि सुनि परम पुनीता । जगदंबा जानहु जियँ सीता ॥
 जगत पिता रघुपतिहि विचारी । भरि लोचन छवि लेहु निहारी ॥
 सुंदर सुखद सकल गुन रासी । ए दौउ बंधु संभु उर वासी ॥
 सुधा समुद्र समीप बिहाई । मृगजलु निरखि मरहु कत धाई ॥
 करहु जाइ जा कहूँ जोइ भावा । हम तौ आजु जनम फलु पावा ॥
 अस कहि भले भूप अनुरागे । रूप अनूप बिलोकन लागे ॥
 देखहिं सुर नभ चढ़े बिमाना । वरषहिं सुमन करहिं कल गाना ॥
 दो०—जानि सुअवसरु सीय तब पठई जनक बोलाइ ।

चतुर सखीं सुंदर सकल सादर चलीं लवाइ ॥२४६॥
 सिय सोभा नहिं जाइ बखानी । जगदंबिका रूप गुन खानी ॥
 उपमा सकल मोहि लघु लागीं । प्राकृत नारि अंग अनुरागीं ॥
 सिय बरनिअ तेइ उपमा देई । कुकबि कहाइ अजसु को लेई ॥
 जौ पटतरिअ तीय सम सीया । जग असि जुवति कहाँ कमनीया ॥

गिरा मुखर तन अरध भवानी । रति अति दुखित अतनु पति जानी
विष बारुनी बंधु प्रिय जेही । कहिअ रमासम किमि वैदेही ॥
जौ छवि सुधा पयोनिधि होई । परम रूपमय कच्छपु सोई ॥
सोभा रजु मंदरु सिंगारु । मथै पानि पंकज निज मारु ॥
दो०—एहि बिधि उपजै लच्छि जब सुंदरता सुखमूल ।

तदपि सकोच समेत कबि कहहिं सीय समतूल ॥२४७॥

चलीं संग लै सखीं सयानी । गावत गीत मनोहर बानी ॥
सोह नवल तनु सुंदर सारी । जगत जननि अतुलित छवि भारी
भूषन सकल सुदेस सुहाए । अंगअंग रचि सखिन्ह बनाए ॥
रंगभूमि जब सिय पगु धारी । देखि रूप मोहे नर नारी ॥
हरषि सुरन्ह दुंदुभीं बजाई । वरषि प्रसून अपछरा गाई ॥
पानि सरोज सोह जयमाला । अवचट चितए सकल भुआला ॥
सीय चकित चित रामहि चाहा । भए मोहवस सब नरनाहा ॥
मुनि समीप देखे दोउ भाई । लगे ललकि लोचननिधि पाई ॥
दो०—गुरजन लाज समाजु बड़ देखि सीय सकुचानि ।

लागि बिलोकन सखिन्ह तन रघुबीरहि उर आनि ॥२४८॥

राम रूपु अरु सिय छवि देखें । नर नारिन्ह परिहरिं निमेषें ॥
सोचहिं सकल कहत सकुचार्हीं । बिधि सन विनय करहिं मन मार्हीं
हरु बिधि बेगि जनक जड़ताई । मति हमारि असि देहि सुहाई ॥
बिनु बिचार पनु सजि मर माहू । सीय राम कर करे बिबाहू ॥

जगु भल कहिहि भाव सब काहू । हठ कीन्हैं अंतहुँ उर दाहू ॥
 एहिं लालसाँ मगन सब लोगू । वरु साँवरो जानकी जोगू ॥
 तब बंदीजन जनक बोलाए । बिरिदावली कहत चलि आए ॥
 कह नृपु जाइ कहहु पन मोरा । चले भाट हियँ हरणु न थोरा ॥
 दो०—बोले बंदी बचन बर सुनहु सकल महिपाल ।

पन बिदेह कर कहहिं हम भुजा उठाइ बिसाल ॥२४९॥

नृप भुजबलु बिधु सिवधनु राहू । गरुअ कठोर बिदित सब काहू ॥
 रावनु बानु महाभट भारे । देखि सरासन गवँहि सिधारे ॥
 सोइ पुरारि कोदंडु कठोरा । राज समाज आजु जोइ तोरा ॥
 त्रिभुवन जय समेत बैदेही । बिनहि बिचार बरइ हठि तेही ॥
 सुनि पन सकल भूप अभिलाषे । भटमानी अतिसय मन माखे ॥
 परिकर बाँधि उठे अकुलाई । चले इष्टदेवन्ह सिर नाई ॥
 तमकि ताकि तकि सिवधनु धरहीं । उठइ न कोटि भाँति बलु करहीं ॥
 जिन्ह के कछु विचारु मन माहीं । चाप समीप महीप न जाहीं ॥
 दो०—तमकि धरहिं धनु मूढ़ नृप उठइ न चलहिं लजाइ ।

मनहुँ पाइ भट बाहुबलु अधिकु अधिकु गरुआइ ॥२५०॥

भूप सहस दस एकहि बारा । लगे उठावन टरइ न टारा ॥
 डगइ न संभु सरासनु कैसैं । कामी बचन सती मनु जैसैं ॥
 सब नृप भए जोगु उपहासी । जैसैं विनु विराग संन्यासी ॥
 कीरति विजय बीरता भारी । चले चाप कर धरवस हारी ॥

श्रीहत भए हारि हियँ राजा। बैठे निज निज जाइ समाजा ॥
 नृपन्ह बिलोकि जनकु अकुलाने। बोले बचन रोष जनु साने ॥
 दीप दीप के भूपति नाना। आए सुनि हम जो पनु ठाना ॥
 देव दनुज धरि मनुज सरीरा। बिपुल बीर आए रनधीरा ॥
 दो०—कुअँरि मनोहर बिजय बडि कीरति अतिकमनीय ।

पावनिहार बिरंचि जनु रचेउ न धनु दमनीय ॥२५१॥
 कहहु काहि यहु लाभु न भावा। काहुँ न संकर चाप चढ़ावा ॥
 रहउ चढ़ाउव तोरव भाई। तिलु भरि भूमि न सके छड़ाई ॥
 अब जनि कोउ माखै भट मानी। बीर बिहीन मही मैं जानी ॥
 तजहु आस निज निज गृह जाहू। लिखा न विधि बैदेहि बिबाहू ॥
 सुकृतु जाइ जाँ पनु परिहरजँ। कुअँरि कुआरि रहउ का करजँ ॥
 जाँ जनतेउँ विनु भट भुवि भाई। तौ पनु करि होतेउँ न हँसाई ॥
 जनक बचन सुनि सब नर नारी। देखि जानकिहि भए दुखारी ॥
 माखे लखनु कुटिल भई भौहैं। रदपट फरकत नयन रिसौहैं ॥
 दो०—कहि न सकत रघुबीर डर लगे बचन जनु बान ।

नाइ राम पद कमल सिरु बोले गिरा प्रमान ॥२५२॥
 रघुबंसिन्ह महुँ जहँ कोउ होई। तेहिँ समाज अस कहइ न कोई ॥
 कही जनक जसि अनुचित बानी। बिद्यमान रघुकुल मनि जानी ॥
 सुनहु भानुकुल पंकज भानू। कहउँ सुभाउ न कछु अभिमानू ॥
 जो तुम्हार अनुसासन पावौ। कंदुक इव ब्रह्मांड उठावौ ॥

काचे घट जिमि डारौं फोरी। सकउँ मेरु मूलक जिमि तोरी ॥
 तव प्रताप महिमा भगवाना। को बापुरो पिनाक पुराना ॥
 नाथ जानि अस आयसु होऊ। कौतुकु करौं बिलोकिअ सोऊ ॥
 कमलनाल जिमि चाप चढ़ावौं। जोजन सत प्रमान लै धावौं ॥
 दो०—तोरोँ छत्रक दंड जिमि तव प्रताप बल नाथ ।

जौं न करौं प्रभु पद सपथ कर न धरौं धनु भाथ ॥२५३॥
 लखन सकोप बचन जे बोले। डगमगानि महि दिग्गज डोले ॥
 सकल लोग सब भूप डेराने। सिय हियँ हरषु जनकु सकुचाने ॥
 गुर रघुपति सब मुनि मन माहीं। मुदित भए पुनि पुनि पुलकाहीं ॥
 सयनहिं रघुपति लखनु नेवारे। प्रेम समेत निकट बैठारे ॥
 बिस्वामित्र समय सुम जानी। बोले अति सनेहमय बानी ॥
 उठहु राम भंजहु भवचापा। मेटहु तात जनक परितापा ॥
 मुनि गुरु बचन चरन सिरु नावा। हरषु बिषादु न कछु उर आवा ॥
 ठाढ़े भए उठि सहज सुभाएँ। ठवनि जुबा मृगराजु लजाएँ ॥
 दो०—उदित उदयगिरि मंच पर रघुबर बालपतंग ।

बिकसे संत सरोज सब हरषे लोचन भृंग ॥२५४॥
 नृपन्ह केरि आसा निसि नासी। बचन नखत अवली न प्रकासी ॥
 मानी महिप कुमुद सकुचाने। कपटी भूप उलूक लुकाने ॥
 भए बिसोक कोक मुनि देवा। बरिसहिं सुमन जनावहिं सेवा ॥
 गुर पद बंदि सहित अनुरागा। राम मुनिन्ह सन आयसु मागा ॥

सहजहिं चले सकल जग स्वामी । मत्त मंजु वर कुंजर गामी ॥
चलत राम सब पुर नर नारी । पुलक पूरि तन भए सुखारी ॥
बंदि पितर सुर सुकृत सँभारे । जौं कछु पुन्य प्रभाउ हमारे ॥
तौ सिवधनु मृनाल की नाई । तोरहुँ रामु गनेस गोसाई ॥
दो०—रामहि प्रेम समेत लखि सखिन्ह समीप बोलाइ ।

सीता मातु सनेह बस बचन कहइ बिलखाइ ॥२५५॥
सखि सब कौतुक देखनिहारे । जेउ कहावत हितू हमारे ॥
कोउ न बुझाइ कहइ गुर पाहीं । ए बालक असि हठ भलि नाहीं ॥
रावन वान छुआ नहिं चापा । हारे सकल भूप करि दापा ॥
सो धनु राजकुअँर कर देहीं । बाल मराल कि मंदर लेहीं ॥
भूप सयानप सकल सिरानी । सखि बिधि गति कछु जाति न जानी ॥
बोली चतुर सखी मृदु बानी । तेजवंत लघु गनिअ न रानी ॥
कहँ कुंभज कहँ सिंधु अपारा । सोषेउ सुजसु सकल संसारा ॥
रवि मंडल देखत लघु लागा । उदयँ तासु तिभुवन तम भागा ॥
दो०—मंत्र परम लघु जासु बस बिधि हरि हर सुर सर्व ।

महामत्त गजराज कहँ बस कर अंकुस खर्ब ॥२५६॥
काम कुसुम धनु सायक लीन्हे । सकल भुवन अपनै बस कीन्हे ॥
देबि तजिअ संसउ अस जानी । भंजव धनुषु राम सुनु रानी ॥
सखी बचन सुनि भै परतीती । मिटा विषादु बढी अति प्रीती ॥
तव रामहि बिलोकि वेदेही । समय हृदय बिनवति जेहि तेही ॥

मनहीं मन मनाव अकुलानी। होहु प्रसन्न महेस भवानी॥
 करहु सफल आपनि सेवकाई। करि हितु हरहु चाप गरुआई॥
 गननायक बरदायक देवा। आजु लगैं कीन्हिउ तुअ सेवा॥
 बार बार बिनती सुनि मोरी। करहु चापगुरुता अति थोरी॥
 दो०—देखि देखि रघुबीर तन सुर मनाव धरि धीर।

भरे बिलोचन प्रेम जल पुलकावली सरीर ॥२५७॥

नीकैं निरखि नयन भरि सोभा। पितु पनु सुमिरि बहुरि मनु छोभा
 अहह तात दारुनि हठ ठानी। समुझत नहिं कछु लाभु नहानी॥
 सचिव सभय सिख देइ न कोई। बुध समाज बड़ अनुचित होई॥
 कहँ धनु कुलिसहु चाहि कठोरा। कहँ स्यामल मृदुगात किसोरा॥
 बिधि केहि भाँति धरौं उर धीरा। सिरस सुमन कन बेधिअ हीरा॥
 सकल सभा कै मति भै भोरी। अय मोहि संभु चाप गति तोरी॥
 निज जड़ता लोगन्ह पर डारी। होहि हरुअ रघुपतिहि निहारी॥
 अति परिताप सीय मन माहीं। लव निमेष जुग सय सम जाहीं॥

दो०—प्रभुहि चितइ पुनि चितव महि राजत लोचन लोल।

खेलत मनसिज मीन जुग जनु बिधु मंडल डोल ॥२५८॥

गिरा अलिनि मुख पंकज रोकी। प्रगट न लाज निसा अवलोकी॥
 लोचन जल रह लोचन कोना। जैसें परम कृपन कर सोना॥
 सकुची व्याकुलता बड़ि जानी। धरि धीरजु प्रतीति उर आनी॥
 तन मन बचन मोर पनु साधा। रघुपति पद सरोज चितु राचा॥

तौ भगवानु सकल उर बासी । करिहि मोहि रघुवर कै दासी ॥
 जेहि कैं जेहि पर सत्य सनेहू । सो तेहि मिलइ न कछु संदेहू ॥
 प्रभु तन चितइ प्रेम तन ठाना । कृपानिधान राम सबु जाना ॥
 सियहि बिलोकि तकेउ धनु कैसैं । चितव गरु लघु ब्यालहि जैसैं ॥
 दो०—लखन लखेउ रघुबंसमनि ताकेउ हर कोदंडु ।

पुलकि गात बोले बचन चरन चापि ब्रह्मांडु ॥२५९॥
 दिसि कुंजरहु कमठ अहि कोला । धरहु धरनि धरि धीरन डोला ॥
 रामु चहहिं संकर धनु तोरा । होहु सजग मुनि आयसु मोरा ॥
 चाप समीप रामु जब आए । नर नारिन्ह सुर मुकृत मनाए ॥
 सब कर संसउ अरु अग्यानु । मंद महीपन्ह कर अभिमानू ॥
 भृगुपति केरि गरब गरुआई । सुर मुनिबरन्ह केरि कदराई ॥
 सिय कर सोचु जनक पछितावा । रानिन्ह कर दारुन दुख दावा ॥
 संभुचाप बड़ बोहितु पाई । चढ़े जाइ सब संगु बनाई ॥
 राम बाहुबल सिंधु अपारु । चहत पारु नहिं कोउ कड़हारु ॥
 दो०—राम बिलोके लोग सब चित्र लिखे से देखि ।

चितई सीय कृपायतन जानी बिकल बिसेषि ॥२६०॥
 देखी विपुल बिकल बैदेही । निमिष बिहात कल्प सम तेही ॥
 तृषित बारिबिनु जो तनु त्यागा । मुएँ करइ का सुधा तड़ागा ॥
 का बरषा सब कृषी सुखानैं । समय चुकैं पुनि का पछितानैं ॥
 अस जिय जानि जानकी देखी । प्रभु पुलकै लखि प्राति बिसेषी ॥

गुरहि प्रनामु मनहिं मन कीन्हा । अति लाघवें उठाइ धनु लीन्हा ॥
 दमकेउ दामिनि जिमि जब लयऊ । पुनि नभ धनु मंडलसम भयऊ
 लेत चढ़ावत खैंचत गाढ़ें । काहुँ न लखा देख सबु ठाढ़ें ॥
 तेहि छन राम मध्य धनु तोरा । भरे भुवन धुनि घोर कठोरा ॥

छं०—भरे भुवन घोर कठोर रव रवि बाजि तजि मारगु चले ।

चिक्करहिं दिग्गाज डोल महि अहि कोल कूरुम कलमले ॥

सुर असुर मुनि कर कान दीन्हें सकल बिकल बिचारहीं ।

कोदंड खंडेउ राम तुलसी जयति बचन उचारहीं ॥

सो०—संकर चापु जहाजु सागरु रघुबर बाहुबलु ।

बूढ़ सो सकल समाजु चढ़ा जो प्रथमहिं मोह बस ॥२६१॥

प्रभु दोउ चापखंड महि डारे । देखि लोग सब भए सुखारे ॥

कौसिकरूप पयोनिधि पावन । प्रेम वारि अवगाहु सुहावन ॥

रामरूप राकेसु निहारी । बढ़त बीचि पुलकावलि भारी ॥

बाजे नभ गहगहे निसाना । देवबधू नाचहिं करि गाना ॥

ब्रह्मादिक सुर सिद्ध मुनीसा । प्रभुहि प्रसंसहिं देहिं असीसा ॥

वरिसाहि सुमन रंग बहु माला । गावहिं किंनर गीत रसाला ॥

रही भुवन भरि जय जय बानी । धनुषभंग धुनि जात न जानी ॥

मुदित कहहिं जहँ तहँ नर नारी । भंजेउ राम संभुधनु भारी ॥

दो०—बंदी मागध सूतगन बिरुद्ध बढ़हिं मतिधीर ।

कराहि निछावरि लोग सब हय गय धन मनि चीर ॥२६२॥

झाँझि मृदंग संख सहनाई । भेरि ढोल दुंदुभी सुहाई ॥
 बाजहिं बहु बाजने सुहाए । जहँ तहँ जुबतिन्ह मंगल गाए ॥
 सखिन्ह सहित हरषी अतिरानी । सूखत धान परा जनु पानी ॥
 जनक लहेउ सुखु सोचु विहाई । पैरत थकें थाह जनु पाई ॥
 श्रीहत भए भूप धनु दूटे । जैसैं दिवस दीप छवि छूटे ॥
 सीयसुखहि बरनिअ केहि भाँती । जनु चातकी पाइ जलु स्वाती ॥
 रामहि लखनु बिलोकत कैसैं । ससिहि चकोर किसोरकु जैसैं ॥
 सतानंद तब आयसु दीन्हा । सीताँ गमनु राम पहिं कीन्हा ॥
 दो०—संग सखीं सुंदर चतुर गावहिं मंगलचार ।

गवनी बाल मराल गति सुषमा अंग अपार ॥२६३॥

सखिन्ह मध्य सिय सोहति कैसैं । छविगन मध्य महाछवि जैसैं ॥
 कर सरोज जयमाल सुहाई । बिस्व विजय सोभा जेहिं छाई ॥
 तन सकोचु मन परम उछाहू । गूढ़ प्रेम लखि परइ न काहू ॥
 जाइ समीप राम छवि देखी । रहि जनु कुअँरि चित्र अवरेखी ॥
 चतुर सखीं लखि कहा बुझाई । पहिरावहु जयमाल सुहाई ॥
 सुनत जुगल कर माल उठाई । प्रेम बिबस पहिराइ न जाई ॥
 सोहत जनु जुग जलज सनाला । ससिहि समीत देत जयमाला ॥
 गावहिं छवि अवलोकि सहेली । सियँ जयमाल राम उर मेली ॥

सो०—रघुबर उर जयमाल देखि देव बरिसहिं सुमन ।

सकुचे सकल भुआल जनु बिलोकि रबि कुमुदगन ॥२६४॥

पुर अरु ब्योम बाजने बाजे । खल भए मलिन साधु सब राजे ॥
 सुर किंनर नर नाग मुनीसा । जय जय जय कहि देहिं असीसा ॥
 नाचहिं गावहिं बिबुध बधूटीं । बार बार कुसुमांजलि छूटीं ॥
 जहँ तहँ विप्र वेदधुनि करहीं । बंदी बिरिदावलि उच्चरहीं ॥
 महि पाताल नाक जसु व्यापा । राम बरी सिय भंजेउ चापा ॥
 करहिं आरती पुर नर नारी । देहिं निछावरि बित्त बिसारी ॥
 सोहति सीय राम कै जोरी । छवि सिंगारु मनहुँ एक ठोरी ॥
 सखीं कहहिं प्रभुपद गहु सीता । करति न चरन परस अति भीता ॥
 दो०—गौतम तिय गति सुरति करि नहिं परसति पग पानि ।

मन बिहसे रघुबंसमनि प्रीति अलौकिक जानि ॥२६५॥

तब सिय देखि भूप अभिलाषे । कूर कपूत मूढ़ मन माखे ॥
 उठि उठि पहिरि सनाह अभागे । जहँ तहँ गाल बजावन लागे ॥
 लेहु छड़ाइ सीय कह कोऊ । धरि बाँधहु नृप बालक दोऊ ॥
 तोरें धनुषु चाढ़ नहिं सरई । जीवत हमहि कुअँरि कोबरई ॥
 जौ बिदेहु कछु करै सहाई । जीतहु समर सहित दोउ भाई ॥
 साधु भूप बोले सुनि बानी । राजसमाजहि लाज लजानी ॥
 बलु प्रतापु बीरता बढ़ाई । नाक पिनाकहि संग सिधाई ॥
 सोइ सरता कि अब कहूँ पाई । असि बुधि तौ बिधि मुहँ मसि लाई

दो०—देखहु रामहि नयन भरि तजि इरिषा महु कोहु ।

लखन राघु पावकु प्रबल जानि सलभ जनि होहु ॥२६६॥

बैनतेय बलि जिमि चह कागू । जिमि ससु चहै नाग अरि भागू ॥
जिमि चह कुसल अकारन कोही । सब संपदा चहै सिवद्रोही ॥
लोभी लोलुप कल कीरति चहई । अकलंकता कि कामी लहई ॥
हरि पद विमुख परम गति चाहा । तस तुम्हार लालचु नरनाहा ॥
कोलाहलु सुनि सीय सकानी । सखीं लवाइ गई जहँ रानी ॥
रामु सुभायँ चले गुरु पाहीं । सिय सनेहु बरनत मन माहीं ॥
रानिन्ह सहित सोचवस सीया । अब धौं विधिहि काह करनीया ॥
भूप वचन सुनि इत उत तकहीं । लखनु राम डर बोलि न सकहीं ॥

दो०—अरुन नयन भृकुटी कुटिल चितवत नृपन्ह सकोप ।

मनहुँ मत्त गजगन निरखि सिंघकिसोरहि चोप ॥२६७॥

खरभरु देखि विकल पुर नारीं । सब मिलि देहिं महीपन्ह गारीं ॥
तेहिं अवसर सुनि सिवधनु भंगा । आयउ भृगुकुल कमल पतंगा ॥
देखि महीप सकल सकुचाने । बाज झपट जनु लवा लुकाने ॥
गौरि सरीर भूति भल भ्राजा । भाल बिसाल त्रिपुंड बिराजा ॥
सीस जटा ससिवदनु सुहावा । रिस बस कछुक अरुन होइ आवा ॥
भृकुटी कुटिल नयन रिस राते । सहजहुँ चितवत मनहुँ रिसाते ॥
बृषभ कंध उर बाहु बिसाल । चारु जनेउ माल मृगछाल ॥
काटि मुनिबसन तून दुइ बाँधें । धनु सर कर कुठार कल काँधें ॥

दो०—सांत बेषु करनी कठिन बरनि न जाइ सरूप ।

धरि मुनितनु जनु वीर रसु आयउ जह सब भूप ॥२६८॥

देखत भृगुपति बेषु कराला । उठे सकल भय विकल भुआला ॥
 पितु समेत कहि कहि निज नामा । लगे करन सब दंड प्रनामा ॥
 जेहि सुभायँ चितवहिँ हितु जानी । सो जानइ जनु आइ खुटानी ॥
 जनक बहोरि आइ सिरु नावा । सीय बोलाइ प्रनामु करावा ॥
 आसिष दीन्हि सर्खीं हरषानीं । निज समाज लै गई सयानीं ॥
 बिस्वामित्रु मिले पुनि आई । पद सरोज मेले दोउ भाई ॥
 रामु लखनु दसरथ के ढोटा । दीन्हि असीस देखि भल जोटा ॥
 रामहि चितइ रहे थकि लोचन । रूप अपार मार मद मोचन ॥
 दो०—बहुरि बिलोकि बिदेह सन कहहु काह अति भीर ।

पूँछत जानि अजान जिमि व्यापेउ कोपु सरीर ॥२६९॥
 समाचार कहि जनक सुनाए । जेहि कारन महीप सब आए ॥
 सुनत बचन फिरि अनत निहारे । देखे चापखंड महि डारे ॥
 अति रिस बोले बचन कठोरा । कहु जड़ जनक धनुष कै तोरा ॥
 बेगि देखाउ मूढ़ न त आजू । उलटउँ महि जहँ लहितव राजू ॥
 अति डरु उतरु देत नृपु नाहीं । कुटिल भूप हरषे मन माहीं ॥
 सुर मुनि नाग नगर नर नारी । सोचहिँ सकल त्रास उर भारी ॥
 मन पछिताति सीय महतारी । बिधि अब सँवरी बात बिगारी ॥
 भृगुपति कर सुभाउ सुनि सीता । अरध निमेष कल्प सम बीता ॥
 दो०—सभय बिलोके लोग सब जानि जानकी भीर ।

हृदयँ न हरषु बिषादु कह्यु बोले श्रीरघुबीर ॥२७०॥

नाथ संभुधनु भंजनिहारा । होइहि केउ एक दास तुम्हारा ॥
 आयसु काह कहिअ किन मोही । सुनि रिसाइ बोले मुनि कोही ॥
 सेवकु सो जो करै सेवकाई । अरि करनी करि करिअ लराई ॥
 सुनहु राम जेहिं सिवधनु तोरा । सहसबाहु सम सो रिपु मोरा ॥
 सो विलगाउ बिहाइ समाजा । न त मारे जैहिं सब राजा ॥
 सुनि मुनि वचन लखन मुसुकाने । बोले परसुधरहि अपमाने ॥
 बहु धनुहीं तोरीं लरिकाई । कग्रहुँ न असिरिस कीन्हि गोसाई ॥
 एहि धनु पर ममता केहि हेतू । सुनि रिसाइ कह भृगुकुलकेतू ॥

दो०—रे नृप बालक काल बस बोलत तोहि न सँभार ।

धनुही सम तिपुरारि धनु बिदित सकल संसार ॥२७१॥

लखन कहा हँसि हमरें जाना । सुनहु देव सब धनुष समाना ॥
 का छति लामु जून धनु तोरें । देखा राम नयन के भोरें ॥
 छुअत दूट रघुपतिहु न दोसू । मुनि बिनु काज करिअ कत रोसू ॥
 बोले चितइ परसु की ओरा । रे सठ सुनेहि सुभाउ न मोरा ॥
 बालकु बोलि बधउँ नहिं तोही । केवल मुनि जड़ जानहि मोही ॥
 बाल ब्रह्मचारी अति कोही । बिस्व बिदित छत्रियकुल द्रोही ॥
 भुजबल भूमि भूप बिनु कीन्ही । विपुल बार महिदेवन्ह दीन्ही ॥
 सहसबाहु भुज छेदनिहारा । परसु बिलोकु महीपकुमारा ॥

दो०—मातु पितहि जनि सोचबस करसि महीसकिसोर ।

गर्भेन्ह के अमक दलन परसु मोर अति घोर ॥२७२॥

बिहसि लखनु बोले मृदु बानी । अहो मुनीसु महा भटमानी ॥
 पुनि पुनि मोहि देखाव कुठारू । चहत उड़ावन फूँकि पहारू ॥
 इहाँ कुम्हड़बतिया कोउ नाहीं । जे तरजनी देखि मरि जाहीं ॥
 देखि कुठारू सरासन बाना । मैं कछु कहा सहित अभिमाना ॥
 भृगुसुत समुझि जनेउ बिलोकी । जो कछु कहहु सहउँ रिस रोकी ॥
 सुर महिसुर हरिजन अरु गाई । हमरें कुल इन्ह पर न सुराई ॥
 बधैं पापु अपकीरति हारें । मारतहूँ पा परिअ तुम्हारें ॥
 कोटि कुलिस सम बचनु तुम्हारा । व्यर्थ धरहु धनु बान कुठारा ॥
 दो०—जो बिलोकि अनुचित कहेउँ छमहु महामुनि धीर ।

सुनि सरोष भृगुबंसमनि बोले गिरा गभीर ॥ २७३ ॥

कौसिक सुनहु मंद यहु बालकु । कुटिल कालवस निज कुल घालकु
 भानु बंस राकेस कलंकू । निपट निरंकुस अबुध असंकू ॥
 काल कवलु होइहि छन माहीं । कहउँ पुकारि खोरि मोहि नाहीं ॥
 तुम्ह हटकहु जाँ चहहु उबारा । कहि प्रतापु बलु रोषु हमारा ॥
 लखन कहेउ मुनि सुजसु तुम्हारा । तुम्हहि अछत कोबरनै पारा ॥
 अपने मुँह तुम्ह आपनि करनी । बार अनेक भाँति बहु बरनी ॥
 नहि संतोषु त पुनि कछु कहहु । जनि रिस रोकि दुसह दुख सहहु ॥
 वीरव्रती तुम्ह धीर अछोभा । गारी देत न पावहु सोभा ॥

दो०—सूर समर करनी करहि कहि न जनावहि आपु ।

बिद्यमान रन पाइ रिपु कायर कथहि प्रतापु ॥ २७४ ॥

तुम्ह तौ कालु हाँक जनु लावा । बार बार मोहि लागि बोलावा॥
 सुनत लखन के बचन कठोरा । परसु सुधारि धरेउ कर घोरा॥
 अब जनि देइ दोसु मोहि लोगू । कटुबादी बालकु बध जोगू ॥
 बाल बिलोकि बहुत मैं बाँचा । अब यहु मरनिहार भा साँचा॥
 कौसिक कहा छमिअ अपराधू । बाल दोष गुन गनहिं न साधू॥
 खर कुठार मैं अकरुन कोही । आगें अपराधी गुरुद्रोही ॥
 उतर देत छोड़उँ बिनु मारें । केवल कौसिक सील तुम्हारें ॥
 न त एहि काटि कुठार कठोरें । गुरहि उरिन होतेउँ श्रम थोरें ॥
 दो०—गाधिसूनु कह हृदयँ हँसि मुनिहि हरिअरइ सूझ ।

अयमय खाँड़ न ऊखमय अजहुँ न बूझ अबूझ ॥२७५॥

कहेउ लखन मुनि सीलु तुम्हारा । को नहिं जान विदित संसारा॥
 माता पितहि उरिन भए नीकें । गुररिनु रहा सोचु बड़ जीकें॥
 सो जनु हमरेहि माथे काढ़ा । दिन चलि गए ब्याज बड़ बाढ़ा॥
 अब आनिअ ब्यवहरिआ बोली । तुरत देउँ मैं थैली खोली ॥
 सुनि कटु बचन कुठार सुधारा । हाय हाय सब सभा पुकारा ॥
 भृगुबर परसु देखावहु मोही । बिप्र बिचारि बचउँ नृपद्रोही ॥
 मिले न कबहुँ सुभट रन गाढ़े । द्विज देवता घरहि के बाढ़े ॥
 अनुचित कहि सब लोग पुकारे । रघुपति सयनहिं लखनु नेवारे ॥
 दो०—लखन उतर आहुति सरिस भृगुबर कोपु कृसानु ।

बदत देखि जल सम बचन बोलि रघुकुलमानु ॥२७६॥

नाथ करहु बालक पर छोहू । सूध दूधमुख करिअ न कोहू ॥
 जौ पै प्रभु प्रभाउ कछु जाना । तौ कि बराबरि करत अयाना ॥
 जौ लरिका कछु अचगारि करहीं । गुर पितु मातु मोद मन भरहीं ॥
 करिअ कृपा सिसु सेवक जानी । तुम्ह सम सील धीर मुनि ग्यानी ॥
 राम बचन सुनि कछुक जुड़ाने । कहि कछु लखनु बहुरि मुसुकाने ॥
 हँसत देखि नख सिख रिस व्यापी । राम तोर भ्राता बड़ पापी ॥
 गौर सरीर स्याम मन माहीं । कालकूटमुख पयमुख नाहीं ॥
 सहज टेढ़ अनुहरइ न तोही । नीचु मीचु सम देख न मोही ॥
 दो०—लखन कहेउ हँसि सुनहु मुनि क्रोधु पाप कर मूल ।

जेहि बस जन अनुचित करहिं चरहिं बिस्व प्रतिकूल ॥ २७७ ॥
 मैं तुम्हार अनुचर मुनिराया । परिहरि कोपु करिअ अब दाया ॥
 दूट चाप नहिं जुरिहि रिसाने । बैठिअ होइहिं पाय पिराने ॥
 जौ अतिप्रिय तौ करिअ उपाई । जोरिअ कोउ बड़ गुनी बोलाई ॥
 बोलत लखनहिं जनकु डेराहीं । मष्ट करहु अनुचित भल नाहीं ॥
 थर थर काँपहिं पुर नर नारी । छोट कुमार खोट बड़ भारी ॥
 भृगुपति सुनि सुनि निरभय बानी । रिस तन जरइ होइ बलहानी ॥
 बोले रामहि देइ निहोरा । बचउँ बिचारि बंधु लघु तोरा ॥
 मनु मलीन तनु सुंदर कैसें । बिष रस भरा कनक घटु जैसैं ॥

दो०—सुनि लल्लिमन बिहसे बहुरि नयन तरेरे राम ।

गुर समीप गवने सकुचि परिहरि बानी बाम ॥ २७८ ॥

अति विनीत मृदु सीतल बानी । बोले रामु जोरि जुग पानी ॥
 सुनहु नाथ तुम्ह सहज सुजाना । बालक बचनु करिअ नहिं काना ॥
 बरै बालकु एकु सुभाऊ । इन्हहि न संत विदूषहिं काऊ ॥
 तेहिं नाहीं कछु काज विगारा । अपराधी मैं नाथ तुम्हारा ॥
 कृपा कोपु बधु बँधव गोसाईं । मो पर करिअ दास की नाई ॥
 कहिअ बेगि जेहि विधि रिस जाई । मुनिनायक सोइ करौं उपाई ॥
 कह मुनि राम जाइ रिस कैसें । अजहुँ अनुज तव चितव अनैसैं ॥
 एहि कैं कंठ कुठार न दीन्हा । तौ मैं काह कोपु करि कीन्हा ॥
 दो०—गर्भ स्रवाहिं अवनिप रवनि सुनि कुठार गति घोर ।

परसु अछत देखउँ जिअत बैरी भूपकिसोर ॥२७९॥
 बहइ न हाथु दहइ रिस छाती । भा कुठार कुंठित नृपघाती ॥
 भयउ वाम विधि फिरेउ सुभाऊ । मोरे हृदयँ कृपा कसि काऊ ॥
 आजु दया दुखु दुसह सहावा । मुनि सौमित्रि बिहसि सिरु नावा ॥
 बाउ कृपा मूरति अनुकूल । बोलत बचन झरत जनु फूला ॥
 जौं पै कृपाँ जरिहिं मुनि गाता । क्रोध भएँ तनु राख बिधाता ॥
 देखु जनक हठि बालकु एहू । कीन्ह चहत जड़ जमपुर गेहू ॥
 बेगि करहु किन आँखिन्ह ओटा । देखत छोट खोट नृप ढोटा ॥
 बिहसे लखनु कहा मन माहीं । मूढ़ें आँखि कतहुँ कोउ नाहीं ॥

दो०—परसुरामु तब राम प्रति बोले उर अति क्रोधु ।

बंधु कहइ कटु संमत तोरें । तू छल विनय करसि कर जोरें ॥
 कर परितोषु मोर संग्रामा । नाहिं त छाड़ कहाउब रामा ॥
 छलु तजि करहि समरु सिवद्रोही । बंधु सहित न त मारउँ तोही ॥
 भृगुपति ब्रकहिं कुठार उठाएँ । मन मुसुकाहिं रामु सिर नाएँ ॥
 गुनह लखन कर हम पर रोषू । कतहुँ सुधाइहु ते बड़ दोषू ॥
 टेढ़ जानि सब बंदइ काहू । बक्र चंद्रमहि असइ न राहू ॥
 राम कहेउ रिस तजिअ मुनीसा । कर कुठारु आगें यह सीसा ॥
 जेहिं रिस जाइ करिअ सोइ स्वामी । मोहि जानिअ आपन अनुगामी
 दो०—प्रभुहि सेवकहि समरु कस तजहु बिप्रबर रोसु ।

बेषु बिलोकें कहेसि कछु बालकहू नहिं दोसु ॥२८१॥
 देखि कुठार बान धनु धारी । भै लरिकहि रिस वीरु विचारी ॥
 नामु जानपै तुम्हहि न चीन्हा । बंस सुभायँ उतरु तेहिं दीन्हा ॥
 जाँ तुम्ह औतेहु मुनि की नाई । पद रज सिर सिसु धरत गोसाईं ॥
 छमहु चूक अनजानत केरी । चहिअ विप्र उर कृपा घनेरी ॥
 हमहि तुम्हहि सरिवरि कसि नाथा । कहहु न कहाँ चरन कहँ माथा ॥
 राम मात्र लघु नाम हमारा । परसु सहित बड़ नाम तोहारा ॥
 देव एकु गुनु धनुष हमारें । नव गुन परम पुनीत तुम्हारें ॥
 सब प्रकार हम तुम्ह सन हारे । छमहु विप्र अपराध हमारे ॥

दो०—बार बार मुनि विप्रबर कहा राम सन राम ।

निपटहिं द्विज करि जानहि मोही । मैं जस बिप्र सुनावउँ तोही ॥
चाप खुवा सर आहुति जानू । कोपु मोर अति घोर कृसानू ॥
समिधि सेन चतुरंग सुहाई । महा महीप भए पसुआई ॥
मैं एहिं परसु काटि बलि दीन्हे । समर जग्य जप कोटिन्ह कीन्हे ॥
मोर प्रभाउ बिदित नहिं तोरें । बोलसि निदरि बिप्र के भोरें ॥
भंजेउ चापु दापु बड़ बाढ़ा । अहमिति मनहुँ जीति जगु ठाढ़ा ॥
राम कहा मुनि कहहु बिचारी । रिस अति बड़ि लघु चूक हमारी ॥
छुअतहिं दूट पिनाक पुराना । मैं केहि हेतु करौं अभिमाना ॥
दो०—जौं हम निदरहिं बिप्र बदि सत्य सुनहु भृगुनाथ ।

तौ अस को जग सुभटु जेहि भय बस नावहिं माथ ॥२८३॥
देव दनुज भूपति भट नाना । समबल अधिक होउ बलवाना ॥
जौं रन हमहि पचारै कोऊ । लरहिं सुखेन कालु किन होऊ ॥
छत्रिय तनु धरि समर सकाना । कुल कलंकु तेहिं पावैं आना ॥
कहउँ सुभाउ न कुलहि प्रसंसी । कालहु डरहिं न रन रघुबंसी ॥
बिप्रबंस कै असि प्रभुताई । अभय होइ जो तुम्हहि डेराई ॥
सुनि मृदु गूढ़ बचन रघुपति के । उघरे पटल परसुधर मति के ॥
राम रमापति कर धनु लेहू । खैंचहु मिटै मोर संदेहू ॥
देत चापु आपुहिं चलि गयऊ । परसुराम मन बिसमय भयऊ ॥

दो०—जाना राम प्रभाउ तब पुलक प्रफुल्लित गात ।

जोरि मानि बोले बचन हृदयँ न प्रेषु अमात ॥२८४॥

जय रघुवंस बनज बन भानू । गहन दनुज कुल दहन कृसानू ॥
 जय सुर बिप्र धेनु हितकारी । जय मद मोह कोह भ्रम हारी ॥
 बिनय सील करुना गुन सागर । जयति वचन रचना अति नागर ॥
 सेवक सुखद सुभग सब अंगा । जय सरीर छवि कोटि अनंगा ॥
 करौं काह मुख एक प्रसंसा । जय महेस मन मानस हंसा ॥
 अनुचित बहुत कहेउँ अग्याता । छमहु छमामंदिर दोउ भ्राता ॥
 कहि जय जय जय रघुकुलकेतू । भृगुपति गए बनहि तप हेतू ॥
 अपमयँ कुटिल महोप डेराने । जहँ तहँ कायर गवँहि पराने ॥
 दो०—देवन्ह दीन्ही दुंदुभीं प्रभु पर बरषहिं फूल ।

हरषे पुर नर नारि सब मिटी मोहमय सूल ॥२८५॥
 अति गहगहे बाजने बाजे । सबहिं मनोहर मंगल साजे ॥
 जूथ जूथ मिलि सुमुखि सुनयनीं । करहिं गान कल कोकिल बयनीं ॥
 सुखु विदेह कर बरनि न जाई । जन्मदरिद्र मनहुँ निधि पाई ॥
 बिगत त्रास भइ सीय सुखारी । जनु बिधु उदयँ चकोरकुमारी ॥
 जनक कीन्ह कौसिकहि प्रनामा । प्रभु प्रसाद धनु भंजेउ रामा ॥
 मोहि कृतकृत्य कीन्ह दुहुँ भाई । अग्र जो उचित सो कहिअ गोसाईं ॥
 कह मुनि सुनु नरनाथ प्रबीना । रहा बिबाहु चाप आधीना ॥
 दूटतहीं धनु भयउ बिबाहु । सुर नर नाग विदित सब काहु ॥

दो०—तदपि जाइ तुम्ह करहु अब जथा बंस व्यवहार ।

दूत अवधपुर पठवहु जाई । आनहिं नृप दसरथहि बोलाई ॥
 मुदित राउ कहि भलेहिं कृपाला । पठए दूत बोलि तेहि काला ॥
 बहुरि महाजन सकल बोलाए । आइ सवन्हि सादर सिर नाए ॥
 हाट वाट मंदिर सुरवासा । नगरु सँवारहु चारिहुँ पासा ॥
 हरषि चले निज निज गृह आए । पुनि परिचारक बोलि पठाए ॥
 रचहु विचित्र वितान बनाई । सिर धरि बचन चले सचुपाई ॥
 पठए बोलि गुनी तिन्ह नाना । जे वितान विधि कुसल सुजाना ॥
 विधिहि बंदि तिन्ह कीन्ह अरंभा । विरचे कनक कदलि के खंभा ॥
 दो०—हरित मनिन्ह के पत्र फल पदुमराग के फूल ।

रचना देखि विचित्र अति मनु बिरंचिकर भूल ॥२८७॥
 वेनु हरित मनिमय सब कीन्हे । सरल सपरव परहिं नहिं चीन्हे ॥
 कनक कलित अहिवेलि बनाई । लखि नहिं परइ सपरन सुहाई ॥
 तेहि के रचि पचि बंध बनाए । विच विच मुकुता दाम सुहाए ॥
 मानिक मरकत कुलिस पिरोजा । चीरि कोरि पचि रचे सरोजा ॥
 किए भृंग बहुरंग विहंगा । गुंजहिं कूजहिं पवन प्रसंगा ॥
 सुर प्रतिमा खंभन गढ़ि काढी । मंगल द्रव्य लिएँ सब ठाढ़ी ॥
 चौकै भाँति अनेक पुराई । सिंधुर मनिमय सहज सुहाई ॥
 दो०—सौरभ पल्लव सुभग सुठि किए नीलमनिकोरि ।

हेम बौर मरकत धवरि लसत पाटमय डोरि ॥२८८॥

रचे सविर वर वदनिवारि । मनहुँ मनीमय फंद सवारि ॥

मंगल कलस अनेक बनाए । ध्वज पताक पट चमर सुहाए ॥
 दीप मनोहर मनिमय नाना । जाइ नवरनि विचित्र बिताना ॥
 जेहिं मंडप दुलहिनि बैदेही । सो बरनै असि मति कबि केही ॥
 दूल्हा रामु रूप गुन सागर । सो बितानु तिहुँ लोक उजागर ॥
 जनक भवन कै सोभा जैसी । गृह गृह प्रति पुर देखिअ तैसी ॥
 जेहिं तेरहुति तेहि समय निहारी । तेहि लघु लगहिं भुवन दस चारी
 जो संपदा नीच गृह सोहा । सो बिलोकि सुरनायक मोहा ॥
 दो०—बसइ नगर जेहिं लच्छि करि कपट नारि बर बेषु ।

तेहि पुर कै सोभा कहत सकुचहिं सारद सेषु ॥२८९॥
 पहुँचे दूत राम पुर पावन । हरषे नगर बिलोकि सुहावन ॥
 भूप द्वार तिन्ह खबरि जनार्ण । दसरथ नृप सुनि लिए बोलाई ॥
 करि प्रनामु तिन्ह पाती दीन्ही । मुदित महीप आपु उठि लीन्ही
 बारि बिलोचन बाँचत पाती । पुलक गात आई भरि छाती ॥
 रामु लखनु उर कर बर चीठी । रहि गए कहत न खाटी मीठी ॥
 पुनि धरि धीर पत्रिका बाँची । हरषी सभा बात सुनि साँची ॥
 खेलत रहे तहाँ सुधि पाई । आए भरतु सहित हित भाई ॥
 पूछत अति सनेहँ सकुचाई । तात कहाँ तें पाती आई ॥
 दो०—कुसल प्रानप्रिय बंधु दोउ अहहिं कहहु केहिं देस ।

सुनि सनेह साने बचन बाची बहुरि नरेस ॥२९०॥

सुनि पाती पुलके दोउ भ्राता । अधिक सनेहु समात न गाता ॥

प्रीति पुनीत भरत कै देखी । सकल सभाँ सुखु लहेउ बिसेषी ॥
 तब नृप दूत निकट बैठारे । मधुर मनोहर बचन उचारे ॥
 भैया कहहु कुसल दोउ वारे । तुम्ह नीकें निज नयन निहारे ॥
 स्यामल गौर धरें धनु भाथा । वय किसोर कौसिक मुनि साथी ॥
 पहिचानहु तुम्ह कहहु सुभाऊ । प्रेम बिस पुनि पुनि कहराऊ ॥
 जा दिन तैं मुनि गए लवाई । तब तैं आजु साँचि सुधि पाई ॥
 कहहु बिदेह कवन बिधि जाने । सुनि प्रिय बचन दूत मुसुकाने ॥

दो०—सुनहु महीपति मुकुट मनि तुम्ह सम धन्य न कोउ ।

रामु लखनु जिन्ह के तनय बिस्व बिभूषन दोउ ॥२९१॥
 पूछन जोगु न तनय तुम्हारे । पुरुषसिंघ तिहु पुर उजिआरे ॥
 जिन्ह के जस प्रताप कैं आगे । ससि मलीन रवि सीतल लागे ॥
 तिन्ह कहँ कहिअ नाथ किमि चीन्हे । देखिअ रवि कि दीप कर लीन्हे ॥
 सीय स्वयंवर भूप अनेका । समिटे सुभट एक तैं एका ॥
 संभु सरासनु काहुँ न टारा । हारे सकल बीर वरिआरा ॥
 तीनि लोक महुँ जे भटमानी । सभ कै सकति संभु धनु भानी ॥
 सकइ उठाइ सरासुर मेरू । सोउ हियँ हारि गयउ करि फेरू ॥
 जेहिँ कौतुक सिवसैलु उठावा । सोउ तेहि सभाँ परामउ पावा ॥

दो०—तहाँ राम रघुबंस मनि सुनिअ महा महिपाल ।

भंजेउ चाप प्रयास बिनु जिमि गज पंकज नाल ॥२९२॥

सुनि सरोष भृगुनाथकु आए । बहुत मोति तिन्ह जीखि देखाए ॥

देखि राम बलु निज धनु दीन्हा । करि बहु विनय गवनु बन कीन्हा ॥
 राजन रामु अतुलबल जैसें । तेज निधान लखनु पुनि तैसें ॥
 कंपहिं भूप बिलोकत जाकें । जिमि गज हरि किसोर के ताकें ॥
 देव देखि तव बालक दोऊ । अब न आँखि तर आवत कोऊ ॥
 दूत बचन रचना प्रिय लागी । प्रेम प्रताप बीर रस पागी ॥
 सभा समेत राउ अनुरागे । दूतन्ह देन निछावरि लागे ॥
 कहि अनीति ते मूढ़हिं काना । धरमु बिचारि सबहिं सुखु माना ॥
 दो०—तब उठि भूप बसिष्ट कहूँ दीन्हि पत्रिका जाइ ।

कथा सुनाई गुरहि सब सादर दूत बोलाइ ॥२९३॥
 सुनि बोले गुर अति सुखु पाई । पुन्य पुरुष कहूँ महि सुख छाई ॥
 जिमि सरिता सागर महुँ जाहीं । जद्यपि ताहि कामना नाहीं ॥
 तिमि सुख संपति विनहिं बोलाएँ । धरमसील पहिं जाहिं सुभाएँ ॥
 तुम्ह गुर विप्र धेनु सुर सेवी । तसि पुनीत कौसल्या देवी ॥
 सुकृती तुम्ह समान जग माहीं । भयउ न है कोउ होनेउ नाहीं ॥
 तुम्ह ते अधिक पुन्य बड़ काकें । राजन राम सरिस सुत जाकें ॥
 बीर विनीत धरम व्रत धारी । गुन सागर वर बालक चारी ॥
 तुम्ह कहूँ सर्व काल कल्याणा । सजहु वरात बजाइ निसाना ॥
 दो०—चलहु बेगि सुनि गुर बचन भलेहिं नाथ सिरु नाइ ।

भूपति गवने भवन तब दूतन्ह बांसु देवाइ ॥२९४॥

मुनि संदेसु सकल हरषानीं । अपर कथा सब भूप बखानीं ॥
 प्रेम प्रफुल्लित राजहिं रानी । मनहुँ सिखिनि सुनि वारिद बानी ॥
 मुदित असीस देहिं गुर नारीं । अति आनंद मगन महतारीं ॥
 लेहिं परस्पर अति प्रिय पाती । हृदयँ लगाइ जुड़ावहिं छाती ॥
 राम लखन कै कीरति करनी । बारहिं बार भूपवर वरनी ॥
 मुनि प्रसादु कहि द्वार सिधाए । रानिन्ह तब महिदेव बोलाए ॥
 दिए दान आनंद समेता । चले विप्रवर आसिष देता ॥
 सो०—जाचक लिए हँकारि दीन्हि निछावरि कोटिबिधि ।

चिर जीवहुँ सुत चारि चक्रवर्ति दसरथ के ॥२९५॥
 कहत चले पहिरें पट नाना । हरषि हने गहगहे निसाना ॥
 समाचार सब लोगन्ह पाए । लागे घर घर होन बधाए ॥
 भुवन चारि दस भरा उछाहू । जनकसुता रघुवीर विआहू ॥
 मुनि सुभ कथा लोग अनुरागे । मग गृह गर्ली सँवारन लागे ॥
 जद्यपि अवध सदैव सुहावनि । राम पुरी मंगलमय पावनि ॥
 तदापि प्रीति कै प्रीति सुहाई । मंगल रचना रची बनाई ॥
 ध्वज पताक पट चामर चारु । छावा परम विचित्र बजारू ॥
 कनक कलस तोरन मनि जाला । हरद दूय दधि अच्छत माला ॥

दो०—मंगलमय निज निज भवन लोगन्ह रचे बनाइ ।

बीथीं सींचीं चतुरसम चौकें चारु पुराइ ॥२९६॥

जै तह जूय जूय मिलि भामिनि । सजि नव सप्त सकल दुति दामिनि ॥

बिधुबदनीं मृग सावक लोचनि । निज सरूप रति मानु विमोचनि ॥
 गावहिं मंगल मंजुल बानीं । सुनि कलरव कलकंठि लजानीं ॥
 भूप भवन किमि जाइ बखाना । विस्व विमोहन रचेउ बिताना ॥
 मंगल द्रव्य मनोहर नाना । राजत बाजत बिपुल निसाना ॥
 कतहुँ बिरिद बंदी उच्चरहीं । कतहुँ वेद धुनि भूसुर करहीं ॥
 गावहिं सुंदरि मंगल गीता । लै लै नामु रामु अरु सीता ॥
 बहुत उछाहु भवनु अति थोरा । मानहुँ उमगि चला चहु ओरा ॥
 दो०—सोभा दसरथ भवन कइ को कवि बरनै पार ।

जहाँ सकल सुर सीस मनि राम लीन्ह अवतार ॥२९७॥
 भूप भरत पुनि लिए बोलाई । हय गय स्यंदन साजहु जाई ॥
 चलहु बेगि रघुवीर बराता । सुनत पुलक पूरे दोउ भ्राता ॥
 भरत सकल साहनी बोलाए । आयसु दीन्ह मुदित उठि धाए ॥
 रचि रुचि जीन तुरग तिन्ह साजे । बरन बरन बर बाजि बिराजे ॥
 सुभग सकल सुठि चंचल करनी । अय इव जरत धरत पग धरनी ॥
 नाना जाति न जाहिं बखाने । निदरि पवनु जनु चहत उड़ाने ॥
 तिन्ह सब छयल भए असवारा । भरत सरिस वय राजकुमारा ॥
 सब सुंदर सब भूषनधारी । कर सर चाप तून कटि भारी ॥
 दो०—छरे छबीले छयल सब सूर सुजान नबीन ।

जुग पदचर असवार प्रति जे असिकला प्रबीन ॥२९८॥

बाँधे बिरद बीर रन गाढ़े । निकसि भए पुर बाहर ठाढ़े ॥

फेरहिं चतुर तुरग गति नाना । हरषहिं सुनि सुनि पनव निसाना ॥
 रथ सारथिन्ह विचित्र बनाए । ध्वज पताक मनि भूषन लाए ॥
 चवैर चारु किंकिनि धुनि करहीं । भानु जान सोभा अपहरहीं ॥
 सावैकरन अगनित हय होते । ते तिन्ह रथन्ह सारथिन्ह जोते ॥
 सुंदर सकल अलंकृत सोहे । जिन्हहि विलोकत मुनि मन मोहे ॥
 जे जल चलहिं थलहि की नाई । टाप न बूढ़ ब्रेग अधिकाई ॥
 अस्त्र सस्त्र सबु साजु बनाई । रथी सारथिन्ह लिए बोलाई ॥
 दो०—चढ़ि चढ़ि रथ बाहेर नगर लागी जुरन बरात ।

होत सगुन सुंदर सबहि जो जेहि कारज जात ॥ २९९ ॥
 कलित करिबरन्हि परीं अँबारीं । कहिन जाहिं जेहि भाँति सँवारी ॥
 चले मत्त गज घंट बिरांजी । मनहुँ सुभग सावन घन राजी ॥
 वाहन अपर अनेक विधाना । सिबिका सुभग सुखासन जाना ॥
 तिन्ह चढ़ि चले विप्रवर वृंदा । जनु तनु धरें सकल श्रुति छंदा ॥
 मागध सूत बंदि गुनगायक । चले जान चढ़ि जो जेहि लायक ॥
 बेसर ऊँट वृषभ बहु जाती । चले वस्तु भरि अगनित भाँती ॥
 कोटिन्ह काँवरि चले कहारा । विविध वस्तु को वरनै पारा ॥
 चले सकल सेवक समुदाई । निज निज साजु समाजु बनाई ॥
 दो०—सब कें उर निर्भर हरषु पूरित पुलक सरीर ।

कबहिं देखिबे नयन भरि रामु लखनु दोड बीर ॥ ३०० ॥

निदरि घनहि घुर्मरहिं निसाना । निज पराइ कछु सुनिअ न काना
 महा भीर भूपति के द्वारें । रज होइ जाइ पधान पवारें ॥
 चढ़ी अटारिन्ह देखहिं नारीं । लिऐं आरती मंगल थारीं ॥
 गावहिं गीत मनोहर नाना । अति आनंदु न जाइ बखाना ॥
 तब सुमंत्र दुइ स्यंदन साजी । जोते रवि हय निंदक बाजी ॥
 दोउ रथ रुचिर भूप पहिं आने । नहिं सारद पहिं जाहिं बखाने ॥
 राज समाजु एक रथ साजा । दूसर तेज पुंज अति भ्राजा ॥
 दो०—तेहिं रथ रुचिर बसिष्ठ कहूँ हरषि चढ़ाइ नरेसु ।

आपु चढ़ेउ स्यंदन सुमिरि हर गुर गौरि गनेसु ॥ ३०१ ॥
 सहित बसिष्ठ सोह नृप कैसैं । सुर गुर संग पुरंदर जैसैं ॥
 करि कुल रीति बेद बिधि राज । देखि सबहि सब भाँति बनाऊ ॥
 सुमिरि रामु गुर आयसु पाई । चले महीपति संख बजाई ॥
 हरषे बिबुध बिलोकि बराता । बरषहिं सुमन सुमंगल दाता ॥
 भयउ कोलाहल हय गय गाजे । व्योम बरात बाजने बाजे ॥
 सुर नर नारि सुमंगल गाई । सरस राग बाजहिं सहनाई ॥
 घंट घंटी धुनि बरनि न जाहीं । सरव करहिं पाइक फहराहीं ॥
 करहिं बिदूषक कौतुक नाना । हास कुसल कल गान सुजाना ॥
 दो०—तुरग नचावहिं कुअर बर अकनि मृदंग निसान ।

नागर नट चितवहिं चकित डगहिं न ताल बँधान ॥ ३०२ ॥

चारा चाषु वाम दिसि लेई । मनहुँ सकल मंगल कहि देई ॥
 दाहिन काग सुखेत सुहावा । नकुल दरसु सब काहूँ पावा ॥
 सानुकूल बह त्रिविध बयारी । सघट सबाल आव वर नारी ॥
 लोवा फिरि फिरि दरसु देखावा । सुरभी सनमुख सिसुहि पिआवा ॥
 मृगमाला फिरि दाहिनि आई । मंगल गन जनु दीन्हि देखाई ॥
 छेमकरी कह छेम बिसेषी । स्यामा वाम सुतरु पर देखी ॥
 सनमुख आयउ दधि अरु मीना । कर पुस्तक दुइ विप्र प्रबीना ॥

दो०—मंगलमय कल्याणमय अभिमत फल दातार ।

जनु सब साचे होन हित भए सगुन एक बार ॥३०३॥

मंगल सगुन सुगम सब ताकैं । सगुन ब्रह्म सुंदर सुत जाकैं ॥
 राम सरिस बरु दुलहिनि सीता । समधी दसरथु जनकु पुनीता ॥
 सुनि अस ब्याहु सगुन सब नाचे । अय कीन्हे विरंचि हम साँचे ॥
 एहि विधि कीन्ह बरात पयाना । हय गय गाजहिं हने निसाना ॥
 आवत जानि भानुकुल केतू । सरितन्हि जनक बँधाए सेतू ॥
 बीच बीच बर बाण बनाए । सुरपुर सरिस संपदा छाए ॥
 असन सयन बर बसन सुहाए । पावहिं सब निज निज मन भाए ॥
 नित नूतन सुख लखि अनुकूले । सकल बरातिन्ह मंदिर भूले ॥

दो०—आवत जानि बरात बर सुनि गहगहे निसान ।

सजि गज रथ पदचर तुरग लेन चले अगवान ॥३०४॥

कनक कलस भरि कोपर थारा । भाजन ललित अनेक प्रकारा ॥
 भरे सुधासम सब पकवाने । नाना भाँति न जाहिं बखाने ॥
 फल अनेक बर वस्तु सुहाई । हरषि भेंट हित भूप पठाई ॥
 भूषन वसन महामनि नाना । खग मृग हय गय बहुविधि जाना
 मंगल सगुन सुगंध सुहाए । बहुत भाँति महिपाल पठाए ॥
 दधि चिउरा उपहार अपारा । भरि भरि काँवरि चले कहारा ॥
 अगवानन्ह जब दीखि बराता । उर आनंदु पुलक भर गाता ॥
 देखि बनाव सहित अगवाना । मुदित बरातिन्ह हने निसाना ॥
 दो०—हरषि परसपर मिलन हित कछुक चले बगमेल ।

जनु आनंद समुद्र दुइ मिलत बिहाइ सुबेल ॥ ३०५ ॥
 बरषि सुमन सुर सुंदरि गावहिं । मुदित देव दुंदुभीं बजावहिं ॥
 वस्तु सकल राखीं नृप आगें । विनय कीन्हि तिन्ह अति अनुरागें
 प्रेम समेत रायँ सबु लीन्हा । भै बकसीस जाचकन्हि दीन्हा ॥
 करि पूजा मान्यता बड़ाई । जनवासे कहूँ चले लवाई ॥
 बसन विचित्र पाँवड़े परहीं । देखि धनदु धन महु परिहरहीं ॥
 अति सुंदर दीन्हेउ जनवासा । जहँ सब कहूँ सब भाँति सुपासा ॥
 जानी सियँ बरात पुर आई । कछु निज महिमा प्रगटि जनार्ण ॥
 हृदयँ सुमिरि सब सिद्धि बोलाई । भूप पहुनई करन पठाई ॥
 दो०—सिधि सब सिय आयसु अकनि गई जहाँ जनवास ।

लिई संपदा सकल सुख सुरपुर भाग बिलास ॥ ३०६ ॥

निज निज बास बिलोकि बराती । सुर सुख सकल सुलभ सब भाँती ॥
 विभव भेद कछु कोउ न जाना । सकल जनक कर करहिं बखाना ॥
 सिय महिमा रघुनायक जानी । हरषे हृदयँ हेतु पहिचानी ॥
 पितु आगमनु सुनत दोउ भाई । हृदयँ न अति आनंदु अमाई ॥
 सकुचन्ह कहि न सकत गुरु पाहीं । पितु दरसन लालचु मन माहीं ॥
 बिस्वामित्र विनय बड़ि देखी । उपजा उर संतोषु बिसेषी ॥
 हरषि बंधु दोउ हृदयँ लगाए । पुलक अंग अंबक जल छाए ॥
 चले जहाँ दसरथु जनवासे । मनहुँ सरोवर तकेउ पिआसे ॥

दो०—भूप बिलोके जबहिं मुनि आवत सुतन्ह समेत ।

उठे हरषि सुखसिंधु महुँ चले थाह सी लेत ॥३०७॥

मुनिहि दंडवत कीन्ह महीसा । बार बार पद रज धरि सीसा ॥
 कौसिक राउ लिए उर लाई । कहि असीस पूछी कुसलाई ॥
 पुनि दंडवत करत दोउ भाई । देखि नृपति उर सुखु न समाई ॥
 सुत हियँ लाइ दुसह दुख मेटे । मृतक सरीर प्राण जनु भेंटे ॥
 पुनि बसिष्ठ पद सिर तिन्ह नाए । प्रेम मुदित मुनिवर उर लाए ॥
 बिप्र बृंद बंदे दुहुँ भाई । मनभावती असीस पाई ॥
 भरत सहानुज कीन्ह प्रनामा । लिए उठाइ लाइ उर रामा ॥
 हरषे लखन देखि दोउ भ्राता । मिले प्रेम परिपूरित गाता ॥

दो०—पुनरज पवित्र ज्ञातिजन जात्यक संजी मीत ।

मिले जथाविधि सबहि प्रभु परम कृपाल बिनीत ॥३०८॥

रामहि देखि बरात जुड़ानी । प्रीति कि रीति न जाति बखानी ॥
 वृष समीप सोहहिं सुत चारी । जनु धन धरमादिक तनुधारी ॥
 सुतन्ह समेत दसरथहि देखी । मुदित नगर नर नारि बिसेषी ॥
 सुमन बरिसि सुर-हनहि निसाना । नाकनटीं नाचहिं करि गाना ॥
 सत्तानंद अरु बिप्र सचिव गन । भागध सूत विदुष बंदीजन ॥
 सहित बरात राउ सनमाना । आयसु मागि फिरे अगवाना ॥
 प्रथम बरात लगन तें आई । तातें पुर प्रभोदु अधिकाई ॥
 ब्रह्मानंदु लोग सब लहहीं । बढहुँ दिवस निसि बिधि सन कहहीं
 दो०—रामु सीय सोभा अवधि सुकृत अवधि दोउ राज ।

जहँ तहँ पुरजन कहहिं अस मिलि नर नारि समाज ॥ ३०९ ॥

जनक सुकृत मूरति बैदेही । दसरथ सुकृत रामु धरें देही ॥
 इन्ह सम काहुँ न सिव अवराधे । काहुँ न इन्ह समान फल लाधे ॥
 इन्ह सम कोउ न भयउ जग माहीं । है नहिं कतहुँ होनेउ नाहीं ॥
 हम सब सकल सुकृत कै रासी । भए जग जनमि जनकपुर बासी ॥
 जिन्ह जानकी राम छवि देखी । को सुकृती हम सरिस बिसेषी ॥
 पुनि देखब रघुबीर बिआहू । लेब भली बिधि लोचन लाहू ॥
 कहहिं परसपर कोकिलबयनीं । एहि बिआहँ बड़ लाभु सुनयनीं ॥
 बड़ें भाग बिधि बात बनाई । नयन अतिथि होइहहिं दोउ भाई ॥

विविध भाँति होइहि पहुनाई। प्रिय न काहि अस सासुर माई॥
 तब तब राम लखनहि निहारी। होइहि सव पुर लोग सुखारी॥
 सखि जस राम लखन कर जोटा। तैसेइ भूप संग दुइ ढोटा॥
 स्याम गौर सब अंग सुहाए। ते सब कहहि देखि जे आए॥
 कहा एक मैं आजु निहारे। जनु विरंचि निज हाथ मँवारे॥
 भरतु रामही की अनुहारी। सहसा लखि न सकहि नर नारी॥
 लखनु सत्रुसूदनु एकरूपा। नख सिख ते सब अंग अनूपा॥
 मन भावहि मुख बरनि न जाहीं। उपमा कहँ त्रिभुवन कोउ नाहीं॥

छं०—उपमा न कोउ कह दास तुलसी कतहुँ कबि कोबिद कहैं।
 बल विनय बिद्या सील सोभा सिंधु इन्ह से एइ अहैं॥
 पुर नारि सकल पसारि अंचल विधिहि बचन सुनावहीं।
 व्याहिअहुँ चारिउ भाइएहि पुर हम सुमंगल गावहीं॥

सो०—कहहि परस्पर नारि बारि बिलोचन पुलक तन।

सखि सत्रु करव पुरारि पुन्य पयोनिधि भूप दोउ ॥३११॥
 एहि विधि सकल मनोरथ करहीं। आनँद उमगि उमगि उर भरहीं॥
 जे नृप सीय स्वयंबर आए। देखि बंधु सब तिन्ह सुख पाए॥
 कहत राम जसु बिसद बिसाला। निज निज भवन गए महिपाला॥
 गए बीति कछु दिन एहि भाँती। प्रमुदित पुरजन सकल बराती॥
 मंगल मूल लगन दिनु आवा। हिम रितु अगहन मास सुहावा॥
 ग्रह तिथि नखतु जोगु बर बारू। लगन सोधि विधि कीन्ह बिचारू॥

पठै दीन्हि नारद सन सोई । गनी जनक के गनकन्ह जोई ॥
 मुनी सकल लोगन्ह यह बाता । कहहिं जोतिषी आहिं विधाता ॥
 दो०—धेनुधूरि बेला बिमल सकल सुमंगल मूल ।

विप्रन्ह कहेउ विदेह सन जानि सगुन अनुकूल ॥३१२॥

उपरोहितहि कहेउ नरनाहा । अब विलंब कर कारनु काहा ॥
 सतानंद तब सचिव बोलाए । मंगल सकल साजि सब ल्याए ॥
 संख निसान पनव बहु बाजे । मंगल कलस सगुन सुभ साजे ॥
 सुभग सुआसिनि गावहिं गीता । करहिं वेद धुनि विप्र पुनीता ॥
 लेन चले सादर एहि भाँती । गए जहाँ जनवास बराती ॥
 कोसलपति कर देखि समाजू । अति लघु लागतिन्हहि सुरराजू ॥
 भयउ समउ अब धारिअ पाऊ । यह सुनि परा निसानहिं घाऊ ॥
 गुरहि पूछि करि कुल विधि राजा । चले संग मुनि साधु समाजा ॥
 दो०—भाग्य बिभव अवधेस कर देखि देव ब्रह्मादि ।

लगे सराहन सहस मुख जानि जनम निज बादि ॥३१३॥

सुरन्ह सुमंगल अवसर जाना । बरषहिं सुमन बजाइ निसाना ॥
 सिव ब्रह्मादिक विबुध बरूथा । चढ़े विमानन्हि नाना जूथा ॥
 प्रेम पुलक तन हृदयँ उछाहू । चले बिलोकन राम बिआहू ॥
 देखि जनकपुरु सुर अनुरागे । निज निज लोक सबहिं लघु लागे ॥
 चितवहिं चकित बिचित्र बिताना । रचना सकल अलौकिक नाना ॥
 नगर नारि नर रूप निधाना । सुधर सुधरम सुसील सुजाना ॥

तिन्हहि देखि सब सुर सुरनारी । भए नखत जनु बिधु उजिआरी ॥
विधिहि भयउ आचरजु बिसेषी । निज करनी कछु कतहुँ न देखी ॥

दो०—सिद्ध समुझाए देव सब जनि आचरज भुलाहु ।

हृदय बिचारहु धीर धरि सिय रघुबीर बिआहु ॥३१४॥

जिन्ह कर नामु लेत जग माहीं । सकल अमंगल मूल नसाहीं ॥
करतल होहि पदारथ चारी । तेइ सिय रामु कहेउ कामारी ॥
एहि विधि संभु सुरन्ह समुझावा । पुनि आगेँ बर बसह चलावा ॥
देवन्ह देखे दसरथु जाता । महामोद मन पुलकित गाता ॥
साधु समाज संग महिदेवा । जनु तनु धरें करहि सुख सेवा ॥
सोहत साथ सुभग सुत चारी । जनु अपवरग सकल तनुधारी ॥
मरकत कनक बरन बर जोरी । देखि सुरन्ह भै प्रीति न थोरी ॥
पुनि रामहि विलोकि हियँ हरषे । नृपहि सराहि सुमन तिन्ह वरषे ॥
दो०—राम रूपु नख सिख सुभग बारहि बार निहारि ।

पुलक गात लोचन सजल उमा समेत पुरारि ॥३१५॥

केकि कंठ दुति स्यामल अंगा । तड़ित विनिंदक बसन सुरंगा ॥
व्याह बिभूषन विविध बनाए । मंगल सब सब भाँति सुहाए ॥
सरद विमल बिधु बदन सुहावन । नयन नवल राजीव लजावन ॥
सकल अलौकिक सुंदरताई । कहि न जाइ मनहीं मन भाई ॥
बंधु मनोहर सोहहि संग । जस्त नचावत चपल सुरंगा ॥
राजकुँअर बर बाजि देखावहि । बस प्रससक विरिद सुनावहि ॥

जेहि तुरंग पर रामु बिराजे। गति विलोकि खगनायकु लाजे॥
 कहि न जाइ सब भाँति सुहावा। बाजि बेषु जनु काम बनावा ॥

छं०—जनु बाजि बेषु बनाइ मनसिजु राम हित अति सोहई ।
 आपनै बय बल रूप गुन गति सकल भुवन बिमोहई ॥
 जगमगत जीनु जराव जोति सुप्रोति मनि मानिक लगे ।
 किंकिनि ललाम लगामु ललित बिलोकि सुर नर मुनि ठगे ॥

दो०—प्रभु मनसहिं लयलीन मनु चलत बाजि छबि पाव ।

भूषित उड़गन तदित घनु जनु बर बरहि नचाव ॥ ३१ ६ ॥

जेहिं बर बाजि रामु असवारा। तेहि सारदउ न बरनै पारा ॥
 संकरु राम रूप अनुरागे। नयन पंचदस अति प्रिय लागे॥
 हरि हित सहित रामु जब जोहे। रमा समेत रमापति मोहे ॥
 निरखि राम छवि विधि हरषाने। आठइ नयन जानि पछिताने ॥
 सुर सेनप उर बहुत उछाहू। विधि ते डेवढ़ लोचन लाहू ॥
 रामहि चितव सुरेस सुजाना। गौतम श्रापु परम हित माना ॥
 देव सकल सुरपतिहिं सिहाहीं। आजु पुरंदर सम कोउ नाहीं ॥
 मुदित देवगन रामहि देखी। नृपसमाज दुहुँ हरपु बिसेषी ॥

छं०—अति हरपु राजसमाज दुहु दिसि दुंदुभीं बाजहिं घनी ।
 बरषहिं सुमन सुर हरषि कहि जय जयति जय रघुकुलमनी ॥

एहि भाँति जानि बरात आवत बाजने बहु बाजहीं ।

रानी सुआसिनि बोलि परिछनि हेतु मंगल साजहीं ॥

दो०—सजि आरती अनेक बिधि मंगल सकल सँवारि ।

चलीं मुदित परिछनि करन गजगामिनि बर नारि ॥३१७॥

बिधुवदनीं सब सब मृगलोचनि । सब निज तन छवि रति महु मोचनि

पहिरें बरन बरन बर चीरा । सकल विभूषन सजें सरीरा ॥

सकल सुमंगल अंग बनाएँ । करहिं गान कलकंठि लजाएँ ॥

कंकन किंकिनि नूपुर बाजहिं । चालि बिलोकि काम गज लाजहिं ॥

बाजहिं बाजने बिबिध प्रकारा । नभ अरु नगर सुमंगलचारा ॥

सची सारदा रमा भवानी । जे सुरतिय सुचि सहज सयानी ॥

कपट नारि बर बेष बनाई । मिलीं सकल रनिवासहिं जाई ॥

करहिं गान कल मंगल बानी । हरष बिबस सब काहुँ न जानी ॥

छं०—को जान केहि आनंद बस सब ब्रह्म बर परिछन चली ।

कल गान मधुर निसान बरषहिं सुमन सुर सोभा भली ॥

आनंदकंदु बिलोकि दूलहु सकल हियँ हरषित भई ।

अंभोज अंबक अंबु उमगि सुअंग पुलकावलि छई ॥

दो०—जो सुखु भा सिय मातु मन देखि राम बर बेषु ।

सो न सकहिं कहि कल्प सत सहस सारदा सेषु ॥३१८॥

नयन नीरु हटि मंगल जानी । परिछनि करहिं मुदित मन रानी ॥

बेद बिहित अरु कुल आचारु । कीन्ह भली बिधि सब व्यवहारु ॥

पंच सबद धुनि मंगल गाना । पट पाँवड़े परहिं बिधि नाना ॥

करि आरती अरघु तिन्ह दीन्हा । राम गमनु मंडप तब कीन्हा ॥

दसरथु सहित समाज बिराजे । बिभवबिलोकि लोकपति लाजे ॥
 समयँ समयँ सुर वरषहिं फूला । सांति पढ़हिं महिसुर अनुकूला ॥
 नभ अरु नगर कोलाहल होई । आपनि पर कछु सुनइ न कोई ॥
 एहि विधि रामु मंडपहिं आए । अरघु देइ आसन बैठाए ॥

छं०—बैठारि आसन आरती करि निरखि बरु सुखु पावहीं ।
 मनि बसन भूषन भूरि चारहिं नारि मंगल गावहीं ॥
 ब्रह्मादि सुरबर बिप्र बेष बनाइ कौतुक देखहीं ।
 अवलोकि रघुकुल कमल रवि छवि सुफल जीवन लेखहीं ॥

दो०—नाऊ बारी भाट नट राम निछावरि पाइ ।

मुदित असीसहिं नाइ सिर हरषु न हृदयँ समाइ ॥ ३१९ ॥

मिले जनकु दसरथु अति प्रीती । करि बैदिक लौकिक सब रीती ॥
 मिलत महा दोउ राज बिराजे । उपमा खोजि खोजि कवि लाजे ॥
 लही न कतहुँ हारि हियँ मानी । इन्ह सम एइ उपमा उर आनी ॥
 सामघ देखि देव अनुरागे । सुमन वरषि जसु गावन लागे ॥
 जगु बिरंचि उपजावा जब तें । देखे सुने व्याह बहु तब तें ॥
 सकल भाँति सम साजु समाजू । सम समधी देखे हम आजू ॥
 देव गिरा सुनि सुंदर साँची । प्रीति अलौकिक दुहु दिसि माची ॥
 देत पाँवड़े अरघु सुहाए । सादर जनकु मंडपहिं ल्याए ॥

छं०—मंडपु बिलोकि बिचित्र रचनाँ रुचिरताँ सुनि मन हरे ।

बिन्न पानि जनक सुजान सब कहँ आनि सिंघासन धरे ॥

कुल इष्ट सरिस बसिष्ट पूजे विनय करि आसिष लही ।
कौसिकहि पूजत परम प्रीति कि रीति तौ न परै कही ॥
दो०—ग्रामदेव आदिक रिषय पूजे मुदित महीस ।

दिए दिव्य आसन सबहि सब सन लही असीस ॥३२०॥

बहुरि कीन्हि कोसलपति पूजा । जानि ईस सम भाउ न दूजा ॥
कीन्हि जोरि कर विनय बड़ाई । कहि निज भाग्य विभव बहुताई ॥
पूजे भूपति सकल बराती । समधी सम सादर सब भाँती ॥
आसन उचित दिए सब काहू । कहाँ काह मुख एक उछाहू ॥
सकल बरात जनक सनमानी । दान मान विनती बर बानी ॥
विधि हरि हरु दिसिपति दिनराऊ । जे जानहिं रघुबीर प्रभाऊ ॥
कपट विप्र बर वेष बनाएँ । कौतुक देखहिं अति सचु पाएँ ॥
पूजे जनक देव सम जानें । दिए सुआसन बिनु पहिचानें ॥

छं०—पहिचान को केहि जान सबहि अपान सुधि भोरी भई ।
आनंद कंदु बिलोकि दूलहु उभय दिसि आनंदमई ॥
सुर लखे राम सुजान पूजे मानसिक आसन दए ।
अवलोकिसीलु सुभाउ प्रभु को बिबुध मन प्रमुदित भए ॥

दो०—रामचंद्र मुख चंद्र छबि लोचन चारु चकोर ।

करत पान सादर सकल प्रेमु प्रमोदु न थोर ॥३२१॥

समउ बिलोकि बसिष्ठ बोलाए । सादर सतानंदु सुनि आए ॥
वेगि कुँअरि अब आनहु जाई । चले मुदित मुनि आयसु पाई ॥

रानी सुनि उपरोहित बानी । प्रमुदित सखिन्ह समेत सयानी ॥
 विप्र धधू कुलवृद्ध बोलाई । करि कुल रीति सुमंगल गाई ॥
 नारि वेप जे सुर बर वामा । सकल सुभायँ सुंदरी स्यामा ॥
 तिन्हहि देखि सुखु पावहिं नारीं । विनु पहिचानि प्रानहु ते प्यारीं ॥
 बार बार सनमानहिं रानी । उमा रमा सारद सम जानी ॥
 सीय सँवारि समाजु बनाई । मुदित मंडपहिं चलीं लवाई ॥

छं०—चलि ल्याइ सीतहि सखीं सादर सजि सुमंगल भामिनीं ।
 नवसप्त साजें सुंदरीं सब मत्त कुंजर गामिनीं ॥
 कल गान सुनि मुनि ध्यान त्यागहिं काम कोकिल लाजहीं ।
 मंजीर नूपुर कलित कंकन ताल गति बर बाजहीं ॥

दो०—सोहति बनिता वृंद महुँ सहज सुहावनि स्वीय ।

छबि ललना गन मध्य जनु सुषमा तिय कमनीय ॥ ३२२ ॥

सिय सुंदरता बरनि न जाई । लघु मति बहुत मनोहरताई ॥
 आवत दीखि बरातिन्ह सीता । रूप रासि सब भाँति पुनीता ॥
 सबहि मनहिं मन किए प्रनामा । देखि राम भए पूरनकामा ॥
 हरषे दसरथ सुतन्ह समेता । कहि न जाइ उर आनँदु जेता ॥
 सुर प्रनामु करि बरिसहिं फूला । मुनि असीस धुनि मंगल मूला ॥
 गान निसान कोलाहल भारी । प्रेम प्रमोद मगन नर नारी ॥
 एहि विधि सीय मंडपहिं आई । प्रमुदित सांति पदहिं मुनिआई ॥
 तेहि अवसर कर विधि व्यवहारु । दुहुँ कुलगुर सब कीन्ह अचारु ॥

छं०—आचारु करि गुर गौरि गनपति मुदित बिप्र पुजावहीं ।
 सुर प्रगटि पूजा लेहिं देहिं असीस अति सुख पावहीं ॥
 मधुपर्क मंगल द्रव्य जो जेहि समय मुनि मन महुँ चाहैं ।
 भरे कनक कोपर कलस सो तब लिपिहिं परिचारक रहैं ॥ १ ॥
 कुल रीति प्रीति समेत रबि कहि देत सब सादर कियो ।
 एहि भाँति देव पुजाइ सीतहि सुभग सिंघासनु दियो ॥
 सिय राम अवलोकनि परसपर प्रेसु काहु न लखि परै ।
 मन बुद्धि बर बानी अगोचर प्रगट कबि कैसेँ करै ॥ २ ॥

दो०—होम समय तनु धरि अनलु अति सुख आहुति लेहिं ।
 बिप्र वेष धरि वेद सब कहि बिबाह बिधि देहिं ॥ ३२ ॥
 जनक पाटमहिषी जग जानी । सीय मातु किमि जाइ बखानी ॥
 सुजसु सुकृत सुख सुंदरताई । सब समेटि बिधि रची बनाई ॥
 समउ जानि मुनिबरन्ह बोलाई । सुनत सुआसिनि सादर ल्याई ॥
 जनक बाम दिसि सोह सुनयना । हिमगिरि संग बनी जनु मयना ॥
 कनक कलस मनि कोपर रुरे । सुचि सुगंध मंगल जल पूरे ॥
 निज कर मुदित रायँ अरु रानी । धरे राम के आगें आनी ॥
 पढ़हिं वेद मुनि मंगल बानी । गगन सुमन झरि अवसर जानी ॥
 बरु बिलोकि दंपति अनुरागे । पाय पुनीत पखारन लागे ॥

छं०—लागे पखारन पाय पंकज प्रेम तन पुलकावली ।
 नभ नगर गान निसान जय धुनि उमगि जनु चहुँ दिसि चली ॥

जे पद सरोज मनोज अरि उर सर सदैव विराजहीं ।
 जे सकृत् सुमिरत बिमलता मन सकल कलि मल भाजहीं ॥ १ ॥
 जे परसि मुनिबनिता लही गति रही जो पातकमई ।
 मकरंदु जिन्हको संभु सिर सुचिता अवधि सुर बरनई ॥
 करि मधुप मन मुनि जोगिजन जे सेइ अभिमत गति लहैं ।
 ते पद पखारत भाग्यभाजनु जनकु जय जय सब कहैं ॥ २ ॥
 बर कुअँरि करतल जोरि साखोचारु दोउ कुलगुर करैं ।
 भयो पानिगहनु विलोकि बिधि सुर मनुज मुनि आनँद भरैं ॥
 सुखमूल दूलहु देखि दंपति पुलक तन हुलस्यो हियो ।
 करि लोक वेद बिधानु कन्यादानु नृपभूषन कियो ॥ ३ ॥
 हिमवंत जिमि गिरिजा महेसहि इरिहि श्री सागर दई ।
 तिमि जनक रामहि सिय समरपी बिस्व कल कीरति नई ॥
 क्यों करै बिनय विदेहु कियो बिदेहु मूरति सावँरीं ।
 करि होमु बिधिबत गाँठि जोरी होन लागीं भावँरीं ॥ ४ ॥

दो०—जय धुनि बंदी वेद धुनि मंगल गान निसान ।

सुनि हरषहिं बरषहिं बिबुध सुरतरु सुमन सुजान ॥ ३२४ ॥

कुअँरु कुअँरि कल भावँरि देहीं । नयन लाभु सब सादर लेहीं ॥
 जाइ न बरनि मनोहर जोरी । जो उपमा कछु कहौं सो थोरी ॥
 राम सीय सुंदर प्रतिछाहीं । जगमगात मुनि खंभन माहीं ॥
 मनहुं मदन रति धरि बहु रूपा । देखत राम बिआहु अरूपा ॥

दरस लालसा सकुच न थोरी । प्रगटत दुरत बहोरि बहोरी ॥
 भए मगन सब देखनिहारे । जनक समान अपान बिसारे ॥
 प्रमुदित मुनिन्ह भाँवरीं फेरीं । नेगसहित सब रीति निबेरीं ॥
 राम सीय सिर सेंदुर देहीं । सोभा कहि न जाति बिधि केहीं ॥
 अरुन पराग जलजु भरि नीकें । ससिहि भूष अहि लोभ अमी कैं ॥
 बहुरि बसिष्ठ दीन्हि अनुसासन । बरु दुलहिनि बैठे एक आसन ॥

छं०—बैठे बरासन रामु जानकि मुदित मन दसरथु भए ।
 तनु पुलक पुनि पुनि देखि अपनैं सुकृत सुरतरु फल नए ॥
 भरि भुवन रहा उछाहु राम बिबाहु भा सबहीं कहा ।
 केहि भाँति बरनि सिरात रसना एक यहु मंगलु महा ॥१॥
 तब जनक पाइ बसिष्ठ आयसु व्याह साज सँवारि कै ।
 मांडवी श्रुतकीरति उरमिला कुँअरि लई हँकारि कै ॥
 कुसकेतु कन्या प्रथम जो गुन सील सुख सोभामई ।
 सब रीति प्रीति समेत करि सो व्याहि नृप भरतहि दर्ई ॥२॥
 जानकी लघु भगिनी सकल सुंदरि सिरोमनि जानि कै ।
 सो तनय दीन्हि व्याहि लखनहि सकल बिधिसनमानि कै ॥
 जेहि नामु श्रुतकीरति सुलोचनि सुमुखि सब गुन आगरी ।
 सो दर्ई रिपुसूदनहि भूपति रूप सील उजागरी ॥३॥
 अनुरूप बर दुलहिनि परस्पर लखि सकुच हियँ हरषहीं ।
 सब मुदित सुदरता सराहीं सुमन सुर मन बरषहीं ॥

सुंदरीं सुंदर बरन्ह सह सब एक मंडप राजहीं ।

जनु जीव उर चारिउ अवस्था बिभुन सहित बिराजहीं ॥४॥

दो०—मुदित अवधपति सकल सुत बधुन्ह समेत निहारि ।

जनु पाए महिपाल मनि क्रियन्ह सहित फल चारि ॥३२५॥

जसि रघुबीर व्याह विधि बरनी । सकल कुअँर व्याहे तेहिं करनी ॥

कहि न जाइ कछु दाइज भूरी । रहा कनक मनि मंडपु पूरी ॥

कंबल बसन विचित्र पटोरे । भाँति भाँति बहु मोल न थोरे ॥

गज रथ तुरग दास अरु दासी । धेनु अलंकृत कामदुहा सी ॥

वस्तु अनेक करिअ किमि लेखा । कहि न जाइ जानहिं जिन्ह देखा ॥

लोकपाल अवलोकि सिहाने । लीन्ह अवधपति सब सुखु माने ॥

दीन्ह जाचकन्हि जो जेहि भावा । उवरा सो जनवासेहिं आवा ॥

तब कर जोरि जनकु मृदु बानी । बोले सब बरात सनमानी ॥

छं०—सनमानि सकल बरात आदर दान बिनय बड़ाइ कै ।

प्रमुदित महा मुनि बृंद बंदे पूजि प्रेम लड़ाइ कै ॥

सिरु नाइ देव मनाइ सब सन कहत कर संपुट किएँ ।

सुर साधु चाहत भाउ सिंधु कि तोष जल अंजलि दिएँ ॥१॥

कर जोरि जनकु बहोरि बंधु समेत कोसलराय सों ।

बोले मनोहर बयन सानि सनेह सील सुभाय सों ॥

संबंध राजन रावरें हम बडे अब सब विधि भए ।

एहि राज साज समेत सेवक जानिबे बिनु गय लए ॥२॥

ए दारिका परिचारिका करि पालिबीं करुना नई ।
 अपराधु छमिबो बोलि पठए बहुत हौं ढोढ्यो कई ॥
 पुनि भानुकुलभूषन सकल सनमान निधि समधी किए ।
 कहि जाति नहिं बिनती परस्पर प्रेम परिपूरन हिए ॥३॥
 बृंदारका गन सुमन बरिसहिं राउ जनदासेहि चले ।
 दुंदुभी जय धुनि वेद धुनि नभ नगर कौतूहल भले ॥
 तब सखीं मंगल गान करत मुनीस आयसु पाइ कै ।
 दूलह दुलहिनिन्ह सहित सुंदरि चलीं कोहबर ल्याइ कै ॥४॥
 दो०—पुनि पुनि रामहि चितव सिय सकुचति मनु सकुचै न ।

हरत मनोहर मीन छवि प्रेम पिआसे नैन ॥३२६॥

मासपारायण, ग्यारहवाँ विथाम

स्याम सरीर सुभायँ सुहावन । सोभा कोटि मनोज लजावन ॥
 जावक जुत पद कमल सुहाए । मुनि मन मधुप रहत जिन्ह छाए ॥
 पीत पुनीत मनोहर धोती । हरति बाल रवि दामिनि जोती ॥
 कल किंकिनि कटि सूत्र मनोहर । बाहु बिसाल बिभूषन सुंदर ॥
 पीत जनेउ, महाछवि देई । कर मुद्रिका चोरि चितु लेई ॥
 सोहत व्याह साज सब साजे । उर आयत उरभूषन राजे ॥
 पिअर उपरना काखासोती । दुहुँ आँचरन्हि लंगे मनि मोती ॥
 नयन कमल कल कुंडल कानां । बदन सकल सौंदर्ज निधाना ॥
 सुंदर भकुटि मनोहर नासा । भाल तिलक रुचिरता निवासा ॥
 सोहत मौर मनोहर माथे । मंगलमय मुकुता मनि गाथे ॥

छं०—गाथे महामनि मौर मंजुल अंग सब चित चोरहीं ।
 पुर नारि सुर सुंदरीं बरहि बिलोकि सब तिन तोरहीं ॥
 मनि बसन भूषन वारि आरति करहि मंगल गावहीं ।
 सुर सुमन बरिसहि सूत मागध बंदि सुजसु सुनावहीं ॥१॥
 कोहबरहि आने कुअँर कुअँरि सुआसिनिन्ह सुख पाइ कै ।
 अति प्रीति लौकिक रीति लागीं करन मंगल गाइ कै ॥
 लहकौरि गौरि सिखाव रामहि सीय सन सारद कहैं ।
 रनिवासु हास विलास रस बस जन्म को फलु सब लहैं ॥२॥
 निज पानि मनि महुँ देखिअति मूरति सुरूपनिधान की ।
 चालति न भुजबल्ली बिलोकनि बिरह भय बस जानकी ॥
 कौतुक बिनोद प्रमोदु प्रेसु न जाइ कहि जानहिं अलीं ।
 बर कुअँरि सुंदर सकल सखीं लवाइ जनवासेहि चलीं ॥३॥
 तेहि समय सुनिअ असीस जहँ तहँ नगर नभ आनँदु महा ।
 चिरु जिअहुँ जोरीं चारु चारथो मुदित मन सबहीं कहा ॥
 जोगींद्र सिद्ध मुनीस देव बिलोकि प्रभु दुंदुभि हनी ।
 चले हरषि बरषि प्रसून निज निज लोक जय जय जय भनी ॥४॥
 दो०—सहित बधूटिन्ह कुअँर सब तब आए पितु पास ।

सोभा मंगल मोद भरि उमगेउ जनु जनवास ॥३२७॥

पुनि जेवनार भई बहु भाँती । पठए जनक बोलाइ बसली ॥
 परत पावड़े बसन अनूपा । सुतन्ह समेत गवन कियो भूपा ॥

सादर सब के पाय पखारे। जथाजोगु पीढ़न्ह बैठारे ॥
 धोए जनक अवधपति चरना। सीलु सनेहु जाइ नहिं बरना ॥
 बहुरि राम पद पंकज धोए। जे हर हृदय कमल महुँ गोए ॥
 तीनिउ भाइ राम सम जानी। धोए चरन जनक निज पानी ॥
 आसन उचित सवहि नृप दीन्हे। बोलि सूपकारी सब लीन्हे ॥
 सादर लगे परन पनवारे। कनक कील मनि पान सँवारे ॥

दो०—सूपोदन सुरभी सरपि सुंदर स्वादु पुनीत ।

छन महुँ सब कें परुसि गे चतुर सुआर विनीत ॥३२८॥

पंच कवल करि जेवन लागे। गारि गान सुनि अति अनुरागे ॥
 भाँति अनेक परे पकवाने। सुधा सरिस नहिं जाहिं बखाने ॥
 परुसन लगे सुआर सुजाना। बिंजन विविध नाम को जाना ॥
 चारि भाँति भोजन विधि गाई। एक एक विधि बरनि न जाई ॥
 छरस रुचिर बिंजन बहु जाती। एक एक रस अगनित भाँती ॥
 जेवँत देहिं मधुर धुनि गारी। लै लै नाम पुरुष अरु नारी ॥
 समय सुहावनि गारि विराजा। हँसत राउ सुनि सहित समाजा ॥
 एहि विधि सबहीं भोजनु कीन्हा। आदर सहित आचमनु दीन्हा ॥

दो०—देइ पान पूजे जनक दसरथुसहित समाज ।

जनवासेहि गवने मुदित सकल भूप सिरताज ॥३२९॥

नित नूतन मंगल पुर माहीं। निमिष सरिस दिन जामिनि जाहीं ॥

बड़े मोर भूपतिमनि जाने। आचम पुन गम गावनि लागे ॥

देखि कुअँर बर बधुन्ह समेता । किमि कहि जात मोदु मन जेता ॥
 प्रातक्रिया करि गे गुरु पाहीं । महाप्रमोदु प्रेमु मन माहीं ॥
 करि प्रनामु पूजा कर जोरी । बोले गिरा अमिअँ जनु बोरी ॥
 तुम्हरी कृपाँ सुनहु मुनिराजा । भयउँ आजु मैं पूरनकाजा ॥
 अब सब विप्र बोलाइ गोसाईँ । देहु धेनु सब भाँति बनाईँ ॥
 सुनि गुर करि महिपाल बड़ाई । पुनि पठए मुनि वृंद बोलाई ॥
 दो०—बामदेउ अरु देवरिषि बालमीकि जाबालि ।

आए मुनिबर निकर तब कौसिकादि तपसालि ॥३३०॥

दंड प्रनाम सबहि नृप कीन्हे । पूजि सप्रेम बरासन दीन्हे ॥
 चारि लच्छ बर धेनु मगाई । कामसुरभि सम सील सुहाई ॥
 सब विधि सकल अलंकृत कीन्हीं । मुदित महिप महिदेवन्ह दीन्हीं ॥
 करत विनय बहु विधि नरनाहू । लहेउँ आजु जग जीवन लाहू ॥
 पाइ असीस महीसु अनंदा । लिए बोलि पुनि जाचक वृन्दा ॥
 कनक बसन मनि हय गय स्यंदन । दिए बूझि रुचिरबिकुलनंदन ॥
 चले पढ़त गावत गुन गाथा । जय जय जय दिनकर कुल नाथा ॥
 एहि विधि राम बिआह उछाहू । सकइ न बरनि सहस मुख जाहू ॥
 दो०—बार बार कौसिक चरन सीसु नाइ कह राउ ।

यह सत्रु सुखु मुनिराज तत्र कृपा कटाच्छ पसाउ ॥३३१॥

जनक सनेहु सीलु करतूती । नृपु सब भाँति सराह बिभूती ॥
 दिमसुष्टि विद्या अवधपति भागा । राखहि जनकु सहित अनुरागा ॥

नित नूतन आदर अधिकारि । दिन प्रति सहस्र भाँति पहुँचाई ॥
 नित नव नगर अनंद उछाड़ू । दसरथ गवनु सोहाइ न काहू ॥
 बहुत दिवस बीते एहि भाँती । जनु सनेह रजु बँधे बराती ॥
 कौसिक सतानंद तब जाई । कहा बिदेह नृपहि समुझाई ॥
 अब दसरथ कहँ आयसु देहू । जत्रपि छाड़ि न सकहु सनेहू ॥
 भलेहिं नाथ कहि सचिव बोलाए । कहि जयजीव सीस तिन्ह नाए ॥

दो०—अवधनाथु चाहत चलन भीतर करहु जनाउ ।

भए प्रेमबस सचिव सुनि बिप्र सभासद राउ ॥३३२॥

पुरवासी सुनि चलिहि बराता । बूझत बिकल परस्पर बाता ॥
 सत्य गवनु सुनि सब बिलखाने । मनहुँ साँझ सरसिज सकुचाने ॥
 जहँ जहँ आवत बसे बराती । तहँ तहँ सिद्ध चला बहु भाँती ॥
 विविध भाँति मेवा पकवाना । भोजन साजु न जाइ बखाना ॥
 भरि भरि बसहँ अपार कहारा । पठई जनक अनेक सुसारा ॥
 तुरग लाख रथ सहस्र पचीसा । सकल सँवारे नखं अरु सीसा ॥
 मत्त सहस्र दस सिंधुर साजे । जिन्हहि देखि दिसिकुंजर लाजे ॥
 कनक बसन मनि भरि भरि जाना । महिषीं धेनु वस्तु विधि नाना ॥

दो०—दाइज अमित न सकिअ कहि दीन्ह बिदेहँ बहोरि ।

जो अवलोकत लोकपति लोक संपदा थोरि ॥३३३॥

सबु समाजु एहि भाँति बनाई । जनक अवधपुर दीन्ह पठाई ॥

चलिहि बरात सुनत सब रानी । बिकल मीनगन जनु लघु पानी ॥

पुनि पुनि सीय गोद करि लेहीं । देइ असीस सिखावनु देहीं ॥
 होएहु संतत पियहि पिआरी । चिरु अहिवात असीस हमारी ॥
 सासु ससुर गुर सेवा करेहू । पति रुख लखि आयसु अनुसरेहू
 अति सनेह बस सखीं सयानी । नारि धरम सिखवहिं मृदु बानी ॥
 सादर सकल कुअँरि समुझाई । रानिन्ह बार बार उर लाई ॥
 बहुरि बहुरि भेटहिं महतारीं । कहहिं विरंचि रचीं कत नारीं ॥
 दो०—तेहि अवसर भाइन्ह सहित रामु भानु कुल केतु ।

चले जनक मंदिर मुदित बिदा करावन हेतु ॥३३४॥

चारिउ भाइ सुभायँ सुहाए । नगर नारि नर देखन धाए ॥
 कोउ कह चलन चहत हहिं आजू । कीन्ह बिदेह बिदा कर साजू ॥
 लेहु नयन भरि रूप निहारी । प्रिय पाहुने भूप सुत चारी ॥
 को जानै केहिं सुकृत सयानी । नयन अतिथि कीन्हे बिधि आनी
 मरनसीलु जिमि पाव पिऊषा । सुरतरु लहै जनम कर भूखा ॥
 पाव नारकी हरिपदु जैसैं । इन्ह कर दरसनु हम कहँ तैसैं ॥
 निरखि राम सोभा उर धरहू । निज मन फनि मूरति मनि करहू ॥
 एहि बिधि सवहि नयन फलु देता । गए कुअँर सब राज निकेता ॥

दो०—रूप सिंधु सब बंधु लखि हरषि उठा रनिवासु ।

करहिं निछावरि आरती महा मुदित मन सासु ॥३३५॥

देखि राम छवि अति अनुरागीं । प्रेम बिबस पुनि पुनि पद लागीं ॥

रही न लाज प्रीति उर छाई । सहज सनेहु वरान किमि जाई ॥

भाइन्ह सहित उबटि अन्हवाए । छरस असन अति हेतु जेवाँए ॥
 बोले रामु सुअवसर जानी । सील सनेह सकुचमय बानी ॥
 राउ अवधपुर चहत सिधाए । बिदा होन हम इहाँ पठाए ॥
 मातु मुदित मन आयसु देहू । बालक जानि करब नित नेहू ॥
 सुनत बचन बिलखेउ रनिवासू । बोलि न सकहिं प्रेमबस सासू ॥
 हृदयँ लगाइ कुअँरि सब लीन्ही । पतिन्ह सौँपि विनती अति कीन्ही ॥

छं०—करि बिनय सिय रामहि समरपी जोरि कर पुनि पुनि कहै ।
 बलि जाउँ तात सुजान तुम्ह कहँ बिदित गति सब की अहै ॥
 परिवार पुरजन मोहि राजहि प्राण प्रिय सिय जानिबी ।
 तुलसीस सीलु सनेहु लखि निज किंकरी करि मानिबी ॥

सो०—तुम्ह परिपूरन काम जान सिरोमनि आवप्रिय ।

जन गुन गाहक राम दोष दलन करुनायतन ॥३३६॥
 अस कहि रही चरन गहि रानी । प्रेम पंक जनु गिरा समानी ॥
 सुनि सनेहसानी बर बानी । बहुविधि राम सासु सनमानी ॥
 राम बिदा मागत कर जोरी । कीन्ह प्रनामु बहोरि बहोरी ॥
 पाइ असीस बहुरि सिरु नाई । भाइन्ह सहित चले रघुराई ॥
 मंजु मधुर मूरति उर आनी । भई सनेह सिथिल सब रानी ॥
 पुनि धीरजु धरि कुअँरि हँकारी । बार बार भेटहिं महतारी ॥
 पहुँचावहिं फिरि मिलहिं बहोरी । बढी परस्पर प्रीति न थोरी ॥

पुनि पुनि मिलत सखिन्ह बिलगाई । बालबच्छ जिमि येनु लवाई ॥

दो०—प्रेम बिबस नर नारि सब सखिन्ह सहित रनिवासु ।

मानहुँ कीन्ह बिदेहपुर करुनाँ बिरहँ निवासु ॥३३७॥

सुक सारिका जानकी ज्याए । कनक पिंजरन्हि राखि पढ़ाए ॥

ब्याकुल कहहि कहाँ बैदेही । सुनि धीरजु परिहरइ न केही ॥

भए विकल खग मृग एहि भाँती । मनुज दसा कैसेँ कहि जाती ॥

बंधु समेत जनकु तब आए । प्रेम उमगि लोचन जल छाए ॥

सीय बिलोकि धीरता भागी । रहे कहावत परम बिरागी ।

लीन्हि रायँ उर लाइ जानकी । भिटी महामरजाद ग्यान की ॥

समुझावत सब सचिव सयाने । कीन्ह बिचारु न अवसर जाने ॥

बारहिँ बार सुता उर लाई । सजि सुंदर पालकीँ मगाई ॥

दो०—प्रेमबिबस परिवारु सत्रु जानि सुलगन नरेस ।

कुअँरि चढ़ाई पालकिन्ह सुमिरे सिद्धि गनेस ॥३३८॥

बहुविधि भूप सुता समुझाई । नारिधरमु कुलरीति सिखाई ॥

दासीं दास दिए बहुतेरे । सुचि सेवक जे प्रिय सिय केरे ॥

सीय चलत ब्याकुल पुरवासी । होहिँ सगुन सुभ मंगल रासी ॥

भूसुर सचिव समेत समाजा । संग चले पहुँचावन राजा ॥

समय बिलोकि बाजने बाजे । रथ गज बाजि बरातिन्ह साजे ॥

दसरथ बिप्र बोलि सब लीन्हे । दान मान परिपूरन कीन्हे ॥

चरन सरोज धूरि धरि सीसा । मुदित महीपति पाइ असीसा ॥

सुमिरि गजाननु कीन्ह पयाना । मंगलमूल सगुन भए नाना ॥

दो०—सुर प्रसून वरषहिं हरषि करहिं अपछरा गान ।

चले अवधपति अवधपुर सुदित बजाइ निसान ॥३३९॥

नृप करि विनय महाजन फेरे । सादर सकल मागने टेरे ॥
भूषन बसन बाजि गज दीन्हे । प्रेम पोषि ठाढ़े सब कीन्हे ॥
बार बार बिरिदावलि भाषी । फिरे सकल रामहि उर राखी ॥
बहुरि बहुरि कोसलपति कहहीं । जनकु प्रेमबस फिरै न चहहीं ॥
पुनि कह भूपति बचन सुहाए । फिरिअ महीस दूरि बड़ि आए ॥
राउ बहोरि उतरि भए ठाढ़े । प्रेम प्रवाह बिलोचन बाढ़े ॥
तब विदेह बोले कर जोरी । बचन सनेह सुधौं जनु बोरी ॥
करौं कवन बिधि विनय बनाई । महाराज मोहि दीन्हि बड़ाई ॥

दो०—कोसलपति समधी सजन सनमाने सब भाँति ।

मिलनि परसपर विनय अति प्रीति न हृदयँ समाति ॥३४०॥

मुनि मंडलिहि जनक सिरु नावा । आसिरबाहु सबहि सन पावा ॥
सादर पुनि भेंटे जामाता । रूपसीलगुन निधि सब भ्राता ॥
जोरि पंकरुह पानि सुहाए । बोले बचन प्रेम जनु जाए ॥
राम करौं केहि भाँति प्रशंसा । मुनि महेस मन मानस हंसा ॥
करहिं जोग जोगी जेहि लागी । कोहु मोहु ममता मदु त्यागी ॥
व्यापकु ब्रह्म अलखु अविनासी । चिदानंदु निरगुन गुनरासी ॥
मन समेत जेहि जान न बानी । तरकि न सकहिं सकल अनुमानी ॥

महिमा मिमामु भोति कहि कहई । जोतिहुं काल एवरा रहई ॥

दो०—नयन बिषय मो कहूँ भयउ सो समस्त सुख मूल ।

सबइ लाभु जग जीव कहँ भएँ ईसु अनुकूल ॥३४१॥

सबहि भाँति मोहि दीन्हि बड़ाई । निज जन जानि लीन्ह अपनाई ॥
 होहिँ सहस दस सारद सेवा । करहिँ कल्प कोटिक भरि लेखा ॥
 मोर भाग्य राउर गुन गाथा । कहि न सिराहिँ सुनहु रघुनाथा ॥
 मैं कछु कहउँ एक बल मोरें । तुम्ह रीझहु सनेह सुठि योरें ॥
 बार बार मागउँ कर जोरें । मनु परिहरै चरन जनि भोरें ॥
 सुनि बर बचन प्रेम जनु पोषे । पूरनकाम रामु परितोषे ॥
 करि बर विनय ससुर सनमाने । पितु कौसिक बसिष्ठ सम जाने ॥
 विनती बहुरि भरत सन कीन्ही । मिलि सप्रेमु पुनि आसिष दीन्ही ॥

दो०—मिले लखन रिपुसूदनहि दीन्हि असीस महीस ।

भए परसपर प्रेमबस फिरि फिरि नावहिँ सीस ॥३४२॥

बार बार करि विनय बड़ाई । रघुपति चले संग सब भाई ॥
 जनक गहे कौसिक पद जाई । चरन रेनु सिर नयनन्ह लाई ॥
 सुनु मुनीस बर दरसन तोरें । अगमु न कछु प्रतीति मन मोरें ॥
 जो सुखसुजसु लोकपति चहहीं । करत मनोरथ सकुचत अहहीं ॥
 सो सुखसुजसु सुलभ मोहि स्वामी । सब सिधि तव दरसन अनुगामी
 कीन्हि विनय पुनि पुनि सिरु नाई । फिरे महीसु आसिषा पाई ॥
 चली बरात निसान बजाई । मुदित छोट बड़ सब समुदाई ॥
 रामाहिँ निराखि ग्राम नर नारी । पाई नयन फलु हाहिँ सुखारी ॥

दो०—बीच बीच बर बास करि मग लोगन्ह सुख देत ।

अवध समीप पुनीत दिन पहुँची आइ जनेत ॥३४३॥
हने निसान पनव बर बाजे । भेरि संख धुनि हय गय गाजे ॥
झाँझि बिरव डिंडिमी सुहाई । सरस राग बाजहिँ सहनाई ॥
पुर जन आवत अकनि बराता । मुदित सकल पुलकावलि गाता ॥
निज निज सुंदर सदन सँवारे । हाट बाट चौहट पुर द्वारे ॥
गलीं सकल अरगजाँ सिँचाई । जहँ तहँ चौकें चारु पुराई ॥
बना बजार न जाइ बखाना । तोरन केतु पताक बिताना ॥
सफल पूगफल कदलि रसाला । रोपे बकुल कदंब तमाला ॥
लगे सुभग तरु परसत धरनी । मनिमय आलवाल कल करनी ॥

दो०—बिबिध भाँति मंगल कलस गृह गृह रचे सँवारि ।

सुर ब्रह्मादि सिंहाहिँ सब रघुबर पुरी निहारि ॥३४४॥
भूप भवन तेहि अवसर सोहा । रचना देखि मदन मनु मोहा ॥
मंगल सगुन मनोहरताई । रिधि सिधि सुख संपदा सुहाई ॥
जनु उछाह सब सहज सुहाए । तनु धरि धरि दसरथ गृहँ छाए ॥
देखन हेतु राम बैदेही । कहहु लालसा होहि न केही ॥
जूथ जूथ मिलि चलीं सुआसिनि । निज छवि निदरहिँ मदन बिलासिनि ॥
सकल सुमंगल सजें आरती । गावहिँ जनु बहु वेष भारती ॥
भूपति भवन कोलाहलु होई । जाइ न बरनि समउ सुखु सोई ॥
कोसल्यादि राम महतारी । प्रेमबिबस तन दसा बिसारी ॥

दो०—दिष्ट दान बिप्रन्ह बिपुल पूजि गनेस पुरारि ।

प्रमुदित परम दरिद्र जनु पाइ पदारथ चारि ॥३४५॥
 मोद प्रमोद बिबस सब भाता । चलहिं न चरन सिथिल भए गाता
 राम दरस हित अति अनुरागी । परिछनि साजु सजन सब लागी ॥
 बिबिध बिधान बाजने बाजे । मंगल मुदित सुमित्राँ सजे ॥
 हरद दूब दधि पल्लव फूल । पान पूगफल मंगल मूल ॥
 अच्छत अंकुर लोचन लाजा । मंजुल मंजरि तुलसि बिराजा ॥
 छुहे पुरट घट सहज सुहाए । मदन सकुन जनु नीड़ बनाए ॥
 सगुन सुगंध न जाहिं बखानी । मंगल सकल सजहिं सब रानी ॥
 रचीं आरतीं बहुत बिधाना । मुदित करहिं कलमंगल गाना ॥

दो०—कनक थार भरि मंगलन्हि कमल करन्हि लिएँ मात ।

चलीं मुदित परिछनि करन पुलक पल्लवित गात ॥३४६॥
 धूप धूम नभु मेचक भयऊ । सावन घन घमंडु जनु ठयऊ ॥
 सुरतरु सुमन माल सुर वरषहिं । मनहुँ बलाक अवलि मनु करषहिं
 मंजुल मनिमय बंदनिवारे । मनहुँ पाकरिपु चाप सँवारे ॥
 प्रगटहिं दुरहिं अटन्ह पर भामिनि । चारु चपल जनु दमकहिं दामिनि
 दुंदुभि धुनि घन गरजनि घोरा । जाचक चातक दादुर मोरा ॥
 सुर सुगंध सुचि वरषहिं बारी । सुखी सकल ससि पुर नर नारी ॥
 समउ जानि गुर आयसु दीन्हा । पुर प्रवेसु रघुकुलमनि कीन्हा ॥
 सुमिरि सभु गिरिजा गनराजा । मुदित महीपति सहित समाजा ॥

दो०—होहिं सगुन बरषहिं सुमन सुर दुंदुभीं बजाइ ।

बिबुध बधू नाचहिं मुदित मंजुल मंगल गाइ ॥३४७॥
मागध सूत बंदि नट नागर । गावहिं जसु तिहु लोक उजागर ॥
जय धुनि विमल वेद बर बानी । दसदिसि सुनिअ सुमंगल सानी ॥
बिपुल बाजने बाजन लागे । नभ सुर नगर लोग अनुरागे ॥
बने बराती बरनि न जाहीं । महा मुदित मन सुख न समार्हीं ॥
पुरबासिन्ह तब राय जोहारे । देखत रामहि भए सुखारे ॥
करहिं निछावरि मनिगन चीरा । बारि बिलोचन पुलक सरीरा ॥
आरति करहि मुदित पुर नारी । हरषहिं निरखि कुअँर बर चारी ॥
सिबिका सुभग ओहार उघारी । देखि दुलहिनिन्ह होहिं सुखारी ॥

दो०—एहि बिधि सबही देत सुखु आए राजदुआर ।

मुदित मातु परिछनि करहिं बधुन्ह समेत कुमार ॥३४८॥
करहिं आरती बारहिं बारा । प्रेमु प्रमोदु कहै को पारा ॥
भूषन मनि पट नाना जाती । करहिं निछावरि अगनित भाँती ॥
बधुन्ह समेत देखि सुत चारी । परमानंद मगन महतारी ॥
पुनि पुनि सीय रामछवि देखी । मुदित सफल जग जीवन लेखी ॥
सखीं सीय मुख पुनि पुनि चाही । गान करहिं निज सुकृत सराही ॥
बरषहिं सुमन छनहिं छन देवा । नाचहिं गावहिं लावहिं सेवा ॥
देखि मनोहर चारिउ जोरीं । सारद उपमा सकल ढँढोरीं ॥
देत न बनहि निपट लघु लागी । एकटक रही रूप अनुरागी ॥

दो०—निगम नीति कुल रीति करि अरघ पाँवड़े देत ।

बधुन्ह सहित सुत परिछि सब चलीं लवाइ निकेत ॥ ३४९ ॥

चारि सिंघासन सहज सुहाए । जनु मनोज निज हाथ बनाए ॥
तिन्ह पर कुअँरि कुअँर बैठारे । सादर पाय पुनीत पखारे ॥
धूप दीप नैवेद बेद विधि । पूजे बर दुलहिनि मंगलनिधि ॥
बारहिं धार आरती करहीं । व्यजन चारु चामर सिर ढरहीं ॥
बस्तु अनेक निछावरि होहीं । भरीं प्रमोद मातु सब सोहीं ॥
पावा परम तत्व जनु जोगीं । अमृतु लहेउ जनु संतत रोगीं ॥
जनम रंक जनु पारस पावा । अंधहि लोचन लाभु सुहावा ॥
मूक बदन जनु सारद छाई । मानहुँ समर सूर जय पाई ॥

दो०—एहि सुख ते सत कोटि गुन पावहिं मातु अनंदु ।

भाइन्ह सहित बिआहि घर आए रघुकुलचंदु ॥ ३५० (क) ॥

लोक रीति जननीं करहिं बर दुलहिनि सकुचाहिं ।

मोदु बिनोदु बिलोकि बड़ रामु मनहिं मुसुकाहिं । ३५० (ख) ।

देव पितर पूजे विधि नीकी । पूजीं सकल बासना जी की ॥
सबहि बंदि मागहिं बरदाना । भाइन्ह सहित राम कल्याना ॥
अंतरहित सुर आसिष देहीं । मुदित मातु अंचल भरि लेहीं ॥
भूपति बोलि बराती लीन्हे । जान बसन मनि भूषन दीन्हे ॥
आयसु पाइ राखि उर रामहि । मुदित गए सब निज निज धामहि
पुर नर नारि सकल पहिराए । घर घर बाजन लगे बघाए ॥

जाचक जन जाचहिं जोइ जोई । प्रमुदित राउ देहिं सोइ सोई ॥
 सेवक सकल बजनिआ नाना । पूरन किए दान सनमाना ॥
 दो०—देहिं असीस जोहारि सब गावहिं गुन गन गाथ ।

तब गुर भूसुर सहित गृहँ गवनु कीन्ह नरनाथ ॥ ३५१ ॥
 जो बसिष्ठ अनुसासन दीन्ही । लोक वेद विधि सादर कीन्ही ॥
 भूसुर भीर देखि सब रानी । सादर उठीं भाग्य बड़ जानी ॥
 पाय पखारि सकल अन्हवाए । पूजि भली विधि भूप जेवाँए ॥
 आदर दान प्रेम परिपोषे । देत असीस चले मन तोषे ॥
 बहु विधि कीन्ह गाधिसुत पूजा । नाथ मोहि सम धन्य न दूजा ॥
 कीन्ह प्रसंसा भूपति भूरी । रानिन्ह सहित लीन्ह पग धूरी ॥
 भीतर भवन दीन्ह बर बासू । मन जोगवत रह नृपु रनिवासू ॥
 पूजे गुर पद कमल बहोरी । कीन्ह विनय उर प्रीति न थोरी ॥
 दो०—बधुन्ह समेत कुमार सब रानिन्ह सहित महीसु ।

पुनि पुनि बंदत गुर चरन देत असीस मुनीसु ॥ ३५२ ॥
 विनय कीन्ह उर अति अनुरागें । सुत संपदा राखि सब आगें ॥
 नेगु मागि मुनिनायक लीन्हा । आसिरबादु बहुत विधि दीन्हा ॥
 उर धरि रामहि सीय समेता । हरषि कीन्ह गुर गवनु निकेता ॥
 विप्रबधू सब भूप बोलाई । चैल चारु भूषन पहिराई ॥
 बहुरि बोलाई सुआसिनि लीन्हीं । रुचि विचारि पहिरावनि दीन्हीं ॥
 नेगी नेग जोग सब लेहीं । रुचि अनुरूप भूपमनि देहीं ॥

प्रिय पाहुने पूज्य जे जाने। भूपति भली भाँति सनमाने॥
 देव देखि रघुवीर बिबाहू। वरषि प्रसून प्रसंसि उछाहू॥
 दो०—चले निसान बजाइ सुर निज निज पुर सुख पाइ ।

कहत परसपर राम जसु प्रेम न हृदयँ समाइ ॥३५३॥

सब त्रिधि सबहि समदि नरनाहू। रहा हृदयँ भरि पूरि उछाहू॥
 जहँ रनिवासु तहाँ पगु धारे। सहित बहूटिन्ह कुअँर निहारे॥
 लिए गोद करि मोद समेता। को कहि सकइ भयउ सुखु जेता॥
 बधू सप्रेम गोद बैठारीं। बार बार हियँ हरषि दुलारीं॥
 देखि समाजु मुदित रनिवासू। सब कँउर अनंद कियो बासू॥
 कहेउ भूप जिमि भयउ बिबाहू। सुनि सुनि हरषु होत सब काहू॥
 जनक राज गुन सीलु बड़ाई। प्रीति रीति संपदा सुहाई॥
 बहु विधि भूप भाट जिमि बरनी। रानीं सब प्रमुदित सुनि करनी॥
 दो०—सुतन्ह समेत नहाइ नृप बोलि बिप्र गुर ग्याति ।

भोजन कीन्ह अनेक बिधि घरी पंच गइ राति ॥३५४॥

मंगलगान करहिं वर भामिनि। मै सुखमूल मनोहर जामिनि॥
 अँचइ पान सब काहूँ पाए। सग सुगंध भूषित छबि छाए॥
 रामहि देखि रजायसु पाई। निज निज भवन चले सिरनाई॥
 प्रेसु प्रमोदु विनोदु बड़ाई। समउ समाजु मनोहरताई॥
 कहि न सकहि सत सारद सेसू। वेद विरंचि महेश गनेसू॥
 सो मै कहौ कवन बिधि बरनी। भूमिनागु सिर धरइ कि धरनी॥

नृप सब भाँति सबहि सनमानी । कहि मृदु बचन बोलाई रानी ॥
बधू लरिकनीं पर घर आई । राखेहु नयन पलक की नाई ॥
दो०—लरिका श्रमित उनीद बस सयन करावहु जाइ ।

अस कहि गे बिश्राम गृहँ राम चरन चितु लाइ ॥३५५॥

भूप बचन सुनि सहज सुहाए । जरित कनक मनि पलँग डसाए ॥
सुभग सुरभि पय फेन समाना । कोमल कलित सुपेती नाना ॥
उपवरहन बर बरनि न जाहीं । स्नग सुगंध मनिमंदिर माहीं ॥
रतनदीप सुठि चारु चँदोवा । कहत न बनइ जान जेहि जोवा ॥
सेज रुचिर रचि रामु उठाए । प्रेम समेत पलँग पौढ़ाए ॥
अग्या पुनि पुनि भाइन्ह दीन्ही । निज निज सेज सयन तिन्ह कीन्ही
देखि स्याम मृदु मंजुल गाता । कहहि सप्रेम बचन सब माता ॥
मारग जात भयावनि भारी । केहि विधि तात ताड़का मारी ॥
दो०—घोर निसाचर बिकट भट समर गनहि नहिं काहु ।

मारे सहित सहाय किमि खल मारीच सुबाहु ॥३५६॥

मुनि प्रसाद बलि तात तुम्हारी । ईस अनेक करवरें टारी ॥
मख रखवारी करि दुहुँ भाई । गुरु प्रसाद सब बिद्या पाई ॥
मुनितिय तरी लगत पग धूरी । कीरति रही भुवन भरि पूरी ॥
कमठ पीठि पबि कूट कठोरा । नृप समाज महुँ शिवधनु तोरा ॥
बिस्व बिजय जसु जानकि पाई । आए भवन ब्याहि सब भाई ॥
सकल अमानुष करम तुम्हारे । केवल कौसिक कृपा सुधारे ॥

आजु सुफलजग जनमु हमारा। देखि तात बिधुबदन तुम्हारा ॥
जे दिन गए तुम्हहि बिनु देखें। ते विरंचि जनि पारहिं लेखें ॥

दो०—राम प्रतोषीं मातु सब कहि बिनीत बर बैन।

सुमिरि संभु गुर बिप्र पद किए नीदबस नैन ॥३५७॥
नीदउँ बदन सोह सुठि लोना। मनहुँ साँझ सरसीरुह सोना ॥
घर घर करहि जागरन नारीं। देहिं परसपर मंगल गारीं ॥
पुरी विराजति राजति रजनी। रानी कहहि बिलोकहु सजनी ॥
सुंदर बधुन्ह सासु लै सोई। फनिकन्ह जनु सिरमनि उर गोई ॥
प्रात पुनीत काल प्रभु जागे। अरुनचूड़ बर बोलन लागे ॥
बंदि मागधन्हि गुनगन गाए। पुरजन द्वार जोहारन आए ॥
बंदि बिप्र सुर गुर पितु माता। पाइ असीस मुदित सब भ्राता ॥
जननिन्ह सादर बदन निहारे। भूपति संग द्वार पगु धारे ॥
दो०—कीन्हि सौच सब सहज सुचि सरित पुनीत नहाइ।

प्रातक्रिया करि तात पहिं आए चारिउ भाइ ॥३५८॥

नवाह्नपारायण, तीसरा विधाम

भूप बिलोकि लिए उर लाई। बैठे हरषि रजायसु पाई ॥
देखि रामु सब सभा जुड़ानी। लोचनलाम अवधि अनुमानी ॥
पुनि बसिष्ठ मुनि कौसिकु आए। सुभग आसनन्हि मुनि बैठाए ॥
सुवन्ह समेत पुजि पद लागे। निरति राम दोऊ गुर अनुसारे ॥
कहहि बसिष्ठ धरम इतिहासा। सुनहिं महीसु सहित रनिवासा ॥

मुनि मन अगम गाधिसुत करनी । मुदित बसिष्ट विपुल विधि बरनी
बोले बामदेउ सब साँची । कीरति कलित लोक तिहुँ माची
मुनि आनंदु भयउ सब काहू । राम लखन उर अधिक उछाहू-
दो०—मंगल मोद उछाह नित जाहिं दिवस एहि भाँति ।

उमगी अवध अनंद भरि अधिक अधिक अधिकाति ॥ ३५९ ॥

सुदिन सोधि कल कंकन छोरे । मंगल मोद विनोद न थोरे ॥
नित नवसुख सुर देखि सिहाहीं । अवध जन्म जाचहिं विधि पाहीं ॥
विस्वामित्रु चलन नित चहहीं । राम सप्रेम विनय बस रहहीं ॥
दिन दिन सयगुन भूपति भाऊ । देखि सराह महामुनिराऊ ॥
मागत विदा राउ अनुरागे । सुतन्ह समेत ठाढ़ भे आगे ॥
नाथ सकल संपदा तुम्हारी । मैं सेवकु समेत सुत नारी ॥
करब सदा लरिकन्ह पर छोहू । दरसन देत रहव मुनि मोहू ॥
अस कहि राउ सहित सुत रानी । परेउ चरन मुख आव न बानी ॥
दीन्हि असीस विप्र बहु भाँती । चले न प्रीति रीति कहि जाती ॥
रामु सप्रेम संग सब भाई । आयसु पाइ फिरे पहुँचाई ॥
दो०—राम रूपु भूपति भगति ब्याहू उछाहू अनंदु ।

जात सराहत मनहिं मन मुदित गाधिकुलचंदु ॥ ३६० ॥

बामदेव रघुकुल गुर ग्यानी । बहुरि गाधिसुत कथा बखानी ॥
मुनि मुनि सुजसु मनहिं मन राऊ । बरनत आपन पुन्य प्रभाऊ ॥
बहुते लोग राजायसु भयऊ । सुतन्ह समेत नृपति गढ़ गसऊ ॥

राम-भरत-मिलन



बरबस लिए उठाइ उर लाए कृपानिधान ।
भरत राम की मिलनि लखि बिसरे सवाहि अपान ॥

श्रीगणेशाय नमः

श्रीजानकीवल्लभो विजयते

श्रीरामचरितमानस



द्वितीय सोपान

(अयोध्याकाण्ड)



श्लोक

यस्याङ्गे च विभाति भूधरसुता देवापगा मस्तके
भाले बालविधुर्गले च गरलं यस्योरसि व्यालराट् ।
सोऽयं भूतिविभूषणः सुरवरः सर्वाधिपः सर्वदा
शर्वः सर्वगतः शिवः शशिनिभः श्रीशङ्करः पातु माम् ॥१॥

प्रसन्नतां या न गताभिषेकतस्तथा न मम्ले वनवासदुःखतः ।
मुखाम्बुजश्री रघुनन्दनस्य मे सदास्तु सा मञ्जुलमङ्गलप्रदा ॥२॥
नीलाम्बुजश्यामलकोमलाङ्गं सीतासमारोपितवामभागम् ।

दो०—श्रीगुरु चरन सरोज रज निज मनु मुकुरु सुधारि ।

बरनउँ रघुवर विमल जसु जो दायकु फल चारि ॥

जबतैं रामु ब्याहि घर आए । नित नव मंगल मोद बधाए ॥

भुवन चारिदस भूधर भारी । सुकृत मेघ बरषहिं सुख बारी ॥

रिधि सिधि संपति नदीं सुहाई । उमगि अवध अंबुधि कहूँ आई ॥

मनिगन पुर नर नारि सुजाती । सुचि अमोल सुंदर सब भाँती ॥

कहि न जाइ कछु नगर विभूती । जनु एतनिअ विरंचि करतूती ॥

सब त्रिधि सब पुर लोग सुखारी । रामचंद मुख चंदु निहारी ॥

मुदित मातु सब सखीं सहेली । फलित विलोकि मनोरथ बेली ॥

राम रूपु गुन सीख सुभाऊ । प्रमुदित होइ देखि सुनि राऊ ॥

दो०—सब कैं उर अभिलाषु अस कहहिं मनाइ महेसु ।

आप अछत जुवराज पद रामहि देउ नरेसु ॥ १ ॥

एक समय सब सहित समाजा । राजसभाँ रघुराजु विराजा ॥

सकल सुकृत मूरति नरनाहू । राम सुजसु सुनि अतिहि उछाहू ॥

नृप सब रहहिं कृपा अभिलाषैं । लोकप करहिं प्रीति रख राखैं ॥

तिभुवन तीनि काल जग माहीं । भूरिभाग दसरथ सम नाहीं ॥

मंगलमूल रामु सुत जासू । जो कछु कहिअ थोर सबु तासू ॥

रायँ सुभायँ मुकुरु कर लीन्हा । बदनु विलोकि मुकुटु सम कीन्हा ॥

श्रवन समीप भए सित केसा । मनहुँ जरठपनु अस उपदेसा ॥

नृप जुवराजु राम कहूँ देहू । जीवन जन्म लाहू किम लेहू ॥

दो०—यह बिचारुउर आनि नृप सुदिनु सुअवसरु पाइ ।

प्रेम पुलकि तन मुदित मन गुरहि सुनायउ जाइ ॥ २ ॥
 कहइ भुआलु सुनिअ मुनिनायक । भए राम सब बिधि सब लायक ॥
 सेवक सचिव सकल पुरवासी । जे हमारे अरि मित्र उदासी ॥
 सबहि रामु प्रिय जेहि बिधि मोही । प्रभु असीस जनु तनु धरि सोही ॥
 बिप्र सहित परिवार गोसाईं । करहिं छोहु सब रौरिहि नाई ॥
 जे गुर चरन रेनु सिर धरहीं । ते जनु सकल बिभव वस करहीं ॥
 मोहि सम यहु अनुभयउ न दूजें । सब पायउ रज पावनि पूजें ॥
 अब अभिलाषु एकु मन मोरें । पूजिहि नाथ अनुग्रह तोरें ॥
 मुनि प्रसन्न लखि सहज सनेहु । कहेउ नरेस रजायसु देहु ॥
 दो०—राजन राउर नासु जसु सब अभिमत दातार ।

फलअनुगामी महिप मनि मनअभिलाषु तुम्हार ॥ ३ ॥
 सब बिधि गुरु प्रसन्न जियँ जानी । बोलेउ राउ रहंसि मृदु बानी ॥
 नाथ रामु करिअहिं जुबराजू । कहिअ कृपा करि करिअ समाजू ॥
 मोहि अच्छत यहु होइ उछाहू । लहहिं लोग सब लोचन लाहू ॥
 प्रभु प्रसाद सिव सबइ निवाहीं । यह लालसा एक मन माहीं ॥
 पुनि न सोच तनु रहउ कि जाऊ । जेहिं न होइ पाछें पछिताऊ ॥
 मुनि मुनि दसरथ बचन सुहाए । मंगल मोद मूल मन भाए ॥
 मुनु नृप जासु बिमुख पछिताहीं । जासु भजन बिनु जरनि न जाहीं ॥

भयउ दाहाइ तनय सोइ स्वामी । राम प्रणीत प्रेम अनुगामी ॥

दो०—बेगि बिलंबु न करिअ नृप साजिअ सबुइ समाजु ।

सुदिन सुमंगलु तबहिं जव रामु होहिं जुवराजु ॥ ४ ॥
 मुदित महीपति मंदिर आए । सेवक सचिव सुमंत्रु बोलाए ॥
 कहि जयजीव सीस तिन्ह नाए । भूप सुमंगल बचन सुनाए ॥
 जौ पाँचहि मत लागै नीका । करहु हरषि हियँ रामहि टीका ॥
 मंत्री मुदित सुनत प्रिय बानी । अभिमत विरवँ परेउ जनु पानी ॥
 बिनती सचिव करहिं कर जोरी । जिअहु जगतपति वरिस करोरी ॥
 जग मंगल भल काजु बिचारा । बेगिअ नाथ न लाइअ बारा ॥
 नृपहि मोदु सुनि सचिव सुभाषा । बढ़त बौड़ जनु लही सुसाखा ॥
 दो०—कहेउ भूप सुनिराज कर जोइ जोइ आयसु होइ ।

राम राज अभिषेक हित बेगि करहु सोइ सोइ ॥ ५ ॥
 हरषि मुनीस कहेउ मृदु बानी । आनहु सकल सुतीरथ पानी ॥
 औषध मूल फूल फल पाना । कहे नाम गनि मंगल नाना ॥
 चामर चरम बसन बहु भाँती । रोम पाट पट अगनित जाती ॥
 मनिगन मंगल वस्तु अनेका । जो जग जोगु भूप अभिषेका ॥
 वेद विदित कहि सकल बिधाना । कहेउ रचहु पुर बिबिध बिताना ॥
 सफल रसाल पूगफल केरा । रोपहु बीथिन्ह पुर चहुँ फेरा ॥
 रचहु मंजु मनि चौकैं चारु । कहहु बनावन बेगि बजारु ॥
 पूजहु गनपति गुर कुलदेवा । सब बिधि करहु भूमिसुर सेवा ॥

दो०—ध्वज पताक तोरन कलस सजहु तुरग रथ नाग ।

सिरधरि सुनिबर बचन सबु निज निज काजहिं लाग ॥ ६ ॥

जो मुनीस जेहि आयसु दीन्हा । सो तेहिं काजु प्रथम जनु कीन्हा ॥
 विप्र साधु सुर पूजत राजा । करत राम हित मंगल काजा ॥
 सुनत राम अभिषेक सुहावा । बाज गहागह अवध बधावा ॥
 राम सीय तन सगुन जनाए । फरकहिं मंगल अंग सुहाए ॥
 पुलकि सप्रेम परसपर कहहीं । भरत आगमनु सूचक अहहीं ॥
 भए बहुत दिन अति अवसेरी । सगुन प्रतीति भेंट प्रिय केरी ॥
 भरतसरिस प्रिय को जग माहीं । इहइ सगुन फल दूसर नाहीं ॥
 रामहि बंधु सोच दिन राती । अंडन्हि कमठ हृदउ जेहि भाँती ॥
 दो०—एहि अवसर मंगलु परम सुनि रहँसेउ रनिवासु ।

सोभत लखि बिधु बढत जनु बारिधि बीचि बिलासु ॥ ७ ॥
 प्रथम जाइ जिन्ह वचन सुनाए । भूषन वसन भूरि तिन्ह पाए ॥
 प्रेम पुलकि तन मन अनुरागी । मंगल कलस सजन सब लागी ॥
 चौकें चारु सुमित्राँ पूरी । मनिमय विविध भाँति अति रूरी ॥
 आनँद मगन राम मइतारी । दिए दान बहु विप्र हँकारी ॥
 पूजी ग्रामदेवि सुर नागा । कहेउ बहोरि देन बलिभागा ॥
 जेहि बिधि होइ राम कल्याण । देहु दया करि सो बरदान ॥
 गावहिं मंगल कोकिलवयनी । विधुबदनी मृगसावकनयनी ॥
 दो०—राम राज अभिषेकु सुनि हियँ हरषे नर नारि ।

लगे सुमंगल सजन सब विधि अनुकूल बिचारि ॥ ८ ॥

सब मरमाहँ बसिषु चोलाए । रामचाम सिख देन पठाए ॥

गुर आगमनु सुनत रघुनाथा । द्वार आइ पद नायउ माथा ॥
 सादर अरघ देइ घर आने । सोरह भाँति पूजि सनमाने ॥
 गहे चरन सिय सहित बहोरी । बोले रामु कमल कर जोरी ॥
 सेवक सदन स्वामि आगमनू । मंगल मूल अमंगल दमनू ॥
 तदपि उचित जनु बोलि सप्रीती । पठइअ काज नाथ असि नीती ॥
 प्रभुता तजि प्रभु कीन्ह सनेहू । भयउ पुनीत आजु यहु गेहू ॥
 आयसु होइ सो करौ गोसाई । सेवकु लहइ स्वामि सेवकाई ॥
 दो०—सुनि सनेह साने बचन सुनि रघुबरहि प्रसंस ।

राम कस न तुम्ह कहहु अस हंस बंस अवतंस ॥ ९ ॥

बरनि राम गुन सीलु सुभाऊ । बोले प्रेम पुलकि मुनिराऊ ॥
 भूप सजेउ अभिषेक समाजू । चाहत देन तुम्हहि जुबराजू ॥
 राम करहु सब संजम आजू । जाँ विधि कुसल निबाहै काजू ॥
 गुरु सिख देइ राय पहिँ गयऊ । राम हृदयँ अस विसमउ भयऊ ॥
 जनमे एक संग सब भाई । भोजन सयन केलि लरिकाई ॥
 करनबेच उपवीत बिआहा । संग संग सब भए उछाहा ॥
 विमल बंस यहु अनुचित एकू । बंधु बिहाइ वड़ेहि अभिषेकू ॥
 प्रभु सप्रेम पछितानि सुहाई । हरउ भगत मन कै कुटिलाई ॥
 दो०—तेहि अवसर आए लखन मगन प्रेम आनंद ।

सनमाने प्रिय बचन कहि रघुकुल कैरव चंद ॥ १० ॥

बाजहि बाजने विविध बिधाना । पुर प्रमादु नहि जाइ बखाना ॥

भरत आगमनु सकल मनावहिं । आवहुँ बेगि नयन फलु पावहिं ॥
 हाट बाट घर गर्ली अथाई । कहहिं परसपर लोग लोगाई ॥
 कालि लगन भलि केतिक बारा । पूजिहि विधि अभिलाषु हमारा ॥
 कनक सिंघासन सीय समेता । बैठहिं रामु होइ चित चेता ॥
 सकल कहहिं कब होइहि काली । विघन मनावहिं देव कुचाली ॥
 तिन्हहि सोहाइ न अवध बधावा । चोरहि चंदिनि राति न भावा ॥
 सारद बोलि विनय सुर करहीं । बारहिं बार पाय लै परहीं ॥
 दो०—बिपति हमारि बिलोकि बड़ि मातु करिअ सोइ आजु ।

रामु जाहिं बन राजु तजि होइ सकल सुरकाजु ॥११॥
 सुनि सुरविनय ठाढ़ि पछिताती । भइउँ सरोज बिपिन हिमराती ॥
 देखि देव पुनि कहहिं निहोरी । मातु तोहि नहिं थोरिउ खोरी ॥
 बिसमय हरष रहित रघुराऊ । तुम्ह जानहु सब राम प्रभाऊ ॥
 जीव करम बस सुख दुख भागी । जाइअ अवध देव हित लागी ॥
 बार बार गहि चरन सँकोची । चली बिचारि बिबुध मति पोची ॥
 ऊँच निवासु नीचि करतूती । देखि न सकहिं पराइ बिभूती ॥
 आगिल काजु बिचारि बहोरी । करिहहिं चाह कुसल कवि मोरी ॥
 हरषि हृदयँ दसरथ पुर आई । जनु ग्रह दसा दुसह दुखदाई ॥
 दो०—नामु मंथरा मंदमति चेरी कैकह केरि ।

अजस पेढारी ताहि करि गई गिरा मति केरि ॥१२॥

दील मंथरा नारायण बन्नाबा । मंजुल मंगल राज बन्नाबा ॥

पूछेसि लोगन्ह काह उछाहू । राम तिलकु सुनि भा उर दाहू ॥
 करइ बिचार कुबुद्धि कुजाती । होइ अकाजु कवनि विधि राती ॥
 देखि लागि मधु कुटिल किराती । जिमि गवँ तकइ लेउँ केहि भाँती ॥
 भरत मातु पहिँ गइ बिलखानी । का अनमनि हसि कह हँसि रानी ॥
 ऊतर देइ न लेइ उसासू । नारि चरित करि ढारइ आँसू ॥
 हँसि कह रानि गालु बड़ तोरें । दीन्ह लखन सिख अस मन मोरें ॥
 तबहुँ न बोल चेरि बड़ि पापिनि । छाड़इ स्वास कारि जनु साँपिनि ॥

दो०—सभय रानि कह कहसि किन कुसल रामु महिपालु ।

लखनु भरतु रिपुदमनु सुनि भा कुबरी उर सालु ॥१३॥
 कत सिख देइ हमहि कोउ माई । गालु करब केहि कर बलु पाई ॥
 रामहि छाड़ि कुसल केहि आजू । जेहि जनेसु देइ जुवराजू ॥
 भयउ कौसिलहि विधि अति दाहिन । देखत गरब रहत उर नाहिन ॥
 देखहु कस न जाइ सब सोभा । जो अवलोकि मोर मनु छोभा ॥
 पूतु बिदेस न सोचु तुम्हारें । जानति हहु बस नाहु हमारें ॥
 नीद बहुत प्रिय सेज तुराई । लखहु न भूप कपट चतुराई ॥
 सुनि प्रिय बचन मलिन मनु जानी । झुकी रानि अब रहु अरगानी ॥
 पुनि अस कबहुँ कहसि घरफोरी । तब धरि जीभ कटावउँ तोरी ॥

दो०—काने खोरे कूबरे कुटिल कुचाली जानि ।

तिय बिसेषि पुनि चेरि कहि भरतमातु सुसुकानि ॥१४॥

प्रियवादिनि सिख दान्हउ ताही । सपनेहुँ तो पर कोपु न मोही ॥

झुदिनु सुमंगल दायकु सोई। तोर कहा फुर जेहि दिन होई ॥
 जेठ स्वामि सेवक लघु भाई। यह दिनकर कुल रीति सुहाई ॥
 राम तिलकु जौं सँचेहुँ काली। देउँ मागु मन भावत आली ॥
 कौसल्या सम सब महतारी। रामहि सहज सुभायँ पिआरी ॥
 मो पर करहिं सनेहु विसेषी। मैं करि प्रीति परीछा देखी ॥
 जौं विधि जनमु देइ करि छोहू। होहुँ राम सिय पूत पुतोहू ॥
 प्रान तें अधिक रामु प्रिय मोरें। तिन्ह कें तिलक छोभु कस तोरें ॥

दो०—भरत सपथ तोहि सत्य कहु परिहरि कपट दुराड ।

हरष समय बिसमउ करसि कारन मोहि सुनाउ ॥१५॥

एकहिं वार आस सब पूजी। अब कछु कहव जीभ करि दूजी ॥
 फोरै जोगु कपारु अभागा। भलेउ कहत दुख रउरेहि लागा ॥
 कहहिं झूठि फुरि बात बनाई। ते प्रिय तुम्हहि करुइ मैं माई ॥
 हमहुँ कहवि अब ठकुर सोहाती। नाहि त मौन रहव दिनु राती ॥
 करि कुरूप विधि परवस कीन्हा। बवा सो छुनिअ लहिअ जो दीन्हा ॥
 कोउ नृप होउ हमहि का हानी। चेरि छाड़ि अब होव कि रानी ॥
 जारै जोगु सुभाउ हमारा। अनभल देखि न जाइ तुम्हारा ॥
 तातें कछुक बात अनुसारी। छमिअ देवि बड़ि चूक हमारी ॥

दो०—गूढ़ क्रपट प्रिय बचन सुनि तीय अधरबुधि रानि ।

सुरमाया बस बैरिनिहि सुहृद जानि पतिआनि ॥१६॥

सादर पुनि पुनि पूँछति ओही। सबरी गान सुगी जनु मोही ॥

तसि मति फिरी अहइ जसि भाबी । रहसी चेरि घात जनु फाबी ॥
 तुम्ह पूँछहु मैं कहत डेराऊँ । घरेहु मोर घरफोरी नाऊँ ॥
 सजि प्रतीति बहुविधि गढ़ि छोली । अवध साढ़साती तब बोली ॥
 प्रिय सिय रामु कहा तुम्ह रानी । रामहि तुम्ह प्रिय सो फुरि बानी ॥
 रहा प्रथम अब ते दिन बीते । समउ फिरें रिपु होहि पिरीते ॥
 मानु कमल कुल पोषनिहारा । बिनु जल जारि करइ सोइ छारा ॥
 जरि तुम्हारि चह सवति उखारी । रूँधहु करि उपाउ बर बारी ॥
 दो०—तुम्हहि न सोचु सोहाग बल निज बस जानहु राउ ।

मन मलीन मुह मीठ नृपु राउर सरल सुभाउ ॥१७॥

चतुर गँभीर राम महतारी । बीचु पाइ निज वात सँचारी ॥
 पठए भरतु भूप ननिअउरें । राम मातु मत जानव रउरें ॥
 सेवहि सकल सवति मोहि नीकें । गरबित भरत मातु बल पी कें ॥
 सालु तुम्हार कौसिलहि माई । कपट चतुर नहिं होइ जनाई ॥
 राजहि तुम्ह पर प्रेमु विसेषी । सवति सुभाउ सकइ नहिं देखी ॥
 रचि प्रपंचु भूपहि अपनाई । राम तिलक हित लगन घराई ॥
 यह कुल उचित राम कहूँ टीका । सबहि सोहाइ मोहि सुठि नीका ॥
 आगिलि बात समुझि डरु मोही । देउ दैउ फिरि सो फलु ओही ॥
 दो०—रचि पंचि कोटिक कुटिलपन कीन्हैसि कपट प्रबोधु ।

कहिसि कथा सत सवति कै जेहि विधि बाढ़ बिरोधु ॥१८॥

भाबी बस प्रतीति उर आई । पूँछ रानि पुनि सपय देवाई ॥

का पूँछहु तुम्ह अबहुँ न जाना । निज हित अनहित पसु पहिचाना
भयउ पाखु दिन सजत समाजू । तुम्ह पाई सुधि मोहि सन आजू ॥
खाइअ पहिरिअ राज तुम्हारें । सत्य कहें नहिं दोषु हमारें ॥
जौं असत्य कछु कहव बनाई । तौ विधि देइहि हमहि सजाई ॥
रामहि तिलक कालि जौं भयऊ । तुम्ह कहूँ विपति बीजु विधि बयऊ
रेख खँचाइ कहउँ बलु भाषी । भामिनि भइहु दूध कइ माखी ॥
जौं सुत सहित करहु सेवकाई । तौ घर रहहु न आन उपाई ॥
दो०—कद्रू बिनतहि दीन्ह दुखु तुम्हहि कौसिलाँ देब ।

भरतु बंदिगृह सेइहहिं लखनु राम के नेब ॥१९॥
कैकयसुता सुनत कटु बानी । कहि न सकइ कछु सहमि सुखानी ॥
तन पसेउ कदली जिमि काँपी । कुबरीं दसन जीभ तब चाँपी ॥
कहि कहि कोटिक कपट कहानी । धीरजु धरहु प्रबोधिसि रानी ॥
फिरा करमु प्रिय लागि कुचाली । बकिहि सराहइ मानि मराली ॥
सुनु मंथरा बात फुरि तोरी । दहिनि आँखि नित फरकइ मोरी
दिन प्रति देखउँ राति कुसपने । कहउँ न तोहि मोह बस अपने ॥
काह करौं सखि सूध सुभाऊ । दाहिन बाम न जानउँ काऊ ॥
दो०—अपनें चलत न आजु लागि अनभल काहुक कीन्ह ।

केहिं अघ एकहि बार मोहि दैअ दुसह दुखु दीन्ह ॥२०॥

नैहर जनमु भरब बरु जाई । जिअत न करवि सवति सेवकाई ॥
अरि बस दैउ जिआवत जाही । मरनु नीक सेहि जीवन चाही ॥

सो सुनि तियरिस गयउ सुखाई । देखहु काम प्रताप बढ़ाई ॥
 सूल कुलिस असि अँगवनिहारे । ते रतिनाथ सुमन सर मारे ॥
 समय नरेसु प्रिया पहिं गयऊ । देखि दसा दुखु दारुन भयऊ ॥
 भूमि सयन पट्ट मोट पुराना । दिए डारि तन भूषन नाना ॥
 कुमतिहि कसि कुबेष्टता फाबी । अन अहिवातु सूच जनु भाबी ॥
 जाइ निकट नृपु कह मृदु बानी । प्रानप्रिया केहि हेतु रिसानी ॥

छं०—केहि हेतु रानि रिसानि परसत पानि पतिहि नेवारई ।
 मानहुँ सरोष भुअंग भामिनि बिषम भाँति निहारई ॥
 दोउ बासना रसना दसन वर मरम ठाहरु देखई ।
 तुलसी नृपति भवतव्यता बस काम कौतुक लेखई ॥

सो०—बार बार कह राउ सुमुखि सुलोचनि पिकवचनि ।

कारन मोहि सुनाउ गजगामिनि निज कोप कर ॥ २५ ॥

अनहित तोर प्रिया केहँ कीन्हा । केहि दुइ सिर केहि जमु चह लीन्हा
 कहु केहि रंकहि करौ नरेसू । कहु केहि नृपहि निकासौं देसू ॥
 सकउँ तोर अरि अमरउ मारी । काह कीट बपुरे नर नारी ॥
 जानसि मोर सुभाउ बरोरू । मनु तव आनन चंद चकोरू ॥
 प्रिया प्रान सुत सरबसु मोरैं । परिजन प्रजा सकल बस तोरैं ॥
 जौं कछु कहौं कपटु करि तोही । भामिनि राम सपथ सत मोही ॥
 बिहसि मागु मनभावति बाता । भूषन सजहि मनोहर गाता ॥
 घरी कुघरी समुझि जिय देखू । वेगि प्रिया परिहरहि कुबेष्ट ॥

दो०—यह सुनि मन गुनि सपथ बढ़ि बिहसि उठी मतिमंद ।

भूषन सजति बिलोकि मृगु मनहुँ किरातिनि फंद ॥ २६ ॥

पुनि कहै राउ सुहृद जियँ जानी । प्रेम पुलकि मृदु मंजुल बानी ॥

भामिनि भयउ तोर मनभावा । घर घर नगर अनंद बधावा ॥

रामहि देउँ कालि जुवराजू । सजहि सुलोचनि मंगल साजू ॥

दलकि उठेउ सुनि हृदउ कठोरु । जनु छुइ गयउ पाकवरतोरु ॥

ऐसिउ पीर बिहसि तेहिं गोई । चोर नारि जिमि प्रगटि न रोई ॥

लखहि न भूप कपट चतुराई । कोटि कुटिल मनि गुरु पढ़ाई ॥

जद्यपि नीति निपुन नरनाहू । नारि चरित जलनिधि अवगाहू ॥

कपट सनेहु बड़ाइ बहोरी । बोली बिहसि नयन मुहु मोरी ॥

दो०—मागु मागु पै कहहु पिय कबहुँ न देहु न लेहु ।

देन कहेहु बरदान दुइ तेउ पावत संदेहु ॥ २७ ॥

जानेउँ मरमु राउ हँसि कहई । तुम्हहि कोहाव परम प्रिय अहई ॥

याती राखि न मागिहु काऊ । विसरि गयउ मोहि भोर सुभाऊ ॥

झूठेहुँ हमहि दोषु जनि देहू । दुइ कै चारि मागि मकु लेहू ॥

रघुकुल रीति सदा चलि आई । प्राण जाहुँ बरु बचनु न जाई ॥

नहिं असत्य सम पातक पुंजा । गिरि सम होहिं कि कोटिक गुंजा ॥

सत्यमूल सब सुकृत सुहाए । वेद पुरान बिदित मनु गाए ॥

तेहि पर राम सपथ करि आई । सुकृत सनेह अवधि रघुराई ॥

बात बड़ाइ कुमति हँसि बोली । कुमत्त कुबिहग कुलह जनु खोली

दो०—भूप मनोरथ सुभग वनु सुख सुबिहंग समाजु ।

भिछिनि जिमि छाड़न चहति बचनु भयंकर बाजु ॥२८॥

मासपारायण, तेरहवाँ विश्राम

सुनहु प्रानप्रिय भावत जी का । देहु एक वर भरतहि टीका ॥
 मागउँ दूसर वर कर जोरी । पुरवहु नाथ मनोरथ मोरी ॥
 तापस बेष बिसेषि उदासी । चौदह बरिस रामु बनवासी ॥
 सुनि मृदु बचन भूप हियँ सोकू । ससि कर छुअत त्रिकल जिमि कोकू
 गयउ सहमि नहिँ कछु कहि आवा । जनु सचान बन झपटेउ लावा ॥
 बिबरन भयउ निपट नरपालू । दामिनि हनेउ मनहुँ तरु तालू ॥
 मायें हाथ मूदि दोउ लोचन । तनु धरि सोचु लाग जनु सोचन ॥
 मोर मनोरथु सुरतरु फूला । फरत करिनि जिमि हतेउ समूला ॥
 अवध उजारि कीन्हि कैकई । दीन्हिसि अचल विपति कै नेई ॥

दो०—कवनेँ अवसर का भयउ गयउँ नारि बिस्वास ।

जोग सिद्धि फल समय जिमि जतिहि अविद्या नास ॥२९॥

एहि बिधि राउ मनहिँ मन झाँखा । देखि कुभाँति कुमति मन माखा
 भरतु कि राउर पूत न हौंही । आनेहु मोल बेसाहि कि मोही ॥
 जो सुनि सरु अस लाग तुम्हारें । काहे न बोलहु बचनु सँभारें ॥
 देहु उतरु अनु करहु कि नाहीं । सत्यसंध तुम्ह रघुकुल माहीं ॥
 देन कहेहु आव जानि वर देहु । सत्य जग अपजनु लेहु ॥
 सत्य सराहि कहेहु वर देना । जानेहु लेइहि मागि चबेना ॥

सिबि दधीचि बलि जो कछु भाषा । तनु धनु तजेउ बचन पनु राखा
अति कटु बचन कहति कैकेई । मानहुँ लोन जरे पर देई ॥

दो०—धरम धुरंधर धीर धरि नयन उघारे रायँ ।

सिरु धुनि लीन्हि उसास असि मारेसि मोहि कुठायँ ॥३०॥

आगें दीखि जरत रिस भारी । मनहुँ रोष तरवारि उघारी ॥
मूठि कुबुद्धि धार निठुराई । धरी कूबरीं सान बनाई ॥
लखी महीप कराल कठोरा । सत्य कि जीवनु लेइहि मोरा ॥
बोले राउ कठिन करि छाती । बानी सबिनय तासु सोहाती ॥
प्रिया बचन कस कहसि कुमाँती । भीर प्रतीति प्रीति करि हाँती ॥
मोरें भरतु रामु दुइ आँखी । सत्य कहउँ करि संकरु साखी ॥
अवसि दूतु मैं पठइव प्राता । ऐहहिं बेगि सुनत दोउ भ्राता ॥
मुदिन सोधि सबु साजु सजाई । देउँ भरत कहुँ राजु बजाई ॥

दो०—लोभु न रामहि राजु कर बहुत भरत पर प्रीति ।

मैं बड़ छोट बिचारि जियँ करत रहेउँ नृपनीति ॥३१॥

राम सपथ सत कहउँ सुभाऊ । राममातु कछु कहेउ न काऊ ॥
मैं सबु कीन्ह तोहि बिनु पूँछें । तेहि तें परेउ मनोरथ छूँछें ॥
रिस परिहरु अब मंगल साजू । कछु दिन गएँ भरत जुवराजू ॥
एकहि बात मोहि दुखु लागा । वर दूसर असमंजस मागा ॥
अजहुँ हृदय बरत तेहि आँचा । सिस परिहास कि साँचेहु साँचा ॥
कहु तजि रोषु राम अपराधू । सबु कोउ कहइ रामु सुठि साधू ॥

तुहँ सराहसि करसि सनेहू । अब सुनि मोहि भयउ संदेहू ॥
 जासु सुभाउ अरिहि अनुकूल । सो किमि करिहि मातु प्रतिकूल ॥
 दो०—प्रिया हास रिस परिहरहि मागु बिचारि बिबेकु ।

जेहि देखीं अब नयन भरि भरत राज अभिषेकु ॥३२॥

जिए मीन बरु बारि बिहीना । मनि बिनु फनिकु जिए दुख दीना
 कहउँ सुभाउ न छलु मन माहीं । जीवनु मोर राम बिनु नाहीं ॥
 समुझि देखु जियँ प्रिया प्रबीना । जीवनु राम दरस आधीना ॥
 सुनि मृदु बचन कुमति अति जरई । मनहुँ अनल आहुति घृत परई
 कहइ करहु किन कोटि उपाया । इहाँ न लागिहि राउरि माया ॥
 देहु कि लेहु अजसु करि नाहीं । मोहि न बहृत प्रपंच सोहाहीं ॥
 रामु साधु तुम्ह साधु सयाने । राममातु भलि सब पहिचाने ॥
 जस कौसिलौ मोर भल ताका । तस फलु उन्हहि देउँ करि साका
 दो०—होत प्रातु मुनिबेष धरि जौं न रामु बन जाहि ।

मोर मरनु राउर अजस नृप समुझिअ मन माहि ॥३३॥

अस कहि कुटिल भई उठि ठाढ़ी । मानहुँ रोष तरंगिनि बाढ़ी ॥
 पाप पहार प्रगट भइ सोई । भरी क्रोध जल जाइ न जोई ॥
 दोउ बर कूल कठिन हठ धारा । भवँर कूयरी बचन प्रचारा ॥
 ढाहत भूपरूप तरु मूला । चली विपति बारिधि अनुकूला ॥
 गह्वरी नरेस गह्वरी कुरि छाँची । तिय मिस मीनु सीस धर जाची ॥
 गहि पद विनय कीन्ह बैठारी । जनि दिनकर कुल होसि कुठारी ॥

सोच विकल विवरन महि परेऊ । मानहुँ कमल मूलु परिहरेऊ ॥
सचिउ समीत सकइ नहिँ पूँछी । बोली असुभ भरी सुम छूछी ॥
दो०—परी न राजहि नीद निसि हेतु जान जगदीसु ।

रामु रामु रटि भोरु किय कहइ न सरसु महीसु ॥३८॥
आनहु रामहि वेगि बोलाई । समाचार तव पूँछेहु आई ॥
चलेउ सुमंत्रु राय रुख जानी । लखी कुचालि कीन्हि कछु रानी
सोच विकल मग परइ न पाऊ । रामहि बोलि कहिहि का राऊ ॥
उर धरि धीरजु गयउ दुआरें । पूँछहिँ सकल देखि मनु मारें ॥
समाधानु करि सो सबही का । गयउ जहाँ दिनकरकुल टीका
राम सुमंत्रहि आवत देखा । आदरु कीन्ह पिता सम लेखा ॥
निरखि बदनु कहि भूप रजाई । रघुकुलदीपहि चलेउ लेवाई ॥
रामु कुभाँति सचिव सँग जाहीं । देखि लोग जहँ तहँ बिलखाहीं ॥
दो०—जाइ दीख रघुबंसमनि नरपति निपट कुसाजु ।

सहमि परेउ लखि सिंघिनिहि मनहुँ बृद्ध गजराजु ॥३९॥
मूँखहिँ अधर जरइ सबु अंगू । मनहुँ दीन मनिहीन भुअंगू ॥
सरुष समीप दीखि कैकेई । मानहुँ मीचु घरीं गनि लेई ॥
करुनामय मृदु राम सुभाऊ । प्रथम दीख दुखु सुना न काऊ ॥
तदपि धीर धरि समउ विचारी । पूँछी मधुर वचन महतारी ॥
मोहि कहु मातु तात दुख कारन । करिअ जतन जेहिँ होइ निवारन
सुनहु राम सबु कारनु एहू । राजहि तुम्ह पर बहुत सनेहू ॥

देन कहेन्हि मोहि दुइ बरदाना । मागेउँ जो कछु मोहि सोहाना ॥
 सो सुनि भयउ भूप उर सोचू । छाड़ि न सकहि तुम्हार सँकोचू ॥
 दो०—सुत सनेहु इत बचनु उत संकट परेउ नरेसु ।

सकहु त आयसु धरहु सिर मेटहु कठिन कलेसु ॥४०॥
 निधरक बैठि कहइ कहु बानी । सुनत कठिनता अति अकुलानी
 जीभ कमान बचन सर नाना । मनहुँ महिप मृदु लच्छ समाना ॥
 जनु कठोरपनु धरें सरीरू । सिखइ धनुषविद्या बर वीरू ॥
 सबु प्रसंगु रघुपतिहि सुनाई । बैठि मनहुँ तनु धरि निठुराई ॥
 मन मुसुकाइ भानुकुल भानू । रामु सहज आनंद निधानू ॥
 बोले बचन बिगत सब दूपन । मृदु मंजुल जनु बाग विभूषन ॥
 सुनु जननी सोइ सुत बड़भागी । जो पितु मातु बचन अनुरागी ॥
 तनय मातु पितु तोषनिहारा । दुर्लभ जननि सकल मंत्रारा ॥
 दो०—मुनिगन मिलनु बिसेषि बन सबहि भाँति हित मोर ।

तेहि महुँ पितु आयसु बहुरि संमत जननी तोर ॥४१॥
 भरतु प्रानप्रिय पावहिं राजू । बिधि सत्र बिधि मोहि सनमुख आजू
 जौं न जाउँ वन ऐसेहु काजा । प्रथम गनिअ मोहि मूढ़ समाजा ॥
 सेवहिं अरँडु कलपतरु त्यागी । परिहरि अमृत लेहिं विषु मागी ॥
 तेउ न पाइ अस समउ चुकाहीं । देखु बिचारि मातु मन माहीं ॥
 अंत्र एक दुखु मोहि बिसेषी । निपट विकल नरनायकु देखी ॥
 थारिइ बात पितहि दुख भारी । होति प्रतीति न मोहि महतारी ॥

राउ धीर गुन उदधि अगाधू। भा मोहि तैं कछु बड़ अपराधू॥
जातैं मोहि न कहत कछु राऊ। मोरिसपथ तोहि कहु सतिभाऊ॥

दो०—सहज सरल रघुवर बचन कुमति कुटिल करि जान ।

चलइ जोंक जल बक्रगति जद्यपि सलिलु समानं ॥४२॥

रहसी रानि राम रुख पाई। बोली कपट सनेहु जनाई॥
सपथ तुम्हार भरत कै आना। हेतु न दूसर मैं कछु जाना॥
तुम्ह अपराध जोगु नहिं ताता। जननी जनक बंधु सुखदाता॥
राम सत्य सबु जो कछु कहहू। तुम्ह पितु मातु वचन रत अहहू॥
पितहि बुझाइ कहहु बलि सोई। चौथेंपन जेहिं अजसु न होई॥
तुम्ह सम सुअन सुकृत जेहिं दीन्है। उचित न तासु निरादरु कीन्है॥
लागहिं कुमुख वचन सुभ कैसे। मगहँ गयादिक तीरथ जैसे॥
रामहि मातु वचन सब भाए। जिमि सुरसरि गत सलिल सुहाए॥
दो०—गइ मुरुछा रामहि सुमिरि नृप फिरिकरवट लीन्ह ।

सचिव राम आगमन कहि बिनय समय सम कीन्ह ॥४३॥

अवनिप अकनि राम पगु धारे। धरि धीरजु तब नयन उधारे॥
सचिवैं सँभारि राउ बैठारे। चरन परत नृप राम निहारे॥
लिए सनेह बिकल उर लाई। गैमनि मनहुँ फनिक फिरि पाई॥
रामहि चितइ रहेउ नरनाहू। चला बिलोचन बारि प्रवाहू॥
सोक बिस कछु कहै न पारा। हृदयँ लगावत बारहिं बारा॥
बिधिहि मनाव राउ मन माहा। जेहि रघुनाथ न कानन जाहा॥

सुमिरि महेसहि कहइ निहोरी । बिनती सुनहु सदासिव मोरी ॥
 आसुतोष तुम्ह अबढर दानी । आरति हरहु दीन जनु जानी ॥
 दो०—तुम्ह प्रेरक सब के हृदयँ सो मति रामहि देहु ।

बचनु मोर तजि रहहिँ घर परिहरि सीलु सनेहु ॥४४॥
 अजसु होउ जग सुजसु नसाऊ । नरक परौ बर सुरपुर जाऊ ॥
 सब दुख दुसह सहावहु मोही । लोचन ओट रामु जनि हौंही ॥
 अस मन गुनइ राउ नहिँ बोला । पीपर पात सरिस मनु डोला ॥
 रघुपति पितहि प्रेमवस जानी । पुनिकछु कहिहि मातु अनुमानी
 देस काल अवसर अनुसारी । बोले बचन बिनीत बिचारी ॥
 तात कहउँ कछु करउँ ढिठाई । अनुचितु छमव जानि लरिकाई ॥
 अति लघु बात लागि दुखु पावा । काहुँ न मोहि कहि प्रथम जनावा
 देखि गोसाइँहि पूँछिउँ माता । सुनि प्रसंगु भए सीतल गाता ॥
 दो०—मंगल समय सनेह बस सोच परिहरिअ तात ।

आयसु देइअ हरषि हियँ कहि पुलके प्रभु गात ॥४५॥
 धन्य जनमु जगतीतल तासू । पितहि प्रमोदु चरित सुनि जासू ॥
 चारि पदारथ करतल ताकें । प्रिय पितु मातु प्रान सम जाकें ॥
 आयसु पालि जनम फलु पाई । ऐहउँ बेगिहिँ होउ रजाई ॥
 विदा मातु सन आवउँ मागी । चलिहउँ बनहि बहुरि पग लागी
 अस कहि राम गवनु तब कीन्हा । भूप सोक बस उतर न दीन्हा ॥
 नगर व्यापि गई बात सुताछी । छुअत चढ़ी जनु सय तन बाछी ॥

सुनि भए बिकल सकल नर नारी । बेलि ब्रिटप जिमि देखि दवारी ॥
जो जहँ सुनइ धुनइ सिरु सोई । बड़ विप्रादु नहिं धीरजु होई ॥
दो०—मुख सुखाहिं लोचन सबहिं सोकु न हृदयँ समाइ ।

मनहुँ करुन रस कटकई उतरी अवध बजाइ ॥४६॥
मिलेहि माझ बिधि बात वेगारी । जहँ तहँ देहिं कैकइहि गारी ॥
एहि पापिनिहि बूझि का परेऊ । छाइ भवन पर पावकु धरेऊ ॥
निज कर नयन काढ़ि चह दीखा । डारि मुधा विषु चाहत चीखा ॥
कुटिल कठोर कुबुद्धि अभागी । भइ रघुवंस बेनु बन आगी ॥
पालव बैठि पेड़ु एहिं काटा । सुख महुँ सोक ठाडु धरि ठाटा ॥
सदा रामु एहि प्रान समाना । कारन कवन कुटिलपनु ठाना ॥
सत्य कहहिं कवि नारि सुभाऊ । सब बिधि अगहु अगाध दुराऊ ॥
निज प्रतिबिंबु बरकु गहि जाई । जानि न जाइ नारि गति भाई ॥
दो०—काह न पावकु जारि सक का न समुद्र समाइ ।

का न करै अबला प्रबल केहि जग कालु न खाइ ॥४७॥
का सुनाइ बिधि काह सुनावा । का देखाइ चह काह देखावा ॥
एक कहहिं भल भूप न कीन्हा । बरु बिचारि नहिं कुमतिहि दीन्हा
जो हठि भयउ सकल दुख भाजनु । अबला बिस ग्यानु गुनु गा जनु
एक धरम परमिति पहिचाने । नृपहि दोसु नहिं देहिं सयाने ॥
सिबि दधीचि हरिचंद कहानी । एक एक सन कहहिं बखानी ॥
एक भरत कर समत कहही । एक उदास भायँ सुनि रहही ॥

कान मूदि कर रद गहि जीहा । एक कहहिं यह बात अलीहा ॥
 सुकृत जाहिं अस कहत तुम्हारे । रामु भरत कहूँ प्रानपिआरे ॥
 दो०—चंदु चवै बर अनल कन सुधा होइ बिषतूल ।

सपनेहुँ कबहुँ न करहिं किछु भरतु राम प्रतिकूल ॥४८॥

एक विधातहि दूषनु देहीं । सुधा देखाइ दीन्ह विषु जेहीं ॥
 खरभरु नगर सोचु सब काहू । दुसह दाहु उर मिटा उछाहू ॥
 बिप्रवधू कुलमान्य जठेरी । जे प्रिय परम कैकई केरी ॥
 लगीं देन सिख सीछु सराही । वचन बानसम लागहिं ताही ॥
 भरतु न मोहि प्रिय राम समाना । सदा कहहु यहु सबु जगु जाना ॥
 करहु राम पर सहज सनेहू । केहिं अपराध आजु वनु देहू ॥
 कबहुँ न कियहु सवति आरेसू । प्रीति प्रतीति जान सबु देखू ॥
 कौसल्याँ अव काह विगारा । तुम्ह जेहिं लागि बज्र पुरपारा ॥
 दो०—सीय कि पिय सँगु परिहरिहि लखनु कि रहिहहिं धाम ।

राजु कि भूँजव भरत पुर नृपु कि जिइहि बिनु राम ॥४९॥

अस विचारि उर छाड़हु कोहू । सोक कलंक कोठि जनि होहू ॥
 भरतहि अवसि देहु जुवराजू । कानन काह राम कर काजू ॥
 नाहिन रामु राज के भूखे । धरम धुरीन बिषय रस रूखे ॥
 गुर गृह बसहुँ रामु तजि गेहू । नृप सन अस बर दूसर लेहू ॥
 जौ नहिं लगिहहु कहें हमारे । नहिं लागिहि कछु हाथ तुम्हारे ॥
 जो परिहास कान्हि कछु हाइ । तो कहि प्रगट जनावहु सोइ ॥

राम सरिस सुत कानन जोगू । काह कहिहि सुनि तुम्ह कहूँ लोगू
उठहु वेगि सोइ करहु उपाई । जेहि विधि सोकु कलंकु नसाई ॥

छं०—जेहि भाँति सोकु कलंकु जाइ उपाय करि कुल पालही ।

हठि फेरु रामहि जात बन जनि बात दूसरि चालही ॥

जिमि भानु बिनु दिनु प्रान बिनु तनु चंद बिनु जिमि जामिनी ।

तिमि अवध तुलसीदास प्रभु बिनु समुझि धौं जियँ भामिनी ॥

सो०—सखिन्ह सिखावनु दीन्ह सुनत मधुर परिनाम हित ।

तेइँ कछु कान न कीन्ह कुटिल प्रबोधी कूबरी ॥५०॥

उतरु न देइ दुसह रिस रूखी । मृगिन्ह चितव जनु वाधिनि भूखी
व्याधि असाधि जानि तिन्ह त्यागी । चलीं कहत मतिमंद अभागी
राजु करत यह दैअँ विगोई । कीन्हेसि अस जउ करइ न कोई ॥

एहि विधि धिलपहिं पुर नर नारीं । देहिं कुचालिहि कोटिक गारीं ॥

जरहिं विषम जर लेहिं उसासा । कवनि राम बिनु जीवन आसा ॥

विपुल वियोग प्रजा अकुलानी । जनु जलचर गन सूखत पानी ॥

अति विषाद बस लोग लोगाई । गए मातु पहिं रामु गोसाई ॥

मुख प्रसन्न चित चौगुन चाऊ । मिटा सोचु जनि राखै राज ॥

दो०—नव गयंदु रघुवीर मनु राजु अलान समान ।

छूट जानि बन गवनु सुनि उर अनंदु अधिकान ॥५१॥

रघुकुलतिलक जोरि दोउ हाथा । मुदित मातु पद नायउ माथा ॥

दीन्ह असीस लाइ उर लीन्ह । भूषन बसन निछावरि कीन्ह ॥

बार बार मुख चुंघति माता । नयन नेह जल पुलकित गाता ॥
 गोद राखि पुनि हृदयँ लगाए । स्रवत प्रेमरस पयद सुहाए ॥
 प्रेमु प्रमोदु न कछु कहि जाई । रंक धनद पदवी जनु पाई ॥
 सादर सुंदर बदन नु निहारी । ब्रोली मधुर बचन महतारी ॥
 कहहु तात जननी बलिहारी । कबहिँ लगन मुद मंगलकारी ॥
 सुकृत सील सुख सीवँ सुहाई । जनम लाभ कइ अवधि अघाई ॥
 दो०—जेहि चाहत नर नारि सब अति आरत एहि भाँति ।

जिमि चातक चातकि तृषित वृष्टि सरद रिनु स्वाति ॥५२॥

तात जाउँ बलि बेगि नहाहू । जो मन भाव मधुर कछु खाहू ॥
 पितु समीप तव जाएहु मैआ । भइ बड़ि बार जाइ बलि मैआ ॥
 मातु बचन सुनि अति अनुकूला । जनु सनेह सुरतरु के फूल ॥
 सुख मकरंद भरे श्रियमूला । निरखि राम मनु भवँ न भूल ॥
 धरम धुरीन धरम गति जानी । कहेउ मातु सन अति मृदु बानी ॥
 पिताँ दीन्ह मोहि कानन राजू । जहँ सब भाँति मोर बड़ काजू ॥
 आयसु देहि मुदित मन माता । जेहिँ मुद मंगल कानन जाता ॥
 जनि सनेह बस डरपसि भोरें । आनँदु अंब अनुग्रह तोरें ॥
 दो०—बरष चारि दस बिपिन बसि करि पितु बचन प्रमान ।

आइ पाय पुनि देखिहउँ मनु जनि करसि मलान ॥५३॥

बचन बिनीत मधुर रघुबर के । सर सम लगे मातु उर करके ॥

कहि न जाइ कछु हृदय विषादू । मनहुँ मृगी सुनि केहरि नादू ॥
नयन सजल तन थर थर काँपी । माजहि खाइ मीन ज़नु मापी ॥
धरि धीरजु सुत वदनु निहारी । गदगद बचन कहति महतारी ॥
तात पितहि तुम्ह प्रानपिआरे । देखि मुदित नित चरित तुम्हारे ॥
राजु देन कहूँ सुभ दिन साधा । कहेउ जान बन केहि अपराधा ॥
तात सुनावहु मोहि निदानू । को दिनकर कुल भयउ कृसानू ॥

दो०—निरखि राम रुख सचिवसुत कारनु कहेउ बुझाइ ।

सुनि प्रसंगु रहि भूक जिमि दसा बरनि नहि जाइ ॥५४॥

राखि न सकइ न कहि सक जाहू । दुहूँ भाँति उर दारुन दाहू ॥
लिखत सुधाकर गा लिखि राहू । विधि गति वाम सदा सब काहू ॥
धरम सनेह उभयँ मति घेरी । भइ गति साँप छुछुंदरि केरी ॥
राखउँ सुतहि करउँ अनुरोधू । धरमु जाइ अरु बंधु बिरोधू ॥
कहउँ जान बन तौ वड़ि हानी । संकट सोच बिबस भइ रानी ॥
बहुरि समुझि तिय धरमु सयानी । रामु भरतु दोउ सुत सम जानी ॥
सरल सुभाउ राम महतारी । बोली वचन धीर धरि भारी ॥
तात जाउँ बलि कीन्हेहु नीका । पितु आयसु सब धरमकटीका ॥

दो०—राजु देन कहि दीन्ह बन मोहि न सो सुख लेसु ।

तुम्ह बिनु भरतहि भूपतिहि प्रजहि प्रचंड कलेसु ॥५५॥

जौं केवल पितु भयसु राखत । तौ जनि जाहु जाति बड़ि पात ॥

जौं पितु मातु कहेउ बन जाना । तौ कानन सत अवध समाना ॥

पितु वनदेव मातु वनदेवी । खग मृग चरन सरोरुह सेवी ॥
 अंतहुँ उचित नृपहि वनवासू । वय बिलोकि हियँ होइ हराँसू ॥
 बड़भागी वनु अवध अभागी । जोरधुबंसतिलक तुम्ह त्यागी ॥
 जौ सुत कहाँ संग मोहि लेहू । तुम्हरे हृदयँ होइ संदेहू ॥
 पूत परम प्रिय तुम्ह सबही के । प्रान प्रान के जीवन जी के ॥
 ते तुम्ह कहहु मातु वन जाऊँ । मैं सुनि वचन बैठि पछिताऊँ ॥

दो०—यह बिचारि नहिँ करउँ हठ झूठ सनेहु बढाइ ।

मानि मातु कर नात बलि सुरति बिसरि जनि जाइ ॥५६॥

देव पितर सब तुम्हहिँ गोसाईँ । राखहुँ पलक नयन की नाई ॥
 अवधि अंबु प्रिय परिजन मीना । तुम्ह करुनाकर धरम धुरीना ॥
 अस बिचारिः सोइ करहु उपाई । सबहिँ जित जेहिँ भेंटहु आई ॥
 जाहु सुखेन वनहिँ बलि जाऊँ । करि अनाथ जन परिजन गाऊँ ॥
 सब कर आजु सुकृत फल बीता । भयउ कराल कालु विपरीता ॥
 बहुविधि बिलपि चरन लपटानी । परम अभागिनि आपुहि जानी ॥
 दारुन दुसह दाहु उर व्यापा । वरनि न जाहिँ बिलाप कलापा ॥
 राम उठाइ मातु उर लाई । कहि मृदु वचन बहुरि समुझाई ॥
 दो०—समाचार तेहि समय सुनि सीय उठी अकुलाइ ।

जाइ सासु पद कमल जुग बंदि बैठि सिरु नाइ ॥५७॥

दीप्ति आसीस सासु मृदु वानी । अति सुकुमारि देखि अकुलानी ॥

बैठि नमित मुख सोचति सीता । रूप रासि पति प्रेम पुनीता ॥

चलन चहत बन जीवन नाथू । केहि सुकृती सन होइहि साथू ॥
 क्री तनु प्रान कि केवल प्राना । विधि करतनु कछु जाइ न जाना
 चारु चरन नख लेखति धरनी । नूपुर मुखर मधुर कवि बरनी ॥
 मनहुँ प्रेम बस विनती करहीं । हमहि सीय पद जनिं परिहरहीं ॥
 मंजु विलोचन मोचति वारी । बोली देखि राम महतारी ॥
 तात सुनहु सिय अति सुकुमारी । सास ससुर परिजनहि पिआरी ॥

दो०—पिता जनक भूपाल मनि ससुर भानुकुल भानु ।

पति रविकुल कैरव बिपिन बिधु गुन रूप निधानु ॥५८॥

मैं पुनि पुत्रवधू प्रिय पाई । रूप रासि गुन सील सुहाई ॥
 नयन पुतरि करि प्रीति बढ़ाई । राखेउँ प्रान जानकिहिं लाई ॥
 कलपवेलि जिमि बहुविधि लाली । सींचि सनेह सलिल प्रतिपाली ॥
 फूलत फलत भयउ विधि ब्रामा । जानि न जाइ काह परिनामा ॥
 पलंग पीठ तजि गोद हिंडोरा । सियँ न दीन्ह पगु अवनि कठोरा
 जिअन मूरि जिमि जोगवत रहऊँ । दीप बाति नहिं टारन कहऊँ ॥
 सोइ सिय चलन चहति बन साथी । आयसु काह होइ रघुनाथा ॥
 चंद किरन रस रसिक चकोरी । रवि रुख नयन सकइ किमि जोरी
 दो०—करि केहरि निसिचर चरहिं दुष्ट जंतु बन भूरि ।

बिष बाटिकाँ कि सोह सुत सुभग सजोवनि मूरि ॥५९॥

बन हित कोल किरात किशोरी । रचीं बिरंचि बिषय सुख भोरी ॥
 पाहन कृमि जिमि कठिन सुभाऊ । तिन्हहि कलेसु न कानन काऊ ॥

कै तापस तिय कानन जोगू। जिन्ह तप हेतु तजा सब भोगू॥
 सिय बन बसिहि तात केहि भाँती। चित्रलिखित कपि देखि डेराती
 सुरसर सुभग बनज बन चारी। डाबर जोगु कि हंसकुमारी॥
 अस विचारि जस आयसु होई। मैं सिख देउँ जानकिहि सोई॥
 जौं सिय भवन रहै कह अंबा। मोहि कहँ होइ बहुत अवलंबा॥
 सुनि रघुवीर मातु प्रिय बानी। सील सनेह सुधाँ जनु सानी॥
 दो०—कहि प्रिय बचन बिबेकमय कीन्हि मातु परितोष।

लगे प्रबोधन जानकिहि प्रगटि बिपिन गुन दोष ॥६०॥

मासपारायण, चौदहवाँ विश्राम

मातु समीप कहत सकुचार्हीं। बोले समउ समुझि मन मारहीं॥
 राजकुमारि सिखावनु सुनहू। आन भाँतिजियँ जनि कछु गुनहू
 आपन मोर नीक जौं चहहू। बचनु हमार मानि गृह रहहू॥
 आयसु मोर सासु सेवकाई। सब विधि भामिनि भवन भलाई॥
 एहिते अधिक धरमु नहिँ दूजा। सादर सासु ससुर पद पूजा॥
 जबजब मातु करिहि सुधि मोरी। होइहि प्रेम विकल मति भोरी॥
 तब तब तुम्ह कहि कथा पुरानी। सुंदरि समुझाएहु मृदु बानी॥
 कहउँ सुभायँ सपथ सत मोही। सुमुखि मातु हित राखउँ तोही॥
 दो०—गुर श्रुति संमत धरम फलु पाइअ बिनहिँ कलेस।

हठ बस सब संकट सहे गालव नहुष नरेस ॥६१॥

मैं पुनि करि प्रवान पितु बानी। बेगि फिरव सुनु सुमुखि सयानी॥

कै तापस तिय कानन जोगू । जिन्ह तप हेतु तजा सब भोगू ॥
 सिय बन बसिहि तात केहि भाँती । चित्रलिखित कपि देखि डेराती
 सुरसर सुभग बनज बन चारी । डावर जोगु कि हंसकुमारी ॥
 अस बिचारि जस आयसु होई । मैं सिख देउँ जानकिहि सोई ॥
 जाँ सिय भवन रहै कह अंबा । मोहि कहँ होइ बहुत अवलंबा ॥
 सुनि रघुवीर मातु प्रिय बानी । सील सनेह सुधाँ जनु सानी ॥
 दो०—कहि प्रिय बचन बिबेकमय कीन्हि मातु परितोष ।

लगे प्रबोधन जानकिहि प्रगटि बिपिन गुन दोष ॥६०॥

मासपारायण, चौदहवाँ विश्राम

मातु समीप कहत सकुचाहीं । बोले समउ समुझि मन माहीं ॥
 राजकुमारि सिखावनु सुनहू । आन भाँति जियँ जनि कछु गुनहू
 आपन मोर नीक जाँ चहहू । बचनु हमार मानि रह रहहू ॥
 आयसु मोर सासु सेवकाई । सब बिधि भामिनि भवन भलाई ॥
 एहिते अधिक धरमु नहिँ दूजा । सादर सासु ससुर पद पूजा ॥
 जब जब मातु करिहि सुधि मोरी । होइहि प्रेम विकल मति भोरी ॥
 तब तब तुम्ह कहि कथा पुरानी । सुंदरि समुझाएहु मृदु बानी ॥
 कहउँ सुभायँ सपथ सत मोही । सुमुखि मातु हित राखउँ तोही ॥
 दो०—गुर श्रुति संमत धरम फलु पाइअ बिनहिँ कलेस ।

हठ बस सब संकट सहे गालव नहुष नरेस ॥६१॥

मैं पुनि करि प्रवान पितु बानी । बेगि फिरव सुनु सुमुखि सयानी ॥

दिवस जात नहिं लागिहि वारा । सुंदरि सिखवन सुनहु हमारा ॥
 जौ हठ करहु प्रेम बस बामा । तौ तुम दुखु पाउब परिनामा ॥
 काननु कठिन भयंकरो भारी । घोर घामु हिम वारि बयारी ॥
 कुस कंटक मग काँकर नाना । चलब पयादेहिं बिनु पदत्राना ॥
 चरन कमल मृदु मंजु तुम्हारे । मारग अगम भूमिधर भारे ॥
 कंदर खोह नदी नद नारे । अगम अगाध न जाहिं निहारे ॥
 भालु बाघ वृक केहरि नागा । करहिं नाद सुनि धीरजु भागा ॥
 दो०—भूमि सयन बलकल बसन असनु कंद फल मूल ।

ते कि सदा सब दिन मिलहिं सबहु समय अनुकूल ॥६२॥
 नर अहार रजनीचर चरही । कपट वेष विधि कोटिक करही ॥
 लागइ अति पहार कर पानी । बिपिन बिपति नहिं जाइ बखानी ॥
 ब्याल कराल विहग बन घोरा । निसिचर निकर नारि नर चोरा ॥
 डरपहिं धीर गहन सुधि आएँ । मृगलोचनि तुम्ह भीरु सुभाएँ ॥
 हंसगवनि तुम्ह नहिं बन जोगू । सुनि अपजसु मोहि देखिहि लोगू ॥
 मानस सलिल सुधाँ प्रतिपाली । जिअइ कि लवन पयोधि मराली ॥
 नव रसाल बन बिहरन सीला । सोह कि कोकिल बिपिन करीला ॥
 रहहु भवन अस हृदयँ बिचारी । चंदवदनि दुखु कानन भारी ॥
 दो०—सहज सुहृद गुर स्वामि सिख जो न करइ सिर मानि ।

सो पछिताइ अघाइ उर अवसि होइ हित हानि ॥६३॥
 सुनि मृदु बचन मनोहर पिय के । लोचन ललित भरे जल सिय के ॥

सीतल सिख दाहक भइ कैसैं । चकइहि सरद चंद निसि जैसैं ॥
 उतरु न आव बिकल ब्रैदेही । तजन चहत सुचि स्वामि सनेही ॥
 बरवस रोकि विलोचन बारी । धरि धीरजु उर अवनिकुमारी ॥
 लागि सासु पग कह कर जोरी । छमवि देवि बड़ि अविनय मोरी ॥
 दीन्हि प्रानपति मोहि सिख सोई । जेहि विधि मोर परम हित होई ॥
 मैं पुनि समुझि दीखि मन माहीं । पिय ब्रियोग सम दुखु जग नाहीं ॥
 दो०—प्राननाथ करुनायतन सुंदर सुखद सुजान ।

तुम्ह बिनु रघुकुल कुमुद बिधु सुरपुर नरक समान ॥ ६४॥
 मातु पिता भगिनी प्रिय भाई । प्रिय परिवार सुहृद समुदाई ॥
 सासु ससुर गुर सजन सहाई । सुत सुंदर सुसील सुखदाई ॥
 जहँ लगि नाथ नेह अरु नाते । पिय बिनु तियहि तरनिहु ते ताते ॥
 तनु धनु धामु धरनि पुर राजू । पति बिहीन सबु सोक समाजू ॥
 भोग रोगसम भूषन भारू । जम जातना सरिस संसारू ॥
 प्राननाथ तुम्ह बिनु जग माहीं । मो कहूँ सुखद कतहुँ कछु नाहीं ॥
 जिय बिनु देह नदी बिनु बारी । तैसिअ नाथ पुरुष बिनु नारी ॥
 नाथ सकल सुख साथ तुम्हारें । सरद बिमल बिधु बदन निहारें ॥
 दो०—खग मृग परिजन नगरु बनु बलकल बिमल दुकूल ।

नाथ साथ सुरसदन सम परनसाल सुख मूल ॥ ६५॥

बनदेवों बनदेव उदारा । करिहहिं सासु ससुर सम साया ॥
 कुस किसलय साथरी सुहाई । प्रभु सँग मंजु मनोज तुराई ॥

कंद मूल फल अमिअ अहारू। अवध सौध सत सरिस पहारू ॥
छिनु छिनु प्रभु पद कमल विलोकी। रहिहउँ मुदित दिवस जिमि कोकी
वन दुख नाथ कहे बहुतेरे। भय विषाद परिताप घनेरे ॥
प्रभु वियोग लवलेस समाना। सब मिलि होहिं न कृपानिधाना ॥
अस जियँ जानि सुजान सिरोमनि। लेइअ संग मोहि छाड़िअ जनि
बिनती बहुत करौं का स्वामी। करुनामय उर अंतरजामी ॥

दो०—राखिअ अवध जो अवधि लगि रहत न जनिअहिं प्रान ।

दीनबंधु सुंदर सुखद सील सनेह निधान ॥६६॥

मोहि मग चलत न होइहि हारी। छिनु छिनु चरन सरोज निहारी
सबहि भौंति पिय सेवा करिहौं। मारग जनित सकल श्रम हरिहौं ॥
पाय पखारि बैठि तरु छाहीं। करिहउँ बाउ मुदित मन माहीं ॥
श्रम कन सहित स्याम तनु देखैं। कहँ दुख समउ प्रानपति पेखैं ॥
सम महि तृन तरुपल्लव डासी। पाय पलोटीहि सब निसि दासी ॥
बार बार मृदु मूरति जोही। लागिहि तात बयारि न मोही ॥
को प्रभु सँग मोहि चितवनिहारा। शिषवधुहि जिमि ससक सिआरा
में सुकुमारि नाथ वन जोगू। तुम्हहि उचित तप मो कहूँ भोगू ॥

दो०—ऐसेउ बचन कठोर सुनि जौं न हृदउ बिलगान ।

तौ प्रभु विषम वियोग दुख सहिहहिं पाँदर प्रान ॥६७॥

अस कहि सीय विकल भइ भारी। बचन वियोगु न सकी सँभारी ॥

देखि दसा रघुपति जियँ जाना। दृष्टि राखैं नहि राखिहि प्राना ॥

कहेउ कृपाल भानुकुलनाथा। पारंहरि सोचु चलहु वन साथी ॥
 नहिं बिषाद कर अवसरु आजू। बेगि करहु वन गवन समाजू ॥
 कहि प्रिय वचन प्रिया समुझाई। लगे मातु पद आसिष पाई ॥
 बेगि प्रजा दुख मेटव आई। जननी निटुर विसरि जनि जाई ॥
 फिरिहि दसा विधि बहुरि कि मोरी। देखिहउँ नयन मनोहर जोरी ॥
 सुदिन सुघरी तात कव होइहि। जननी जिअत वदन विधु जोइहि ॥
 दो०—बहुरि बच्छ कहि लालु कहि रघुपति रघुबर तात ।

कवहिं बोलाइ लगाइ हियँ हरषि निरखिहउँ गात ॥६८॥

लखि सनेह कातरि महतारी। वचनु न आव बिकल भइ भारी ॥
 राम प्रबोधु कीन्ह विधि नाना। समउ सनेहु न जाइ बखाना ॥
 तव जानकी सासु पग लागी। सुनिअ माय मैं परम अभागी ॥
 सेवा समय दैअँ वनु दीन्हा। मोर मनोरथु सफल न कीन्हा ॥
 तजव छोभु जनि छाड़िअ छोहू। करमु कठिन कछु दोसु न मोहू ॥
 सुनि सिय वचन सासु अकुलानी। दसा कवनि विधि कहौ बखानी ॥
 बारहिं बार लाइ उर लीन्हीं। धरि धीरजु सिख आसिष दीन्हीं ॥
 अचल होउ अहिवातु तुम्हारा। जव लगि गंग जमुन जलधारा ॥

दो०—सीतहि सासु असीस सिख दीन्हि अनेक प्रकार ।

चली नाइ पद पदुम सिरु अति हित बारहिं बार ॥६९॥

समानार जव लछिमन पाए। व्याकुल बिलख वदन उठि धाए ॥

कंप पुलक तन नयन सनीरा। गहे चरन अति प्रेम अधीरा ॥

कहिन सकत कछु चितवत ठाढ़े । मीनु दीन जनु जल तैं काढ़े ॥
 सोचु हृदयँ विधि का होनिहारा । सबु सुख सुकृतु सिरान हमारा ॥
 मो कहूँ काह कहव रघुनाथा । रखिहहिं भवन कि लेहहिं साथा ॥
 राम बिलोकि बंधु कर जोरें । देह गेह सब सन तृनु तोरें ॥
 बोले बचनु राम नय नागर । सील सनेह सरल सुख सागर ॥
 तात प्रेम बस जनि कदराहू । समुझि हृदयँ परिनाम उछाहू ॥
 द्रो०—मातु पिता गुरु स्वामि सिख सिर धरि करहिं सुभायँ ।

लहेउ लाभु तिन्ह जनम कर नतरु जनमु जग जायँ ॥७०॥
 अस जियँ जानि सुनहु सिख भाई । करहु मातु पितु पद सेवकाई ॥
 भवन भरतु रिपुसूदन नहिँ । राउ वृद्ध मम दुखु मन माहीं ॥
 मैं बन जाउँ तुम्हहि लेइ साथा । होइ सबहि विधि अवध अनाथा ॥
 गुरु पितु मातु प्रजा परिवारू । सब कहूँ परइ दुसह दुख भारू ॥
 रहहु करहु सब कर परितोषू । नतरु तात होइहि बड़ दोषू ॥
 जासु राज प्रिय प्रजा दुखारी । सो नृपु अवसि नरक अधिकारी ॥
 रहहु तात असि नीति विचारी । सुनत लखनु भए व्याकुल भारी ॥
 सिअरें बचन सुखि गए कैसैं । परसत तुहिन तामरसु जैसैं ॥
 द्रो०—उतरु न आवत प्रेम बस गहे चरन अकुलाइ ।

नाथ दासु मैं स्वामि तुम्ह तजहु त काह बसाइ ॥७१॥

दीन्हि मोहि सिख नीकि गोशई । लागि अगम अपनी कदराई ॥
 नरबर धीर धरम धुर धारी । निगम नीति कहूँ ते अधिकारी ॥

मैं सिसु प्रभु सनेहँ प्रतिपाला । मंदरु मेरु कि लेहि मराला ॥
 गुर पितु मातु न जानउँ काहू । कहउँ सुभाउ नाथ पतिआहू ॥
 जहँ लगि जगत सनेह सगाई । प्रीति प्रतीति निगम निजु गाई ॥
 मोरें सबइ एक तुम्ह स्वामी । दीनबंधु उर अंतरजामी ॥
 धरम नीति उपदेसिअ ताही । कीरति भूति सुगति प्रिय जाही ॥
 मन क्रम वचन चरन रत होई । कृपासिंधु परिहरिअ कि सोई ॥
 दो०—करुनासिंधु सुबंधु के सुनि मृदु वचन बिनीत ।

समुझाए उर लाइ प्रभु जानि सनेहँ सभीत ॥७२॥
 मागहु विदा मातु सन जाई । आवहु बेगि चलहु बन भाई ॥
 मुदित भए सुनि रघुवर बानी । भयउ लाभ बड़ गइ बड़ि हानी ॥
 हरषित हृदयँ मातु पहिँ आए । मनहुँ अंध फिरि लोचन पाए ॥
 जाइ जननि पग नायउ माथा । मनु रघुनंदन जानकि साथ ॥
 पूँछे मातु मलिन मन देखी । लखन कही सब कथा विसेषी ॥
 गई सहमि सुनि वचन कठोरा । मृगी देखि दव जनु चहु ओरा ॥
 लखन लखेउ भा अनरथ आजू । एहिँ सनेह बस करव अकाजू ॥
 मागत विदा सभय सकुचाहीं । जाइ संग विधि कहिहि कि नाहीं ॥
 दो०—समुझि सुमित्राँ राम सिय रूपु सुसोलु सुभाउ ।

नृप सनेहु लखि धुनेउ सिरु पापिनि दीन्ह कुदाउ ॥७३॥

धीरजु धरेउ कुअवसर जानी । सहज सुहृद बोली मृदु बानी ॥
 तात तुम्हार मातु बेदेही । पिता रामु सब भाति सनेही ॥

अवध तहाँ जहँ राम निवासू। तइँई दिवसु जहँ भानु प्रकासू॥
 जाँ पै सीय रामु बन जाहीं। अवध तुम्हार काजु कछु नाहीं॥
 गुर पितु मातु बंधु सुर साई। सेइअहिं सकल प्रान की नाई॥
 रामु प्रानप्रिय जीवन जी के। स्वारथ रहित सखा सबही के॥
 पूजनीय प्रिय परम जहाँ तैं। सब मानिअहिं राम के नातैं॥
 अस जियँ जानि संग बन जाहू। लेहु तात जग जीवन लाहू॥
 दो०—भूरिभाग भाजनु भयहु मोहि समेत बलि जाउँ ।

जाँ तुम्हरेँ मन छाडि छलु कोन्ह राम पद ठाउँ ॥७४॥
 पुत्रवती जुवती जग सोई। रघुपति भगतु जासु सुतु होई॥
 नतरु बाँझ भलि वादिविआनी। राम विमुख सुत तैं हित जानी॥
 तुम्हरेहिं भाग रामु बन जाहीं। दूसर हेतु तात कछु नाहीं॥
 सकल सुकृत करवड़ फलु एहू। राम सीय पद सहज सनेहू॥
 रागु रोषु इरिषा मदु मोहू। जनि सपनेहुँ इन्ह के बस होहू॥
 सकल प्रकार विकार बिहाई। मन क्रम बचन करेहु सेवकाई॥
 तुम्ह कहूँ बन सब भाँति सुपासू। सँग पितु मातु रामु सिय जासू॥
 जेहिं न रामु बन लहहिं कलेसू। सुत सोइ करेहु इहइ उपदेसू॥

छं०—उपदेसु यहु जेहिं तात तुम्हरे राम सिय सुख पावहीं ।
 पितु मातु प्रिय परिवार पुर सुख सुरति बन बिसरावहीं ॥
 मलसी प्रभुहि सिख देइ आयसु दीन्ह पुनि आसिष दई ।
 रति होउ अबिरल अमल सिय रघुबीर पद नित नित नई ॥

सो०—मातु चरन सिरु नाइ चले तुरत संकित हृदयँ ।

बागुर बिषम तोराइ मनहुँ भाग मृगु भाग बस ॥७५॥

गए लखनु जहँ जानकिनाथू । भे मन मुदित पाइ प्रिय साथू ॥

बंदि राम सिय चरन सुहाए । चले संग नृपमंदिर आए ॥

कहहिँ परसपर पुर नर नारी । भलि बनाइ विधि बात बिगारी ॥

तन कृस मन दुखु बदन मलीने । बिकल मनहुँ माखी मधु छीने ॥

कर मीजहिँ सिरु धुनि पछिताहीं । जनु बिनु पंख बिहग अकुलाहीं ॥

मइ बड़ि भीर भूप दरबारा । बरनि न जाइ बिषादु अपारा ॥

सचिवँ उठाइ राउ बैठारे । कहि प्रिय वचन रामु पगु धारे ॥

सिय समेत दोउ तनय निहारी । व्याकुल भयउ भूमिपति भारी ॥

दो०—सीष सहित सुत सुभग दोउ देखि देखि अकुलाइ ।

बारहिँ बार सनेह बस राउ लेइ उर लाइ ॥७६॥

सकइ न बोलि बिकल नरनाहू । सोक जनित उर दारुन दाहू ॥

नाइ सीसु पद अति अनुरागा । उठि रघुबीर बिदा तब मागा ॥

पितु असीस आयसु मोहि दीजै । हरष समय विसमउ कत कीजै ॥

तात किऐँ प्रिय प्रेम प्रमादू । जसु जग जाइ होइ अपवादू ॥

मुनि सनेह बस उठि नरनाहँ । बैठारे रघुपति गहि बाहँ ॥

सुनहु तात तुम्ह कहूँ मुनि कहहीं । रामु चराचर नायक अहहीं ॥

सुम अरु असुम करम अनुहारी । ईसु देइ फल हृदयँ विचारी ॥

करइ जो करम पाव फल सोइ । निगम नीति असि कह सबु कोई ॥

दो०—और करै अपराधु कोउ और पाव फल भोगु ।

अति विचित्र भगवंत गति को जग जानै जोगु ॥७७॥

रायँ राम राखन हित लागी । बहुत उपाय किए छलु त्यागी ॥
लखी राम रुख रहत न जाने । धरम धुरंधर धीर सयाने ॥
तव नृप सीय लाइ उर लीन्ही । अति हित बहुत भौंति सिख दीन्ही
कहि बन के दुख दुसह सुनाए । सासु ससुर पितु सुख समुझाए ॥
सिय मनु राम चरन अनुरागा । घर न सुगमु बन बिषमु न लागा
औरउ सबहिं सीय समुझाई । कहि कहि विपिन विपति अधिकाई
सचिव नारि गुर नारि सयानी । सहित सनेह कहहिं मृदु बानी ॥
तुम्ह कहूँ तौ न दीन्ह बनवासू । करहु जो कहहिं ससुर गुर सासू ॥
दो०—सिख सीतलि हित मधुर मृदु सुनि सीतहि न सोहानि ।

सरद चंद चंदिनि लगत जनु चकई अकुलानि ॥७८॥

सीय सकुच बस उतरु न देई । सो सुनि तमकि उठी कैकेई ॥
मुनि पट भूषन भाजन आनी । आगें धरि बोली मृदु बानी ॥
नृपहि प्रानप्रिय तुम्ह रघुबीरा । सील सनेह न छाड़िहि भीरा ॥
सुकृत सुजसु परलोकु नसाऊ । तुम्हहि जान बन कहिहि न काऊ ॥
अस विचारिसोइ करहु जो भावा । राम जननि सिख सुनि सुख पावा
भूपहि बचन बानसम लागे । करहिं न प्रान पयान अभागे ॥
लोग बिकल मरुछित नरनाह । काह करिअ कछु सझ न काह ॥
राम सुरत मुनि वेषु बनाई । चले जनक जननिहि सिर नाई ॥

दो०—सजि धन साजुं समाजु सबु बनिता बंधु समेत ।

बंदि बिप्र गुर चरन प्रभु चले करे सबहि अचेत ॥७९॥
 निकसि बसिष्ठ द्वार भए ठाढ़े । देखे लोग विरह दब दाढ़े ॥
 कहि प्रिय बचन सकल समुझाए । बिप्र वृंद रघुवीर बोलाए ॥
 गुर सन कहि बरषासन दीन्हे । आदर दान विनय बस कीन्हे ॥
 जाचक दान मान संतोषे । मीत पुनीत प्रेम परितोषे ॥
 दासीं दास बोलाइ बहोरी । गुरहि सौं पि बोले कर जोरी ॥
 सब कै सार सँभार गोसाईं । करबि जनक जननी की नाई ॥
 बारहिं बार जोरि जुग पानी । कहत रामु सब सन मृदु बानी ॥
 सोइ सब भाँति मोर हितकारी । जेहि तें रहै भुआल सुखारी ॥

दो०—मातु सकल मोरे विरहँ जेहिं न होहिं दुख दीन ।

सोइ उपाउ तुम्ह करेहु सब पुर जन परम प्रवीन ॥८०॥
 एहि विधि राम सबहि समुझावा । गुर पद पदुम हरषि सिरु नावा ॥
 गनपति गौरि गिरीसु मनार्इ । चले असीस पाइ रघुराई ॥
 राम चलत अति भयउ बिप्रादू । सुनि न जाइ पुर आरत नादू ॥
 कुसगुन लंक अवध अति सोकू । हरष बिप्राद बिबस सुरलोकू ॥
 गइ मुरुछा तब भूपति जागे । बोलि सुमंत्रु कहन अस लागे ॥
 रामु चले धन प्रान न जाहीं । केहि सुख लागि रहत तन माहीं ॥
 एहि तें कवन व्यथा बलवाना । जो दुख पाइ तजहिं तनु प्राना ॥
 पुनि धरि धीर कहइ नरनाहू । ले रथ संग सखा तुम्ह जाहू ॥

दो०—सुठि सुकुमार कुमार दोउ जनकसुता सुकुमारि ।

रथ चढ़ाइ देखराइ बनु फिरहु गएँ दिन चारि ॥८१॥

जौं नहिं फिरहिं धीर दोउ भाई । सत्यबंध दृढ़ व्रत रघुराई ॥

तौ तुम्ह विनय करेहु कर जोरी । फेरिअ प्रभु मिथिलेसकिसोरी ॥

जब सिय कानन देखि डेराई । कहेहु मोरि सिख अवसरु पाई ॥

सासु संसुर अस कहेउ सँदेसू । पुत्रि फिरिअ बन बहुत कलेसू ॥

पितुग्रह कवहुँ कवहुँ ससुरारी । रहेहु जहाँ रुचि होइ तुम्हारी ॥

एहि विधि करेहु उपाय कदंबा । फिरइ त होइ प्रान अवलंबा ॥

नाहिं त मोर मरनु परिनामा । कछु न बसाइ भएँ विधि नामा ॥

अस कहि मुरुछि परा महि राज । रामु लखनु सिय आनि देखाऊ

दो०—पाइ रजायसु नाइ सिरु रथु अति बेग बनाइ ।

गयउ जहाँ बाहेर नगर सीय सहित दोउ भाइ ॥८२॥

तब सुमंत्र नृप वचन सुनाए । करि विनती रथ रामु चढ़ाए ॥

चढ़ि रथ सीय सहित दोउ भाई । चले हृदयँ अवधहि सिरु नाई ॥

चलत रामु लखि अवध अनाथा । विकल लोग सब लागे साथी ॥

कृपासिंधु बहुविधि समुझावहिं । फिरहिं प्रेम बस पुनि फिरि आवहिं

लागति अवध भयावनि भारी । मानहुँ कालराति अँधिआरी ॥

घोर जंतु सम पुर नर नारी । डरपहिं एकहि एक निहारी ॥

घर मसान परिजन जनु भूता । सुत हित भीत मनहुँ जमदूता ॥

बागन्ह बिटप बेलि कुम्हिलाहीं । सरित सरोवर देखि न जाही ॥

दो०—हय गय कोटिन्ह केलिमृग पुरपसु चातक मोर ।

पिक रथांग सुक सारिका सारस हंस चकोर ॥८३॥

राम वियोग विकल सब ठाढ़े । जहँ तहँ मनहुँ चित्र लिखि काढ़े ॥
नगरु सफल वनु गहवर भारी । खग मृग विपुल सकल नर नारी ॥
विधि कैकई किरातिनि कीन्ही । जेहिँ दव दुसह दसहुँ दिसि दीन्ही
सहि न सके रघुवर बिरहागी । चले लोग सब व्याकुल भागी ॥
सबहिँ विचारु कीन्ह मन माहीं । राम लखन सिय विनु सुखु नाहीं
जहाँ रामु तहँ सबुइ समाजू । विनु रघुवीर अवध नहिँ काजू ॥
चले साथ अस मंत्रु दढ़ाई । सुर दुर्लभ सुख सदन बिहाई ॥
राम चरन पंकज प्रिय जिन्हही । विषय भोग बस करहिँ कि तिन्हही

दो०—बालक वृद्ध बिहाइ गृहँ लगे लोग सब साथ ।

तमसा तीर निवासु किय प्रथम दिवस रघुनाथ ॥८४॥

रघुपति प्रजा प्रेमबस देखी । सदय हृदयँ दुखु भयउ बिसेषी ॥
करुनामय रघुनाथ गोसाँई । बेगि पाइअहिँ पीर पराई ॥
कहि सप्रेम मृदु वचन सुहाए । बहुविधि राम लोग समुझाए ॥
किए धरम उपदेस घनेरे । लोग प्रेम बस फिरहिँ न फेरे ॥
सीछु सनेहु छाड़ि नहिँ जाई । असमंजस बस भे रघुराई ॥
लोग सोग श्रम बस गए सोई । कछुक देवमायाँ मति मोई ॥
जबहिँ जांम जुग जामिनि बीती । राम सचिव सन कहेउ सप्रीती ॥
खोज मारि रघु होकहु ताता । आन उपायँ बनिहि नहिँ बाता ॥

दो०—राम लखन सिय जान चढ़ि संभु चरन सिरु नाइ ।

सचिवँ चलायउ तुरत रथु इत उत खोज दुराइ ॥८५॥

जागे सकल लोग भएँ भोरू । गे रघुनाथ भयउ अति सोरू ॥
रथ कर खोज कतहुँ नहिँ पावहिँ । रामराम कहि चहुँ दिसि धावहिँ ॥
मनहुँ वारिनिधि बूढ़ जहाजू । भयउ विकल बड़ बनिक समाजू ॥
एकहि एक देहिँ उपदेसू । तजे राम हम जानि कलेसू ॥
निंदहिँ आपु सराहहिँ मीना । धिक जीवनु रघुवीर बिहीना ॥
जौँ पै प्रिय बियोगु विधि कीन्हा । तौ कस मरनु न मागें दीन्हा ॥
एहि विधि करत प्रलाप कलापा । आए अवध भरे परितापा ॥
विषम बियोगु न जाइ बखाना । अवधि आस सब राखहिँ प्राना ॥

दो०—राम दरस हित नेम व्रत लगे करन नर नारि ।

मनहुँ कोक कोकी कमल दीन बिहीन तमारि ॥८६॥

सीता सचिव सहित दोउ भाई । संगबेरपुर पहुँचे जाई ॥
उतरे राम देवसरि देखी । कीन्ह दंडवत हरषु बिसेषी ॥
लखन सचिवँ सियँ किए प्रनामा । सबहि सहित सुखु पायउ रामा ॥
गंग सकल मुद मंगल मूला । सब सुख करनि हरनि सब सूला ॥
कहि कहि कोटिक कथा प्रसंगा । रामु विलोकहिँ गंग तरंगा ॥
सचिवहि अनुजहि प्रियहि सुनाई । बिबुध नदी महिमा अधिकारि ॥
मज्जनु कीन्ह पंथ श्रम गयऊ । सुचि जलु पिअत मुदित मन भयऊ ॥
सुमिरत जाहि मिटइ श्रम भारू । तेहि श्रम यह लौकिक व्यवहारू ॥

दो०—सुद्ध सच्चिदा दमय कंद भानुकुल केतु ।

चरित करत नर अनुहरत संसृति सागर सेतु ॥८७॥

यह सुधि गुहँ निषाद जव पाई । सुदित लिए प्रिय बंधु बोलाई ॥
 लिए फल मूल भेंट भरि भारा । मिलन चलेउ हियँ हरषु अपारा ॥
 करि दंडवत भेंट धरि आगें । प्रभुहि त्रिलोकत अति अनुरागें ॥
 सहज सनेह विवस रघुराई । पूँछी कुसल निकट वैठाई ॥
 नाथ कुसल पद पंकज देखें । भयउँ भागभाजन जन लेखें ॥
 देव धरनि धनु धामु तुम्हारा । मैं जनु नीचु सहित परिवारा ॥
 कृपा करिअ पुर धारिअ पाऊ । थापिय जनु सबु लोगु सिहाऊ ॥
 कहेहु सत्य सबु सखा सुजाना । मोहि दीन्ह पितु आयसु आना ॥
 दो०—वरष चारिदस बासु बन मुनि व्रत वेपु अहारु ।

ग्राम बासु नहिँ उचित सुनि गुहहि भयउ दुखु भारु ॥८८॥

राम लखन सिय रूप निहारी । कहहिँ सप्रेम ग्राम नर नारी ॥
 ते पितु मातु कहहु सखि कैसे । जिन्ह पठए बन बालक ऐसे ॥
 एक कहहिँ भल भूपति कीन्हा । लोयन लाहु हमहि विधि दीन्हा ॥
 तब निषादपति उर अनुमाना । तरु सिंसुपा मनोहर जाना ॥
 लै रघुनाथहि ठाउँ देखावा । कहेउ राम सब भाँति सुहावा ॥
 पुरजन करि जोहारु घर आए । रघुवर संध्या करन सिधाए ॥
 गुहँ सँवारि साँथरी डशाई । कुसकि प्रलयमय मृदुल सुहाई ॥
 सुनि फल मूल मधुर मृदु जाना । दीना भरि भरि राखि पानी ॥

पौ०—सिय सुमंत्र भ्राता सहित कंद मूल फल खाइ ।

सयन कीन्ह रघुवंसमनि पाय पलोटत भाइ ॥८९॥
उठे लखनु प्रभु सोवत जानी । कहि सचिवहि सोवन मृदु बानी ॥
कछुक दूरि सजि दान सरासन । जागन लगे बैठि वीरासन ॥
गुहँ बोलाइ पाहरू प्रतीती । ठावँ ठावँ राखे अति प्रीती ॥
आपु लखन पहिँ बैठेउ जाई । कटि भाथी सर चाप चढ़ाई ॥
सोवत प्रभुहि निहारि निषादू । भयउ प्रेम वस हृदयँ निषादू ॥
तनु पुलकित जलु लोचन बहई । वचन सप्रेम लखन सन कहई ॥
भूपति भवन सुभायँ सुहावा । सुरपति सदनु न पटतर पावा ॥
मनिमय रचित चारु चौबारे । जनु रतिपति निज हाथ सँवारे ॥

दो०—सुचि सुबिचित्र सुभोगमय सुमन सुगंध सुबास ।

पलँग मंजु मनि दीप जहँ सब बिधि सकल सुपास ॥९०॥

विविध वसन उपधान तुराई । छीर फेन मृदु बिसद सुहाई ॥
तहँ सिय रामु सयन निसि करहीं । निज छवि रति मनोज मदु हरहीं ॥
ते सिय रामु साथरीं सोए । श्रमित वसन बिनु जाहिं न जोए ॥
मातु पिता परिजन पुरवासी । सखा सुसील दास अरु दासी ॥
जोगवहिं जिन्हहि प्राण की नाई । महि सोवत तेइ राम गोसाई ॥
पिता जनक जग विदित प्रभाऊ । समुर सुरेस सखा रघुराऊ ॥
रामचंद्र पति सो वैदेही । सोवत महि बिधि वाम न केही ॥
सिय रघुबीर कि कानन जोगू । करम प्रधान सत्य कह लोगू ॥

दो०—कैकयनंदिनि मंदमति कठिन कुटिलपनु कीन्ह ।

जेहिं रघुनंदन जानकिहि सुख अवसर दुखु दीन्ह ॥९१॥

भइ दिनकर कुल बिटप कुठारी । कुमति कीन्ह सब बिस्व दुखारी ॥
 भयउ बिषादु निषादहि भारी । राम सीय महि सयन निहारी ॥
 बोले लखन मधुर मृदु बानी । ग्यान बिराग भगति रस सानी ॥
 काहुन कोउ सुख दुख कर दाता । निज कृत करम भोग सबु भ्राता
 जोग वियोग भोग भल मंदा । हित अनहित मध्यम भ्रम फंदा ॥
 जनमु मरनु जहँ लगि जग जालू । संपति बिपति करमु अरु कालू ॥
 धरनि धामु धनु पुर परिवारू । सरगु नरकु जहँ लगि व्यवहारू ॥
 देखिअ सुनिअ गुनिअ मन माहीं । मोह मूल परमारथु नाहीं ॥

दो०—सपनें होइ भिखारि नृपु रंकु नाकपति होइ ।

जागें लाभु न हानि कछु तिमि प्रपंच जियँ जोइ ॥९२॥

अस बिचारि नहिं कीजिअ रोसू । काहुहि वादि न देइअ दोसू ॥
 मोह निसाँ सबु सोवनिहारा । देखिअ सपन अनेक प्रकारा ॥
 एहिं जग जाभिनि जागहिं जोगी । परमारथी प्रपंच बियोगी ॥
 जानिअ तबहिं जीव जग जागा । जब सब बिषय बिलास बिरागा ॥
 होइ बिबेकु मोह भ्रम भागा । तब रघुनाथ चरन अनुरागा ॥
 सखा परम परमारथु एहू । मन क्रम बचन राम पद नेहू ॥
 राम ब्रह्म परमारथ रूपा । अबिगत अलख अनादि अनूपा ॥
 सकल बिकार रहित गतमंदा । कहि नित नति निरूपहि बैदा ॥

दो०—भगत भूमि भूसुर सुरभि सुर हित लागि कृपाल ।

करत चरित धरि मनुज तनु सुनत मिटहि जग जाल ॥९३॥

मासपारायण, पंद्रहवाँ विश्राम

सखा समुझि अस परिहरि मोहू । सिय रघुवीर चरन रत होहू ॥

कहत राम गुन भा भिनुसारा । जागे जग मंगल सुखदारा ॥

सकल सौच करि राम नहावा । सुचि सुजान बट छीर मगावा ॥

अनुज सहित सिर जटा बनाए । देखि सुमंत्र नयन जल छाए ॥

हृदयँ दाहु अति वदन मलीना । कह कर जोरि वचन अति दीना ॥

नाथ कहेउ अस कोसलनाथा । लै रथु जाहु राम कैं साथी ॥

बनु देखाइ सुरसरि अन्हवाई । आनेहु फेरि बेगि दोउ भाई ॥

लखनु रामु सिय आनेहु फेरी । संसय सकल सँकोच निबेरी ॥

दो०—नृप अस कहेउ गोसाईँ जस कहइ करौ बलि सोइ ।

करि बिनती पायन्ह परेउ दीन्ह बाल जिमि रोइ ॥९४॥

तात कृपा करि कीजिअ सोई । जातैं अवध अनाथ न होई ॥

मंत्रिहि राम उठाइ प्रबोधा । तात धरम मतु तुम्ह सबु सोधा ॥

सिबि दधीच हरिचंद नरेसा । सहे धरम हित कोटि कलेसा ॥

रंतिदेव बलि भूप सुजाना । धरमु धरेउ सहि संकट नाना ॥

धरमु न दूसर सत्य समाना । आगम त्रिगम पुरान बखाना ॥

मैं सोइ धरमु सुलभ करि पावा । तजैं तिहूँ पुर अपजसु छावा ॥

संभावित कहूँ अपजस लाहूँ । मरन कोटि सम दाहन दाहूँ ॥

तुम्ह सन तात बहुत का कहऊँ । दिऐँ उतर फिरि पातकु लहऊँ ॥

दो०—पितु पद गहि कहि कोटि नति बिनय करब कर जोरि ।

चिंता कवनिहुं बात कै तात करिअ जनि मोरि ॥९५॥

तुम्ह पुनि पितु सम अति हित मोरें । बिनती करउँ तात कर जोरें ॥

सब बिधि सोइ करतव्य तुम्हारें । दुख न पाव पितु सोच हमारें ॥

मुनि रघुनाथ सचिव संवादू । भयउ सपरिजन विकल निषादू ॥

पुनि कछु लखन कही कटु बानी । प्रभु बरजे बड़ अनुचित जानी ॥

सकुचि राम निज सपथ देवाई । लखन सँदेसु कहिअ जनि जाई ॥

कह सुमंत्रु पुनि भूप सँदेसू । सहि न सकिहि सिय विपिन कलेसू ॥

जेहि बिधि अवध आव फिरि सीया । सोइ रघुबरहि तुम्हहि करनीया ॥

नतरु निपट अवलंब विहीना । मैं न जिअब जिमि जल बिनु मीना ॥

दो०—मइकें ससुरें सकल सुख जबहिं जहाँ मनु मान ।

तहँ तब रहिहि सुखेन सिय जब लगि विपति बिहान ॥९६॥

बिनती भूप कीन्ह जेहि भाँती । आरति प्रीति न सो कहि जाती ॥

पितु सँदेसु मुनि कृपानिधाना । सियहि दीन्ह सिख कोटि विधाना ॥

सासु ससुर गुर प्रिय परिवारू । फिरहु त सब कर मिटै खमारू ॥

मुनि पति बचन कहति बैदेही । सुनहु प्रानपति परम सनेही ॥

प्रभु करुनामय परम बिबेकी । तनु तजि रहति छाँह किमि छेंकी ॥

प्रभा जाइ कहँ भानु बिहाई । कहँ चंद्रिका चंदु तजि जाई ॥

पतिहि प्रेममय बिनय सुनाई । कहति सचिव सन गिरा सुझाई ॥

तुम्ह पितु ससुर सरिस हितकारी । उतर देउँ फिरि अनुचित भारी
दो०—आरति बस सनमुख भइउँ बिलगु न मानब तात ।

आरजसुत पद कमल बिनु बादि जहाँ लगि नात ॥९७॥

पितु वैभव विलास मैं डीठा । नृपमनि मुकुट मिलित पद पीठा
सुखनिधान अस पितु गृह मोरें । पिय बिहीन मन भाव न मोरें ॥
ससुर चक्रवर्द्ध कोसलराज । भुवन चारिदस प्रगट प्रभाज ॥
आगें होइ जेहि सुरपति लेई । अरध सिंघासन आसनु देई ॥
ससुर एतादस अवध निवास । प्रिय परिवार मातु सम सासू ॥
बिनु रघुपति पद पदुम परागा । मोहि केउ सपनेहुँ सुखद न लागा
अगम पंथ बन भूमि पहारा । करि केहरि सर सरित अपारा ॥
कोल किरात कुरंग विहंगा । मोहि सब सुखद प्रानपति संग ॥
दो०—सासु ससुर सन मोरि हुँति बिनय करबि परि पायँ ।

मोर सोचु जनि करिअ कछु मैं बन सुखी सुभायँ ॥९८॥

प्राननाथ प्रिय देवर साथ । वीरधुरीन धरें धनु भाथा ॥
नहिं मग श्रमु भ्रमु दुख मन मोरें । मोहि लगि सोचु करिअ जनि मोरें
सुनि सुमंत्रु सिय सीतलि बानी । भयउ विकल जनु फनि मनि हानी
नयन सूझ नहिं सुनइ न काना । कहि न सकइ कछु अति अकुलाना
राम प्रबोधु कीन्ह बहु भाँती । तदपि होति नहिं सीतलि छाती ॥
जतन अनेक साथ हित कीन्हें । उचित उतर रघुनंदन दीन्हें ॥
मोदि जाइ नहिं राम रजाइ । कोठिन करम गति कछु न बसाइ ॥

राम लखन सिय पद सिरु नाई । फिरेउ बनिक जिमि मूर गवाँई ॥

दो०—रथु हाँकेउ हय राम तन हेरि हेरि हिहिनाहिं ।

देखि निषाद बिषादबस धुनहिं सीस पछिताहिं ॥९९॥

जासु बियोग बिकल पसु ऐसैं । प्रजा मातु पितु जिइहहिं कैसैं ॥

बरबस राम सुमंत्रु पठाए । सुरसरि तीर आपु तव आए ॥

मागी नाव न केवटु आना । कहइ तुम्हार मरमु मैं जाना ॥

चरन कमल रज कहूँ सबु कहई । मानुष करनि मूरि कछु अहई ॥

छुअत सिला भइ नारि सुहाई । पाहन तैं न काठ कठिनाई ॥

तरनिउ मुनि धरिनी होइ जाई । बाट परइ मोरि नाव उड़ाई ॥

एहिं प्रतिपालउँ सबु परिवारू । नहिं जानउँ कछु अउर कवारू ॥

जौ प्रभु पार अवसि गा चहहू । मोहि पद पदुम पखारन कहहू ॥

छं०—पद कमल धोइ चढ़ाइ नाव न नाथ उतराई चहौं ।

मोहि राम राउरि आन दसरथ सपथ सब साची कहौं ॥

बरु तीर मारहुँ लखनु पै जब लगि न पाय पखारिहौं ।

तब लगि न तुलसीदास नाथ कृपाल पारु उतारिहौं ॥

सो०—सुनि केवट के बैन प्रेम लपेटे अटपटे ।

बिहसे करुनाएन चितइ जानकी लखन तन ॥१००॥

कृपासिंधु बोले मुसुकाई । सोइ करु जेहिं तव नाव न जाई ॥

बेगि आनु जल पाय पखारू । होत बिलंबु उतारहि पारू ॥

जासु नाम सुमिरत एक बारा । उतराई नर भवसिंधु अपारा ॥

चारि पदारथ भरा भँडारू । पुन्य प्रदेस देस अति चारू ॥
छेत्रु अगम गढु गाढ सुहावा । सपनेहुँ नहिं प्रतिपच्छिन्ह पावा ॥
सेन सकल तीरथ वर वीरा । कलुष अनीक दलन रनधीरा ॥
संगमु सिंहासन सुठि सोहा । छत्रु अखयवट्ट मुनिमनु मोहा ॥
चवँर जमुन अरु गंग तरंगा । देखि होहिं दुख दारिद भंगा ॥
दो०—सेवहिं सुकृती साधु सुचि पावहिं सब मनकाम ।

बंड़ी वेद पुरान गन कहहिं बिमल गुन ग्राम ॥१०५॥
को कहि सकइ प्रयाग प्रभाऊ । कलुष पुंज कुंजर मृगराऊ ॥
अस तीरथपति देखि सुहावा । सुख सागर रघुवर सुख पावा ॥
कहि सिय लखनहि सखहि सुनाई । श्रीमुख तीरथराज बड़ाई ॥
करि प्रनामु देखत वन वागा । कहत महातम अति अनुरागा ॥
एहि बिधि आइ बिलोकी बेनी । सुमिरत सकल सुमंगल देनी ॥
मुदित नहाइ कीन्हि सिव सेवा । पूजि जथाविधि तीरथ देवा ॥
तब प्रभु भरद्वाज पहिं आए । करत दंडवत मुनि उर लाए ॥
मुनि मन मोदन कछु कहि जाई । ब्रह्मानंद रासि जनु पाई ॥
दो०—दीन्हि असीस मुनीस उर अति अनंदु अस जानि ।

लोचन गोचर सुकृत फल मनहुँ किए बिधि आनि ॥१०६॥
कुसल प्रसन्न करि आसन दीन्हे । पूजि प्रेम परिपूरन कीन्हे ॥
कंद मूल फल अंकुर नीके । दिए आनि मुनि मनहुँ अमी के ॥
सीय लखन जन सहित सुहाए । अति रुचि राम मूल फल खाए ॥

भए बिगतश्रम रामु सुखारे। भरद्वाज मृदु वचन उचारे ॥
 आजु सुफल तपु तीरथ त्यागू। आजु सुफल जप जोग विरागू ॥
 सफल सकल सुभ साधन साजू। राम तुम्हहि अवलोकत आजू ॥
 लाभ अवधि सुख अवधि न दूजी। तुम्हरेँ दरस आस सब पूजी ॥
 अब करि कृपा देहु वर एहू। निज पद सरसिज सहज सनेहू ॥
 दो०—करम बचन मन छाडि छलु जब लगि जनु न तुम्हार ।

तब लगि सुखु सपनेहुँ नहीं किएँ कोटि उपचार ॥१०७॥
 मुनि मुनि वचन रामु सकुचाने। भाव भगति आनंद अघाने ॥
 तब रघुवर मुनि सुजसु सुहावा। कोटि भाँति कहि सवहि सुनावा ॥
 सो बड़ सो सब गुन गन गेहू। जेहि मुनीस तुम्ह आदर देहू ॥
 मुनि रघुवीर परसपर नवहीं। वचन अगोचर सुखु अनुभवहीं ॥
 यह सुधि पाइ प्रयाग निवासी। बटु तापस मुनि सिद्ध उदासी ॥
 भरद्वाज आश्रम सब आए। देखन दसरथ सुअन सुहाए ॥
 राम प्रनाम कीन्ह सब काहू। मुदित भए लहि लोयन लाहू ॥
 देहिं असीस परम सुखु पाई। फिरे सराहत सुंदरताई ॥
 दो०—राम कीन्ह विश्राम निसि प्रात प्रयाग नहाइ ।

चले सहित सिय लखन जन मुदित मुनिहि सिरु नाइ ॥१०८॥
 राम सप्रेम कहेउ मुनि पाहीं। नाथ कहिअ हम केहि मग जाहीं ॥
 मुनि मन विद्वसि राम सन कहहीं। सुगम सकल मग तुम्ह कहूँ अहहीं ॥
 साथ लागि मुनि सिष्य बोलाए। सुनि मन मुदित पचासक आए ॥

सबन्हि राम पर प्रेम अपारा । सकल कहहिं मगु दीख हमारा ॥
मुनि बटु चारि संग तब दीन्हे । जिन्ह बहु जनम सुकृत सब कीन्हे
करि प्रनाम रिषि आयसु पाई । प्रमुदित हृदयँ चले रघुराई ॥
ग्राम निकट जब निकसहिं जाई । देखहिं दरसु नारि नर धाई ॥
होहिं सनाथ जनम फलु पाई । फिरहिं दुखित मनु संग पठाई ॥
दो०—बिदा किए बटु बिनय करि फिरे पाइ मन काम ।

उतरि नहाए जमुन जल जो सरीर सम स्याम ॥१०९॥
सुनत तीरवासी नर नारी । धाए निज निज काज बिसारी ॥
लखन राम सिय सुंदरताई । देखि करहिं निज भाग्य बड़ाई ॥
अति लालसा बसहिं मन माहीं । नाउँ गाउँ बूझत सकुचाहीं ॥
जे तिन्ह महुँ वयविरिध सयाने । तिन्ह करि जुगुति रामु पहिचाने ॥
सकल कथा तिन्ह सबहि सुनाई । बनहि चले पितु आयसु पाई ॥
मुनि सन्निषाद सकल पछिताहीं । रानी रायँ कीन्ह भल नाहीं ॥
तेहि अवसर एक तापसु आवा । तेजपुंज लघुवयस सुहावा ॥
कवि अलखित गति वेषु निरागी । मन क्रम बचन राम अनुरागी ॥
दो०—सजल नयन तन पुलकि निज इष्टदेउ पहिचानि ।

परेउ दंड जिमि धरनितल दसा न जाइ बखानि ॥११०॥
राम सप्रेम पुलकि उर लावा । परम रंक जनु पारसु पावा ॥
मनहुँ प्रेम परमाश्रय दोऊ । मिलत धरें तन कह सब कोऊ ॥
बहुरि लखन पायन्ह सोइ लागा । लीन्ह उठाइ उमगि अनुरागा ॥

पुनिसिय चरन धूरि धरि सीसा । जननि जानि सिसु दीन्हि असीसा
 कीन्ह निषाद दंडवत तेही । मिलेउ मुदित लखि राम सनेही ॥
 पिअत नयन पुट रूपु पियूषा । मुदित सुअसनु पाइ जिमि भूखा
 ते पितु मातु कहहु सखि कैसे । जिन्ह पठए बन बालक ऐसे ॥
 राम लखन सिय रूपु निहारी । होहिं सनेह विकल नर नारी ॥
 दो०—तब रघुबीर अनेक बिधि सखहि सिखावनु दीन्ह ।

राम रजायसु सीस धरि भवन गवनु तेई कीन्ह ॥१११॥

पुनि सियँ राम लखन कर जोरी । जमुनहि कीन्ह प्रनामु बहोरी ॥
 चले ससीय मुदित दोउ भाई । रवितनुजा कइ करत बड़ाई ॥
 पथिक अनेक मिलहिं मग जाता । कहहिं सप्रेम देखि दोउ भ्राता ॥
 राज लखन सय अंग तुम्हारें । देखि सोचु अति हृदय हमारें ॥
 मारग चलहु पयादेहि पाएँ । ज्योतिषु झूठ हमारें भाएँ ॥
 अगमु पंथु गिरि कानन भारी । तेहि महुँ साथ नारि सुकुमारी ॥
 करि केहरि बन जाइ न जोई । हम सँग चलहिं जो आयसु होई ॥
 जाय जहाँ लगि तहँ पहुँचाई । फिरब बहोरि तुम्हहि सिरु नाई ॥
 दो०—एहि बिधि पूँछहिं प्रेम बस पुलक गात जलु नैन ।

कृपासिंधु फेरहिं तिन्हहि कहि बिनीत मृदु बैन ॥११२॥

जे पुर गाँव बसहिं मग माहीं । तिन्हहि नाग सुर नगर सिद्दाहीं ॥
 केहि सुकृती केहि घरीं बसाए । धन्य पुन्यमय परम सुहाए ॥
 जहँ जहँ राम चरन चलि जाहीं । तिन्ह समान अमरावति नाहीं ॥

पुन्यपुंज मग निकट निवासी । तिन्हहि सराहहिं सुरपुरवासी ॥
 जे भरिनयन बिलोकहिं रामहि । सीता लखन सहित घनस्यामहि ॥
 जे सर सरित राम अवगाहहिं । तिन्हहि देव सर सरित सराहहिं ॥
 जेहि तर तर प्रभु बैठहिं जाई । करहिं कलपतरु तासु बड़ाई ॥
 परसि राम पद पदुम परागा । मानति भूमि भूरि निज भागा ॥
 दो०—छाँह करहिं वन बिबुधगन वरषहिं सुमन सिहाहिं ।

देखत गिरि बन बिहग मृग रासु चले मग जाहिं ॥११३॥
 सीता लखन सहित रघुराई । गाँव निकट जब निकसहिं जाई ॥
 सुनि सब बाल वृद्ध नर नारी । चलहिं तुरत गृहकाजु विसारी ॥
 राम लखन सिय रूप निहारी । पाइ नयनफलु होहिं सुखारी ॥
 सजल बिलोचन पुलक सरीरा । सब भए मगन देखि दोउ वीरा ॥
 वरनि न जाइ दसा तिन्ह केरी । लहि जनु रंकन्ह सुरमनि ढेरी ॥
 एकन्ह एक बोलि सिख देहीं । लोचन लाहु लेहु छन एहीं ॥
 रामहि देखि एक अनुरागे । चितवत चले जाहिं सँग लागे ॥
 एक नयन मग छवि उर आनी । होहिं सिथिल तन मन बर बानी ॥
 दो०—एक देखि बट छाँह भलि डासि मृदुल तन पात ।

कहहिं गवाँइअ छिनुकु श्रमु गवनब अबहिं कि प्रात ॥११४॥
 एक कलस भरि आनहिं पानी । अँचइअ नाथ कहहिं मृदु बानी ॥
 सुनि प्रिय वचन प्रीति अति देखी । राम कुपाल सुसील विसेयी ॥
 जानी श्रमित सीय मन मारी । घरिक बिलंबु कीन्ह बट छाहीं ॥

मुदित नारिं नर देखहिं सोभा । रूप अनूप नयन मनु लोभा ॥
 एकटक सब सोहहिं चहुँ ओरा । रामचंद्र मुख चंद चकोरा ॥
 तरुन तमाल बरन तनु सोहा । देखत कोटि मदन मनु मोहा ॥
 दामिनि बरन लखन सुठि नीके । नख सिख सुभग भावते जी के ॥
 मुनिपट कटिन्ह कसैं तूनीरा । सोहहिं कर कमलनि धनु तीरा ॥

दो०—जटा मुकुट सीसनि सुभग उर भुज नयन बिसाल ।

सरद परब बिधु बदन बर लसत स्वेद कन जाल ॥११५॥
 बरनि न जाइ मनोहर जोरी । सोभा बहुत थोरि मति मोरी ॥
 राम लखन सिय सुंदरताई । सब चितवहिं चितमन मति लाई ॥
 थके नारि नर प्रेम पिआसे । मनहुँ मृगी मृग देखि दिआ से ॥
 सीय समीप ग्रामतिय जाहीं । पूँछत अति सनेहँ सकुचाहीं ॥
 बार बार सब लागहिं पाएँ । कहहिं बचन मृदु सरल सुभाएँ ॥
 राजकुमारि विनय हम करहीं । तिय सुभायँ कछु पूँछत डरहीं ॥
 स्वामिनि अविनय छमवि हमारी । बिलगु न मानव जानि गवाँरी ॥
 राजकुअँर दोउ सहज सलोने । इन्ह तें लही दुति मरकत सोने ॥

दो०—स्यामल गौर किसोर बर सुंदर सुषमा ऐन ।

सरद सर्वरीनाथ मुखु सरद सरोरुह नैन ॥११६॥

मासपारायण, सोलहवाँ विश्राम
 नवाह्नपारायण, चौथा विश्राम

कोटि मनोज लजावनिहारे । सुमुखि कहहु को आहिं तुम्हारे ॥
 सुनि सनेहमय मंजुल बानी । सकुची सिय मन महुँ मुसुकानी ॥
 तिन्हहि बिलोकि बिलोकति धरनी । दुहुँ सकोच सकुचति बरबरनी
 सकुचि सप्रेम बाल मृग नयनी । बोली मधुर वचन पिकवयनी ॥
 सहज सुभाय सुभग तन गोरे । नामु लखनु लघु देवर मोरे ॥
 बहुरि बदन बंधु अंचल ढाँकी । पिय तन चितइ भौंह करि बाँकी ॥
 खंजन मंजु तिरीछे नयननि । निज पति कहेउ तिन्हहि सियँ सयननि
 भई मुदित सब ग्रामबधूटी । रंकन्ह राय रासि जनु लूटी ॥

दो०—अति सप्रेम सिय पायँ परि बहुबिधि देहिँ असोस ।

सदा सोहागिनि होहु तुम्ह जब लगि महि अहि सीस ॥११७॥

पारवती सम पतिप्रिय होहू । देवि न हम पर छाड़व छोहू ॥
 पुनि पुनि बिनय करिअ कर जोरी । जौँ एहि मारग फिरिअ बहोरी ॥
 दरसनु देव जानि निज दासी । लखीं सीयँ सब प्रेम पिआसी ॥
 मधुर वचन कहि कहि परितोषी । जनु कुमुदिनी कौमुदी पोषी ॥
 तबहिँ लखन रघुवर रुख जानी । पूँछेउ मगु लोगन्हि मृदु बानी ॥
 सुनत नारि नर भए दुखारी । पुलकित गात बिलोचन बारी ॥
 मिटा मोदु मन भए मलीने । विधि निधि दीन्ह लेत जनु छीने
 समुझि करम गति धीरजु कीन्हा । सोधि सुगम मगु तिन्ह काहिँ दीन्हा

दो०—लखन जानकी सहित तब गवनु कीन्ह खुदाथ ।

फेरे सब प्रिय वचन कहि लिए लाइ मन साथ ॥११८॥

फिरत नारि नर अति पछिताहीं । दैअहि दोषु देहिं मन माहीं ॥
 सहित विषाद परसपर कहहीं । विधि करतव उलटे सब अहहीं ॥
 निपट निरंकुस निठुर निसंकू । जेहिंससि कीन्ह सरुज सकलंकू ॥
 रूख कलपतरु सागरु खारा । तेहिं पठए बन राजकुमारा ॥
 जौं पै इन्हहि दीन्ह बनवासू । कीन्ह बादि विधि भोग विलासू ॥
 ए विचरहिं मग विनु पदत्राना । रचे बादि विधि बाहन नाना ॥
 ए महि परहिं डसि कुस पाता । सुभग सेज कत सृजत विधाता ॥
 तरुवर वास इन्हहि विधि दीन्हा । धवल धाम रचि रचि श्रमु कीन्हा
 दो०—जौं ए सुनि पट धर जटिल सुंदर सुठि सुकुमार ।

बिबिध भाँति भूषन बसन बादि किए करतार ॥११९॥

जौं ए कंद मूल फल खाहीं । बादि सुधादि असन जग माहीं ॥
 एक कहहिं ए सहज सुहाए । आपु प्रगट भए विधि न बनाए ॥
 जहँ लगि वेद कही विधि करनी । श्रवन नयन मन गोचर बरनी ॥
 देखहु खोजि भुअन दस चारी । कहँ अस पुरुष कहाँ असि नारी ॥
 इन्हहि देखि विधि मनु अनुरागा । पटतर जोग बनावै लगा ॥
 कीन्ह बहुत श्रम ऐक न आए । तेहिं शरिषा बन आनि दुराए ॥
 एक कहहिं हम बहुत न जानहिं । आपुहि परम धन्य करि मानहिं ॥
 ते पुनि पुन्यपुंज हम लेखे । जे देखहिं देखिहहिं जिन्ह देखे ॥

दा०—एहि विधि कहि कहि ब्रज प्रिय लेहि लखन अवि चीन ।

किमि चलिहहिं मारग अगम सुठि सुकुमार सरीर ॥१२०॥

नारि सनेह बिकल बस होहीं। चकई साँझ समय जनु सोहीं॥
 मृदु पद कमल कठिन मगु जानी। गहवरि हृदयँ कहहिं वर बानी॥
 परसत मृदुल चरन अरुनारे। सकुचति महि जिमि हृदय हमारे
 जौं जगदीस इन्हहि वनु दीन्हा। कसन सुमनमय मारगु कीन्हा॥
 जौं मागा पाइअ विधि पाहीं। ए रखिअहिं सखि आँखिन्ह माहीं॥
 जे नर नारि न अवसर आए। तिन्ह सिय रामु न देखन पाए॥
 सुनि सुरूपु वृझहिं अकुलाई। अब लगि गए कहाँ लगि भाई॥
 समरथ धाइ विलोकहिं जाई। प्रमुदित फिरहिं जनम फलु पाई॥

दो०—अबला बालक वृद्ध जन कर मीजहिं पछिताहिं ।

होहिं प्रेमबस लोग इमि रामु जहाँ जहँ जाहिं ॥१२१॥

गावँ गावँ अस होइ अनंदू। देखि भानुकुल कैरव चंदू॥
 जे कछु समाचार सुनि पावहिं। ते नृप रानिहि दोसु लगावहिं॥
 कहहिं एक अति भल नरनाहू। दीन्ह हमहि जोइ लोचन लाहू॥
 कहहिं परसपर लोग लोगाई। बातें सरल सनेह सुहाई॥
 ते पितु मातु धन्य जिन्ह जाए। धन्य सो नगरु जहाँ तें आए॥
 धन्य सो देसु सैलु बन गाऊँ। जहँ जहँ जाहिं धन्य सोइ ठाऊँ॥
 सुखु पायउ बिरंचि रचि तेही। ए जेहि के सब भाँति सनेही॥
 राम लखन पथि कथा सुहाई। रही सकल मग कानन छाई॥

दो०—एहि बिधि रघुकुल कमल रवि मग लोगन्ह सुख देत ।

जाहिं चले देखत बिपिन सिय सोमिनि समेत ॥१२२॥

आगें रामु लखनु बने पाछें । तापस वेप विराजत काछें ॥
 उमय बीच सिय सोहति कैसैं । ब्रह्म जीव बिच माया जैसैं ॥
 बहुरि कहउँ छवि जसि मन बसई । जनु मधु मदन मध्य रति लसई ॥
 उपमा बहुरि कहउँ जियँ जोही । जनु बुध विधु बिच रोहिनि सोही ॥
 प्रभु पद रेख बीच बिच सीता । धरति चरन मग चलति समीता ॥
 सीय राम पद अंक धराएँ । लखन चलहिं मगु दाहिन लाएँ ॥
 राम लखन सिय प्रीति सुहाई । बचन अगोचर किमि कहि जाई ॥
 खग मृग मगन देखि छवि होहीं । लिए चोरि चित राम बटोहीं ॥
 दो०—जिन्ह जिन्ह देखे पथिक प्रिय सिय समेत दोउ भाइ ।

भव मगु अगसु अनंदु तेइ बिनु श्रम रहे सिराइ ॥१२३॥

अजहुँ जासु उर सपनेहुँ काऊ । बसहुँ लखनु सिय रामु बटाऊ ॥
 राम धाम पथ पाइहि सोई । जो पथ पाव कबहुँ मुनि कोई ॥
 तब रघुवीर श्रमित सिय जानी । देखि निकट बटु सीतल पानी ॥
 तहँ बसि कंद मूल फल खाई । प्रात नहाइ चले रघुराई ॥
 देखत बन सर सैल सुहाए । बालभीकि आश्रम प्रभु आए ॥
 राम दीख मुनि वासु सुहावन । सुंदर गिरि काननु जलु पावन ॥
 सरनि सरोज ब्रिटप बन फूले । गुंजत मंजु मधुप रस भूले ॥
 खग मृग विपुल कोलाहल करहीं । धिरहित बैर मुदित मन चरहीं ॥

दो०—सुचि सुंदर आश्रमु निरखि हरषे राजिवनेन ।

सुनि रघुबर आगमनु मुनि आग आयड लेन ॥१२४॥

मुनि कहूँ राम दंडवत कीन्हा । आसिरवाहु विप्रवर दीन्हा ॥
 देखि राम छवि नयन जुड़ाने । करि सनमानु आश्रमहिं आने ॥
 मुनिवर अतिथि प्रानप्रिय पाए । कंद मूल फल मधुर मगाए ॥
 सिय सौमित्रि राम फल खाए । तब मुनि आश्रम दिए सुहाए ॥
 बालमीकि मन आनँदु भारी । मंगल मूरति नयन निहारी ॥
 तब कर कमल जोरि रघुराई । बोले वचन श्रवन सुखदाई ॥
 तुम्ह त्रिकाल दरसी मुनिनाथा । विस्व बदर जिमि तुम्हरेँ हाथा ॥
 अस कहि प्रभु सब कथा बखानी । जेहि जेहि भाँति दीन्ह बनुरानी ॥

दो०—तात बचन पुनि मातु हित भाइ भरत अस राउ ।

मो कहूँ दरस तुम्हार प्रभु सबु मम पुन्य प्रभाउ ॥१२५॥

देखि पाय मुनिराय तुम्हारे । भए सुकृत सब सुफल हमारे ॥
 अब जहँ राउर आयसु होई । मुनि उदवेगु न पावै कोई ॥
 मुनि तापस जिन्ह तें दुखु लहहीं । ते नरेस विनु पावक दहहीं ॥
 मंगल मूल विप्र परितोषू । दहइ कोटि कुल भूसुर रोषू ॥
 अस जियँ जानि कहिअ सोइ ठाऊँ । सिय सौमित्रि सहित जहँ जाऊँ ॥
 तहँ रचि रुचिर परन तृन साला । वासु करौँ कछु काल कृपाला ॥
 सहज सरल मुनि रघुवर बानी । साधु साधु बोले मुनि ग्यानी ॥
 कस न कहहु अस रघुकुलकेतू । तुम्ह पालक संतत श्रुति सेतू ॥

छं०—श्रुति सेतु पालक राम तुम्ह जगदीस माया जानकी ।

जो सृजति जगु पालति हरति रुख पाइ कृपानिधान की ॥

जो सहसंसीसु अहीसु महिधरु लखनु सचराचर धनी ।
 सुर काज धरि नरराज तनु चले दलन खल निसिचर अनी ॥

दो०—राम सरूप तुम्हार बचन अंगोचर बुद्धिपर ।

अबिगत अकथ अपार नेति नेति नित निगम कह ॥१२६॥

जगु पेखन तुम्ह देखनिहारे । विधि हरि संभु नचावनिहारे ॥
 तेउ न जानहिं मरमु तुम्हारा । और तुम्हहि को जाननिहारा ॥
 सोइ जानइ जेहि देहु जनाई । जानत तुम्हहि तुम्हइ होइ जाई ॥
 तुम्हरिहि कृपाँ तुम्हहि रघुनंदन । जानहिं भगत भगत उर चंदन ॥
 चिदानंदमय देह तुम्हारी । बिगत बिकार जान अधिकारी ॥
 नर तनु धरेहु संत सुर काजा । कहहु करहु जस प्राकृत राजा ॥
 राम देखि सुनि चरित तुम्हारे । जइ मोहिं बुध होहिं सुखारे ॥
 तुम्ह जो कहहु करहु सबु साँचा । जस काछिअ तस चाहिअ नाचा ॥
 दो०—पूछेहु मोहि कि रहौं कहँ मैं पूछत सकुचाउँ ।

जहँ न होहु तहँ देहु कहि तुम्हहि देखावौं ठाउँ ॥१२७॥

सुनि मुनि बचन प्रेम रस साने । सकुचि राम मन महुँ मुसुकाने ॥
 बालमीकि हँसि कहहिं बहोरी । बानी मधुर अमिअ रस बोरी ॥
 सुनहु राम अब कहउँ निकेता । जहाँ बसहु सिय लखन समेता ॥
 जिन्ह के श्रवन समुद्र समाना । कथा तुम्हारि सुभग सरि नाना ॥
 भरहिं निरंतर होहिं न पूरे । तिन्ह के हिय तुम्ह कहँ रह्यो ॥
 लोचन चातक जिन्ह करि राखे । रहहिं दरस जलधर अभिलाषे ॥

निदरहिं सरित सिंधु सर भारी । रूप बिंदु जल होहिं सुखारी ॥

तिन्ह केँ हृदय सदन सुखदायक । बसहु बंधु सिय सह रघुनायक ॥

दो०—जसु तुम्हार मानस बिमल हंसिनि जीहा जासु ।

सुकताहल गुन गन चुनइ राम बसहु हियँ तासु ॥१२८॥

प्रभु प्रसाद सुचि सुभग सुबासा । सादर जासु लहइ नित नासा ॥

तुम्हहि निवेदित भोजन करहीं । प्रभु प्रसाद पट भूषन धरहीं ॥

सीस नवहिं सुर गुरु द्विज देखी । प्रीति सहित करि विनय बिसेषी ॥

कर नित करहिं राम पद पूजा । राम भरोस हृदयँ नहिं दूजा ॥

चरन राम तीरथ चलि जाहीं । राम बसहु तिन्ह के मन माहीं ॥

मंत्रराजु नित जपहिं तुम्हारा । पूजहिं तुम्हहि सहित परिवारा ॥

तरपन होम करहिं विधि नाना । विप्र जेवाँइ देहिं बहु दाना ॥

तुम्ह तें अधिक गुरहि जियँ जानी । सकल भायँ सेवहिं सनमानी ॥

दो०—सबु करि मागहिं एक फलु राम चरन रति होउ ।

तिन्ह केँ मन मंदिर बसहु सिय रघुनंदन दोउ ॥१२९॥

काम कोह मद मान न मोहा । लोभ न छोभ न राग न द्रोहा ॥

जिन्ह केँ कपट दंभ नहिं माया । तिन्ह केँ हृदय बसहु रघुराया ॥

सब के प्रिय सब के हितकारी । दुख सुख सरिस प्रसंसा गारी ॥

कहहिं सत्य प्रिय बचन बिचारी । जागत सोवत सरन तुम्हारी ॥

तुम्हहि छाडि गति दूसरि नाहीं । राम बसहु तिन्ह के मन माहीं ॥

जननी सम जानहिं परनारी । धनु पराव विष तें विष भारी ॥

जे हरषहिं पर संपति देखी । दुखित होहिं पर विपति विसेषी ॥
जिन्हहि राम तुम्ह प्रानपिआरे । तिन्ह के मन सुभ सदन तुम्हारे ॥

दो०—स्वामि सखा पितु मातु गुरु जिन्ह के सब तुम्ह तात ।

मन मंदिर तिन्ह के बसहु सीय सहित दोउ भ्रात ॥१३०॥

अवगुन तजि सब के गुन गहहीं । विप्र धेनु हित संकट सहहीं ॥
नीति निपुन जिन्ह कह जग लीका । घर तुम्हार तिन्ह कर मनु नीका
गुन तुम्हार समुझइ निज दोसा । जेहि सब भाँति तुम्हार भरोसा ॥
राम भगत प्रिय लागहिं जेही । तेहि उर बसहु सहित वैदेही ॥
जाति पाँति धनु धरमु बड़ाई । प्रिय परिवार सदन सुखदाई ॥
सब तजि तुम्हहि रहइ उर लाई । तेहि के हृदयँ रहहु रघुराई ॥
सरगु नरकु अपवरगु समाना । जहँ तहँ देख धरें धनु बाना ॥
करम बचन मन राउर चेरा । राम करहु तेहि केँ उर डेरा ॥

दो०—जाहि न चाहिअ कबहुँ कछु तुम्ह सन सहज सनेहु ।

बसहु निरंतर तासु मन सो राउर निज गेहु ॥१३१॥

एहि विधि मुनिवर भवन देखाए । बचन सप्रेम राम मन भाए ॥
कह मुनि सुनहु भानुकुलनायक । आश्रम कहउँ समय सुखदायक ॥
चित्रकूट गिरि करहु निवासू । तहँ तुम्हार सब भाँति सुपासू ॥
सैलु सुहावन कानन चारू । करि केहरि मृग विहग विहारू ॥

नदी पुबीत पुरान बखानी । अत्रिप्रिया निज तपबल आनी ॥
सुरसरि धार नाउँ मंदाकिनि । जो सब पातक पोतक डाकिनि ॥

अत्रि आदि मुनिवर बहु बसहीं । करहिं जोग जप तप तन कसहीं ॥
चलहु सफल श्रम सब कर करहु । राम देहु गौरव गिरिवरहु ॥

दो०—चित्रकूट महिमा अमित कही महामुनि गाइ ।

आइ नहाए सरित बर सिय समेत दोउ भाइ ॥१३२॥

रघुवर कहेउ लखन भल घाटू । करहु कतहुँ अब ठाहर ठाटू ॥
लखन दीख पय उतर करारा । चहुँ दिसि फिरेउ धनुष जिमि नारा
नदी पनच सर सम दम दाना । सकल कलुष कलि साउज नाना ॥
चित्रकूट जनु अचल अहेरी । चुकइ न घात मार मुठभेरी ॥
अस कहि लखन ठाउँ देखरावा । थलु बिलोकि रघुवर सुखु पावा ॥
रमेउ राम मनु देवन्ह जाना । चले सहित सुर थपति प्रधाना ॥
कोल किरात बेप सब आए । रचे परन तृन सदन सुहाए ॥
वरनि न जाहिं मंजु दुइ साला । एक ललित लघु एक बिसाला ॥
दो०—लखन जानकी सहित प्रभु राजत रुचिर निकेत ।

सोह मदनु मुनि बेष जनु रति रितुराज समेत ॥१३३॥

मासपारायण, सत्रहवाँ विश्राम

अमर नाग किंनर दिसिपाला । चित्रकूट आए तेहि काला ॥
राम प्रनामु कीन्ह सब काहू । मुदित देव लहि लोचन लाहू ॥
वरधि सुमन कह देव समाजू । नाथ सनाथ भए हम आजू ॥
करि बिनती दुख दुसह सुनाए । हरषित निज निज सदन सिधाए ॥
चित्रकूट रघुनंदनु छाए । समाचार सुनि सुनि मुनि आए ॥

आवत देखि मुदित मुनिवृन्दा । कीन्ह दंडवत रघुकुल चंदा ॥
मुनि रघुवरहि लाइ उर लेहीं । सुफल होन हित आसिष देहीं ॥
सिय सौमित्रि राम छवि देखहिं । साधन सकल सफल करि लेखहिं ॥

दो०—जथाजोग सनमानि प्रभु बिदा किए मुनिवृन्द ।

करहिं जोग जप जाग तप निज आश्रमन्हि सुछंद ॥१३४॥

यह सुधि कोल किरातन्ह पाई । हरपे जनु नव निधि घर आई ॥
कंद मूल फल भरि भरि दोना । चले रंक जनु लूटन सोना ॥
तिन्ह महुँ जिन्ह देखे दोउ भ्राता । अपर तिन्हहि पूँछहिं मगु जाता ॥
कहत सुनत रघुवीर निकाई । आइ सबन्हि देखे रघुराई ॥
करहिं जोहार भेंट धरि आगे । प्रभुहि विलोकहिं अति अनुरागे ॥
चित्र लिखे जनु जहँ तहँ ठाढ़े । पुलक सरीर नयन जल बाढ़े ॥
राम सनेह मगन सब जाने । कहि प्रिय वचन सकल सनमाने ॥
प्रभुहि जोहारि बहोरि बहोरी । वचन बिनीत कहहिं कर जोरी ॥

दो०—अब हम नाथ सनाथ सब भए देखि प्रभु पाय ।

भाग हमारें आगमनु राउर कोसलराय ॥१३५॥

धन्य भूमि वन पंथ पहारा । जहँ जहँ नाथ पाउ तुम्ह धारा ॥
धन्य विहग मृग काननचारी । सफल जनम भए तुम्हहि निहारी ॥
हम सब धन्य सहित परिवारा । दीख दरसु भरि नयन तुम्हारा ॥
कीन्ह वासु भल ठाउँ बिचारी । इहाँ सकल पित रहव सुखारी ॥
हम सब माँति करव सेवकाई । करि केहरि अहि बाघ बराई ॥

वन बेहड़ गिरि कंदर खोहा। सव हमार प्रभु पग पग जोहा ॥
तहँ तहँ तुम्हहि अहेर खेलाउव। सर निरझर जल ठाउँ देखाउव ॥
हम सेवक परिवार समेता। नाथ न सकुचव आयसु देता ॥
दो०—वेद बचन मुनि मन अगम ते प्रभु करुना ऐन ।

बचन किरातन्ह के सुनत जिमि पितु बालक बैन ॥१३६॥

रामहि केवल प्रेमु पिआरा। जानि लेउ जो जाननिहारा ॥
राम सकल वनचर तव तोषे। कहि मृदु बचन प्रेम परिपोषे ॥
बिदा किए सिर नाइ सिधाए। प्रभु गुन कहत सुनत घर आए ॥
एहि बिधि सिय समेत दोउ भाई। बसहिं बिपिन सुर मुनि सुखदाई ॥
जब तैं आइ रहे रघुनायकु। तब तैं भयउ वनु मंगलदायकु ॥
फूलहिं फलहिं बिटप बिधि नाना। मंजु बलित बर बेलि बिताना ॥
सुरतर सरिस सुभायँ सुहाए। मनहुँ बिबुध वन परिहरि आए ॥
गुंज मंजुतर मधुकर श्रेनी। त्रिविध बयारि बहइ सुख देनी ॥
दो०—नीलकंठ कलकंठ सुक चातक चक्र चकोर ।

भाँति भाँति बोलहिं बिहग श्रवन सुखद चित चोर ॥१३७॥

करि केहरि कपि कोल कुरंगा। विगतवैर विचरहिं सव संग ॥
फिरत अहेर राम छवि देखी। होहिं मुदित मृगवृंद विशेषी ॥
बिबुध बिपिन जहँ लगि जग माहीं। देखि रामबनु सकल सिहाहीं ॥
सुरसरि सरसइ दिनकर कन्या। मेकलसुता गोदावरि धन्या ॥
सब सर सिंधु नदी नद नाना। मंदाकिनि कर करहिं बखाना ॥

उदय अस्त गिरि अरु कैलासू। मंदर मेरु सकल सुरघासू॥
 सैल हिमाचल आदिक जेते। चित्रकूट जसु गावहिं तेते॥
 विधि मुदित मन सुखु न समाई। श्रम विनु विपुल बड़ाई प्राई॥
 दो०—चित्रकूट के बिहग मृग बेलि बिटप तृन जाति ।

पुन्य पुंज सब धन्य अस कहहिं देव दिन राति ॥१३८॥

नयनवंत रघुवरहि बिलोकी। पाइ जनम फल होहिं विसोकी॥
 परसि चरन रज अचर सुखारी। भए परम पद के अधिकारी॥
 सो वनु सैल सुभायँ सुहावन। मंगलमय अति पावन पावन॥
 महिमा कहिअ कवनि विधि तासू। सुख सागर जहँ कीन्ह निवासू॥
 पय पयोधि तजि अवध बिहाई। जइँ सिय लखनु रामुरहे आई॥
 कहि न सकहिं सुषमा जेसि कानन। जौं सत सहस होहिं सहसानन॥
 सो मैं बरनि कहौं विधि केहीं। डायर कमठ कि मंदर लेहीं॥
 सेवहिं लखनु करम मन बानी। जाइ न सीलु सनेहु बखानी॥

दो०—छिनु छिनु लखि सिय राम पद जानि आपु पर नेहु ।

करत न सपनेहुँ लखनु चितु बंधु मातु पितु गोहु ॥१३९॥
 राम संग सिय रहति सुखारी। पुर परिजन गृह सुरति विसारी॥
 छिनु छिनु पियविधु बदन निहारी। प्रमुदित मनहुँ चकोरकुमारी॥
 नाह नेहु नित बढ़त बिलोकी। हरषित रहति दिवस जिमि कोकी॥
 सिय मनु राम चरन अनुरागा। अवध सहस सम वनु प्रिय लाग्या॥
 परनकुटी प्रिय प्रियतम संगी। प्रिय परिवार कुरंग बिहंगा॥

सासु ससुर सम मुनितिय मुनिवर । असनु अमिअ सम कंद मूल फर
नाथ साथ साँथरी सुहाई । मयन सयन सय सम सुखदाई ॥
लोकप होहिं विलोकत जासू । तेहि कि मोहि सक विषय बिलासू ॥

दो०—सुमिरत रामहि तजहिं जन तृन सम विषय बिलासु ।

रामप्रिया जग जननि सिय कछु न आचरजु तासु ॥१४०॥

सीय लखन जेहि विधि सुखु लहहीं । सोइ रघुनाथ करहिं सोइ कहहीं
कहहिं पुरातन कथा कहानी । सुनहिं लखनु सिय अति सुखु मानी
जब जबरामु अवध सुधि करहीं । तब तब वारि विलोचन भरहीं ॥
सुमिरि मातु पितु परिजन भाई । भरत सनेहु सीछु सेवकाई ॥
कृपासिंधु प्रभु होहिं दुखारी । धीरजु धरहिं कुसमउ विचारी ॥
लखि सिय लखनु बिकल होइ जाहीं । जिमि पुरुषहि अनुसर परिछाहीं
प्रिया बंधु गति लखि रघुनंदनु । धीर कृपाल भगत उर चंदनु ॥
लगे कहन कछु कथा पुनीता । सुनि सुखु लहहिं लखनु अरु सीता
दो०—रामु लखन सीता सहित सोहत परन निकेत ।

जिमि बासव बस अमरपुर सची जयंत समेत ॥१४१॥

जोगवहिं प्रभु सिय लखनहि कैसैं । पलक विलोचन गोलक जैसैं ॥
सेवहिं लखनु सीय रघुबीरहि । जिमि अत्रिबेकी पुरुष सरीरहि ॥
एहि विधि प्रभु बन बसहिं सुखारी । खग मृग सुर तापस हितकारी ॥
कहेउँ राम बन गवनु सुहावा । सुनहु सुमंत्र अवध जिमि आवा ॥
फिरेउ निषादु प्रभुहि पहुँचाई । सचिव सहित रथ देखैसि आई ॥

मंत्री बिकल विलोकि निषादू । कहि न जाइ जस भयउ विषादू ॥
 राम राम सिय लखन पुकारी । परेउ धरनितल व्याकुल भारी ॥
 देखि दखिन दिसि हय हिहिनाहीं । जनु बिनु पंख बिहग अकुलाहीं
 दो०—नहिं तृन चरहिं न पिअहिं जलु मोचहिं लोचन बारि ।

व्याकुल भए निषाद सब रघुबर बाजि निहारि ॥१४२॥

धरि धीरजु तव कहइ निषादू । अब सुमंत्र परिहरहु विषादू ॥
 तुम्ह पंडित परमारथ ग्याता । धरहु धीर लखि विमुख विधाता ॥
 विविध कथा कहि कहि मृदु बानी । रथ बैठारेउ बरबस आनी ॥
 सोक सिथिल रथु सकइ न हाँकी । रघुबर बिरह पीर उर बाँकी ॥
 चरफराहिं मग चलहिं न घोरे । बन मृग मनहुँ आनि रथ जोरे ॥
 अढुकि परहिं फिरि हेरहिं पीछें । राम बियोगि बिकल दुख तीछें ॥
 जो कह रामु लखनु बैदेही । हिंकरि हिंकरि हित हेरहिं तेही ॥
 बाजि बिरह गति कहि किमि जाती । विनु मनि फनिक बिकल जेहि भाँती
 दो०—भयउ निषादु विषादबस देखत सचिव तुरंग ।

बोलि सुसेवक चारि तब दिए सारथी संग ॥१४३॥

गुह सारथिहि फिरेउ पहुँचाई । बिरहु विषादु बरनि नहिं जाई ॥
 चले अवध लेइ रथहि निषादा । होहिं छनहिं छन मगन विषादा ॥
 सोच सुमंत्र बिकल दुख दीना । धिग जीवन रघुबीर बिहीना ॥
 रहिहि न अंतहुँ अधम सरीर । जसु न लहेउ बिछुरत सखीर ॥
 भए अजस अघ भाजन प्राणा । कवन हेतु नहिं करत पयाना ॥

अहह मंद मनु अवसर चूका । अजहुँ न हृदय होत दुइ टूका ॥
मीजि हाथ सिरु धुनि पछिताई । मनहुँ कृपन धन रासि गवाँई ॥
बिरिद बाँधि घर बीरु कहाई । चलेउ समर जनु सुभट पराई ॥
दो०—विप्र विवेकी बेदबिद संमत साधु सुजाति ।

जिमि धोखें मदपान कर सचिव सोच तेहि भाँति ॥ १४४ ॥

जिमि कुलीन तिय साधु सयानी । पतिदेवता करम मन बानी ॥
रहै करम बस परिहरि नाहू । सचिव हृदयँ तिमि दारुन दाहू ॥
लोचन सजल डीठि भइ थोरी । सुनइ न श्रवन विकल मति भोरी ॥
सूखहिँ अधर लागि मुहँ लाटी । जिउ न जाइ उर अवधि कपाटी ॥
बिबरन भयउ न जाइ निहारी । मारेसि मनहुँ पिता महतारी ॥
हानि गलानि बिपुल मन व्यापी । जमपुर पंथ सोच जिमि पापी ॥
बचनु न आव हृदयँ पछिताई । अवध काह मैं देखव जाई ॥
राम रहित रथ देखिहि जोई । सकुचिहि मोहि बिलोकत सोई ॥
दो०—धाइ पूँछिहहिँ मोहि जब बिकल नगर नर नारि ।

उतरु देब मैं सबहि तव हृदयँ बज्रु बैठारि ॥ १४५ ॥

पूछिहहिँ दीन दुखित सब माता । कहव काह मैं तिन्हहि विधाता ॥
पूछिहि जबहिँ लखन महतारी । कहिहउँ कवन सँदेस मुखारी ॥
राम जननि जब आइहि धाई । सुमिरि बच्छु जिमि धेनु लवाई ॥
पूँछत उतरु देव मैं तेही । गो बनु राम लखनु दैदेही ॥
जोइ पूँछिहि तेहि उतरु देवा । जाइ अवध अव यह सुखु लवा ॥

पूँछिहि जवहिं राउ दुख दीना । जिवनु जासु रघुनाथ अधीना ॥
 देहउँ उतरु कौनु मुहु लाई । आयउँ कुसल कुअँर पहुँचाई ॥
 सुनत लखन सिय राम सँदेसू । तृनजिमि तनु परिहरिहि नरेसू ॥
 दो०—हृदउ न बिदरेउ पंक जिमि बिछुरत प्रीतसु नीरु ।

जानत हौं मोहि दीन्ह बिधि यहु जातना सरीरु ॥१४६॥

एहि बिधि करत पंथ पछितावा । तमसा तीर तुरत रथु आवा ॥
 बिदा किए करि विनय निषादा । फिरे पायँ परि बिकल विषादा ॥
 पैठत नगर सचिव सकुचाई । जनु मारेसि गुर बाँभन गाई ॥
 त्रैठि त्रिटप तर दिवसु गवाँवा । साँझ समय तब अवसरु पावा ॥
 अवध प्रवेसु कीन्ह अँधिआरें । पैठ भवन रथु राखि दुआरें ॥
 जिन्ह जिन्ह समाचार सुनि पाए । भूप द्वार रथु देखन आए ॥
 रथु पहिचानि बिकल लखि घोरे । गरहिं गात जिमि आतप ओरे ॥
 नगर नारि नर व्याकुल कैसैं । निघटत नीर मीन गन जैसैं ॥

दो०—सचिव आगमनु सुनत सबु बिकल भयउरनिवासु ।

भवनु भयंकरु लाग तेहि मानहुँ प्रेत निवासु ॥१४७॥

अति आरति सत्र पूँछिहि रानी । उतरु न आव बिकल भइ यानी ॥
 सुनइ न श्रवण नयन नहिं सूझा । कहहु कहाँ नृपु तेहि तेहि बूझा ॥
 दासिन्ह दीख सचिव बिकलाई । कौसल्या गृहँ गई लवाई ॥

जाइ सुमंत्र दीख कस राजा । अमिश रहित जनु चंद्र विराजा ॥

आसन सयन बिभूषन हीना । परेउ भूमितल निपट मलीना ॥

लेइ उसासु सोच एहि भाँती। सुरपुर तें जनु खँसेउ जजाती॥
लेत सोच भरि छिनु छिनु छाती। जनु जरि पंख परेउ संपाती॥
राम राम कह राम सनेही। पुनि कह राम लखन वैदेही॥
दो०—देखि सचिव जय जीव कहि कीन्हेउ दंड प्रनामु।

सुनत उठेउ व्याकुल नृपति कहु सुमंत्र कहँ रामु ॥१४८॥
भूप सुमंत्रु लीन्ह उर लाई। बूड़त कछु आधार जनु पाई॥
सहित सनेह निकट बैठारी। पूँछत राउ नयन भरि बारी॥
राम कुसल कहु सखा सनेही। कहँ रघुनाथु लखनु वैदेही॥
आने फेरि कि वनहि सिधाए। सुनत सचिव लोचन जलछाए॥
सोक बिकल पुनि पूँछ नरेसू। कहु सिय राम लखन संदेसू॥
राम रूप गुन सील सुभाऊ। सुमिरि सुमिरि उर सोचत राऊ॥
राउ सुनाइ दीन्ह बनवासू। सुनि मन भयउ नहरषु हराँसू॥
सो सुत बिछुरत गए न प्राना। को पापी बड़ मोहि समाना॥
दो०—सखा रामु सिय लखनु जहँ तहाँ मोहि पहुँचाउ।

नाहिं त चाहत चलन अब प्रान कहँ सतिभाउ ॥१४९॥
पुनि पुनि पूँछत मंत्रिहि राऊ। प्रियतम सुअन सँदेस सुनाऊ॥
करहि सखा सोइ बेगि उपाऊ। रामु लखनु सिय नयन देखाऊ॥
सचिव धीर धरि कह मृदु बानी। महाराज तुम्ह पंडित ग्यानी॥
बीर सुधीर धुरंधर देवा। साधु समाजु मदा तुम्ह सेवा॥
जनम मरन सब दुख सुख भोगा। हानि लाभु प्रिय मिलन बियोगा॥

काल करम बस होहिं गोसाईं। बरबस राति दिवस की नाई॥
 सुख हरपहिं जड़ दुख बिलखाहीं। दोउ सम धीर धरहिं मन माहीं॥
 धीरज धरहु विवेकु विचारी। छाड़िअ सोच सकल हितकारी॥
 दो०—प्रथम बासु तमसा भयउ दूसर सुरसरि तीर ।

न्हाइ रहे जलपानु करि सिय समेत दोउ बीर ॥१५०॥

केवट कीन्हि बहुत सेवकाई। सो जामिनि सिंगरौर गवाई॥
 होत प्रात बट छीरु मगावा। जटा मुकुट निज सीस बनावा ॥
 राम सखाँ तब नाव मगाई। प्रिया चढ़ाइ चढ़े रघुराई॥
 लखन बान धनु धरे बनाई। आपु चढ़े प्रभु आयसु पाई॥
 बिकल त्रिलोकि मोहि रघुबीरा। बोले मधुर बचन धरि धीरा॥
 तात प्रनामु तात सन कहेहू। बार बार पद पंकज गहेहू॥
 करबि पायँ परि बिनय बहोरी। तात करिअ जनि चिंता मोरी॥
 बन मग मंगल कुसल हमारें। कृपा अनुग्रह पुन्य तुम्हारें॥

छं०—तुम्हरेँ अनुग्रह तात कानन जात सब सुख पाइहौं ।
 प्रतिपालि आयसु कुसल देखन पाय पुनि फिरि आइहौं ॥
 जननीं सकल परितोषि परि परि पायँ करि बिनती धनी ।
 तुलसी करेहु सोइ जतनु जेहिं कुसली रहहिं कोसल धनी॥

सो०—गुर सन कहब सँदेसु बार बार पद पदुम गहि ।

करब सोइ उपदेसु जेहिं न सोच मोहि अवधपति ॥१५१॥

पुरजन परिजन सकल निहोरी। तात सुनाएहु बिनती मोरी॥

सोइ सब भाँति मोर हितकारी। जातैं रह नरनाहु सुखारी॥
 कहव सँदेसु भरत के आएँ। नीति न तजिअ राजपदु पाएँ॥
 पालेहु प्रजहि करम मन बानी। सेएहु मातु सकल सम जानी॥
 ओर निवाहेहु भायप भाई। करि पितु मातु सुजन सेवकाई॥
 तात भाँति तेहि राखव राऊ। सोच मोर जेहिँ करै न काऊ॥
 लखन कहे कछु बचन कठोरा। बरजि राम पुनि मोहि निहोरा॥
 बार बार निज सपथ देवाई। कहनि न तात लखन लरिकाई॥
 दो०—कहि प्रनासु कछु कहन लिय सिय भइ सिथिल सनेह।

शक्ति बचन लोचन सजल पुलक पल्लवित देह ॥१५२॥

तेहि अवसर रघुवर रुख पाई। केवट पारहि नाव चलाई॥
 रघुकुलतिलक चले एहि भाँती। देखउँ ठाढ़ कुलिस धरिछाती॥
 मैं आपन किमि कहाँ कलेसू। जिअत फिरेउँ लेइ राम सँदेसू॥
 अस कहि सचिव बचन रहि गयऊ। हानि गलानि सोच बस भयऊ॥
 सूत बचन सुनतहिँ नरनाहु। परेउ धरनि उर दारुन दाहू॥
 तलफत विषम मोह मन मापा। माजा मनहुँ मीन कहूँ व्यापा॥
 करि बिलाप सद्य रोवहिँ रानी। महा विपति किमि जाइ बखानी॥
 सुनि बिलाप दुखहू दुखु लागा। धीरजहू कर धीरजु भागा॥
 दो०—भयउ कोलाहल अवध अति सुनि नृप राउर सोर।

विपुल बिहग बन परेउ निसि मानहुँ कुलिस कठोर ॥१५३॥

प्रान कंठगत भयउ भुआल। मनि बिहीन जनु व्याकुल व्याल॥

इंद्रीं सकल विकल भई भारी । जनु सरसरसिज वनु विनु वारी ॥
 कौसल्याँ नृपु दीख मलाना । रविकुल रवि अँथयउ जियँ जाना ॥
 उर धरि धीर राम महतारी । बोली वचन समय अनुसारी ॥
 नाथ समुझि मन करिअ विचारू । राम वियोग पयोधि अपारू ॥
 करनधार तुम्ह अवध जहाजू । चढ़ेउ सकल प्रिय पथिक समाजू ॥
 धीरजु धरिअ त पाइअ पारू । नाहिं त बूझिहि सनु परिवारू ॥
 जौं जियँ धरिअ विनय पिय मोरी । रामु लखनु सिय मिलहिं बहोरी ॥
 दो०—प्रिया वचन मृदु सुनत नृपु चितयउ आँखि उघारि ।

तलफत मीन मलीन जनु सींचत सीतल बारि ॥१५४॥

धरि धीरजु उठि बैठ भुआलू । कहुं सुमंत्र कहँ राम कृपालू ॥
 कहाँ लखनु कहँ रामु सनेही । कहँ प्रिय पुत्रवधू बैदेही ॥
 बिलपत राउ विकल बहु भाँती । भइ जुग सरिस सिराति न राती ॥
 तापस अंध साप सुधि आई । कौसल्यहि सब कथा सुनाई ॥
 भयउ विकल वरनत इतिहासा । राम रहित धिग जीवन आसा ॥
 सो तनु राखि करव मैं काहा । जेहिं न प्रेम पनु मोर निवाहा ॥
 हा रघुनंदन प्रान पिरीते । तुम्ह विनु जिअत बहुत दिन बीते ॥
 हा जानकी लखन हा रघुवर । हा पितु हित चित चातक जलधर ॥
 दो०—राम राम कहि राम कहि राम राम कहि राम ।

तनु परिहरि रघुवर बिरहँ सउ गायउ सुरधाम ॥१५५॥

जिअन मरन फलु दसरथ पावा । अंड अनेक अमल जसु छावा ॥

जिअत राम विधु बदन निहारा । राम विरह करि मरनु सँवारा ॥
 सोक विकल सब रोवहि रानी । रूपु सीलु बलु तेजु बखानी ॥
 करहि विलाप अनेक प्रकारा । परहि भूमितल बारहि वारा ॥
 बिलपहि विकल दास अरु दासी । घर घर रुदनु करहि पुरवासी ॥
 अँथयउ आजु भानुकुल भानू । धरम अवधि गुन रूप निधानू ॥
 गारीं सकल कैकइहि देहीं । नयन विहीन कीन्ह जग जेहीं ॥
 एहिबिधि बिलपत रैन विहानी । आए सकल महामुनि ग्यानी ॥
 दो०—तब बसिष्ठ मुनि समय सम कहि अनेक इतिहास ।

सोक नेवारेउ सबहि कर निज बिग्यान प्रकास ॥१५६॥

तेल नावँ भरि नृप तनु राखा । दूत बोलाइ बहुरि अस भाषा ॥
 धावहु वेगि भरत पहि जाहू । नृप सुधि कतहुँ कहहु जनि काहू ॥
 एतनेइ कहेहु भरत सन जाई । गुर बोलाइ पठयउ दोउ भाई ॥
 मुनि मुनि आयसु धावन धाए । चले वेग वर वाजि लजाए ॥
 अनरथु अवध अरंभेउ जत्र तैं । कुसगुन होहि भरत कहूँ तव तैं ॥
 देखहि राति भयानक सपना । जागि करहि कटु कोटि कल्पना ॥
 विप्र जेवाँइ देहि दिन दाना । सिव अभिषेक करहि विधि नाना ॥
 मागहि हृदयँ महेस मनाई । कुसल मातु पितु परिजन भाई ॥
 दो०—एहि बिधि सोचत भरत मन धावन पहुँचे आइ ।

गुर अनुसासन श्रवन सुनि चले गनेसु मनाइ ॥१५७॥

चले समीर वेग हय हाके । नाघत सरित सल बन बाँके ॥

हृदयँ सोचु बड़ कछु न सोहाई । अस जानहिं जियँ जाउँ उड़ाई ॥
 एक निमेष वरष सम जाई । एहि विधि भरत नगर निअराई ॥
 असगुन होहिं नगर पैठारा । रटहिं कुभाँति कुखेत करारा ॥
 खर सिआर बोलहिं प्रतिकूला । सुनि सुनि होइ भरत मन सूला ॥
 श्रीहत सर सरिता वन बागा । नगरु विसेषि भयावनु लागा ॥
 खग मृग हय गय जाहिं न जोए । राम वियोग कुरोग विगोए ॥
 नगर नारि नर निपट दुखारी । मनहुँ सवन्हि सब संपति हारी ॥
 दो०—पुरजन मिलहिं न कहहिं कछु गवँहि जोहारहिं जाहिं ।

भरत कुसल पूँछि न सकहिं भय विषाद मन माहिं ॥१५८॥

हाट बाट नहिं जाइ निहारी । जनु पुर दहँ दिसि लागि दवारी ॥
 आवत सुत सुनि कैकयनंदिनि । हरषी रविकुल जलरुह चंदिनि ॥
 सजि आरती मुदित उठि धाई । द्वारेहिं भेंटि भवन लेइ आई ॥
 भरत दुखित परिवारु निहारा । मानहुँ तुहिन वनज वनु मारा ॥
 कैकेई हरषित एहि भाँती । मनहुँ मुदित दव लाइ किराती ॥
 सुताहि ससोच देखि मनु मारें । पूँछति नैहर कुसल हमारें ॥
 सकल कुसल कहि भरत सुनाई । पूँछी निज कुल कुसल भलाई ॥
 कहु कहँ तात कहाँ सब माता । कहँ सिय राम लखन प्रिय भ्राता ॥

दो०—सुनि सुत बचन सनेहमय कण्ठ नीर भरि नैन ।

भरत श्रवण मन सुल सम पापिनि बोली बैन ॥१५९॥

तात बात मैं सकल सँवारी । मै मंथरा सहाय बिचारी ॥

कछुक काज विधि बीच विगारेउ । भूपति सुरपति पुर पगु धारेउ ॥
 सुनत भरतु भए विवस विषादा । जनु सहमेउ करि केहरि नादा ॥
 तात तात हा तात पुकारी । परे भूमितल व्याकुल भारी ॥
 चलत न देखन पायउँ तोही । तात न रामहि सँपेहु मोही ॥
 बहुरि धीर धरि उठे सँभारी । कहु पितु मरन हेतु महतारी ॥
 सुनि सुत वचन कहति कैकेई । मरमु पाँछि जनु माहुर देई ॥
 आदिहु तँ सब आपनि करनी । कुटिल कठोर मुदित मन बरनी ॥
 दो०—भरतहि बिसरेउ पितु मरन सुनत राम बन गौनु ।

हेतु अपनपउ जानि जियँ थकित रहे धरि मौनु ॥१६०॥

विकल विलोकि सुतहि समुझावति । मनहुँ जरे परलोनु लगावति ॥
 तात राउ नहिँ सोचै जोगू । विदइ सुकृत जसु कीन्देउ भोगू ॥
 जीवत सकल जनम फल पाए । अंत अमरपति सदन सिधाए ॥
 अस अनुमानि सोच परिहरहू । सहित समाज राज पुर करहू ॥
 सुनि सुठि सहमेउ राजकुमारू । पाकें छत जनु लाग अँगारू ॥
 धीरज धरि भरि लेहिँ उसासा । पापिनि सबहि भाँति कुल नासा ॥
 जौ पै कुरुचि रही अति तोही । जनमत काहे न मारे मोही ॥
 पेड़ काटि तैं पालउ सींचा । मीन जिअन निति बारि उलीचा ॥
 दो०—हंसबंसु दसरथु जनकु राम लखन से भाइ ।

जननी तूँ जननी भई विधि सन कछु न बसाइ ॥१६१॥

जब तै कुमाति कुमत जियँ टयऊ । खंड खंड होइ हृदय न गयऊ ॥

वर मागत मन भइ नहिं पीरा । गरि न जीह मुहँ परेउ न कीरा ॥
 भूषँ प्रतीति तोरि किमि कीन्ही । मरन काल विधि मति हरि लीन्ही
 विधिहुँ न नारि हृदय गति जानी । सकल कपट अघ अवगुन खानी
 सरल सुसील धरम रत राज । सो किमि जानै तीय सुभाऊ ॥
 अस को जीव जंतु जग माहीं । जेहि रघुनाथ प्रानप्रिय नाहीं ॥
 मे अति अहित रामु रेउ तोही । को तू अहसि सत्य कहु मोही ॥
 जो हसि सो हसि मुहँ मसि लाई । आँखि ओट उठि बैठहि जाई ॥
 दो०—राम बिरोधी हृदय तें प्रगट कीन्ह विधि मोहि ।

मो समान को पातकी बादि कहउँ कछु तोहि ॥१६२॥
 सुनि सत्रुघुन मातु कुटिलाई । जरहिं गात रिस कछु न बसाई ॥
 तेहि अवसर कुवरी तहँ आई । वसन विभूषन विविध बनाई ॥
 लखि रिस भरेउ लखन लघु भाई । वरत अनल घृत आहुति पाई ॥
 हुमगि लात तकि कूबर मारा । परि मुह भर महि करत पुकारा ॥
 कूबर टूटेउ फूट कपारू । दलित दसन मुख रुधिर प्रचारू ॥
 आह दइअ मैं काह नसावा । करत नीक फलु अनइस पावा ॥
 सुनिरिपुहन लखि नख सिख खोटी । लगे घसीटन धरि धरि झोंटी
 भरत दयानिधि दीन्हि छड़ाई । कौसल्या पहिं गे दोउ भाई ॥
 दो०—मलिन बसन बिबरन विकल कृस सरीर दुख भार ।

कनक कलप बर बेलि बन मानहुँ हनी तुसार ॥१६३॥

भरतहि देखि मातु उठि धाई । मरुछित अवनि परी झई आई ॥

देखत भरतु बिकल भए भारी । परे चरन तन दसा बिसारी ॥
मातु तात कहँ देहि देखाई । कहँ सिय रामु लखनु दोउ भाई ॥
कैकइ कत जनमी जग माझा । जौ जनमि त भइ काहे न बाँझा ॥
कुल कलंकु जेहिं जनमेउ मोही । अपजस भाजन प्रियजन द्रोही ॥
को तिभुवन मोहि सरिस अभागी । गति असि तोरि मातु जेहि लागी ॥
पितु सुरपुर बन रघुबर केतू । मैं केवल सब अनरथ हेतू ॥
धिग मोहि भयउँ बेनु बन आगी । दुसह दाह दुख दूषन भागी ॥
दो०—मातु भरत के बचन मृदु सुनि पुनि उठी सँभारि ।

लिए उठाइ लगाइ उर लोचन मोचति बारि ॥१६४॥
सरल सुभाय मायँ हियँ लाए । अति हित मनहुँ राम फिरि आए ॥
भेंटैउ बहुरि लखन लघु भाई । सोकु सनेहु न हृदयँ समाई ॥
देखि सुभाउ कहत सबु कोई । राम मातु अस काहे न होई ॥
माताँ भरतु गोद बैठारे । आँसु पौछि मृदु वचन उचारे ॥
अजहुँ वच्छ बलि धीरज धरहू । कुसमउ समुझि सोक परिहरहू ॥
जनि मानहु हियँ हानि गलानी । काल करम गति अघटित जानी ॥
काहुहि दोसु देहु जनि ताता । भा मोहि सब विधि बाम विधाता ॥
जो एतेहुँ दुख मोहि जिआवा । अजहुँ को जानइ का तेहि भावा ॥
दो०—पितु आयस भूषन बसन तात तजे रघुबीर ।

बिसमउ हरषु न हृदयँ कछु पहिरे बलकल चीर ॥१६५॥

चले बिपिन सुनि सिय सँग लागी । रहइ न राम चरन अनुरागी ॥
 सुनतहिं लखनु चले उठि साथी । रहहिं न जतन किए रघुनाथी ॥
 तब रघुपति सबही सिरु नाई । चले संग सिय अरु लघु भाई ॥
 रामु लखनु सिय बनहि सिधाए । गइउँ न संग न प्रान पठाए ॥
 यहु सबु भा इन्ह आँखिन्ह आगैं । तउ न तजा तनु जीव अभागैं ॥
 मोहि न लाज निज नेहु निहारी । राम सरिस सुत मैं महतारी ॥
 जिऐ मरै भल भूपति जाना । मोर हृदय सत कुलिस समाना ॥
 दो०—कौसल्या के बचन सुनि भरत सहित रनिवासु ।

ब्याकुल बिलपत राजगृह मानहुँ सोक नेवासु ॥१६६॥
 बिलपहिं विकल भरत दोउ भाई । कौसल्याँ लिए हृदयँ लगाई ॥
 भाँति अनेक भरतु समुझाए । कहि विवेकमय बचन सुनाए ॥
 भरतहुँ मातु सकल समुझाई । कहि पुरान श्रुति कथा सुहाई ॥
 छल बिहीन सुचि सरल सुबानी । बोले भरत जोरि जुग पानी ॥
 जे अघ मातु पिता सुत मारैं । गाइ गोठ महिसुर पुर जारैं ॥
 जे अघ तिय बालक बध कीन्हें । मीत महीपति माहुर दीन्हें ॥
 जे पातक उपपातक अहहीं । करम बचन मन भव कबि कहहीं ॥
 ते पातक मोहि होहुँ बिधाता । जौ यहु होइ मोर मत माता ॥
 दो०—जे परिहरि हरि हर चरन भजहिं भूतगन घोर ।

तेहि कइ गति मोहि देउ बिधि जौ जननी मत मोर ॥१६७॥

बेचहिं बेदु धरमु दुहि लेहीं । पिसुन पराय पाप कहि देहीं ॥

कपटी कुटिल कलहप्रिय क्रोधी । वेद विदूषक विस्व विरोधी ॥
लोभी लंपट लोलुपचारा । जे ताकहिं परधनु परदारा ॥
पावौं मैं तिन्ह कै गति घोरा । जौं जननी यहु संमत मोरा ॥
जे नहिं साधुसंग अनुरागे । परमारथ पथ विमुख अभागे ॥
जे न भजहिं हरि नरतनु पाई । जिन्हहि न हरि हर सुजसु सोहाई
तजि श्रुतिपंथु बाम पथ चलहीं । बंचक बिरचि बेष जगु छलहीं ॥
तिन्ह कै गति मोहि संकर देऊ । जननी जौं यहु जानौं भेऊ ॥
दो०—मातु भरत के बचन सुनि साँचे सरल सुभायँ ।

कहति राम प्रिय तात तुम्ह सदा बचन मन कायँ ॥१६८॥
राम प्रानहु तैं प्रान तुम्हारे । तुम्ह रघुपतिहि प्रानहु तैं प्यारे ॥
बिधु बिष चवै सवै हिमु आगी । होइ बारिचर बारि बिरागी ॥
मएँ ग्यानु बर मिटै न मोहू । तुम्ह रामहि प्रतिकूल न होहू ॥
मत तुम्हार यहु जो जग कहहीं । सो सपनेहुँ सुख सुगति न लहहीं ॥
अस कहि मातु भरतु हियँ लाए । थन पय सवहिं नयन जल छाए ॥
करत बिलाप बहुत यहि भाँती । बैठेहिं बीति गई सब राती ॥
बामदेउ बसिष्ठ तब आए । सचिव महाजन सकल बोलाए ॥
मुनि बहु भाँति भरत उपदेसे । कहि परमारथ बचन सुदेसे ॥
दो०—तात हृदयँ धीरजु धरहु करहु जो अवसर आजु ।

उठे भरत गुरबचन सुनि करन कहेउ सजु साजु ॥१६९॥

नृपतनु वेद विदित अन्हवावा । परम बिचित्र विमानु बनावा ॥

गहि पद भरत मातु सब राखी। रहीं रानि दरसन अभिलाषी॥
 चंदन अगर भार बहु आए। अमित अनेक सुगंध सुहाए॥
 सरजु तीर रचि चिता बनाई। जनु सुरपुर सोपान सुहाई॥
 एहि विधि दाह क्रिया सब कीन्ही। विधिवत न्हाइ तिलांजुलि दीन्ही
 सोधि सुमृति सब बेद पुराना। कीन्ह भरत दसगात विधाना॥
 जहँ जस मुनिवर आयसु दीन्हा। तहँ तस सहस भौंति सबु कीन्हा॥
 भए बिसुद्ध दिए सब दाना। धेनु बाजि गज बाहन नाना॥
 दो०—सिंघासन भूषन बसन अन्न धरनि धन धाम।

दिए भरत लहि भूमिसुर मे परिपूरन काम ॥१७०॥

पितु हित भरत कीन्हि जसि करनी। सो मुख लाख जाइ नहिं बरनी
 सुदिनु सोधि मुनिवर तब आए। सचिव महाजन सकल बोलाए
 बैठे राजसभाँ सब जाई। पठए बोलि भरत दोउ भाई॥
 भरतु बसिष्ठ निकट बैठारे। नीति धरममय बचन उचारे॥
 प्रथम कथा सब मुनिवर बरनी। कैकइ कुटिल कीन्हि जसि करनी
 भूप धरमव्रतु सत्य सराहा। जेहिं तनु परिहरि प्रेमु निबाहा॥
 कहत राम गुन सील सुभाऊ। सजल नयन पुलकेउ मुनिराऊ॥
 बहुरि लखन सिय प्रीति बखानी। सोक सनेह मगन मुनि ग्यानी॥
 दो०—सुनहु भरत भावी प्रबल बिलखि कहेउ मुनिनाथ।

हानि लाभु जीवतु मरतु जसु अपजसु बिधि हाथ ॥१७१॥

अस बिचारि केहि देइअ दोस। न्यरय काहि पर कीजिअ रोस॥

तात बिचार करहु मन माहीं। सोच जोगु दसरथ नृपु नाहीं ॥
 सोचिअ विप्र जो वेद बिहीना। तजि निज घरसु विषय लयलीना ॥
 सोचिअ नृपति जो नीति न जाना। जेहि न प्रजा प्रिय प्रान समाना ॥
 सोचिअ वयसु कृपन धनवानू। जो न अतिथि सिव भगति सुजानू ॥
 सोचिअ सूद्रु विप्र अवमानी। मुखर मानप्रिय ग्यान गुमानी ॥
 सोचिअ पुनि पति बंचक नारी। कुटिल कलहप्रिय इच्छाचारी ॥
 सोचिअ बटु निज व्रतु परिहरई। जो नहिं गुर आयसु अनुसरई ॥

दो०—सोचिअ गृही जो मोह बस करइ करम पथ त्याग ।

सोचिअ जती प्रपंच रत बिगत बिबेक बिराग ॥१७२॥
 बैखानस सोइ सोचै जोगू। तपु बिहाइ जेहि भावइ भोगू ॥
 सोचिअ पिसुन अकारन क्रोधी। जननि जनक गुर बंधु बिरोधी ॥
 सब बिधि सोचिअ पर अपकारी। निज तनु पोषक निरदय मारी ॥
 सोचनीय सबहीं बिधि सोई। जो न छाड़ि छलु हरि जन होई ॥
 सोचनीय नहिं कोसलराऊ। भुवन चारिदस प्रगट प्रभाऊ ॥
 भयउ न अहइ न अब होनिहारा। भूप भरत जस पिता तुम्हारा ॥
 बिधि हरि हरु सुरपति दिसिनाथा। बरनहिं सब दसरथ गुन गाथा ॥

दो०—कहहु तात केहि भौंति कोउ करिहि बड़ाई तासु ।

राम लखन तुम्ह सत्रुहन सरिस सुअन सुचि जासु ॥१७३॥
 सब प्रकार भूषति बड़धाबी। यदि बिप्रासु करिअ तेहि लानी ॥
 यहु सुनि समुझि सोचु परिहरहु। सिर धरि राज रजायसु करहु ॥

रायँ राजपदु तुम्ह कहँ दीन्हा । पिता बचनु फुर चाहिअ कीन्हा ॥
 तजे रामु जेहिँ बचनहि लागी । तनु परिहरेउ राम विरहागी ॥
 नृपहि बचन प्रिय नहिँ प्रिय प्राणा । करहु तात पितु बचन प्रवाना ॥
 करहु सीस धरि भूप रजाई । हइ तुम्ह कहँ सब भाँति भलाई ॥
 परसुराम पितु अग्या राखी । मारी मातु लोक सब साखी ॥
 तनय जजातिहि जौबनु दयऊ । पितु अग्याँ अघ अजसु न भयऊ ॥
 दो०—अनुचित उचित बिचारु तजि जे पालहिँ पितु बैन ।

ते भाजन सुख सुजस के बसहिँ अमरपति ऐन ॥१७४॥
 अवसि नरेस बचन फुर करहु । पालहु प्रजा सोकु परिहरहु ॥
 सुरपुर नृपु पाइहि परितोषू । तुम्ह कहँ सुकृतु सुजसु नहिँ दोषू
 बेद बिदित संमत सबही का । जेहि पितु देइ सो पावइ टीका ॥
 करहु राजु परिहरहु गलानी । मानहु मोर बचन हित जानी ॥
 सुनि सुख लहय राम बैदेहीं । अनुचित कहब न पंडित केहीं ॥
 कौसल्यादि सकल महतारीं । तेउ प्रजा सुख होहिँ सुखारीं ॥
 परम तुम्हार राम कर जानिहि । सो सब बिधि तुम्ह सन भल मानिहि
 सौँपेहु राजु राम के आएँ । सेवा करेहु सनेह सुहाएँ ॥
 दो०—कीजिअ गुर आयसु अवसि कहहिँ सचिव कर जोरि ।

रघुपति आएँ उचित जस तस तब करब बहोरि ॥१७५॥

कौसल्या धरि धीरज कहई । पत पथ्य गुर आयसु अहई ॥
 सो आदरिअ करिअ हित मानी । तजिअ विषादु काल गति जानी ॥

बन रघुपति सुरपति नरनाहू । तुम्ह एहि भाँति तात कदराहू ॥
परिजन प्रजा सचिव सब अंबा । तुम्हही सुत सब कहँ अवलंबा ॥
लखि विधि बाम कालु कठिनाई । धीरजु धरहु मातु बलि जाई ॥
सिर धरि गुर आयसु अनुसरहू । प्रजा पालि परिजन दुखु हरहू ॥
गुर के बचन सचिव अभिनंदनु । सुने भरत हिय हित जनु चंदनु ॥
सुनी बहोरि मातु मृदु बानी । सील सनेह सरल रस सानी ॥
छं०—सानी सरल रस मातु बानी सुनि भरतु व्याकुल भए ।

लोचन सरोरुह स्रवत सींचत बिरह उर अंकुर नए ॥

सो दसा देखत समय तेहि बिसरी सबहि सुधि देह की ।

तुलसी सराहत सकल सादर सीवँ सहज सनेह की ॥

सो०—भरतु कमल कर जोरि धीर धुरंधर धीर धरि ।

बचन अभिअँ जनु बोरि देत उचित उत्तर सबहि ॥ १७६ ॥

मासपारायण, अठारहवाँ विधाम

मोहि उपदेसु दीन्ह गुर नीका । प्रजा सचिव संमत सबही का ॥

मातु उचित धरि आयसु दीन्हा । अवसि सीस धरि चाहउँ कीन्हा ॥

गुर पितु मातु स्वामि हित बानी । सुनि मन मुदित करिअ भलि जानी

उचित कि अनुचित किएँ बिचारू । धरमु जाइ सिर पातक भारू ॥

तुम्ह तौ देहु सरल सिख सोई । जो आचरत मोर भल होई ॥

जद्यपि यह समुझत हउँ नीकें । तदपि होत परितोषु न जीकें ॥

अब तुम्ह विनय मारि सुनि लहू । मोहि अनुहरत सिखावनु देहू ॥

ऊतर देउँ छमब अपराधू। दुखित दोष गुन गनहिं न साधू ॥

दो०—पितु सुरपुरसिय रामु बन करन कहहु मोहि राजु ।

एहि तें जानहु मोर हित कै आपन बड़ काजु ॥१७७॥

हित हमार सियपति सेवकाई। सो हरि लीन्ह मातु कुटिलाई ॥

मैं अनुमानि दीख मन माहीं। आन उपायँ मोर हित नाहीं ॥

सोक समाजु राजु केहि लेखें। लखन राम सिय विनु पद देखें ॥

बादि बसन विनु भूपन भारू। बादि बिरति विनु ब्रह्मविचारू ॥

सरुज सरीर बादि बहु भोगा। विनु हरि भगति जायँ जप जोगा ॥

जायँ जीव विनु देह सुहाई। बादि मोर सबु विनु रघुराई ॥

जाउँ राम पहिं आयसु देहू। एकहिं आँक मोर हित एहू ॥

मोहि नृप करि भल आपन चहहू। सोउ सनेह जड़ता यस कहहू ॥

दो०—कैकेई सुअ कुटिलमति राम बिमुख गतलाज ।

तुम्ह चाहत सुखु मोह बस मोहि से अधम कें राज ॥१७८॥

कहउँ साँचु सब सुनि पतिआहू। चाहिअ धरमसील नरनाहू ॥

मोहि राजु हठि देइहहु जवहीं। रसा रसातल जाइहि तवहीं ॥

मोहि समान को पाप निवासू। जेहि लगि सीय राम बनबासू ॥

रायँ राम कहूँ काननु दीन्हा। विछुरत गमनु अमरपुर कीन्हा ॥

मैं सठु सब अनरथ कर हेतू। बैठ बात सब सुनउँ सचेतू ॥

विनु रघुबीर बिलोकि अबासू। रहे प्रान सहि जग उपहासू ॥

कहँ लगि कहौँ हृदय कठिनाई । निदरि कुलिसु जेहिँ लही बड़ाई ॥

दो०—कारन तें कारजु कठिन होइ दोसु नहिँ मोर ।

कुलिस अस्थि तें उपल तें लोह कराल कठोर ॥१७९॥

कैकई भव तनु अनुरागे । पावँर प्राण अघाइ अभागे ॥
जौँ प्रिय विरहँ प्राण प्रिय लागे । देखव सुनव बहुत अब आगे ॥
लखन राम सिय कहँ वनु दीन्हा । पठइ अमरपुर पति हित कीन्हा ॥
लीन्ह विधवपन अपजसु आपू । दीन्हेउ प्रजहिँ सोकु संतापू ॥
मोहिँ दीन्ह सुख सुजसु सुराजू । कीन्ह कैकई सब कर काजू ॥
एहिँ तें मोर काह अब नीका । तेहिँ परदेन कहहु तुम्ह टीका ॥
कैकइ जठर जनमि जग माहीं । यह मोहिँ कहँ कछु अनुचित नाहीं ॥
मोरि बात सब बिधिहिँ बनाई । प्रजा पाँच कत करहु सहाई ॥

दो०—ग्रह ग्रहीत पुनि बात बस तेहिँ पुनि बीछी मार ।

तेहिँ पिआइअ बारुनी कहहु काह उपचार ॥१८०॥

कैकइ सुअन जोगु जग जोई । चतुर विरंचि दीन्ह मोहिँ सोई ॥
दसरथ तनय राम लघु भाई । दीन्ह मोहिँ बिधि बादि बड़ाई ॥
तुम्ह सब कहहु कदावन टीका । राय रजायसु सब कहँ नीका ॥
उतर देउँ केहिँ बिधि केहिँ केही । कहहु सुखेन जथा रुचि जेही ॥
मोहिँ कुमातु समेत बिहाई । कहहु कहिहिँ के कीन्ह भलाई ॥
मोहिँ जिनको सचरावर माहीं । जेहिँ सिय राम प्राणप्रिय नाहीं ॥
परम हानि सब कहँ बड़ लाहू । अदिनु मोर नहिँ दूषन काहू ॥

संसय सील प्रेम बस अहहू । सबुइ उचित सब जो कछु कहहू ॥
 दो०—राम मातु सुठि सरलचित मो पर प्रेमु बिसेषि ।

कहइ सुभाय सनेह बस मोरि दीनता देखि ॥१८१॥
 गुर बिबेक सागर जगु जाना । जिन्हहि विस्व कर बदर समाना ॥
 मो कहँ तिलक साज सज सोऊ । भएँ बिधि विमुख विमुख सबु कोऊ
 परिहरि रामु सीय जग माहीं । कोउ न कहिहि मोर मत नाहीं ॥
 सो मैं सुनब सहब सुखु मानी । अंतहुँ कीच तहाँ जहँ पानी ॥
 डरु न मोहि जग कहिहि किपोचू । परलोकहु कर नाहिन सोचू ॥
 एकइ उर बस दुसह दवारी । मोहि लगि भे सिय रामु दुखारी ॥
 जीवन लाहु लखन भल पावा । सबु तजि राम चरन मनु लावा ॥
 मोर जनम रघुबर बन लागी । झूठ काह पछिताउँ अभागी ॥
 दो०—आपनि दारुन दीनता कहउँ सबहि सिरु नाइ ।

देखें बिनु रघुनाथ पद जिय कै जरनि न जाइ ॥१८२॥
 आन उपाउ मोहि नहिं सूझा । को जिय कै रघुबर बिनु बूझा ॥
 एकहिं आँक इहइ मन माहीं । प्रातकाल चलिहउँ प्रभु पाहीं ॥
 जद्यपि मैं अनभल अपराधी । भै मोहि कारन सकल उपाधी ॥
 तदपि सरन सनमुख मोहि देखी । छमि सब करिहहि कृपा बिसेषी ॥
 सील सकुच सुठि सरल सुभाऊ । कृपा सनेह सदन रघुराऊ ॥
 आनिहुक अनभल कीन्ह न रामा । मैं सिसु सेवक जद्यपि बामा ॥
 तुम्ह पै पाँच मोर भल मानी । आयसु आसिष देहु सुबानी ॥

जेहिं सुनि विनय मोहि जनु जानी । आवहिं बहुरि राम रजधानी ॥

दो०—जद्यपि जनसु कुमातु तैं मैं सहु सदा सदोष ।

आपन जानि न त्यागिहहिं मोहि रघुबीर भरोस ॥१८३॥

भरत बचन सब कहैं प्रिय लागे । राम सनेह सुधाँ जनु पागे ॥

लोग वियोग विषम विष दागे । मंत्र सबीज सुनत जनु जागे ॥

मातु सचिव गुर पुर नर नारी । सकल सनेहैं बिकल भए भारी ॥

भरतहि कहहिं सराहि सराही । राम प्रेम मूरति तनु आही ॥

तात भरत अस काहे न कहहू । प्रान समान राम प्रिय अहहू ॥

जो पावैंर अपनी जड़ताई । तुम्हहि सुगाइ मातु कुटिलाई ॥

सो सहु कोटिक पुरुष समेता । बसिहि कलप सत नरक निकेता ॥

अहि अघ अवगुन नहिं मनि गहई । हरइ गरल दुख दारिद दहई ॥

दो०—अवसि चलिअ बन रामु जहैं भरत मंत्रु भल कोन्ह ।

सोक सिंधु बूझत सबहि तुम्ह अवलंबनु दीन्ह ॥१८४॥

भा सब कैं मन मोदु न थोरा । जनु घन धुनि सुनि चातक मोरा ॥

चलत प्रात लखि निरनउ नीके । भरतु प्रानप्रिय भे सबही के ॥

मुनिहि बंदि भरतहि सिरु नाई । चले सकल घर बिदा कराई ॥

धन्य भरत जीवनु जग माहीं । सीछु सनेहु सराहत जाहीं ॥

कहहिं परसपर भा बड़ काजू । सकल चलै कर साजहिं साजू ॥

जेहि राखहिं रहु घर रखवारी । सो जानइ जनु गरदनि मारी ॥

दो०—कोउ कहै सैन कहिअ जहिं काहू । कोउ कहै जग जीवन लाहू ॥

दो०—जरउ सो संपति सदन सुख सुहृद मातु पितु भाइ ।

सनमुख होत जो राम पद करै न सहस सहाइ ॥१८५॥

घर घर साजहिं बाहन नाना । हरषु हृदयँ परभात पयाना ॥
 भरत जाइ घर कीन्ह बिचारू । नगर बाजि गज भवन भँडारू ॥
 संपति सब रघुपति कै आही । जौं बिनु जतन चलौं तजि ताही ॥
 तौ परिनाम न मोरि भलाई । पाप सिरोमनि साँइ दोहाई ॥
 करइ स्वामि हित सेवकु सोई । दूषन कोटि देइ किन कोई ॥
 अस बिचारि सुचिं सेवक बोले । जे सपनेहुँ निज धरम न डोले ॥
 कहि सबु मरमु धरमु भल भाषा । जो जेहि लायक सो तेहिं राखा ॥
 करि सबु जतनु राखि रखवारे । राम मातु पहिं भरतु सिधारे ॥
 दो०—आरत जननी जानि सब भरत सनेह सुजान ।

कहेउ बनावन पालकीं सजन सुखासन जान ॥१८६॥

चक्र चक्रि जिमि पुर नर नारी । चहत प्रात उर आरत भारी ॥
 जागत सब निसि भयउ बिहाना । भरत बोलाए सचिव मुजाना ॥
 कहेउ लेहु सबु तिलक समाजू । बनहिं देव मुनि रामहि राजू ॥
 बेगि चलहु मुनि सचिव जोहारे । तुरत तुरग रथ नाग सँवारे ॥
 अरुंधती अरु अगिनि समाऊ । रथ चढ़ि चले प्रथम मुनिराऊ ॥
 बिप्र बृंद चढ़ि बाहन नाना । चले सकल तप तेज निधाना ॥
 नगर लोग सब सजि सजि जाना । चित्रकूट कहँ कीन्ह पयाना ॥
 सिबिका तुमान जाहिं बसानी । चढ़ि चढ़ि चलत भाई सब राणी ॥

दो०—सौंपि नगर सुचि सेवकनि सादर सकल चलाइ ।

सुमिरि राम सिय चरन तब चले भरत दोउ भाइ ॥१८७॥

राम दरस बस सब नर नारी । जनु करि करिनि चले तकि बारी ॥

बन सिय रामु समुझि मन माहीं । सानुज भरत पयादेहि जाहीं ॥

देखि सनेहु लोग अनुरागे । उत्तरि चले हय गय रथ त्यागे ॥

जाइ समीप राखि निज डोली । राम मातु मृदु बानी बोली ॥

तात चढ़हु रथ बलि महतारी । होइहि प्रिय परिवार दुखारी ॥

तुम्हरेँ चलत चलिहि सबु लोगू । सकल सोक कृस नहिँ मग जोगू ॥

सिर धरि बचन चरन सिरु नाई । रथ चढ़ि चलत भए दोउ भाई ॥

तमसा प्रथम दिवस करि बासू । दूसर गोमति तीर निवासू ॥

दो०—पय अहार फल असन एक निसि भोजन एक लोग ।

करत राम हित नेम व्रत परिहरि भूषन भोग ॥१८८॥

सई तीर बसि चले बिहाने । सुंगबेरपुर सब निअराने ॥

समाचार सब सुने निषादा । हृदयँ बिचार करइ सबिषादा ॥

कारन कवन भरतु बन जाहीं । है कछु कपट भाउ मन माहीं ॥

जौँ पै जियँ न होति कुटिलाई । तौ कत लीन्ह संग कटकाई ॥

जानहिँ सानुज रामहि मारी । करउँ अकंटक राजु सुखारी ॥

भरत न राजनीति उर आनी । तब कलंकु अब जीवन हानी ॥

सकल सुरासुर जुरहिँ जुझारा । रामहि समर न जीतनिहारा ॥

का आचरतु भरतु अब करहीं । नहिँ बिष बेलि अमिअ फल परहीं ॥

दो०—अस बिचारि गुहँ ग्याति सन कहेउ सजग सब होहु ।

हथवाँसहु बोरहु तरनि कीजिअ घाटारोहु ॥१८९॥

होहु सँजोइल रोकहु घाटा । ठाटहु सकल मरै के ठाटा ॥

सनमुख लोह भरत सन लेऊँ । जिअत न सुरसरि उतरन देऊँ ॥

समर मरनु पुनि सुरसरि तीरा । राम काजु छनभंगु सरीरा ॥

भरत भाइ नृपु मैं जन नीचू । बड़ें भाग असि पाइअ मीचू ॥

स्वामि काज करिहउँ रन रारी । जस धवलिहउँ भुवन दस चारी ॥

तजउँ प्रान रघुनाथ निहोरें । दुहूँ हाथ मुद मोदक मोरें ॥

साधु समाज न जाकर लेखा । राम भगत महुँ जासु न रेखा ॥

जायँ जिअत जग सो महि भारू । जननी जौवन बिटप कुठारू ॥

दो०—बिगत बिषाद निषादपति सबहि बढाइ उछाहु ।

सुमिरि राम मागेउ तुरत तरकस धनुष सनाहु ॥१९०॥

बेगहु भाइहु सजहु सँजोऊ । सुनि रजाइ कदराइ न कोऊ ॥

भलेहिं नाथ सब कहहिं सहरषा । एकहिं एक बढावइ करषा ॥

चले निषाद जोहारि जोहारी । सूर सकल रन रूचइ रारी ॥

सुमिरि राम पद पंकज पनहीं । भार्यी बाँधि चढ़ाइन्हि धनहीं ॥

अँगरी पहिरि कूँडि सिर धरहीं । फरसा बाँस सेल सम करहीं ॥

एक कुसल अति ओड़न खाँड़े । कूदहिं गगन मनहुँ छिति छाँड़े ॥

निज निज साजु समाजु बनाई । गुह राउतहि जोहारे जाई ॥

देखि सुभट सब लायक जाने । लै लै नाम सकल सनमाने ॥

दो०—भाइहु लावहु धोख जनि आजु काज बड़ मोहि ।

सुनि सरोष बोले सुभट बीर अधीर न होहि ॥१९१॥

राम प्रताप नाथ बल तोरे । करहिं कटकु विनु भटविनु घोरै ॥

जीवत पाउ न पाछें धरहीं । रुंड मुंडमय मेदिनि करहीं ॥

दीख निपादनाथ भल टोळू । कहेउ बजाउ जुझाऊ ढोळू ॥

एतना कहत छींक भइ बाँए । कहेउ सगुनिअन्ह खेत सुहाए ॥

बूढ़ एकु कह सगुन विचारी । भरतहि मिलिअ न होइहि रारी ॥

रामहि भरतु मनावन जाहीं । सगुन कहइ अस विग्रहु नाहीं ॥

सुनि गुह कहइ नीक कह बूढ़ा । सहसा करि पछिताहिं विमूढ़ा ॥

भरत सुभाउ सीलु विनु बूझें । बड़ि हित हानि जानि विनु जूझें ॥

दो०—गहहु घाट भट समिटि सब लेउँ मरममिलि जाइ ।

बूझि मित्र अरि मध्य गति तस तब करिहउँ आइ ॥१९२॥

लखब सनेहु सुभायँ सुहाएँ । बैर प्रीति नहिं दुरइँ दुराएँ ॥

अस कहि भेंट सँजोवन लागे । कंद मूल फल खग मृग मागे ॥

मीन पीन पाँठीन पुराने । भरि भरि मार कहारन्ह आने ॥

मिलन साजु सजि मिलन सिधाए । मंगल मूल सगुन सुभ पाए ॥

देखि दूरि तैं कहि निज नामू । कीन्ह मुनीसहि दंड प्रनामू ॥

जानि रामप्रिय दीन्हि असीसा । भरतहि कहेउ बुझाइ मुनीसा ॥

राम सखा सुनि संदनु त्यागा । चले उतरि उमगत अनुरागा ॥

गाउँ जाति गुहँ गाउँ पुनई । कीन्ह जोहरि माथ महि लाई ॥

दो०—करत दंडवत देखि तेहि भरत लीन्ह उर लाइ ।

मनहुँ लखन सन भेंट भइ प्रेसु न हृदयँ समाइ ॥१९३॥

भेंटत भरतु ताहि अति प्रीती । लोग सिहाहिं प्रेम कै रीती ॥

धन्य धन्य धुनि मंगल मूला । सुर सराहि तेहि वरिसहिं फूला ॥

लोक वेद सब भाँतिहिं नीचा । जासु छाँह छुइ लेइअ सींचा ॥

तेहि भरि अंक राम लघु भ्राता । मिलत पुलक परिपूरित गाता ॥

राम राम कहि जे जमुहार्हीं । तिन्हहि न पाप पुंज समुहार्हीं ॥

यह तौ राम लाइ उर लीन्हा । कुल समेत जगु पावन कीन्हा ॥

करमनास जलु सुरसरि परई । तेहि को कहहु सीस नहिं धरई ॥

उलटा नामु जपत जगु जाना । बालमीकि भए ब्रह्म समाना ॥

दो०—स्वपच सबर खस जमन जइ पावँर कोल किरात ।

रासु कहत पावन परम होत भुवन बिख्यात ॥१९४॥

नहिं अचिरिजु जुग जुग चलि आई । केहि न दीन्हि रघुबीर बड़ाई ॥

राम नाम महिमा सुर कहहीं । सुनि सुनि अवध लोग सुखु लहहीं ॥

रामसखहि मिलि भरत सप्रेमा । पूँछी कुसल सुमंगल खेमा ॥

देखि भरत कर सीलु सनेहु । भा निषाद तेहि समय बिदेहु ॥

सकुच सनेहु मोदु मन बाढ़ा । भरतहि चितवत एकटक ठाढ़ा ॥

धरि धीरजु पद बंदि बहोरी । विनय सप्रेम करत कर जोरी ॥

कुसल मल पद पंकज पेखी । मैं तिहुँ काल कुसल निज लेखी ॥

अब प्रभु परम अनुग्रह तोरें । सहित कोटि कुल मंगल मोरें ॥

दो०—समुझि मोरि करतूति कुलु प्रभु महिमा जियँ जोइ ।

जो न भजइ रघुबीर पद जग बिधि बंचित सोइ ॥१९५॥

कपटी कायर कुमति कुजाती । लोक बेद बाहेर सब भौंती ॥

राम कीन्ह आपन जबही तैं । भयउँ भुवन भूषन तबही तैं ॥

देखि प्रीति सुनि बिनय सुहाई । मिलेउ बहोरि भरत लघु भाई ॥

कहि निषाद निज नाम सुबानी । सादर सकल जोहारी रानी ॥

जानि लखन सम देहिं असीसा । जिअहु सुखी सय लाख बरीसा ॥

निरखि निषादु नगर नर नारी । भए सुखी जनु लखनु निहारी ॥

कहहिं लहेउ एहिं जीवन लाहू । भेंटै रामभद्र भरि बाहू ॥

सुनि निषादु निज भाग बड़ाई । प्रमुदित मन लइ चलेउ लेवाई ॥

दो०—सनकारे सेवक सकल चले स्वामि रुख पाइ ।

घर तरु तर सर बाग बन बास बनाएन्हि जाइ ॥१९६॥

सुंगवेरपुर भरत दीख जब । भे सनेहँ सब अंग सिथिल तब ॥

सोहत दिऐ निषादहि लागू । जनु तनु धरें बिनय अनुरागू ॥

एहि बिधि भरत सेनु सबु संग । दीखि जाइ जग पावनि गंगा ॥

रामघाट कहँ कीन्ह प्रनामू । भा मनु मगनु मिले जनु रामू ॥

करहिं प्रनाम नगर नर नारी । मुदित ब्रह्ममय बारि निहारी ॥

करि मज्जनु मागहिं कर जोरी । रामचंद्र पद प्रीति न थोरी ॥

भरत कहेउ सुरसरि तब रेनु । सकल सुखद सेवक सुरधेनु ॥

जोरि पानि बर मागउँ एहु । सीय राम पद सहज सनेहु ॥

दो०—एहि विधि मज्जनु भरतु करि गुर अनुसासन पाइ ।

मातु नहानीं जानि सब डेरा चले लवाइ ॥१९७॥

जहँ तहँ लोगन्ह डेरा कीन्हा । भरत सोधु सबही कर लीन्हा ॥
 सुर सेवा करि आयसु पाई । राम मातु पहिं गे दोउ भाई ॥
 चरन चाँपि कहि कहि मृदु बानी । जननीं सकल भरत सनमानी ॥
 भाइहि सौंपि मातु सेवकाई । आपु निषादाहि लीन्ह बोलाई ॥
 चले सखा कर सों कर जोरें । सिथिल सरीरु सनेह न थोरें ॥
 पूँछत सखहि सो ठाउँ देखाऊ । नेकु नयन मन जरनि जुड़ाऊ ॥
 जहँ सिय रामु लखनु निसिसोए । कहत भरे जल लोचन कोए ॥
 भरत बचन सुनि भयउ विषादू । तुरत तहाँ लइ गयउ निषादू ॥

दो०—जहँ सिंसुपा पुनीत तर रघुबर किय विश्रामु ।

अति सनेहँ सादर भरत कीन्हेउ दंड प्रनामु ॥१९८॥

कुस साँथरी निहारि सुहाई । कीन्ह प्रनामु प्रदच्छिन जाई ॥
 चरन रेख रज आँखिन्ह लाई । वनइ न कहत प्रीति अधिकाई ॥
 कनक बिंदु दुइ चारिक देखे । राखे सीस सीय सम लेखे ॥
 सजल बिलोचन हृदयँ गलानी । कहत सखा सन बचन सुबानी ॥
 श्रीहत सीय बिरहँ दुतिहीना । जथा अवध नर नारि बिलीना ॥
 पिता जनक देउँ पटतर केही । करतल भोगु जोगु जग जेही ॥
 ससुर भानुकुल भानु भुआलू । जेहि सिहात अमरावतिपालू ॥
 प्राननाथ रघुनाथ गोसाई । जो बड़ होत सो राम बड़ाई ॥

दो०—पति देवता सुतीय मनि सीय साँथरी देखि ।

बिहरत हृदय न हहरि हर पबि तें कठिन बिसेषि ॥१९९॥

लालन जोगु लखन लघु लोने । मे न भाइ अस अहहिं न होने ॥

पुरजन प्रिय पितु मातु दुलारे । सिय रघुबीरहि प्रानपिआरे ॥

मृदु मूरति सुकुमार सुभाऊ । तात वाउ तन लग न काऊ ॥

ते बन सहहिं विपति सब भाँती । निदरे कोटि कुलिस एहिं छाती ॥

राम जनमि जगु कीन्ह उजागर । रूप सील सुख सब गुन सागर ॥

पुरजन परिजन गुर पितु माता । राम सुभाउ सबहि सुखदाता ॥

बैरिउ राम बड़ाई करहीं । बोलनि मिलनि विनय मन हरहीं ॥

सारद कोटि कोटि सत सेषा । करि न सकहिं प्रभु गुन गन लेखा ॥

दो०—सुखस्वरूप रघुवंसमनि मंगल मोद निधान ।

ते सोचत कुस डसि महि बिधि गति अति बलवान ॥२००॥

राम सुना दुखु कान न काऊ । जीवनतरु जिमि जोगवइ राऊ ॥

पलक नयन फनि मनि जेहि भाँती । जोगवहिं जननि सकल दिन राती ॥

ते अब फिरत विपिन पदचारी । कंद मूल फल फूल अहारी ॥

धिग कैकई अमंगल मूला । भइसि प्रान प्रियतम प्रतिकूले ॥

मैं धिग धिग अघ उदधि अभागी । सबु उतपातु भयउ जेहि लागी ॥

कुल कलंकु करि सृजेउ बिधाताँ । साइँ दोह मोहि कीन्ह कुमाताँ ॥

सुनि सप्रेम समुझाव निषाद । नाथ करिअ कत वादि बिषाद ॥

राम तुम्हहि प्रिय तुम्ह प्रिय रामाहि । यह निरजोसु दासु बिधि बामाहि ॥

छं०—बिधि बाम की करनी कठिन जेहि मातु कीन्ही बावरी ।
 तेहि राति पुनि पुनि करहि प्रभु सादर सरहना रावरी ॥
 तुलसी न तुम्ह सो राम प्रीतमु कहतु हौं सौंहें किऐँ ।
 परिनाम मंगल जानि अपने आनिए धीरजु हिऐँ ॥

सो०—अंतरजामी रामु सकुच सप्रेम कृपायतन ।

चलिअ करिअ विश्रामु यह बिचारि दृढ़ आनि मन ॥२०१॥

सखा बचन सुनि उर धरि धीरा । बास चले सुमिरत रघुवीरा ॥
 यह सुधि पाइ नगर नर नारी । चले बिलोकन आरत भारी ॥
 परदखिना करि करहि प्रनामा । देहि कैकइहि खोरि निकामा ॥
 भरि भरि बारि बिलोचन लेहीं । वाम विधातहि दूपन देहीं ॥
 एक सराहिं भरत सनेहू । कोउ कह नृपति निवाहेउ नेहू ॥
 निंदहि आपु सराहि निषादहि । को कहि सकइ विमोह विषादहि ॥
 एहि बिधि राति लोगु सबु जागा । भा भिनुसार गुदारा लगा ॥
 गुरहि सुनावैं चढ़ाई सुहाई । नई नाव सब मातु चढ़ाई ॥
 दंड चारि महुँ भा सबु पारा । उतरि भरत तब सबहिं सँभारा ॥

दो०—प्रातक्रिया करि मातु पद बंदि गुरहि सिरु नाइ ।

आगें किए निषाद गन दीन्हेउ कटकु चलाइ ॥२०२॥

कियउ निषादनाथु अगुआई । मातु पालकीं सकल चलाई ॥
 साथ बोलाइ भाइ लघु दीन्हा । विप्रन्ह सहित गवनु गुर कीन्हा ॥
 आपु सुरसरिहि कीन्ह प्रनामू । सुमिर लखन सहित सिध रामू ॥

गवने भरत पयादेहिं पाए। कोतल संग जाहिं डोरिआए ॥
 कहहिं सुसेवक वारहिं वारा। होइअ नाथ अस्व असवारा ॥
 रामु पयादेहि पायँ सिधाए। हम कहँ रथ गज बाजि बनाए ॥
 सिर भर जाउँ उचित अस मोरा। सब तैं सेवक धरमु कठोरा ॥
 देखि भरत गति सुनि मृदु बानी। सब सेवक गन गरहिं गलानी ॥
 दो०—भरत तीसरे पहर कहँ कीन्ह प्रवेसु प्रयाग ।

कहत राम सिय राम सिय उमगि उमगि अनुराग ॥ २०३ ॥
 झलका झलकत पायन्ह कैसैं। पंकज कोस ओस कन जैसैं ॥
 भरत पयादेहिं आए आजू। भयउ दुखित सुनि सकल समाजू ॥
 खबरि लीन्ह सब लोग नहाए। कीन्ह प्रनाम त्रिवेनिहिं आए ॥
 सविधि सितासित नीर नहाने। दिए दान महिसुर सनमाने ॥
 देखत स्यामल धवल हलोरे। पुलकि सरीर भरत कर जोरे ॥
 सकल काम प्रद तीरथराऊ। वेद विदित जग प्रगट प्रभाऊ ॥
 मागउँ भीख त्यागि निज धरमू। आरत काह न करइ कुकरमू ॥
 अस जियँ जानि सुजान सुदानी। सफल करहिं जग जाचक बानी ॥
 दो०—अरथ न धरम न काम रुचि गति न चहउँ निरबान ।

जनम जनम रति राम पद यह बरदानु न आन ॥ २०४ ॥
 जानहुँ रामु कुटिल करि मोही। लोग कहउ गुर साहिय द्रोही ॥
 सीता राम चरन रति मोरैं। अनुदिन बढ़उ अनुग्रह तोरैं ॥
 जलकु जलम गरि सुखि बिसरउ। जाचत जलु मवि साहन बासउ ॥

चातकु रटनि घटें घटि जाई। बढें प्रेमु सब भाँति भलाई॥
 कनकहिँ बान चढ़इ जिमि दाहें। तिमि प्रियतम पद नेम निबाहें॥
 भरत बचन सुनि माझ त्रिवेनी। भइ मृदु बानि सुमंगल देनी॥
 तात भरत तुम्ह सब विधि साधू। राम चरन अनुराग अगाधू॥
 बादि गलानि करहु मन माहीं। तुम्ह सम रामहि कोउ प्रिय नाहीं
 दो०—तनु पुलकेउ हियँ हरषु सुनि बेनि बचन अनुकूल।

भरत धन्य कहि धन्य सुर हरषित बरषहिँ फूल॥२०५॥
 प्रमुदित तीरथराज निवासी। बैखानस बडु गृही उदासी॥
 कहहिँ परसपर मिलि दस पाँचा। भरत सनेहु सीलु सुचि साँचा॥
 सुनत राम गुन ग्राम सुहाए। भरद्वाज मुनिवर पहिँ आए॥
 दंड प्रनामु करत मुनि देखे। मूरतिमंत भाग्य निज लेखे॥
 धाइ उठाइ लाइ उर लीन्हे। दीन्हि असीस कृतारथ कीन्हे॥
 आसनु दीन्ह नाइ सिरु बैठे। चहत सकुच गृहँ जनु भजि पैठे॥
 मुनि पूँछव कछु यह बड़ सोचू। बोले रिषि लखि सीलु सँकोचू॥
 सुनहु भरत हम सब सुधि पाई। विधि करतब पर किछु न बसाई॥
 दो०—तुम्ह गलानि जियँ जनि करहु समुझि मातु करतूति।

तात कैकइहि दोसु नहिँ गई गिरा मति धूति॥२०६॥
 यहउ कहत भल कहिहि न कोऊ। लोकु बेदु बुध संमत दोऊ॥
 तात तुम्हार विमल जसु गाई। पाइहि लोकउ बेदु बड़ाई॥
 लोक वेद समत सबु कहइ। जेहि पितु देइ राजु सी लहइ॥

राउ सत्यव्रत तुम्हहि बोलई। देत राजु सुख धरमु बड़ाई॥
 राम गवनु वन अनरथ मूला। जोसुनि सकल विस्व भइ सूला॥
 सो भावी बस रानि अयानी। करिकुचालि अंतहुँ पछितानी॥
 तहँउँ तुम्हार अल्प अपराधू। कहै सो अधम अयान असाधू॥
 करतेहु राजु त तुम्हहि न दोषू। रामहि होत सुनत संतोषू॥
 दो०—अब अति कीन्हेहु भरत भल तुम्हहि उचित मत एहु।

सकल सुमंगल मूल जग रघुवर चरन सनेहु ॥२०७॥

सो तुम्हार धनु जीवनु प्राना। भूरिभाग को तुम्हहि समाना॥
 यह तुम्हार आचरजु न ताता। दसरथ सुअन राम प्रिय भ्राता॥
 सुनहु भरत रघुवर मन माहीं। पेम पात्रु तुम्ह सम कोउ नाहीं॥
 लखन राम सीतहि अति प्रीती। निसि सब तुम्हहि सराहत बीती॥
 जाना मरमु नहात प्रयागा। मगन होहि तुम्हरेँ अनुरागा॥
 तुम्ह पर अस सनेहु रघुवर कै। सुख जीवन जग जस जड़ नर कै॥
 यह न अधिक रघुवीर बड़ाई। प्रनत कुटुंब पाल रघुराई॥
 तुम्ह तौ भरत मोर मत एहु। धरें देह जनु राम सनेहु॥
 दो०—तुम्ह कहँ भरत कलंक यह हम सब कहँ उपदेसु।

राम भगति रस सिद्धि हित भा यह समउ गनेसु ॥२०८॥

नव विधु बिमल तात जसु तोरा। रघुवर किंकर कुमुद चकोरा॥
 उदित सदा अँयइहि कवहुँ ना। घटिहि न जग नभ दिन दिन दूना॥
 कोक तिलोक प्रीति अति करिही। प्रभु प्रसाप रवि अविहि न इच्छी

निसि दिन सुखद सदा सब काहू । ग्रसिहि न कैकइ करतवु राहू ॥
 पूरन राम सुपेम पियूषा । गुर अवमान दोष नहिं दूषा ॥
 राम भगत अब अभिअँ अघाहूँ । कीन्हहु सुलभ सुधा वसुधाहूँ ॥
 भूप भगीरथ सुरसरि आनी । सुमिरत सकल सुमंगल खानी ॥
 दसरथ गुन गन बरनि न जाहीं । अधिकु कहा जेहि सम जग नाहीं
 दो०—जासु सनेह सकोच बस राम प्रगट भए आइ ।

जे हर हिय नयननि कबहुँ निरखे नहीं अघाइ ॥२०९॥

कीरति विधु तुम्ह कीन्ह अनूपा । जहँ बस राम पेम मृगरूपा ॥
 तात गलानि करहु जियँ जाएँ । डरहु दरिद्रहि पारसु पाएँ ॥
 सुनहु भरत हम झूठ न कहहीं । उदासीन तापस बन रहहीं ॥
 सब साधन कर सुफल सुहावा । लखन राम सिय दरसन पावा ॥
 तेहि फल कर फलु दरस तुम्हारा । सहित पयाग सुभाग हमारा ॥
 भरत धन्य तुम्ह जसु जगु जयऊ । कहि अस पेम मगन मुनि भयऊ
 सुनि मुनि बचन सभासद हरषे । साधु सराहि सुमन सुर बरषे ॥
 धन्य धन्य धुनि गगन पयागा । सुनि सुनि भरतु मगन अनुरागा
 दो०—पुलक गात हियँ रामु सिय सजल सरोरुह नैन ।

करि प्रनामु मुनि मंडलिहि बोले गदगद बैन ॥२१०॥

मुनि समाजु अरु तीरथराज । साँचिहुँ सपथ अघाइ अकाजू ॥

एहि गल जौ किछु कहि अनाई । एहि सम अधिकु न अब अधमाई
 तुम्ह सर्वग्य कहउँ सतिभाऊ । उर अंतरजामी खुराऊ ॥

मोहि न मातु करतब कर सोचू । नहिं दुखु जियँ जगु जानिहि पोचू
नाहिन डरु बिगारिहि परलोकू । पितहु मरन कर मोहि न सोकू ॥
सुकृत सुजस भरि भुअन सुहाए । लछिमन राम सरिस सुत पाए ॥
राम बिरहँ तजि तनु छनभंगू । भूप सोच कर कवन प्रसंगू ॥
राम लखन सिय विनु पग पनहीं । करि मुनि बेष फिरहिं बन बनहीं
दो०—अजिन बसन फल असन महि सयन डसि कुस पात ।

बसि तरु तर नित सहत हिम आतप बरषा बात ॥२११॥
एहि दुख दाहँ दहइ दिन छाती । भूख न बासर नीद न राती ॥
एहि कुरोग कर औषधु नाहीं । सोधेउँ सकल विस्व मन माहीं ॥
मातु कुमत बढ़ई अघ मूल । तेहिं हमार हित कीन्ह बँसूल ॥
कलि कुकाठ कर कीन्ह कुजंत्रू । गाड़ि अवधि पढ़ि कठिन कुमंत्र
मोहि लगि यहु कुठाटु तेहिं ठाट । घालेसि सब जगु बारहवाटा ॥
मिटइ कुजोगु राम फिरि आएँ । बसइ अवध नहिं आन उपाएँ ॥
भरत वचन सुनि मुनि सुखु पाई । सबहिं कीन्हि बहु भाँति बड़ाई ॥
तात करहु जनि सोचु विसेषी । सब दुखु मिटिहि राम पग देखी ॥
दो०—करि प्रबोधु मुनिबर कहेउ अतिथि पेसप्रिय होहु ।

कंद मूल फल फूल हम देहिं लेहु करि छोहु ॥२१२॥
सुनि मुनि वचन भरत हियँ सोचू । भयउ कुअवसर कठिन सँकोचू
जानि गरुड गुर गिरा बहोरी । चरन बंदि बोले कर जोरी ॥

भरत बचन मुनिवर मन भाए । सुचिसेवकसिध निकट बोलाए
 चाहिअ कीन्हि भरत पहुनाई । कंद मूल फल आनहु जाई ॥
 भलेहिं नाथ कहि तिन्ह सिर नाए । प्रमुदित निज निज काज सिधाए
 मुनिहि सोच पाहुन बड़ नेवता । तसि पूजा चाहिअ जसदेवता ॥
 सुनि रिधि सिधि अनिमादिक आई । आयसु होइ सो करहिं गोसाई
 दो०—राम बिरह व्याकुल भरतु सानुज सहित समाज ।

पहुनाई करि हरहु श्रम कहा मुदित मुनिराज ॥२१३॥
 रिधि सिधि सिर धरि मुनिवर बानी । बड़भागिनि आपुहि अनुमानी
 कहहिं परसपर सिधि समुदाई । अतुलित अतिथिराम लघु भाई ॥
 मुनि पद बंदि करिअ सोइ आजू । होइ सुखी सब राज समाजू ॥
 अस कहि रचेउ रुचिर गृह नाना । जेहि बिलोकि बिलखाहिं बिमाना
 भोग बिभूति भूरि भरि राखे । देखत जिन्हहि अमर अभिलाषे ॥
 दासी दास साजु सब लीन्हें । जोगवत रहहिं मनहि मनु दीन्हें ॥
 सब समाजु सजि सिधि पल माहीं । जे सुख सुरपुर सपनेहुं नाहीं ॥
 प्रथमहिं बास दिए सब केही । सुंदर सुखद जथा रुचि जेही ॥
 दो०—बहुरि सपरिजन भरत कहूँ रिषि अस आयसु दीन्ह ।

बिधि बिसमय दायकु बिभव मुनिवर तपबल कीन्ह ॥२१४॥

मुनि प्रभाउ जब भरत बिलोका । सब लघु लगे लोकपति लोका ॥
 सुख समाजु नहिं जाइ बखानी । देखत बिरति बिसारहिं ग्यानी ॥
 आसन सयन सुवसन बिताना । वन वाटिका बिहग मृग नाना ॥

सुरभि फूल फल अमिअ समाना । बिमल जलासय विविध विधाना
असन पान सुचि अमिअ अमी से । देखि लोग सकुचात जमी से ॥
सुर सुरभी सुरतरु सबही कै । लखि अभिलाषु सुरेस सची कै ॥
रितु वसंत बह त्रिविध बयारी । सब कहँ सुलभ पदारथ चारी ॥
सुक चंदन बनितादिक भोगा । देखि हरष बिसमय बस लोगा ॥
दो०—संपति चकई भरतु चक मुनि आयस खेलवार ।

तेहि निसि आश्रम पिंजराँ राखे भा भिनुसार ॥२१५॥

मात्सपारायण, उन्नीसवाँ विश्राम

कीन्ह निमज्जनु तीरथराजा । नाइ मुनिहि सिर सहित समाजा ॥
रिषि आयसु असीस सिर राखी । करि दंडवत बिनय बहु भाषी ॥
पथ गति कुसल साथ सब लीन्हें । चले चित्रकूटहिं चितु दीन्हें ॥
रामसखा कर दीन्हें लागू । चलत देह धरि जनु अनुरागू ॥
नहिं पद त्रान सीस नहिं छाया । पेमु नेमु ब्रतु धरमु अमाया ॥
लखन राम सिय पंथ कहानी । पूँछत सखहि कहत मृदु बानी ॥
राम बास थल त्रिप बिलोकें । उर अनुराग रहत नहिं रोक्कें ॥
देखि दसा सुर बरिसहिं फूला । भइ मृदु महि मगु मंगल मूला ॥
दो०—किएँ जाहिं छाया जलद सुखद बहइ बर बात ।

तस मगु भयउ न राम कहँ जस भा भरतहि जात ॥२१६॥

जडु चेतन मग जीव घनेरे । जे चितए प्रभु जिन्ह प्रभु हेरे ॥
ते सब भए परम पद जागू । भरत दरस भेटा भव रोगू ॥

यह बड़ि बात भरत कहि नाहीं । सुमिरत जिनहि रामु मन माहीं ॥
 बारक राम कहत जग जेऊ । होत तरन तारन नर तेऊ ॥
 भरतु राम प्रिय पुनि लघु भ्राता । कस न होइ मगु मंगलदाता ॥
 सिद्ध साधु मुनिवर अंस कहहीं । भरतहि निरखि हरषु हियँ लहहीं ॥
 देखि प्रभाउ सुरेसहि सोचू । जगु भल भलेहि पोच कहूँ पोचू ॥
 गुर सन कहेउ करिअ प्रभु सोई । रामहि भरतहि भेट न होई ॥
 दो०—रामु सँकोची प्रेम बस भरत सपेम पयोधि ।

बनी बात बेगरन चहति करिअ जतनु छलु सोधि ॥२१७॥
 बचन सुनत सुरगुरु मुसुकाने । सहसनयन बिनु लोचन जाने ॥
 मायापति सेवक सन माया । करइ त उलटि परइ सुरराया ॥
 तब किछु कीन्ह राम रुख जानी । अब कुचालि करि होइहि हानी ॥
 सुनु सुरेस रघुनाथ सुभाऊ । निज अपराध रिसाहिं न काऊ ॥
 जो अपराधु भगत कर करई । राम रोष पावक सो जरई ॥
 लोकहुँ बेद बिदित इतिहासा । यह महिमा जानहिं दुरबासा ॥
 भरत सरिस को राम सनेही । जगु जप राम रामु जप जेही ॥
 दो०—मनहुँ न आनिअ अमरपति रघुवर भगत अकाजु ।

अजसु लोक परलोक दुख दिन दिन सोक समाजु ॥२१८॥
 सुनु सुरेस उपदेसु हमारा । रामहि सेवकु परम पिआरा ॥
 मानत सुनु सेवक सेवकहि । सेवक बैर बैर अधिकारि ॥
 जद्यपि सम नहिं राग न रोष । गहहिं न पाप पूनु गुन दोष ॥

करम प्रधान बिस्व करि राखा । जो जस करइ सो तस फलु चाखा ॥
तदपि करहिं सम विषम बिहारा । भगत अभगत हृदय अनुसारा ॥
अगुन अलेप अमान एकरस । रामु सगुन भए भगत पेम बस ॥
राम सदा सेवक रुचि राखी । वेद पुरान साधु सुर साखी ॥
अस जियँ जानि तजहु कुटिलाई । करहु भरत पद प्रीति सुहाई ॥
दो०—राम भगत परहित निरत पर दुख दुखी दयाल ।

भगत सिरोमनि भरत तें जनि डरपहु सुरपाल ॥२१९॥
सत्यसंध प्रभु सुर हितकारी । भरत राम आयस अनुसारी ॥
स्वारथ विवस विकल तुम्ह होहू । भरत दोसु नहिं राउर मोहू ॥
सुनि सुरवर सुरगुर बर बानी । भा प्रमोदु मन मिटी गलानी ॥
बरषि प्रसून हरषि सुरराऊ । लगे सराहन भरत सुभाऊ ॥
एहि बिधि भरत चले मग जाहीं । दसा देखि मुनि सिद्ध सिद्दाहीं ॥
जबहिं रामु कहि लेहिं उसासा । उमगत पेमु मनहुँ चहु पासा ॥
द्रवहिं बचन सुनि कुलिस पषाना । पुरजन पेमु न जाइ बखाना ॥
बीच वास करि जमुनहिं आए । निरखि नीरु लोचन जल छाए ॥
दो०—रघुबर बरन बिलोकि बर वारि समेत समाज ।

होत मगन बारिधि बिरह चढ़े बिबेक जहाज ॥२२०॥
जमुन तीर तेहि दिन करि बासू । भयउ समय सम सबहि सुगासू ॥
रातिहिं घाट घाट की तरनी । आई अगनित जाहिं न बरनी ॥
प्रात पार भए एकहि खेवा । तोषे रामसखा की सेवा ॥

चले नहाइ नदिहि सिर नाई । साथ निषादनाथ दोउ भाई ॥
 आगें मुनिवर वाहन आछें । राजसमाज जाइ सबु पाछें ॥
 तेहि पाछें दोउ बंधु पयादें । भूषन बसन बेष सुठि सादें ॥
 सेवक सुहृद सचिवसुत साथी । सुभिरत लखनु सीय रघुनाथा ॥
 जहँ जहँ राम वास विश्रामा । तहँ तहँ करहि सप्रेम प्रनामा ॥
 दो०—मगबासी नर नारि सुनि धाम काम तजि धाइ ।

देखि सरूप सनेह सब मुदित जनम फलु पाइ ॥२२१॥
 कहहि सपेम एक एक पाहीं । रामु लखनु सखि होह कि नाहीं ॥
 बय बपु बरन रूपु सोइ आली । सीलु सनेहु सरिस सम चाली ॥
 बेषु न सो सखि सीय न संगी । आगें अनी चली चतुरंगा ॥
 नहिं प्रसन्न मुख मानस खेदा । सखि संदेहु होइ एहिं भेदा ॥
 तासु तरक तियगन मन मानी । कहहि सकल तेहि सम न सयानी ॥
 तेहि सराहि बानी फुरि पूजी । बोली मधुर बचन तिय दूजी ॥
 कहि सपेम सब कथाप्रसंगू । जेहि विधि राम राज रस भंगू ॥
 भरतहि बहुरि सराहन लागी । सील सनेह सुभाय सुभागी ॥
 दो०—चलत पयादें खात फल पिता दीन्ह तजि राजु ।

जात मनावन रघुबरहि भरत सरिस को आजु ॥२२२॥
 भायप भगति भरत आचरनू । कहत सुनत दुख दूषन हरनू ॥
 जो किछु कहव योर सखि सोई । राम बंधु अस काहे न होई ॥
 हम सब सानुज भरतहि देखे । भइन्ह धन्य जुबती जन लेखे ॥

मुनि गुन देखि दसा पछिताहीं । कैकइ जननि जोगु सुतु नार्हीं ॥
 कोउ कह दूषनु रानिहि नाहिन । विधि सबु कीन्ह हमहि जो दाहिन ।
 कहँ हम लोक वेद विधि हीनी । लघु तिय कुल करतूति मलीनी ॥
 बसहिँ कुदेस कुगाँव कुबामा । कहँ यह दरसु पुन्य परिनामा ॥
 अस अनंदु अचिरिजु प्रतिग्रामा । जनु मरु भूमि कलपतरु जामा ॥
 दो०—भरत दरसु देखत खुलेउ मग लोगन्ह कर भागु ।

जनु सिंघलबासिन्ह भयउ विधि बस सुलभ प्रयागु ॥ २२३ ॥
 निज गुन सहित राम गुन गाथा । सुनत जाहिँ सुमिरत रघुनाथा ॥
 तीरथ मुनि आश्रम सुरधामा । निरखि निमज्जहिँ करहिँ प्रनामा ॥
 मनहीं मन मागहिँ बरु एहू । सीय राम पद पदुम सनेहू ॥
 मिलहिँ किरात कोल बनबासी । बैखानस बटु जती उदासी ॥
 करि प्रनामु पूँछहिँ जेहि तेही । केहि बन लखनु रामु बैदेही ॥
 ते प्रभु समाचार सब कहहीं । भरतहि देखि जनम फलु लहहीं ॥
 जे जन कहहिँ कुसल हम देखे । ते प्रिय राम लखन सम लेखे ॥
 एहि विधि बूझत सबहि सुवानी । सुनत राम बनबास कहानी ॥
 दो०—तेहि बासर बसि प्रातहीं चले सुमिरि रघुनाथ ।

राम दरस की लालसा भरत सरिस सब साथ ॥ २२४ ॥
 मंगल सगुन होहिँ सब काहू । फरकहिँ सुखद विलोचन बाहू ॥
 भरतहि सहित समाज उछाहू । मिलिहहिँ रामु मिटिहिँ दुख काहू ॥
 करत मनोरथ जस जिय जाके । जाहिँ सनेह सुरा सब छके ॥

सिथिल अंग पग मग डगि डोलहिं । विहवल बचन पेम बस बोलहिं
 रामसखाँ तेहि समय देखावा । सैल सिरोमनि सहज सुहावा ॥
 जासु समीप सरित पय तीरा । सीय समेत बसहिं दोउ बीरा ॥
 देखि करहिं सब दंड प्रनामा । कहि जय जानकि जीवन रामा ॥
 प्रेम मगन अस राजसमाजू । जनु फिरि अवध चले रघुराजू ॥
 दो०—भरत प्रेसु तेहि समय जस तस कहि सकइ न सेपु ।

कबिहि अगम जिमि ब्रह्मसुख अह मम मलिन जनेपु ॥ २२५ ॥
 सकल सनेह सिथिल रघुवर कैं । गए कोस दुइ दिनकर ढरकैं ॥
 जलु थलु देखि बसे निसि वीतैं । कीन्ह गवन रघुनाथ पिरीतैं ॥
 उहाँ रामु रजनी अवसेषा । जागे सीयँ सपन अस देखा ॥
 सहित समाज भरत जनु आए । नाथ त्रियोग ताप तन ताए ॥
 सकल मलिन मन दीन दुखारी । देखीं सासु आन अनुहारी ॥
 मुनि सिय सपन भरे जल लोचन । भए सोचवस सोच विमोचन ॥
 लखन सपन यह नीक न होई । कठिन कुचाह सुनाइहि कोई ॥
 अस कहि बंधु समेत नहाने । पूजि पुरारि साधु सनमाने ॥
 छं०—सनमानि सुर मुनि बंदि बैठे उतर दिसि देखत भए ।
 नभ धूरि खग मृग भूरि भागे बिकल प्रभु आश्रम गए ॥
 तुलसी उठे अवलोकि कारनु काह चित सचकित रहे ।
 सब समाचार किरात कोलन्हि आइ तेहि अवसर कहे ॥

सो०—सुनत सुमंगल बैन मन प्रमोद तन पुलक भर ।

बहुरि सोचवस भे सियरवनू। कारन कवन भरत आगवनू॥
 एक आइ अस कहा बहोरी। सेन संग चतुरंग न थोरी॥
 सो सुनि रामहि भा अति सोचू। इत पितु बच इत बंधु सकोचू॥
 भरत सुभाउ समुझि मन माहीं। प्रभुचित हित थिति पावत नाहीं ॥
 समाधान तव भा यह जाने। भरतु कहे महुँ साधु सयाने॥
 लखन लखेउ प्रभु हृदयँ खमारू। कहत समय सम नीति विचारू॥
 बिनु पूछें कछु कहउँ गोसाईं। सेवकु समयँ न ढीठ ढिठाई॥
 तुम्ह सर्वग्य सिरोमनि स्वामी। आपनि समुझि कहउँ अनुगामी॥
 दो०—नाथ सुहृद सुठि सरल चित सील सनेह निधान ।

सब पर प्रीति प्रतीति जियँ जानिअ आपु समान ॥२२७॥

बिषई जीव पाइ प्रभुताई। मूढ़ मोह बस होहिं जनाई॥
 भरतु नीति रत साधु सुजाना। प्रभु पद प्रेमु सकल जगु जाना॥
 तेऊ आजु राम पदु पाई। चले धरम मरजाद मेटाई॥
 कुटिल कुबंधु कुअवसर ताकी। जानि राम बनवास एकाकी॥
 करि कुमंत्रु मन साजि समाजू। आए करै अकंटक राजू॥
 कोटि प्रकार कलपि कुटिलाई। आए दल बटोरि दोउ भाई॥
 जौं जियँ होति न कपट कुचाली। केहि सोहाति रथ बाजि गजाली॥
 भरतहि दोसु देइ को जाएँ। जग बौराइ राज पदु पाएँ॥
 दो०—ससि गुर तिय गामी नघुपु चढ़ेउ भूमिसुर जान ।

सहस्रबाहु सुरनाथ त्रिसंकू। केहि न राजमद दीन्ह कलंकू॥
 भरत कीन्ह यह उचित उपाऊ। रिपु रिन रंच न राखव काऊ॥
 एक कीन्ह नहिं भरत भलाई। निदरे रामु जानि असहाई॥
 समुझि परिहिसोउ आजु विसेषी। समर सरोष राम मुखु पेखी॥
 एतना कहत नीति रस भूला। रन रस बिटपु पुलक मिस फूला॥
 प्रभु पद बंदि सीस रज राखी। बोले सत्य सहज बलु भाषी॥
 अनुचित नाथ न मानव मोरा। भरत हमहि उपचार न थोरा॥
 कहँ लगि सहिअ रहिअ मनु मारैं। नाथ साथ धनु हाथ हमारैं॥

दो०—छत्रि जाति रघुकुल जनमु राम अनुग जगु जान ।

लातहुँ मारैं चढ़ति सिर नीच को धूरि समान ॥२२९॥

उठि कर जोरि रजायसु मागा। मनहुँ वीर रस सोवत जागा॥
 बाँधि जटा सिर कसि कटि भाथा। साजि सरासनु सायकु हाथा॥
 आजु राम सेवक जसु लेऊँ। भरतहि समर सिखावन देऊँ॥
 राम निरादर कर फलु पाई। सोवहुँ समर सेज दोउ भाई॥
 आइ बना भल सकल समाजू। प्रगट करउँ रिस पाछिल आजू॥
 जिमि करि निकर दलइ मृगराजू। लेइ लपेटि लवा जिमि बाजू॥
 तैसेहिं भरतहि सेन समेता। सानुज निदरि निपातउँ खेता॥
 जौँ सहाय कर संकर आई। तौ मारउँ रन राम दोहाई॥

दो०—अति सरोष माखे लखनु लखि सुनि सपथ प्रवान ।

सजय लोक सख लोकपति चाहत भभरि भगान ॥२३०॥

जगु भय मगन गगन भइ बानी । लखन बाहुबलु विपुल बखानी ॥
 तात प्रताप प्रभाउ तुम्हारा । को कहि सकइ को जाननिहारा ॥
 अनुचित उचित काजु किछु होऊ । समुझि करिअ भल कह सबु कोऊ
 सहसा करि पाछें पछिताहीं । कहहिं वेद बुध ते बुध नाहीं ॥
 सुनि सुर वचन लखन सकुचाने । राम सीयँ सादर सनमाने ॥
 कही तात तुम्ह नीति सुहाई । सब तें कठिन राजमदु भाई ॥
 जो अचवँत नृप मातहिं तेई । नाहिन साधुसभा जेहिं सेई ॥
 सुनहु लखन भल भरत सरीसा । विधि प्रपंच महुँ सुना न दीसा ॥
 दो०—भरतहि होइ न राजमदु विधि हरि हर पद पाइ ।

कबहुँ कि काँजी सीकरनि छीरसिंधु बिनसाइ ॥२३१॥
 तिमिर तरुन तरनिहि मकु गिलई । गगनु मगन मकु मेघहिं मिलई
 गोपद जल वूझहिं घटजोनी । सहज छमा बर छाड़ै छोनी ॥
 मसक फूँक मकु मेरु उड़ाई । होइ न नृपमदु भरतहि भाई ॥
 लखन तुम्हार सपथ पितु आना । सुचि सुबंधु नहिं भरत समाना ॥
 सगुनु खीरु अवगुन जलु ताता । मिलइ रचइ परपंचु विधाता ॥
 भरतु हंस रबिवंस तड़ागा । जनमि कीन्ह गुन दोष विभागा ॥
 गहि गुन पय तजि अवगुन बारी । निज जस जगत कीन्ह उजिआरी
 कहत भरत गुन सीलु सुभाऊ । पेम पयोधि मगन रघुराऊ ॥
 दो०—सुनि रघुबर बानी बिबुध देखि भरत पर हेतु ।

सकल सराहत राम सी प्रभु की कृपानिकेतु ॥२३२॥

जौं न होत जग जनम भरत को । सकल धरम धुर धरनि धरत को
 कवि कुल अगम भरत गुन गाथा । को जानइ तुम्ह बिनु रघुनाथा ॥
 लखन राम सियँ सुनि सुरबानी । अति सुखु लहेउ न जाइ बखानी ॥
 इहाँ भरतु सब सहित सहाए । मंदाकिनीं पुनीत नहाए ॥
 सरित समीप राखि सब लोगा । मागि मातु गुर सचिव नियोगा ॥
 चले भरतु जहँ सिय रघुराई । साथ निषादनाथु लघु भाई ॥
 समुझि मातु करतव सकुचाहीं । करत कुतरक कोटि मन माहीं ॥
 रामु लखनु सिय सुनि मम नाऊँ । उठि जनि अनत जाहिँ तजि ठाऊँ
 दो०—मातु सते महुँ मानि मोहि जो कछु करहिँ सो थोर ।

अघ अवगुन छभि आदरहिँ समुझि आपनी ओर ॥२३३॥
 जौं परिहरहिँ मलिन मनु जानी । जौं सनमानहिँ सेवकु मानी ॥
 मोरें सरन रामहि की पनही । राम सुखामि दोसु सब जनही ॥
 जग जस भाजन चातक मीना । नेम पेम निज निपुन नबीना ॥
 अस मन गुनत चले मग जाता । सकुच सनेहँ सिथिल सब गाता ॥
 फेरति मनहुँ मातु कृत खोरी । चलत भगति बल धीरज धोरी ॥
 जब समुझत रघुनाथ सुभाऊ । तब पथ परत उताइल पाऊ ॥
 भरत दसा तेहि अवसर कैसी । जल प्रवाहँ जल अलि गति जैसी ॥
 देखि भरत कर सोचु सनेहू । भा निषाद तेहि समयँ बिदेहू ॥
 दो०—लगे होन मंगल सगुन सुनि गुनि कहत निषादु ।

मिटिहि सोचु होइहि हरपु पुनि परिनाम बिषादु ॥२३४॥

भरत दीख बन सैल समाजू। मुदित छुधित जनु पाइ सुनाजू॥
 ईति भीति जनु प्रजा दुखारी। त्रिविध ताप पीड़ित ग्रह मारी॥
 जाइ सुराज सुदेस सुखारी। होहिं भरत गति तेहि अनुहारी॥
 राम वास बन संपति भ्राजा। सुखी प्रजा जनु पाइ सुराजा॥
 सचिव विरागु विवेकु नरेसू। विपिन सुहावन पावन देसू॥
 भट जम नियम सैल रजधानी। सांति सुमति सुचि सुंदर रानी॥
 सकल अंग संपन्न सुराज। राम चरन आश्रित चित चाऊ॥
 दो०—जीति मोह महिपालु दल सहित विवेक भुआलु ।

करत अकंटक राज पुरँ सुख संपदा सुकालु ॥२३५॥
 बन प्रदेस मुनि वास घनेरे। जनु पुर नगर गाउँ गन खेरे॥
 विपुल विचित्र विहग मृग नाना। प्रजा समाजु न जाइ बखाना॥
 खगहा करि हरि बाध बराहा। देखि महिष वृष साजु सराहा॥
 वयर विहाइ चरहिं एक संग। जहँ तहँ मनहुँ सेन चतुरंगा॥
 झरना झरहिं मत्त गज गाजहिं। मनहुँ निसान विविधि विधि बाजहिं
 चक्र चक्रोर चातक सुक पिक गन। कूजत मंजु मराल मुदित मन॥
 अलिनान गावत नाचत मोरा। जनु सुराज मंगल चहु ओरा॥
 बेलि बिटप तृन सफल सफूला। सब समाजु मुद मंगल मूला॥
 दो०—राम सैल सोभा निरखि भरत हृदयँ अति पेसु ।

तापस तप फलु पाइ जिमि सुखी सिरानें नेसु ॥२३६॥

मासपारायण, वीसवाँ विश्राम
 नवाह्नपारायण, पाँचवाँ विश्राम

तब केवट ऊँचें चढ़ि धाई। कहेउ भरत सन भुजा उठाई॥
 नाथ देखिअहिं ब्रिटप बिसाला। पाकरि जंबु रसाल तमाला॥
 जिन्ह तरुवरन्ह मध्य बटु सोहा। मंजु बिसाल देखि मनु मोहा॥
 नील सघन पल्लव फल लाला। अविरल छाहँ सुखद सब काला॥
 मानहुँ तिमिर अरुनमय रासी। बिरची बिधि सँकेलि सुषमा सी॥
 ए तरु सरित समीप गोसाँई। रघुवर परनकुटी जहँ छाई॥
 तुलसी तरुवर विविध सुहाए। कहूँ कहूँ सियँ कहूँ लखन लगाए॥
 बट छायाँ वेदिका बनाई। सियँ निज पानि सरोज सुहाई॥
 दो०—जहाँ बैठि मुनिगन सहित नित सिय रामु सुजान।

सुनहिं कथा इतिहास सब आगम निगम पुरान ॥२३७॥

सखा बचन सुनि ब्रिटप निहारी। उमगे भरत बिलोचन बारी॥
 करत प्रनाम चले दोउ भाई। कहत प्रीति सारद सकुचाई॥
 हरषहिं निरखि राम पद अंका। मानहुँ पारसु पायउ रंका॥
 रज सिर धरि हियँ नयनन्हि लावहिं। रघुवर मिलन सरिस सुख पावहिं॥
 देखि भरत गति अकथ अतीवा। प्रेम मगन मृग खग जड़ जीवा॥
 सखाहि सनेह ब्रिस मग भूला। कहि सुपंथ सुर बरषहिं फूला॥
 निरखि सिद्ध साधक अनुरागे। सहज सनेहु सराहन लागे॥
 होत न भूतल भाउ भरत को। अचर सचर चर अचर करत को॥

दो०—पेम अमिअ मंदरु बिरहु भरतु पयोधि गँभीर।

मथि प्रगटउ सुर साधु हित कृपासिधु रघुवीर ॥२३८॥

सखा समेत मनोहर जोटा । लखेउ न लखन सघन बन ओटा ॥
 भरत दीख प्रभु आश्रमु पावन । सकल सुमंगल सदन सुहावन ॥
 करत प्रवेश मिटे दुख दावा । जनु जोगीं परमारथु पावा ॥
 देखे भरत लखन प्रभु आगे । पूँछे बचन कहत अनुरागे ॥
 सीस जटा कटि मुनि पट बाँधें । तून कसैं कर सर धनु काँधें ॥
 वेदी पर मुनि साधु समाजू । सीय सहित राजत रघुराजू ॥
 बलकल बसन जटिल तनु स्यामा । जनु मुनिवेष कीन्ह रति कामा ॥
 कर कमलनि धनु सायकु फेरत । जिय की जरनि हरत हँसि हेरत ॥
 दो०—लसत मंजु मुनि मंडली मध्य सीय रघुचंदु ।

ग्यान सभाँ जनु तनु धरें भगति सच्चिदानंदु ॥२३९॥

सानुज सखा समेत मगन मन । बिसरे हरष सोक सुख दुख गन ॥
 पाहि नाथ कहि पाहि गोसाईं । भूतल परे लकुट की नाई ॥
 बचन सपेम लखन पहिचाने । करत प्रनामु भरत जियँ जाने ॥
 बंधु सनेह सरस एहि ओरा । उत साहिब सेवा बस जोरा ॥
 मिलि न जाइ नहिं गुदरत बनई । सुकवि लखन मन की गति भनई
 रहे राखि सेवा पर भारू । चढ़ी चंग जनु खँच खेलारू ॥
 कहत सप्रेम नाइ महि माथा । भरत प्रनाम करत रघुनाथा ॥
 उठे रामु मुनि पेम अधीरा । कहूँ पट कहूँ निषंग धनु तीरा ॥

दो०—बरबस लिए उठाइ उर लाए कृपानिधान ।

भरत राम की मिलनि लखि बिसरे सबहि अपान ॥२४०॥

मिलनि प्रीति किमि जाइ वखानी । कविकुल अगम करम मन बानी
 परम पेम पूरन दोउ भाई । मन बुधि चित अहमिति बिसराई ॥
 कहहु सुपेम प्रगट को करई । केहि छाया कवि मति अनुसरई ॥
 कबिहि अरथ आखर बलु साँचा । अनुहरि ताल गतिहि नटु नाचा ॥
 अगम सनेह भरत रघुवर को । जहँ न जाइ मनु बिधि हरि हर को ॥
 सो मैं कुमति कहौं केहि माँती । बाज सुराग कि गाँडर ताँती ॥
 मिलनि विलोकि भरत रघुवर की । सुरगन समय धकधकी धरकी ॥
 समुझाए सुरगुरु जड़ जागे । वरधि प्रसून प्रसंसन लागे ॥
 दो०—मिलि सपेम रिपुसूदनहि केवटु भेंटै राम ।

भूरि भायँ भेंटै भरत लछिमन करत प्रनाम ॥२४१॥

भेंटै लखन ललकि लघु भाई । बहुरि निषादु लीन्ह उर लाई ॥
 पुनि मुनिगन दुहुँ भाइन्ह बंदे । अभिमत आसिष पाइ अनंदे ॥
 सानुज भरत उमगि अनुरागा । धरिसिर सिय पद पदुम परागा ॥
 पुनि पुनि करत प्रनाम उठाए । सिर कर कमल परसि बैठाए ॥
 सीयँ असीस दीन्ह मन माहीं । मगन सनेहँ देह सुधि नाहीं ॥
 सब बिधि सानुकूल लखि सीता । भेनिसोच उर अपडर बीता ॥
 कोउ किछु कहइ न कोउ किछु पूँछा । प्रेम भरा मन निज गति छूँछा
 तेहि अवसर केवटु धीरजु धरि । जोरि पानि बिनवत प्रनामु करि ॥

दो०—नाथ साथ मुनिनाथ के मातु सकल पुर लोग ।

सैवक सेनप सचिव सब आए बिकल बियोग ॥२४२॥

सीलसिंधु सुनि गुर आगवन्। सिय समीप राखे रिपुदवन्॥
 चले सवेग रामु तेहि काल। धीर धरम धुर दीनदयाल॥
 गुरहि देखि सानुज अनुरागे। दंड प्रनाम करन प्रभु लागे॥
 मुनिवर धाइ लिए उर लाई। प्रेम उमगि भेंटे दोउ भाई॥
 प्रेम पुलकि केवट कहि नामू। कीन्ह दूरि तैं दंड प्रनामू॥
 रामसखा रिपि बरवस भेंटा। जनु महि छुठत सनेह समेटा॥
 रघुपति भगति सुमंगल मूला। नभ सराहि सुर वरिसहिं फूला॥
 एहि सम निपट नीच कोउ नाहीं। बड़ वसिष्ठ सम को जग माहीं॥
 दो०—जेहि लखि लखनहु तैं अधिक मिले मुदित मुनिराउ।

सो सीतापति भजन को प्रगट प्रताप प्रभाउ ॥२४३॥

आरत लोग राम सबु जाना। करुनाकर सुजान भगवाना॥
 जो जेहि भायँ रहा अभिलाषी। तेहि तेहि कै तसितसि रुख राखी॥
 सानुज मिलि पल महँ सब काहू। कीन्ह दूरि दुखु दारुन दाहू॥
 यह बड़ि बात राम कै नाहीं। जिमि घट कोटि एक रबि छाहीं॥
 मिलि केवटहि उमगि अनुरागा। पुरजन सकल सराहिं भागा॥
 देखीं राम दुखित महतारीं। जनु सुबेलि अवलीं हिम मारीं॥
 प्रथम राम भेंटी कैकेई। सरल सुभायँ भगति मति मेई॥
 पग परि कीन्ह प्रबोधु बहोरी। काल करम बिधि सिर धरि खोरी॥
 दो०—भेटीं रघुवर मातु सब करि प्रबोधु परितोषु।

अब ईस आखीन जमु कीहु न देखि दोषु ॥२४४॥

गुरतिय पद बंदे दुहु भाई । सहित विप्रतिय जे सँग आई ॥
 गंग गौरि सम सब सनमानी । देहिं असीस मुदित मृदु बानी ॥
 गहि पद लगे सुमित्रा अंका । जनु भैंटी संपति अति रंका ॥
 पुनि जननी चरननि दोउ भ्राता । परे पेम व्याकुल सब गाता ॥
 अति अनुराग अंग उर लाए । नयन सनेह सलिल अन्हवाए ॥
 तेहि अवसर कर हरष विषादू । किमि कवि कहै मूक जिमि स्वादू ॥
 मिलि जननिहि सानुज रघुराऊ । गुर सन कहेउ कि धारिअ पाऊ ॥
 पुरजनं पाइ मुनीस नियोगू । जल थल तकि तकि उत्तरेउ लोगू ॥

दो०—महिसुर मंत्री मातु गुर गने लोग लिए साथ ।

. पावन आश्रम गवनु किय भरत लखन रघुनाथ ॥२४५॥

सीय आई मुनिवर पग लागी । उचित असीस लही मन मागी ॥
 गुरपतिनिहि मुनितियन्ह समेता । मिली पेमु कहि जाइ न जेता ॥
 बंदि बंदि पग सिय सबही के । आसिरबचन लहे प्रिय जी के ॥
 सासु सकल जब सीयँ निहारीं । मूदे नयन सहमि सुकुमारीं ॥
 परीं अधिक बस मनहुँ मरालीं । काह- कीन्ह करतार कुचालीं ॥
 तिन्ह सिय निरखि निपट दुखु पावा । सो सबु सहिअ जो दैउ सहावा ॥
 जनकसुता तब उर धरि धीरा । नील नलिन लोयन भरि नीरा ॥
 मिली सकल सासुन्ह सिय जाई । तेहि अवसर करुना महि छाई ॥
 दो०—लागि लागि पग सबनि सिय भेंटति अति अनुराग ।

हृदयँ असीसहिं पेस बस रहिअहु भरी सोदास ॥२४६॥

विकल सनेहँ सीय सब रानी। बैठन सबहि कहेउ गुर ग्यानी॥
 कहि जग गति मायिक मुनिनाथा। कहे कछुक परमारथ गाथा॥
 नृप कर सुरपुर गवनु सुनावा। सुनि रघुनाथ दुसह दुखु पावा॥
 मरन हेतु निज नेहु बिचारी। भे अति विकल धीर धुर धारी॥
 कुलिस कठोर सुनत कटु बानी। बिलपत लखन सीय सब रानी॥
 सोक विकल अति सकल समाजू। मानहुँ राजु अकाजेउ आजू॥
 मुनिवर बहुरि राम समुझाए। सहित समाज सुसरित नहाए॥
 ब्रतु निरंबु तेहि दिन प्रभु कीन्हा। मुनिहु कहें जलु काहुँ न लीन्हा॥
 दो०—ओरु भएँ रघुनंदनहि जो मुनि आयसु दीन्ह ।

श्रद्धा भगति समेत प्रभु सो सबु सादरु कीन्ह ॥२४७॥

करि पितु क्रिया बेद जसि बरनी। भे पुनीत पातक तम तरनी॥
 जासु नाम पावक अच तूल। सुमिरत सकल सुमंगल मूल॥
 सुद्ध सो भयउ साधु संमत अस। तीरथ आवाहन सुरसरि जस॥
 सुद्ध भएँ दुइ वासर बीते। बोले गुर सन राम पिरीते॥
 नाथ लोग सब निपट दुखारी। कंद मूल फल अंबु अहारी॥
 सानुज भरतु सचिव सब माता। देखि मोहि पल जिमि जुग जाता॥
 सब समेत पुर धारिअ पाऊ। आपु इहाँ अमरावति राज॥
 बहुत कहेउँ सब कियउँ ढिठाई। उचित होइ तस करिअ गोसाँई॥

दो०—धर्म सेतु करुनायतन कस न कहहु अस राम ।

लोचन दुखित दिन बुद्ध वरस देखि लहहु विग्रह ॥२४८॥

राम बचन सुनि सभय समाजू। जनु जलनिधि महुँ विकल जहाजू॥
 सुनि गुर गिरा सुमंगल मूला। भयउ मनहुँ मारुत अनुकूल॥
 पावन पयँ तिहुँ काल नहार्हीं। जो बिलोकि अघ ओघ नसार्हीं॥
 मंगलमूरति लोचन भरि भरि। निरखहिं हरषि दंडवत करि करि॥
 राम सैल बन देखन जाहीं। जहँ सुख सकल सकल दुख नाहीं॥
 झरना झरहिं सुधा सम वारी। त्रिविध तापहर त्रिविध वयारी॥
 विटप वेलि तृन अगनित जाती। फल प्रसून पल्लव बहु भाँती॥
 सुंदर सिला सुखद तरु छाहीं। जाइ वरनि बन छवि केहि पाहीं॥
 दो०—सरनि सरोरुह जल बिहग कूजत गुंजत भृंग।

बैर बिगत बिहरत बिपिन मृग बिहंग बहुरंग ॥२४९॥

कोल किरात भिल्ल बनवासी। मधुसुचि सुंदर स्वादु सुधासी॥
 भरि भरि परन पुटीं रचि रूरी। कंद मूल फल अंकुर जूरी॥
 सबहि देहिं करि विनय प्रनामा। कहि कहि स्वाद भेद गुन नामा॥
 देहिं लोग बहु मोल न लेहीं। फेरत राम दोहाई देहीं॥
 कहहिं सनेह मगन मृदु बानी। मानत साधु पेम पहिचानी॥
 तुम्ह सुकृती हम नीच निषादा। पावा दरसन राम प्रसादा॥
 हमहि अगम अति दरसु तुम्हारा। जस मरु धरनि देवधुनि धारा॥
 राम कृपाल निषाद नेवाजा। परिजन प्रजउ चाहिअ जस राजा॥

दो०—यह जियँ जानि सँकोचु तजि करिअ छोहु लखि नेहु।

हमहि कृपाल करम लखि फल मृग अंकुर लेहु ॥२५०॥

तुम्ह प्रिय पाहुने बन पगु धारे। सेवा जोगु न भाग हमारे ॥
 देव काह हम तुम्हहि गोसाँई। ईंधनु पात किरात मिताई ॥
 यह हमारि अति बड़ि सेवकाई। लेहि न बासन बसन चोराई ॥
 हम जड़ जीव जीव गन घाती। कुटिल कुचाली कुमति कुजाती ॥
 पाप करत निसि बासर जाहीं। नहिं पटकटि नहिं पेट अघाहीं ॥
 सपनेहुँ धरम बुद्धि कस काऊ। यह रघुनंदन दरस प्रभाऊ ॥
 जय तैं प्रभु पद पदुम निहारे। भिटे दुसह दुख दोष हमारे ॥
 बचन सुनत पुरजन अनुरागे। तिन्ह के भाग सराहन लागे ॥

छं०—लागे सराहन भाग सब अनुराग बचन सुनावहीं ।
 बोलनि मिलनि सिय राम चरन सनेहु लखि सुख पावहीं ॥
 नर नारि निदरहिं नेहु निज सुनि कोल भिल्लनि की गिरा ।
 तुलसी कृपा रघुवंसमनि की लोह लै लौका तिरा ॥

सो०—बिहरहिं बन चहु ओर प्रति दिन प्रमुदित लोग सब ।

जल ज्यों दादुर मोर भए पीन पावस प्रथम ॥२५१॥

पुर जन नारि मगन अति प्रीती। बासर जाहिं पलक सम वीती ॥
 सीय सासु प्रति बेध बनाई। सादर करइ सरिस सेवकाई ॥
 लखा न मरमु राम बिनु काहूँ। माया सब सिय माया माहूँ ॥
 सीय सासु सेवा बस कीन्हीं। तिन्ह लहि सुख सिख आसिष दीन्हीं ॥
 लखि सिय सहित सरल दोउ भाई। कुटिल रानि पछितानि अघाई

अवनि जमहि जाचति कैकेई। मदि न बीचु बिधि सीचु न देई ॥

लोकहुँ बेद विदित कवि कहहीं । राम विमुख यलु नरक न लहहीं ॥
 यहु संसउ सब के मन माहीं । राम गवनु विधि अवध कि नाहीं ॥
 दो०—निसि न नीद नहिं भूख दिन भरतु बिकल सुचि सोच ।

नीच कीच बिच मगन जस मीनहि सलिल सँकोच ॥ २५२ ॥

कीन्हि मातु मिसकाल कुचाली । ईति भीति जस पाकत साली ॥
 केहि विधि होइ राम अभिषेकू । मोहि अवकलत उपाउ न एकू ॥
 अवसि फिरहिं गुर आयसु मानी । मुनि पुनि कहव राम रुचि जानी
 मातु कहेहुँ बहुरहिं रघुराऊ । राम जननि हठ करबि कि काऊ ॥
 मोहि अनुचर कर केतिक वाता । तेहि महुँ कुसमउ वाम विधाता ॥
 जौ हठ करउँ त निपट कुकरमू । हरगिरि तैं गुरु सेवक धरमू ॥
 एकउ जुगुति न मन ठहरानी । सोचत भरतहि रैन विहानी ॥
 प्रात नहाइ प्रभुहि सिर नाई । बैठत पठए रिषयँ बोलाई ॥
 दो०—गुर पद कमल प्रनामु करि बैठे आयसु पाइ ।

बिप्र महाजन सचिव सब जुरे सभासद आइ ॥ २५३ ॥

बोले मुनिवर समय समाना । सुनहु सभासद भरत सुजाना ॥
 धरम धुरीन भानुकुल भानू । राजा रामु स्वयस भगवानू ॥
 सत्यसंध पालक श्रुति सेतू । राम जनमु जग मंगल हेतू ॥
 गुर पितु मातु बचन अनुसारी । खल दलु दलन देव हितकारी ॥
 नीति प्रीति परमारय स्वारथु । कोउ न राम सम जान जथारथु ॥

विधि हरिद्वार सखि रुचि दिशिपाल । राधा जीव करम कुलि काल ॥

अहिप महिप जहँ लगि प्रभुताई। जोग सिद्धि निगमागम गाई॥
करि विचार जियँ देखहु नीकें। राम रजाइ सीस सबही कें॥
दो०—राखें राम रजाइ रख हम सब कर हित होइ ।

समुझि सयाने करहु अब सब मिलि संमत सोइ ॥२५४॥
सब कहँ सुखद राम अभिषेकू। मंगल मोद मूल मग एकू॥
केहि विधि अवध चलहिं रघुराऊ। कहहु समुझि सोइ करिअ उपाऊ
सब सादर सुनि मुनिवर बानी। नय परमारथ स्वारथ सानी॥
उतरु न आव लोग भए भोरे। तब सिरु नाइ भरत कर जोरे॥
भानुवंस भए भूप घनेरे। अधिक एक तैं एक बड़ेरे॥
जनम हेतु सब कहँ पितु माता। करम सुभासुभ देइ विधाता॥
दलि दुख सजइ सकल कल्याना। अस असीस राउरि जगु जाना॥
सो गोसाईं विधि गति जेहिं छेंकी। सकइ को टारि टेक जो टेकी॥
दो०—बूझिअ मोहि उपाउ अब सो सब मोर अभागु ।

सुनि सनेहमय वचन गुर उर उमगा अनुरागु ॥२५५॥
तात वात फुरि राम कृपाहीं। राम विमुख सिधि सपनेहुँ नाहीं॥
सकुचउँ तात कहत एक वाता। अरध तजहिं बुध सरबस जाता॥
तुम्ह कानन गवनहु दोउ भाई। फेरिअहिं लखन सीय रघुराई॥
सुनि सुवचन हरषे दोउ भ्राता। भे प्रमोद परिपूरन गाता॥
मन प्रसन्न तन तेजु विराजा। जनु जिय राउ रामु भए राजा॥

बहुत लख लोखन्ह लघु हानी। सम दाउ सुन सन रोवहिं रानी॥

कहहिं भरतु मुनि कहा सो कीन्हे । फलु जग जीवन्ह अभिमत दीन्हे
कानन करउँ जनम भरि बासू । एहि तैं अधिक न मोर सुपासू ॥

दो०—अंतरजामी रामु सिय तुम्ह सरबग्य सुजान ।

जौं फुर कहहु त नाथ निज कीजिअ बचनु प्रवान ॥ २५६ ॥

भरत बचन सुनि देखि सनेहु । सभा सहित मुनि भए विदेहु ॥
भरत महा महिमा जलरासी । मुनि मति ठाढ़ि तीर अबलासी ॥
गा चह पार जतनु हियँ हेरा । पावति नाव न बोहितु बेरा ॥
औरु करिहि को भरत बड़ाई । सरसी सीपि कि सिंधु समाई ॥
भरतु मुनिहि मन भीतर भाए । सहित समाज राम पहिं आए ॥
प्रभु प्रनामु करि दीन्ह सुआसनु । बैठे सब सुनि मुनि अनुसासनु ॥
बोले मुनिबरु बचन विचारी । देस काल अवसर अनुहारी ॥
सुनहु राम सरबग्य सुजाना । धरमनीतिगुन ग्यान निधाना ॥

दो०—सब के उर अंतर बसहु जानहु भाउ कुभाउ ।

पुरजन जननी भरत हित होइ सो कहिअ उपाउ ॥ २५७ ॥

आरत कहहिं विचारि न काऊ । सूझ जुआरिहि आपन दाऊ ॥
सुनि मुनि बचन कहत रघुराऊ । नाथ तुम्हारेहि हाथ उपाऊ ॥
सब कर हित रख राउरि राखें । आयसु किएँ मुदित फुर भाषें ॥
प्रथम जो आयसु मो कहूँ होई । माथें मानि करौं सिख सोई ॥
पुनि जेहि कहँ जस कहय गोसाई । सो सब भाँति घटिहि सेवकाई ॥
कह मुनि राम सत्य तुम्ह भाषा । भरत सनेह विचार न राखा ॥

तेहि तें कहउँ बहोरि बहोरी । भरत भगति बस भइ मति मोरी ॥
मोरें जान भरत रुचि राखी । जो कीजिअ सो सुभ सिव साखी ॥
दो०—भरत बिनय सादर सुनिअ करिअ बिचारु बहोरि ।

करब साधुमत लोकमत नृपनय निगम निचोरि ॥२५८॥

गुर अनुरागु भरत पर देखी । राम हृदयँ आनंदु बिसेधी ॥
भरतहि धरम धुरंधर जानी । निज सेवक तन मानस बानी ॥
बोले गुर आयस अनुकूल । वचन मंजु मृदु मंगलमूल ॥
नाथ सपथ पितु चरन दोहाई । भयउ न भुअन भरत सम भाई ॥
जे गुर पद अंबुज अनुरागी । ते लोकहुँ वेदहुँ बड़भागी ॥
राउर जा पर अस अनुरागू । को कहि सकइ भरत कर भागू ॥
लखि लघु बंधु बुद्धि सकुचाई । करत बदन पर भरत बड़ाई ॥
भरतु कहहिं सोइ किऐँ भलाई । अस कहि राम रहे अरगाई ॥

दो०—तब मुनि बोले भरत सन सब सँकोचु तजि तात ।

कृपासिंधु प्रिय बंधु सन कहहु हृदय कै बात ॥२५९॥

मुनि मुनि वचन राम रुख पाई । गुरु साहिब अनुकूल अघाई ॥
लखि अपनैं सिर सबु छरु भारू । कहि न सकहिं कछु करहिं विचारू ॥
पुलकि सरीर सभाँ भए ठाढ़े । नीरज नयन नेह जल बाढ़े ॥
कहब मोर मुनिनाथ निवाहा । एहि तें अधिक कहौँ मैं काहा ॥
मैं जानउँ निज नाथ सुभाऊ । अपराधिहु पर कोह न काऊ ॥
मौ पर कृपा सनेहु बिसेधी । खेलत खुनिस न करहुँ देखी ॥

सिसुपन तैं परिहरेउँ न संगू । कबहुँ न कीन्ह मोर मन भंगू ॥
 मैं प्रभु कृपा रीति जियँ जोही । हारेहुँ खेल जितावहिं मोही ॥
 दो०—महूँ सनेह सकोच बस सनमुख कही न बैन ।

दरसन तृपित न आजु लागि पेम पिआसे नैन ॥२६०॥

विधि न सकेउ सहि मोर दुलारा । नीच ब्रीचु जननी मिस पारा ॥
 यहउ कहत मोहि आजु न सोभा । अपनी समुझि साधु सुचि को भा
 मातु मंदि मैं साधु सुचाली । उर अस आनत कोटि कुचाली ॥
 फरइ कि कोदव वालि सुसाली । मुकता प्रसव कि संबुक काली ॥
 सपनेहुँ दोसक लेसु न काहू । मोर अभाग उदधि अवगाहू ॥
 बिनु समुझैं निज अघ परिपाकू । जारिउँ जायँ जननि कहि काकू ॥
 हृदयँ हेरि हारेउँ सब ओरा । एकहि भाँति भलेहिं भल मोरा ॥
 गुर गोसाइँ साहिब सिय रामू । लागत मोहि नीक परिनामू ॥
 दो०—साधु सभाँ गुर प्रभु निकट कहउँ सुथल सति भाउ ।

प्रेम प्रपंचु कि झूठ फुर जानहिं मुनि रघुराउ ॥२६१॥

भूपति मरन पेम पनु राखी । जननी कुमति जगतु सबु साखी ॥
 देखि न जाहिं बिकल महतारीं । जरहिं दुसह जर पुर नर नारीं ॥
 महीं सकल अनरथ कर मूला । सो मुनि समुझि सहिउँ सब सूला ॥
 सुनि वन गवनु कीन्ह रघुनाथा । करि मुनि वेष लखन सिय साथा ॥
 बिनु पानहिन्ह पयादेहि पाएँ । संकरु साखि रहेउँ एहि घाएँ ॥
 बहुरि निहारि निपाद सनेहू । कुलिस कोठन उर भयउ न येहू ॥

अब सबु आँखिन्ह देखेउँ आई । जिअत जीव जड़ सबइ सहाई ॥
जिन्हहि निरखि मग साँपिनि वीछी । तजहिं विषम विषु तामस तीछी
दो०—तेइ रघुनंदनु लखनु सिय अनहित लागे जाहि ।

तासु तनय तजि दुसह दुख दैउ सहावइ काहि ॥२६२॥

मुनि अति विकल भरत बर बानी । आरति प्रीति बिनय नय सानी ॥
सोक मगन सब सभाँ खमारु । मनहुँ कमल बन परेउ तुसारु ॥
कहि अनेक विधि कथा पुरानी । भरत प्रबोधु कीन्ह मुनि ग्यानी ॥
बोले उचित बचन रघुनंदू । दिनकर कुल कैरव बन चंदू ॥
तात जायँ जियँ करहु गलानी । ईस अधीन जीव गति जानी ॥
तीनि काल तिभुअन मत मोरें । पुन्यसिलोक तात तर तोरें ॥
उर आनत तुम्ह पर कुटिलाई । जाइ लोकु परलोकु नसाई ॥
दोसु देहिं जननिहि जड़ तेई । जिन्ह गुर साधु सभा नहिं सेई ॥

दो०—मिटिहहिं पाप प्रपंच सब अखिल अमंगल भार ।

लोक सुजसु परलोक सुख सुमिरत नामु तुम्हार ॥२६३॥

कहउँ सुभाउ सत्य सिव साखी । भरत भूमि रह राउरि राखी ॥
तात कुतरक करहु जनि जाएँ । बैर पेम नहिं दुरइ दुराएँ ॥
मुनि गन निकट बिहग मृग जाहीं । बाधक बधिक विलोकि पराहीं ॥
हित अनहित पसु पच्छिउ जाना । मानुष तनु गुन ग्यान निधाना ॥
तात तुम्हहि मैं जानउँ नीकें । करौं काह असमंजस जीकें ॥

राखेउ राखँ सत्य मोहि ल्यामी । जातु मरिहोउ पेम फल लागी ॥

तासु वचन मेटत मन सोचू । तेहि तैं अधिक तुम्हार सँकोचू ॥
 ता पर गुर मोहि आयसु दीन्हा । अवसिजो कहहु चहउँ सोइ कीन्हा
 दो०—मनु प्रसन्न करि सकुच तजि कहहु करौं सोइ आजु ।

सत्यसंध रघुवर वचन सुनि भा सुखी समाजु ॥२६४॥

सुर गन सहित समय सुरराजू । सोचहिं चाहत होन अकाजू ॥
 वनत उपाउ करत कछु नाहीं । राम सरन सब गे मन माहीं ॥
 बहुरि विचारि परस्पर कहहीं । रघुपति भगत भगति वस अहहीं ॥
 सुधि करि अंवरीष दुरवासा । भे सुर सुरपति निपट निरासा ॥
 सहे सुरन्ह बहु काल विषादा । नरहरि किए प्रगट प्रह्लादा ॥
 लगि लगि कान कहहिं धुनि माथा । अब सुर काज भरत के हाथा ॥
 आन उपाउ न देखिअ देवा । मानत रामु सुसेवक सेवा ॥
 हियँ सपेम सुमिरहु सब भरतहि । निज गुन सील राम वस करतहि ॥
 दो०—सुनि सुर मत सुरगुर कहेउ भल तुम्हार बड़ भागु ।

सकल सुमंगल मूल जग भरत चरन अनुरागु ॥२६५॥

सीतापति सेवक सेवकाई । कामधेनु सय सरिस सुहाई ॥
 भरत भगति तुम्हरे मन आई । तजहु सोचु विधि बात बनाई ॥
 देखु देवपति भरत प्रभाऊ । सहज सुभायँ विवस रघुराऊ ॥
 मन थिर करहु देव डरु नाहीं । भरतहि जानि राम परिछाहीं ॥
 सुनि सुरगुर सुर संमत सोचू । अंतराजामी प्रभुहि सँकोचू ॥
 निज सिर भारु भरत जियँ जाना । करत कोटि विधि उर अनुमाना

करि विचार मन दीन्ही ठीका । राम रजायस आपन नीका ॥
निज पन तजि राखेउ पनु मोरा । छोहु सनेहु कीन्ह नहिं थोरा ॥
दो०—कीन्ह अनुग्रह अमित अति सब बिधि सीतानाथ ।

करि प्रनामु बोले भरतु जोरि जलज जुग हाथ ॥२६६॥
कहाँ कहावौं का अब स्वामी । कृपा अंबुनिधि अंतरजामी ॥
गुर प्रसन्न साहिय अनुकूला । मिटी मलिन मन कलपित सूला ॥
अपडर डरेउँ न सोच समूलें । रविहि न दोसु देव दिसि भूलें ॥
मोर अभागु मातु कुटिलाई । बिधि गति बिषम काल कठिनाई
पाउ रोपि सब मिलि मोहि घाला । प्रनतपाल पन आपन पाला ॥
यह नइ रीति न राउरि होई । लोकहुँ वेद विदित नहिं गोई ॥
जगु अनमल भल एकु गोसाई । कहिअ होइ भल कासु भलाई ॥
देउ देवतरु सरिस सुभाऊ । सनमुख विमुख न काहुहि काऊ
दो०—जाइ निकट पहिचानि तरु छाहँ समनि सब सोच ।

मागत अभिमत पाव जग राउ रंकु भल पोच ॥२६७॥
लखि सब बिधि गुर स्वामि सनेहू । मिटेउ छोभु नहिं मन संदेहू ॥
अब करुनाकर कीजिअ सोई । जन हित प्रभु चित छोभु न होई ॥
जो सेवकु साहिवहि सँकोची । निज हित चहइ तासु मति पोची ॥
सेवक हित साहिव सेवकाई । करै सकल सुख लोभ विहाई ॥
स्वारथु नाथ फिरें सबही का । किएँ रजाइ कोटि बिधि नीका ॥

देव एक विनती सुनि मोरी । उचित होइ तस करब बहोरी ॥
 तिलक समाजु साजि सबु आना । करिअ सुफल प्रभु जाँ मनु माना
 दो०—सानुज पठइअ मोहि बन कीजिअ सबहि सनाथ ।

नतर फेरिअहि बंधु दोउ नाथ चलौ मैं साथ ॥२६८॥

नतर जाहि बन तीनिउ भाई । बहुरिअ सीय सहित रघुराई ॥
 जेहि विधि प्रभु प्रसन्न मन होई । करुना सागर कीजिअ सोई ॥
 देव दीन्ह सबु मोहि अमारु । मोरें नीति न धरम विचारु ॥
 कहउँ वचन सब स्वारथ हेतू । रहत न आरत केँ चित चेतू ॥
 उतर देइ सुनि स्वामि रजाई । सो सेवकु लखि लाज लजाई ॥
 अस मैं अवगुन उदधि अगाधू । स्वामि सनेहँ सराहत साधू ॥
 अब कृपाल मोहि सो मत भावा । सकुच स्वामि मन जाई न पावा
 प्रभु पद सपथ कहउँ सति भाऊ । जग मंगल हित एक उपाऊ ॥

दो०—प्रभु प्रसन्न मन सकुच तजि जो जेहि आयसु देब ।

सो सिर धरि धरि करिहि सबु मिटिहि अनट अवरेबा ॥२६९॥

भरत बचन सुचि सुनि सुर हरषे । साधु सराहि सुमन सुर बरषे ॥
 असमंजस बस अवध नेवासी । प्रमुदित मन तापस बनवासी ॥
 चुपहि रहे रघुनाथ सँकोची । प्रभु गति देखि समा सब सोची ॥
 जनक दूत तेहि अवसर आए । मुनि बसिष्ठ मुनि बेगि बोलाए ॥
 करि प्रनाम बिन्द राम निहाये । बेषु देखि भूप निमट दुखाये ॥
 दूतन्ह मुनिबर बूझी बाता । कहहु बिदेह भूप कुसलाता ॥

सुनि सकुचाइ नाइ महि माथा । बोले चर वर जोरें हाथा ॥

बूझब राउर सादर साई । कुसल हेतु सो भयउ गोसाई ॥

दो०—नाहिं त कोसल नाथ कैं साथ कुसल गइ नाथ ।

मिथिला अवध बिसेष तें जगु सब भयउ अनाथ ॥२७०॥

कोसलपति गति सुनि जनकौरा । भे सब लोक सोक बस वौरा ॥

जेहिं देखे तेहि समय विदेहू । नामु सत्य अस लाग न केहू ॥

रानि कुचालि सुनत नरपालहि । सूझ न कछु जस मनि विनु ब्यालहि

भरत राज रघुवर वनबासू । भा मिथिलेसहि हृदयँ हराँसू ॥

नृप बूझे बुध सचिव समाजू । कहहु विचारि उचित का आजू ॥

समुझि अवध असमंजस दोऊ । चलिअ कि रहिअ न कह कछु कोऊ

नृपहिं धीर धरि हृदयँ विचारी । पठए अवध चतुर चर चारी ॥

बूझि भरत सति भाउ कुभाऊ । आएहु बेगि न होइ लखाऊ ॥

दो०—गए अवध चर भरत गति बूझि देखि करतूति ।

चले चित्रकूटहि भरतु चार चले तेरहूति ॥२७१॥

दूतन्ह आइ भरत कह करनी । जनक समाज जथामति वरनी ॥

सुनि गुर परिजन सचिव महीपति । भे सब सोच सनेहँ बिकल अति

धरि धीरजु करि भरत बड़ाई । लिए सुभट साहनी बोलाई ॥

घर पुर देस राखि रखवारे । हय गय रथ बहु जान सँवारे ॥

दुधरी साधि चले ततकाला । किए विश्रामु न मग महिपाला ॥

मोहिं आहु नद्वार प्रथमा । चले जगु सब उतरस सकुलापा ॥

खरि लेन हम पठए नाथा । तिन्ह कहि अस महि नायउ माथा
साथ किरात छ सातक दीन्है । मुनिबर तुरत बिदा चर कीन्है ॥

दो०—सुनत जनक आगवनु सबु हरषेउ अवध समाजु ।

रघुनंदनहि सकोचु बड़ सोच बिबस सुरराजु ॥२७२॥

गरइ गलानि कुटिल कैकई । काहि कहै केहि दूषनु देई ॥

अस मन आनि मुदित नर नारी । भयउ बहोरि रहव दिन चारी ॥

एहि प्रकार गत वासर सोऊ । प्रात नहान लाग सबु कोऊ ॥

करि मज्जनु पूजहिं नर नारी । गनप गौरि तिपुरारि तमारी ॥

रमा रमन पद बंदि बहोरी । बिनवहिं अंजुलि अंचल जोरी ॥

राजा रामु जानकी रानी । आनँद अवधि अवध रजधानी ॥

सुबस बसउ फिरि सहित समाजा । भरतहि रामु करहुँ जुवराजा ॥

एहि सुख सुधाँ सींचि सब काहू । देव देहु जग जीवन लाहू ॥

दो०—गुर समाज भाइन्ह सहित राम राजु पुर होउ ।

अछत राम राजा अवध मरिअ माग सबु कोउ ॥२७३॥

मुनि सनेहमय पुरजन बानी । निंदहिं जोग बिरति मुनि ग्यानी ॥

एहि विधि नित्य करम करि पुरजन । रामहि करहिं प्रनाम पुलकि तन

ऊँच नीच मध्यम नर नारी । लहहिं दरसु निज निज अनुहारी ॥

सावधान सबही सनमानहिं । सकल सराहत कृपानिधानहिं ॥

लखि कहि लें रघुवर नाथी । बालन नीति प्रीति पहिचानी ॥

सील सकोच सिंधु रघुराज । सुमुख सुलोचन सरल सुभाज ॥

कहत राम गुन गन अनुरागे । सब निज भाग सराहन लागे ॥
हम सम पुन्य पुंज जग थोरे । जिन्हहि रामु जानत करि मोरे ॥
दो०—प्रेम मगन तेहि समय सब सुनि आवत मिथिलेसु ।

सहित सभा संभ्रम उठै रबिकुल कमल दिनेसु ॥२७४॥

भाइ सचिव गुर पुरजन साथी । आगैं गवनु कीन्ह रघुनाथा ॥
गिरिवरु दीख जनकपति जवहीं । करि प्रनामु रथ त्यागेउ तवहीं ॥
राम दरस लालसा उछाहू । पथ श्रम लेसु कलेसु न काहू ॥
मन तहँ जहँ रघुवर वैदेही । विनु मन तन दुख सुख सुधिं केही
आवत जनकु चले एहि भाँती । सहित समाज प्रेम मति माती ॥
आए निकट देखि अनुरागे । सादर मिलन परसपर लागे ॥
लगे जनक मुनिजन पद बंदन । रिषिन्ह प्रनामु कीन्ह रघुनंदन ॥
भाइन्ह सहित रामु मिलि राजहि । चले लवाइ समेत समाजहि ॥
दो०—आश्रम सागर सांत रस पूरन पावन पाथु ।

सेन मनहुँ करुना सरित लिपैं जाहिँ रघुनाथु ॥२७५॥

बोरति ग्यान विराग करारे । वचन ससोक मिलत नद नारे ॥
सोच उसास समीर तरंगा । धीरज तट तरुवर कर भंगा ॥
विषम विषाद तोरावति धारा । भय भ्रम भवँर अवर्त अपारा ॥
केवट बुध विद्या बड़ि नावा । सकहिँ न खेइ ऐक नहिँ आवा ॥
वनचर कोल किरात विचारे । थके विलोकि पथिक हियँ हारे ॥
आश्रम उदधि मिली जब जाइ । मनहुँ उठै अबुधि अकुलाइ ॥

सोक विकल दोउ राज समाजा । रहा न ग्यानु न धीरजु लाजा ॥

भूप रूप गुन सील सराही । रोवहिं सोक सिंधु अवगाही ॥

छं०—अवगाहि सोक समुद्र सोचहिं नारि नर व्याकुल महा ।

दै दोष सकल सरोष बोलहिं बामबिधि कीन्हो कहा ॥

सुर सिद्ध तापस जोगिजन मुनि देखि दसा बिदेह की ।

तुलसी न समरथु कोउ जो तरि सकै सरित सनेह की ॥

सो०—किण अमित उपदेस जहँ तहँ लोगन्ह मुनिबरन्ह ।

धीरजु धरिअ नरेस कहेउ बसिष्ठ बिदेह सन ॥२७६॥

जासु ग्यानु रवि भवनिसि नासा । बचन किरन मुनि कमल विकासा

तेहि कि मोह ममता निअराई । यह सिय राम सनेह बड़ाई ॥

बिपई साधक सिद्ध स्याने । त्रिविध जीव जग वेद बखाने ॥

राम सनेह सरस मन जासू । साधु सभाँ बड़ आदर तासू ॥

सोह न राम पेम बिनु ग्यानू । करनधार बिनु जिमि जलजानू ॥

मुनि बहुबिधि बिदेहु समुझाए । राम घाट सब लोग नहाए ॥

सकल सोक संकुल नर नारी । सो वासरु बीतेउ बिनु बारी ॥

पसु खग मृगन्ह न कीन्ह अहारू । प्रिय परिजन कर कौन बिचारू

दो०—दोउ समाज निमिराजु रघुराजु नहाने प्रात ।

बैठे सब बट बिटप तर मन मलीन कृस गात ॥२७७॥

CC-0. Mumukshu Bhawan Varanasi Collection. Digitized by eGangotri

जे महिपुर दसरथ पुर बासी । जे मिथिलापति नगर निवासी ॥

हंस बंस गुर जनक पुरोध । जिन्ह जग मगु परमारथु सोधा ॥

लगे कहन उपदेस अनेका । सहित धरम नय बिरति विवेका ॥
 कौसिक कहि कहि कथा पुरानी । समुझाई सब सभा सुवानी ॥
 तब रघुनाथ कौसिकहि कहेऊ । नाथ कालि जल बिनु सबु रहेऊ ॥
 मुनि कह उचित कहत रघुराई । गयउ वीति दिन पहर अढ़ाई ॥
 रिषि रुख लखि कह तेरहुतिराजू । इहाँ उचित नहिँ असन अनाजू ॥
 कहा भूप भल सबहि सोहाना । पाइ रजायसु चले नहाना ॥
 दो०—तेहि अवसर फल फूल दल मूल अनेक प्रकार ।

लइ आए बनचर बिपुल भरि भरि काँवरि भार ॥२७८॥
 कामद भे गिरि राम प्रसादा । अवलोकत अपहरत विषादा ॥
 सर सरिता वन भूमि विभागा । जनु उमगत आनँद अनुरागा ॥
 बेलि बिटप सब सफल सफूला । बोलत खग मृग अलि अनुकूला ॥
 तेहि अवसर बन अधिक उछाहू । त्रिविध समीर सुखद सब काहू ॥
 जाइ न बरनि मनोहरताई । जनु महि करति जनक पहुनाई ॥
 तब सब लोग नहाइ नहाई । राम जनक मुनि आयसु पाई ॥
 देखि देखि तरुवर अनुरागे । जइँ तहँ पुरजन उतरन लागे ॥
 दल फल मूल कंद विधि नाना । पावन सुंदर सुधा समाना ॥
 दो०—सादर सब कहँ रामगुर पठए भरि भरि भार ।

पूजि पितर सुर अतिथि गुर लगे करन फरहार ॥२७९॥

एहि विधि वासर बीते चारी । रामु निरखि नर नारि सुखारी ॥
 दुहु समाज असि रुचि मन माहीं । बिनु सिय राम फिरव भल नाहीं ॥

सीता राम संग बनवासू। कोटि अमरपुर सरिस सुपासू॥
 परिहरि लखन रामु वैदेही। जेहि घर भाव वाम विधि तेही ॥
 दाहिन दइउ होइ जब सबही। राम समीप वसिअ बन तवही ॥
 मंदाकिनि मजनु तिहु काल। राम दरसु मुद मंगल माला ॥
 अटनु राम गिरि बन तापस थल। असनु अमिअ सम कंद मूल फल
 सुख समेत संवत दुइ साता। पल सम होहि न जनिअहि जाता
 दो०—एहि सुख जोग न लोग सब कहहि कहाँ अस भागु।

सहज सुभायँ समाज दुहु राम चरन अनुरागु ॥२८०॥
 एहि विधि सकल मनोरथ करहीं। बचन सप्रेम सुनत मन हरहीं ॥
 सीय मातु तेहि समय पठाई। दासी देखि सुअवसर आई ॥
 सावकास सुनि सब सिय सासू। आयउ जनकराज रनिवासू ॥
 कौसल्याँ सादर सनमानी। आसन दिए समय सम आनी ॥
 सीलु सनेहु सकल दुहु ओरा। द्रवहि देखि सुनि कुलिस कठोरा ॥
 पुलक सिथिल तन बारि विलोचन। महि नख लिखन लगीं सब सोचन
 सब सिय राम प्रीति कि सि मूरति। जनु करुना बहु वेष बिसूरति ॥
 सीय मातु कह विधि बुधि बाँकी। जो पय फेनु फोर पवि टाँकी ॥
 दो०—सुनिअ सुधा देखिअहि गरल सब करतूति कराल ।

जहँ तहँ काक उलूक बक मानस सकृत् मराल ॥२८१॥

सुनि लखन दइ देखि सुनि विधि मति अडि विपरीति विधि न
 जो सजि पालइ हरइ बहोरी। बाल केलि सम विधि मति भोरी ॥

कौसल्या कह दोसु न काहू । करम विवस दुख सुख छति लाहू ॥
 कठिन करम गति जान विधाता । जो सुम असुम सकल फल दाता
 ईस रजाइ सीस सबही कै । उतपति थितिलय विप्रहु अमी कै ॥
 देवि मोह बस सोचिअ बादी । विधि प्रपंचु अस अचल अनादी ॥
 भूपति जिअव मरव उर आनी । सोचिअ सखि लखि निज हित हानी
 सीय मातु कह सत्य सुवानी । सुकृती अवधि अवधपति रानी ॥
 दो०—लखनु रासु सिय जाहुँ बन भल परिनाम न पोचु ।

गहवरि हियँ कह कौसिला मोहि भरत कर सोचु ॥२८२॥
 ईस प्रसाद असीस तुम्हारी । सुत सुतवधू देवसरि बारी ॥
 राम सपथ मैं कीन्हि न काऊ । सो करि कहउँ सखी सति भाऊ ॥
 भरत सील गुन विनय बड़ाई । मायप भगति भरोस भलाई ॥
 कहत सारदहु कर मति हीचे । सागर सीप कि जाहिँ उलीचे ॥
 जानउँ सदा भरत कुलदीपा । बार बार मोहि कहेउ महीपा ॥
 कसैं कनकु मनि पारिखि पाएँ । पुरुष परिखिअहिँ समयँ सुभाएँ ॥
 अनुचित आजु कहव अस मोरा । सोक सनेहँ सयानप थोरा ॥
 सुनि सुरसरि सम पावनि बानी । भई सनेह विकल सब रानी ॥
 दो०—कौसल्या कह धीर धरि सुनहु देवि मिथिलेसि ।

को बिबेकनिधि बल्लभहि तुम्हहि सकइ उपदेसि ॥२८३॥

रानि राय सन अवसरु पाई । अपनी भाँति कहव समुझाई ॥
 रखिअहिँ लखनु भरतु गवनहि बन । जो यह मत माने महीप मन ॥

तौ भल जतनु करब सुबिचारी । मोरें सोचु भरत कर भारी ॥
गूढ़ सनेह भरत मन माहीं । रहें नीक मोहि लागत नाहीं ॥
लखि सुभाउ सुनि सरल सुवानी । सब भइ मगन करुन रस रानी ॥
नभ प्रसून झरि धन्य धन्य धुनि । सिथिल सनेहैं सिद्ध जोगी मुनि ॥
सबु रनिवासु बिथकि लखि रहेऊ । तब धरि धीर सुमित्राँ कहेऊ ॥
देवि दंड जुग जामिनि वीती । राम मातु सुनि उठी सप्रीती ॥
दो०—बेगि पाउ धारिअ थलहि कह सनेहैं सतिभाय ।

हमरें तौ अब ईस गति कै मिथिलेस सहाय ॥२८४॥

लखि सनेह सुनि बचन विनीता । जनक प्रिया गह पाय पुनीता ॥
देवि उचित असि विनय तुम्हारी । दसरथ घरिनि राम महतारी ॥
प्रभु अपने नीचहु आदरहीं । अगिनि धूम गिरि सिर तिनु धरहीं ॥
सेवकु राउ करम मन बानी । सदा सहाय महेसु भवानी ॥
रउरे अंग जोगु जग को है । दीप सहाय कि दिनकर सोहै ॥
रामु जाइ बनु करि सुर काजू । अचल अवधपुर करिहहिं राजू ॥
अमर नाग नर राम बाहुवल । सुख बसिहहिं अपने अपने थल ॥
यह सब जागबलिक कहि राखा । देवि न होइ मुधा मुनि भाषा ॥
दो०—अस कहि पग परि पेम अति सिय हित विनय सुनाइ ।

सिय समेत सियमातु तब चली सुआयसु पाइ ॥२८५॥

तापस बेध जानकी देखी । भा सबु बिकल बिषाद बिसेषी ॥

जनक राम गुर आयसु पाई । चले थलहि सिय देखी आई ॥
 लीन्हि लाइ उर जनक जानकी । पाहुनि पावन पेम प्रान की ॥
 उर उमगेउ अंबुधि अनुरागू । भयउ भूप मनु मनहुँ पयागू ॥
 सिय सनेह बटु बाढ़त जोहा । ता पर राम पेम सिसु सोहा ॥
 चिरजीवी मुनि ग्यान बिकल जनु । बूढ़त लहेउ बाल अवलंबनु ॥
 मोह मगन मति नहिं विदेह की । महिमा सिय रघुवर सनेह की ॥
 दो०—सिय पितु मातु सनेह बस बिकल न सकी सँभारि ।

धरनिसुताँ धीरजु धरेउ समउ सुधरसु बिचारि ॥२८६॥
 तापस वेष जनक सिय देखी । भयउ पेमु परितोषु विसेषी ॥
 पुत्रि पवित्र किए कुल दोऊ । सुजस धवल जगु कह सबु कोऊ
 जिति सुरसरि कीरति सरि तोरी । गवनु कीन्ह बिधि अंड करोरी ॥
 गंग अवनि थल तीनि बड़ेरे । एहिं किए साधु समाज घनेरे ॥
 पितु कह सत्य सनेहँ सुबानी । सीय सकुच महुँ मनहुँ समानी ॥
 पुनि पितु मातु लीन्हि उर लाई । सिख आसिष हित दीन्हि सुहाई ॥
 कहति न सीय सकुचि मन माहीं । इहाँ बसव रजनीं भल नाहीं ॥
 लखि रुख रानि जनायउ राऊ । हृदयँ सराहत सीलु सुभाऊ ॥
 दो०—बार बार मिलि भेंटि सिय बिदा कीन्हि सनमानि ।

कही समय सिर भरत गति रानि सुबानि सयानि ॥२८७॥
 सुनि भूपाल भरत व्यवहारू । सोन सुगंध सुधा ससि सारू ॥
 मूदे सजल नयन पुलकै सन । सुजसु सराइन ली मुदित मन ॥

सावधान सुनु सुमुखि सुलोचनि । भरत कथा भव बंध विमोचनि ॥
 धरम राजनय ब्रह्मविचारू । इहाँ जथामति मोर प्रचारू ॥
 सो मति मोरि भरत महिमाही । कहै काह छलि छुअति न छाँही ॥
 विधि गनपति अहिपति सिव सारद । कवि कोविद बुध बुद्धि विसारद
 भरत चरित कीरति करतूती । धरम सील गुन विमल विभूती ॥
 समुझत सुनत सुखद सब काहू । सुचि सुरसरि रुचि निदर सुधाहू
 दो०—निरवधि गुन निरूपम पुरुष भरतु भरत सम जानि ।

कहिअ सुमेरुकि सेर सम कबिकुल मति सकुचानि ॥२८८॥

अगम सबहि बरनत बरवरनी । जिमि जलहीन मीन गमु धरनी ॥
 भरत अमित महिमा सुनु रानी । जानहिं रामु न सकहिं बखानी ॥
 बरनि सप्रेम भरत अनुभाऊ । तिय जिय की रुचि लखि कह राजू
 बहुरहिं लखनु भरतु बन जाहीं । सब कर भल सब के मन माहीं ॥
 देवि परंतु भरत रघुवर की । प्रीति प्रतीति जाइ नहिं तरकी ॥
 भरतु अवधि सनेह ममता की । जद्यपि रामु सीम समता की ॥
 परमारथ स्वारथ सुख सारे । भरत न सपनेहुँ मनहुँ निहारे ॥
 साधन सिद्धि राम पग नेहू । मोहिलखि परत भरत मत एहू ॥
 दो०—भोरेहुँ भरत न पेलिहहिं मनसहुँ राम रजाइ ।

करिअ न सोचु सनेह बस कहेउ भूप बिलखाइ ॥२८९॥

राम भरत गुन गनत समीची । निमि दंपतिहि प्रलक सम वीची ॥

राज समाज प्रात जुग जागे । न्हाइ न्हाइ सुर पूजन लागे ॥

गे नहाइ गुर पहिं रघुराई। वंदि चरन बोले रुख पाई॥
 नाथ भरतु पुरजन महतारी। सोक विकल बनवास दुखारी॥
 सहित समाज राउ मिथिलेसू। बहुत दिवस भए सहत कलेसू॥
 उचित होइ सोइ कीजिअ नाथा। हित सबही कर रौरैं हाथा॥
 अस कहि अति सकुचे रघुराऊ। मुनि पुलके लखि सील सुभाऊ॥
 तुम्ह बिनु राम सकल सुख साजा। नरक सरिस दुहु राज समाजा॥
 दो०—श्रान प्राण के जीव के जिव सुख के सुख राम।

तुम्ह तजि तात सोहात गृह जिन्हहि तिन्हहि बिधि बाम॥२९०॥

जो सुखु करमु धरमु जरि जाऊ। जहँ न राम पद पंकज भाऊ॥

जोगु कुजोगु ग्यानु अग्यानु। जहँ नहिं राम पेस परधानू॥

तुम्ह बिनु दुखी सुखी तुम्ह तेहीं। तुम्ह जानहु जिय जो जेहि केहीं॥

राउर आयसु सिर सबही कैं। विदित कृपालहि गति सब नीकैं॥

आपु आश्रमहि धारिअ पाऊ। भयउ सनेह सिथिल मुनिराऊ॥

करि प्रनामु तब रामु सिधाए। रिषि धरि धीर जनक पहिं आए॥

राम बचन गुरु नृपहि सुनाए। सील सनेह सुभायँ सुहाए॥

महाराज अब कीजिअ सोई। सब कर धरम सहित हित होई॥

दो०—न्यान निधान सुजान सुचि धरम धीर नरपाल।

तुम्ह बिनु असमंजस समन को समरथ एहि काल॥२९१॥

मुनि मुनि बचन जनक अनुरागे। लखि गति ग्यानु विरागु विरागे॥

सिथिल सनेहँ गुनत मन मोहीं। आए इहाँ कीन्ह भल नहीं॥

रामहि रायँ कहेउ बन जाना । कीन्ह आपु प्रिय प्रेम प्रवाना ॥
 हम अब बन तैं बनहि पठाई । प्रमुदित फिरव बिबेक बड़ाई ॥
 तापस मुनि महिसुर मुनि देखी । भए प्रेम बस बिकल बिसेषी ॥
 समउ समुझि धरि धीरजु राजा । चले भरत पहिँ सहित समाजा ॥
 भरत आइ आगें भइ लीन्है । अवसर सरिस सुआसन दीन्है ॥
 तात भरत कह तेरहुति राज । तुम्हहि विदित रघुवीर सुभाऊ ॥
 दो०—राम सत्यव्रत धरम रत सब कर सीलु सनेहु ।

संकट सहत सकोच बस कहिअ जो आयसु देहु ॥२९२॥

मुनि तन पुलकि नयन भरि वारी । बोले भरतु धीर धरि भारी ॥
 प्रभु प्रिय पूज्य पिता सम आपू । कुलगुरु समहित माय न बापू ॥
 कौसिकादि मुनि सचिव समाजू । ग्यान अंबुनिधि आपुनु आजू ॥
 सिसु सेवकु आयसु अनुगामी । जानि मोहि सिख देइअ स्वामी ॥
 एहिँ समाज थल बूझव राउर । मौन मलिन मैं बोलव बाउर ॥
 छोटे बदन कहउँ बड़ि बाता । छमव तात लखि वामविधाता ॥
 आगम निगम प्रसिद्ध पुराना । सेवाधरमु कठिन जगु जाना ॥
 स्वामि धरम स्वारथहि विरोधू । बैरु अंध प्रेमहि न प्रबोधू ॥
 दो०—राखि राम रुख धरमु ब्रतु पराधीन मोहि जानि ।

सब कें संमत सर्व हित करिअ पेशु पहिचानि ॥२९३॥

मण्डल अचरित सुनि देखि सुभाऊ । सहित समाज ससह्य लख ॥
 सुगम अगम मृदु मंजु कठोरे । अरथु अमित अति आखर थोरे ॥

ज्यों मुख मुकुर मुकुर निज पानी । गहि न जाइ अस अदभुत बानी
 भूप भरतु मुनि सहित समाजू । गे जहँ विबुध कुमुद द्विजराजू ॥
 सुनि सुधि सोच बिकल सब लोगा । मनहुँ मीनगन नव जल जोगा ॥
 देवँ प्रथम कुलगुर गति देखी । निरखि बिदेह सनेह बिसेषी ॥
 राम भगतिमय भरतु निहारे । सुर स्वारथी हहरि हियँ हारे ॥
 सत्र कोउ राम पेममय पेखा । भए अलेख सोच बस लेखा ॥
 दो०—सु सनेह सकोच बस कह ससोच सुरराजु ।

रचहु प्रपंचहि पंच मिलि नाहिं त भयउ अकाजु ॥२९४॥

कीन्ह सुमिरि सारदा सराही । देवि देव सरनागत पाही ॥
 भेरि भरत मति करि निज माया । पालु विबुध कुल करि छल छाया
 विबुध विनय सुनि देवि सयानी । बोली सुर स्वारथ जड़ जानी ॥
 मो सन कहहु भरत मति फेरू । लोचन सहस न सूझ सुमेरू ॥
 बिधि हरि हर माया बड़ि भारी । सोउ न भरत मति सकइ निहारी ॥
 सो मति मोहि कहत करु भोरी । चंदिनि कर कि चंडकर चोरी ॥
 भरत हृदयँ सिय राम निवासू । तहँ कि तिमिर जहँ तरनि प्रकासू ॥
 अस कहि सारद गइ बिधि लोका । विबुध बिकल निसि मानहुँ कोका
 दो०—सुर स्वारथी मलीन मन कीन्ह कुमंत्र कुठाडु ।

रचि प्रपंच माया प्रबल भय भ्रम भरति उचाडु ॥२९५॥

करि कुचालि सोचत सुरराजु । भरत हाथ सब काजु अकाजु ॥
 गए जनकु रघुनाथ समीपा । सनमाने सब रविकुल दीपा ॥

देखेउँ पाय सुमंगल मूला । जानेउँ स्वामि सहज अनुकूल ॥
 बड़ैं समाज बिलोकेउँ भागू । वड़ीं चूक साहिव अनुरागू ॥
 कृपा अनुग्रहु अंगु अघाई । कीन्हि कृपानिधि सब अधिकारि ॥
 राखा मोर दुलार गोसाई । अपनें सील सुभायँ भलाई ॥
 नाथ निपट मैं कीन्हि ढिठाई । स्वामि समाज सकोच बिहाई ॥
 अविनय विनय जथारुचि बानी । छमिहि देउ अति आरति ज्ञानी ॥
 दो०—सुहृद सुजान सुसाहिबहि बहुत कहब बड़ि खोरि ।

आयसु देइअ देव अब सबइ सुधारी मोरि ॥३००॥

प्रभु पद पदुम पराग दोहाई । सत्य सुकृत सुख सीवँ सुहाई ॥
 सो करि कहउँ हिए अपने की । रुचि जागत सोवत सपने की ॥
 सहज सनेहँ स्वामि सेवकाई । स्वारथ छल फल चारि बिहाई ॥
 अग्या सम न सुसाहिब सेवा । सो प्रसादु जन पावै देवा ॥
 अस कहि प्रेम विवस भए भारी । पुलक सरीर बिलोचन बारी ॥
 प्रभु पद कमल गहे अकुलाई । समउ सनेहु न सो कहि जाई ॥
 कृपासिंधु सनमानि सुबानी । बैठाए समीप गहि पानी ॥
 भरत विनय मुनि देखि सुभाऊ । सिथिल सनेहँ सभा रघुराऊ ॥
 छं०—रघुराउ सिथिल सनेहँ साधु समाज मुनि मिथिला धनी ।

मन महुँ सराहत भरत भायप भगति की महिमा धनी ॥

भरतहि प्रसंसत विबुध बरषत सुमन मानस मलिन से ।

तुलसी बिकल सब लोग मुनि सकुचे निसागम नलिन से ॥

सो०—देखि दुखारी दीन दुहु समाज नर नारि सब ।

मघवा महा मलीन मुणु मारि मंगल चहत ॥३०१॥

कपट कुचालि सीवँ सुरराजू। पर अकाज प्रिय आपन काजू॥
काक समान पाकरिपु रीती। छली मलीन कतहुँ न प्रतीती॥
प्रथम कुमत करि कपटु सँकेला। सो उचाटु सब कै सिर मेला॥
सुरमायँ सब लोग विमोहे। राम प्रेम अतिसय न बिछोहे॥
भय उचाट बस मन थिर नाहीं। छन बन रुचि छन सदन सोहाहीं॥
दुविध मनोगति प्रजा दुखारी। सरित सिंधु संगम जनु बारी॥
दुचित कतहुँ परितोषु न लहहीं। एक एक सन मरमु न कहहीं॥
लखि हियँ हँसि कह कृपानिधानू। सरिस स्वान मघवान जुवानू॥
दो०—भरतु जनकु मुनिजन सचिव साधु सचेत बिहाइ ।

लागि देवमाया सबहि जथाजोगु जनु पाइ ॥३०२॥

कृपासिंधु लखि लोग दुखारे। निज सनेहँ सुरपति छल भारे॥
सभा राउ गुर महिसुर मंत्री। भरत भगति सब कै मति जंत्री॥
रामहि चितवत चित्र लिखे से। सकुचत बोलत वचन सिखे से॥
भरत प्रीति नति विनय बड़ाई। सुनत सुखद वरनत कठिनाई॥
जासु बिलोकि भगति लवलेसू। प्रेम मगन मुनिगन मिथिलेसू॥
महिमा तासु कहै किमि तुलसी। भगति सुभायँ सुमति हियँ हुलसी॥
आपु छोटे महिमा नहि जानी। कविबुल कामि मानि सकुचीनी॥
कहि न सकति गुन रुचि अधिकाई। मति गति बालवचन की नाई॥

दो०—भरत बिमल जसु बिमल बिधु सुमति चकोरकुमारि ।

उदित बिमल जन हृदय नभ एकटक रही निहारि ॥ ३०३ ॥

भरत सुभाउ न सुगम निगमहूँ । लघुमति चापलता कबि छमहूँ ॥
 कहत सुनत सति भाउ भरत को । सीय राम पद होइ न रत को ॥
 सुमिरत भरतहि प्रेमु राम को । जेहि न सुलभु तेहि सरिस वामको
 देखि दयाल दसा सबही की । राम सुजान जानि जन जी की ॥
 धरम धुरीन धीर नय नागर । सत्य सनेह सील सुख सागर ॥
 देसु कालु लखि समउ समाजू । नीति प्रीति पालक रघुराजू ॥
 बोले बचन बानि सरबसु से । हित परिनाम सुनत ससि रसु से ॥
 तात भरत तुम्ह धरम धुरीना । लोक वेद विद प्रेम प्रवीना ॥

दो०—करम बचन मानस बिमल तुम्ह समान तुम्ह तात ।

गुर समाज लघु बंधु गुन कुसमयँ किमि कहि जात ॥ ३०४ ॥

जानहु तात तरनि कुल रीती । सत्यसंध पितु कीरति प्रीती ॥
 समउ समाजु लाज गुरजन की । उदासीन हित अनहित मन की ॥
 तुम्हहि विदित सबही कर करमू । आपन मोर परम हित धरमू ॥
 मोहि सब भाँति भरोस तुम्हारा । तदपि कहउँ अवसर अनुसार ॥
 तात तात बिनु घात हमारी । केवल गुरकुल कृपाँ सँभारी ॥
 नतरु प्रजा परिजन परिवारु । हमहि सहित सबु होत खुआरु ॥
 जौ बिनु आबसर अथवँ दिनेसु । जस केहि कहहु न होइ कबेसु ॥
 तस उतपात तात विधि कीन्हा । मुनि मिथिलेस राखि सबु लीन्हा ॥

दो०—राज काज सब लाज पति धरम धरनि धन धाम ।

गुर प्रभाउ पालिहि सबहि भल होइहि परिनाम ॥३०५॥

सहित समाज तुम्हार हमारा । घर बन गुर प्रसाद रखवारा ॥
मातु पिता गुर स्वामि निदेसू । सकल धरम धरनीधर सेसू ॥
सो तुम्ह करहु करावहु मोहू । तात तरनिकुल पालक होहू ॥
साधक एक सकल सिधि देनी । कीरति सुगति भूतिमय वेनी ॥
सो बिचारि सहि संकट भारी । करहु प्रजा परिवार सुखारी ॥
बाँटी बिपति सबहि मोहि भाई । तुम्हहि अवधि भरि बड़ि कठिनाई
जानि तुम्हहि मृदु कहउँ कठोरा । कुसमयँ तात न अनुचित मोरा ॥
होहि कुठायँ सुबंधु सहाए । ओड़िअहि हाथ असनिहु के घाए ॥
दो०—सेवक कर पद नयन से मुख सो साहिबु होइ ।

तुलसी प्रीति किरीति सुनि सुकवि सराहहि सोइ ॥३०६॥

सभा सकल सुनि रघुवर बानी । प्रेम पयोधि अमिअँ जनु सानी ॥
सिथिल समाज सनेह समाधी । देखि दसा चुप सारद साधी ॥
भरतहि भयउ परम संतोषू । सनमुख स्वामि विमुख दुख दोषू
मुख प्रसन्न मन मिटा बिषादू । भा जनु गूँगेहि गिरा प्रसादू ॥
कौन्ह सप्रेम प्रनामु बहोरी । बोले पानि पंकरुह जोरी ॥
नाथ भयउ सुखु साथ गए को । लहेउँ लाहु जग जनमु भए को ॥
अब कृपाल जस आयसु होई । करौ सीम धरि सादर सोई ॥
सो अवलंब देव मोहि देई । अवधि पारु पावौं जेहि सेई ॥

दो०—देव देव अभिषेक हित गुर अनुसासनु पाइ ।

आनेउँ सब तीरथ सलिलु तेहि कहँ काह रजाइ ॥३०७॥

एकु मनोरथु बड़ मन माहीं । सभयँ सकोच जात कहि नाहीं ॥
 कहहु तात प्रभु आयसु पाई । बोले बानि सनेह सुहाई ॥
 चित्रकूट सुचि थल तीरथ बन । खग मृग सर सरि निर्झर गिरिगन
 प्रभु पद अंकित अवनि विसेषी । आयसु होइ त आवौ देखी ॥
 अवसि अत्रि आयसु सिर धरहू । तात विगतभय कानन चरहू ॥
 मुनि प्रसाद घनु मंगल दाता । पावन परम सुहावन भ्राता ॥
 रिषिनायकु जहँ आयसु देहीं । राखेहु तीरथ जलु थल तेहीं ॥
 मुनि प्रभु बचन भरत सुखु पावा । मुनि पद कमल मुदित सिर नावा
 दो०—भरत राम संबादु सुनि सकल सुमंगल मूल ।

सुर स्वारथी सराहि कुल बरषत सुरतरु फूल ॥३०८॥

धन्य भरत जय राम गोसाई । कहत देव हरषत बरिआई ॥
 मुनि मिथिलेस सभाँ सब काहू । भरत बचन सुनि भयउ उछाहू ॥
 भरत राम गुन ग्राम सनेहू । पुलकि प्रसंसत राउ विदेहू ॥
 सेवक स्वामि सुभाउ सुहावन । नेमु पेमु अति पावन पावन ॥
 मति अनुसार सराहन लागे । सचिव सभासद सब अनुरागे ॥
 सुनि सुनि राम भरत संबादू । दुहु समाज हियँ हरषु बिषादू ॥
 राम मातु दुख सुख सम जानी । कहि गुन राम प्रबोधी रानी ॥
 एक कहहि रघुवीर बड़ाई । एक सराहत भरत भलाई ॥

दो०—अत्रि कहेउ तब भरत सन सैल समीप सुकूप ।

राखिअ तीरथ तोय तहँ पावन अमिअ अनूप ॥३०९॥
भरत अत्रि अनुसासन पाई । जल भाजन सबदिऐ चलाई ॥
सानुज आपु अत्रि मुनि साधू । सहित गए जहँ कूप अगाधू ॥
पावन पाथ पुन्यथल राखा । प्रमुदित प्रेम अत्रि असभाषा ॥
तांत अनादि सिद्ध थल एहू । लोपेउ काल विदित नहिं केहू ॥
तब सेवकन्ह सरस थल देखा । कीन्ह सुजल हित कूप विसेषा ॥
विधि बस भयउ बिस्व उपकारू । सुगम अगम अति धरम बिचारू ॥
भरतकूप अब कहिहहिं लोगा । अतिपावन तीरथ जल जोगा ॥
प्रेम सनेम निमज्जत प्राणी । होइहहिं विमल करम मन बानी ॥

दो०—कहत कूप महिमा सकल गए जहाँ रघुराउ ।

अत्रि सुनायउ रघुबरहि तीरथ पुन्य प्रभाउ ॥३१०॥
कहत धरम इतिहास सप्रीती । भयउ भोरु निसि सो सुख बीती ॥
नित्य निवाहि भरत दोउ भाई । राम अत्रि गुर आयसु पाई ॥
सहित समाज साज सब सादें । चले राम बन अटन पयादें ॥
कोमल चरन चलत बिनु पनहीं । भइ मृदु भूमि सकुचि मन मनहीं ॥
कुस कंटक काँकरीं कुराई । कटुक कठोर कुबस्तु दुराई ॥
महि मंजुल मृदु मारग कीन्हे । बहत समीर त्रिविध सुख लीन्हे ॥
सुगन्ध वरधि सुगन्धन कबिआई । मिठ भूति कलि सुन मृदुताही ॥
मृग बिलोकि खग बोलि सुबानी । सेवहिं सकल राम प्रिय जानी ॥

दो०—सुलभ सिद्धि सब प्राकृतहु राम कहत जमुहात ।

राम प्रानप्रिय भरत कहूँ यह न होइ बड़ि बात ॥३११॥

एहि बिधि भरतु फिरत बन माहीं । नेमु प्रेमलखि मुनि सकुचार्हीं ॥
पुन्य जलश्रय भूमि विभागा । खग मृग तरु तृन गिरि बन बागा
चारु बिचित्र पवित्र विसेषी । बूझत भरतु दिव्य सब देखी ॥
सुनि मन मुदित कहत रिषिराऊ । हेतु नाम गुन पुन्य प्रभाऊ ॥
कतहुँ निमज्जन कतहुँ प्रनामा । कतहुँ बिलोकत मन अभिरामा ॥
कतहुँ बैठि मुनि आयसु पाई । सुमिरत सीय सहित दोउ भाई ॥
देखि सुभाउ सनेहु सुसेवा । देहिं असीस मुदित बनदेवा ॥
फिरहिं गएँ दिनु पहर अढ़ाई । प्रभु पद कमल बिलोकहिं आई ॥

दो०—देखे थल तीरथ सकल भरत पाँच दिन माझ ।

कहत सुनत हरि हर सुजसु गयउ दिवसु भइ साँझ ॥३१२॥

भोर न्हाइ सबु जुरा समाजू । भरत भूमिसुर तेरहुति राजू ॥
भल दिन आजु जानि मन माहीं । राम कृपाल कहत सकुचार्हीं ॥
गुर नृप भरत सभा अवलोकी । सकुचि राम फिरि अवनि बिलोकी
सील सराहि सभा सब सोची । कहूँ न राम सम स्वामि सँकोची ॥
भरत सुजान राम रुख देखी । उठि सप्रेम धरि धीर बिसेषी ॥
करि दंडवत कहत कर जोरी । राखीं नाथ सकल रुचि मोरी ॥
मोहि लगी सहेउ सबहिं संताप । बहुत भँति दुख पाव आपू ॥
अब गोसाँई मोहि देउ रजाई । सेवौ अवध अवधि भरि जाई ॥

दो०—जेहिं उपाय पुनि पाय जनु देखै दीनदयाल ।

सो सिख देखै अवधि लागि कोसलपाल कृपाल ॥ ३१३ ॥

पुरजन परिजन प्रजा गोसाईं । सब सुचि सरस सनेहँ सगाईं ॥
 राउर बदिं भल भव दुख दाहू । प्रभु बिनु वादि परम पद लाहू ॥
 स्वामि सुजानु जानि सब ही की । रुचि लालसा रहनि जनजी की ॥
 प्रनतपाल पालिहि सब काहू । देउ दुहू दिसि ओर निबाहू ॥
 अस मोहि सब विधि भूरि भरोसो । किँए बिचारु न सोचु खरो सो ॥
 आरति मोर नाथ कर छोहू । दुहुँ मिलि कीन्ह ढीठु हठि मोहू ॥
 यह बड़ दोषु दूरि करि स्वामी । तजि सकोच सिखइअ अनुगामी
 भरत विनय सुनि सबहिं प्रसंसी । खीर नीर बिबरन गति हंसी ॥

दो०—दीनबन्धु सुनि बन्धु के बचन दीन छलहीन ।

देस काल अवसर सरिस बोले रामु प्रवीन ॥ ३१४ ॥

तात तुम्हारि मोरि परिजन की । चिंता गुरहि नृपहि घर बन की ॥
 माथे पर गुर मुनि मिथिलेसू । हमहि तुम्हहि सपनेहुँ न कलेसू ॥
 मोर तुम्हार परम पुरुषारथु । स्वारथु सुजसु धरमु परमारथु ॥
 पितु आयसु पालिहिं दुहु भाई । लोक बेद भल भूप भलाई ॥
 गुरपितु मातु स्वामि सिख पालें । चलेहुँ कुमग पगपरहिं न खालें ॥
 अस बिचारि सब सोच बिहाई । पालहु अवध अवधि भरिजाई ॥
 देसु कोसु परिजन परिवारु । गुरपद रजहिं लाग छरुमारु ॥
 तुम्ह मुनि मातु सचिव सिख मानी । पालेहु पुहुमि प्रजा रजधानी ॥

दो०—भरत मातु पद बंदि प्रभु सुचि सनेहँ मिलि भेंटि ।

बिदा कीन्ह सजि पालकी सकुच सोच सब मेदि ॥३१९॥

परिजन मातु पितहि मिलि सीता । फिरी प्रानप्रिय प्रेम पुनीता ॥

करि प्रनामु भेंटिं सब सासू । प्रीति कहत कवि हियँ न हुलासू ॥

मुनि सिख अभिमत आसिष पाई । रही सीय दुहु प्रीति समाई ॥

खुपति पटु पालकीं मगाई । करि प्रबोधु सब मातु चढ़ाई ॥

बार बार हिलि मिलि दुहु भाई । सम सनेहँ जननी पहुँचाई ॥

साजि वाजि गज बाहन नाना । भरत भूप दल कीन्ह पयाना ॥

हृदयँ रामु सिय लखन समेता । चले जाहिँ सब लोग अचेता ॥

बसह वाजि गज पसु हियँ हारें । चले जाहिँ परबस मन मारें ॥

दो०—गुर गुरतिय पद बंदि प्रभु सीता लखन समेत ।

फिरे हरष बिसमय सहित आए परन निकेत ॥३२०॥

बिदा कीन्ह सनमानि निषादू । चलेउ हृदयँ बड़ बिरह बिषादू ॥

कोल किरात भिल्ल बनचारी । फेरे फिरे जोहारि जोहारी ॥

प्रभु सिय लखन बैठि बट छाहीं । प्रिय परिजन वियोग बिलखाहीं ॥

भरत सनेह सुभाउ सुबानी । प्रिया अनुज सन कहत बखानी ॥

प्रीति प्रतीति बचन मन करनी । श्रीमुख राम प्रेम बस बरती ॥

तेहि अवसर खग मृग जल मीना । चित्रकूट चर अचर मलीना ॥

बिबुध बिलोकि दसा खबर की । वरषि सुमन कहि गति घर घर की

प्रभु प्रनामु करि दीन्ह भरोसो । चले मुदित मन डर न खरोसो ॥

दो०—सानुज सीय समेत प्रभु राजत परन कुटीर ।

भगति ग्यानु बैराम्य जनु सोहत धरें सरिर ॥३२१॥

मुनि महिसुर गुर भरत भुआलू । राम विरहँ सब साजु विहालू ॥
प्रभु गुन ग्राम गनत मन माहीं । सब चुपचाप चले मग जाहीं ॥
जमुना उतरि पार सबु भयऊ । सो बासरु बिनु भोजन गयऊ ॥
उतरि देवसरि दूसर बासू । रामसखाँ सब कीन्ह सुपासू ॥
सई उतरि गोमती नहाए । चौथें दिवस अवधपुर आए ॥
जनकु रहे पुर बासर चारी । राज काज सब साज सँभारी ॥
सौं पि सचिव गुर भरतहि राजू । तेरहुति चले साजि सबु साजू ॥
नगर नारि नर गुर सिख मानी । बसे सुखेन राम रजधानी ॥

दो०—राम दरस लागि लोग सब करत नेम उपवास ।

तजि तजि भूषन भोग सुख जिअत अवधि कीं आस ॥३२२॥

सचिव सुसेवक भरत प्रबोधे । निज निज काज पाइ सिख ओधे ॥
पुनि सिख दीन्हि बोलि लघु भाई । सौं पी सकल मातु सेवकाई ॥
भूसुर बोलि भरत कर जोरे । करि प्रनाम बय विनय निहोरे ॥
ऊँच नीच कारजु भल पोचू । आयसु देव न करब सँकोचू ॥
परिजन पुरजन प्रजा बोलाए । समाधानु करि सुबस बसाए ॥
सानुज गे गुर गेहँ बहोरी । करि दंडवत कहत कर जोरी ॥
आयसु होइ त रहैं सोना । बोले मुनि तन पुलकि सपमा ॥
समुझव कहव करब तुम्ह जोई । धरम सारु जग होइहि सोई ॥

दो०—सुनि सिख पाइ असीस बड़ि गनक बोलि दिनु साधि ।

सिंघासन प्रभु पादुका बैठारे निरूपाधि ॥३२३॥

राम मातु गुर पद सिरु नाई । प्रभु पद पीठ रजायसु पाई ॥

नंदिगावैं करि परन कुटीरा । कीन्ह निवासु धरम धुर धीरा ॥

जटाजूट सिर मुनिपट धारी । महि खनि कुस साँथरी सँवारी ॥

असन बसन वासन व्रत नेमा । करत कठिन रिषिधरम सप्रेमा ॥

भूषन बसन भोग सुख भूरी । मन तन बचन तजे तिन तूरी ॥

अवध राजु सुर राजु सिहाई । दसरथ धनु सुनि धनदु लजाई ॥

तेहिं पुर बसत भरत बिनु रागा । चंचरीक जिमि चंपक बागा ॥

रमा बिलासु राम अनुरागी । तजत वमन जिमि जन बड़भागी ॥

दो०—राम पेम भाजन भरतु बड़े न एहिं करतूति ।

चातक हंस सराहिअत टैंक बिबेक बिभूति ॥३२४॥

देह दिनहुँ दिन दूबरि होई । घटइ तेजु बलु मुखछबि सोई ॥

नित नव राम प्रेम पनु पीना । बढ़त धरम दलु मनु न मलीना ॥

जिमि जलु निघटत सरद प्रकासे । बिलसत बेतस वनज बिकासे ॥

सम दम संजम नियम उपासा । नखत भरत हिय विमल अकासा ॥

ध्रुव बिस्वासु अवधि राका सी । स्वामि सुरति सुरबीधि बिकासी ॥

राम पेम बिधु अचल अदोषा । सहित समाज सोह नित चोखा ॥

भरत रहनि समझनि करतूती । भगति विरति गुन विमल बिभूती ॥

बरनत सकल सुकवि सकुचाहीं । सेस गनेस गिरा गमु नाहीं ॥

दो०—नित पूजत प्रभु पाँवरी प्रीति न हृदयँ समाति ।

मागि मागि आयसु करत राज काज बहु भाँति ॥३२५॥
 पुलक गात हियँ सिय रघुवीरू । जीह नामु जप लोचन नीरू ॥
 लखन राम सिय कानन बसहीं । भरतु भवन बसितप तनु कसहीं ॥
 दोउ दिसि समुझि कहत सबु लोगू । सब विधि भरत सराहन जोगू ॥
 सुनि व्रत नेम साधु सकुचाहीं । देखि दसा मुनिराज लजाहीं ॥
 परम पुनीत भरत आचरनू । मधुर मंजु मुद मंगल करनू ॥
 हरन कठिन कलि कलुष कलेसू । महामोह निसि दलन दिनेसू ॥
 पाप पुंज कुंजर मृगराजू । समन सकल संताप समाजू ॥
 जन रंजन भंजन भव भारू । राम सनेह सुधाकर सारू ॥
 छं०—सिय राम प्रेम पियूष पूरन होत जनमु न भरत को ।
 सुनि मन अगम जम नियम सम दम बिषम व्रत आचरत को ।
 दुख दाह दारिद दंभ दूषन सुजस मिस अपहरत को ।
 कलिकाल तुलसी से सठन्हि हठि राम सनमुख करत को ॥
 सो०—भरत चरित करि नेमु तुलसी जो सादर सुनहिं ।

सीय राम पद पेसु अवसि होइ भव रस बिरति ॥३२६॥


मासपारायण, इक्कीसवाँ विश्राम

इति श्रीमद्रामचरितमानसे सकलकलिकलुषविध्वंसने

द्वितीयः सोपानः समाप्तः ।

(अयोध्याकाण्ड समाप्त)

सुतीक्ष्णजी रामके ध्यानमें



अतिसय प्रीति देखि रघुबीरा ।

प्रगटे हृदयँ हरन भव भीरा ॥

श्रीगणेशाय नमः

श्रीजानकीवल्लभो विजयते

श्रीरामचरितमानस

तृतीय सोपान

(अरण्यकाण्ड)

श्लोक

मूलं धर्मतरोर्विवेकजलधेः पूर्णेन्दुमानन्ददं
वैराग्याम्बुजभास्करं ह्यघघनध्वान्तापहं तापहम् ।
मोहाम्भोधरपूगपाटनविधौ स्वःसम्भवं शङ्करं
वन्दे ब्रह्माकुलं कलङ्कशमनं श्रीरामभूप्रियम् ॥ १ ॥
सान्द्रानन्दपयोदसौभगतनुं पीताम्बरं सुन्दरं
पाणौ बाणशरासनं कटिलसत्तूणीरभारं वरम् ।
राजीवायतलोचनं धृतजटाजूदेन संशोभितं
सीतालक्ष्मणसंयुतं पथिगतं रामाभिरामं भजे ॥ २ ॥

सो०—उमा राम गुन गूढ़ पंडित मुनि पावहिं बिरति ।

पावहिं मोह विमूढ़ जे हरि विमुख न धर्म रति ॥

पुर नर भरत प्रीति मैं गाई। मति अनुरूप अनूप सुहाई॥
अब प्रभु चरित सुनहु अति पावन । करत जे बन सुर नर मुनि भावन
एक बार चुनि कुसुम सुहाए। निज कर भूषन राम बनाए ॥
सीतहि पहिराए प्रभु सादर। बैठे फटिक सिला पर सुंदर ॥
सुरपति सुत धरि बायस बेधा। सठ चाहत रघुपति बल देखा ॥
जिमि पिपीलिका सागर थाहा। महा मंदमति पावन चाहा ॥
सीता चरन चोंच हति भागा। मूढ़ मंदमति कारन कागा ॥
चला रुधिर रघुनायक जाना। सीक धनुष सायक संधाना ॥

दो०—अति कृपाल रघुनायक सदा दीन पर नेह ।

ता सन आइ कीन्ह छलु मूरख अवगुन गेह ॥ १ ॥

प्रेरित मंत्र ब्रह्मसर धावा। चला भाजि बायस भय पावा ॥
धरि निज रूप गयउ पितु पाहीं। राम विमुख राखा तेहि नाहीं ॥
भा निरास उपजी मन त्रासा। जथा चक्र भय रिषि दुर्वासा
ब्रह्मधाम सिवपुर सब लोका। फिरा श्रमित व्याकुल भय सोका
काहूँ बैठन कहा न ओही। राखि को सकइ राम कर द्रोही ॥
मातु मृत्यु पितु समन समाना। सुधा होइ विष सुनु हरिजाना ॥
मित्र करइ सब रिपु कै कलजी। ता कहँ विनु धन दी बैस रानी ॥
सब जगु ताहि अनलहु ते ताता। जो रघुवीर विमुख सुनु भ्राता ॥

नारद देखा विकल जयंता । लागि दया कोमल चित संता ॥
 पठवा तुरत राम पहिं ताही । कहेसि पुकारि प्रनत हित पाही ॥
 आतुर सभय गहेसि पद जाई । त्राहि त्राहि दयाल रघुराई ॥
 अतुलित बल अतुलित प्रभुताई । मैँ मतिमंद जानि नहिं पाई ॥
 निज कृत कर्म जनित फल पायउँ । अब प्रभु पाहिसरन तकि आयउँ
 सुनि कृपाल अति आरत बानी । एकनयन करि तजा भवानी ॥
 सो०—कीन्ह मोह बस द्रोह जद्यपि तेहि कर बध उचित ।

प्रभु छाडेउ करि छोह को कृपाल रघुबीर सम ॥ २ ॥
 रघुपति चित्रकूट बसि नाना । चरित किए श्रुति सुधा समाना ॥
 बहुरि राम अस मन अनुमाना । होइहि भीर सबहिं मोहि जाना ॥
 सकल मुनिन्ह सन बिदा कराई । सीता सहित चले द्वौ भाई ॥
 अत्रि के आश्रम जब प्रभु गयऊ । सुनत महामुनि हरषित भयऊ ॥
 पुलकित गात अत्रि उठि धाए । देखि राम आतुर चलि आए ॥
 करत दंडवत मुनि उर लाए । प्रेम वारि द्वौ जन अन्हवाए ॥
 देखि राम छवि नयन जुड़ाने । सादर निज आश्रम तव आने ॥
 करि पूजा कहि बचन सुहाए । दिए मूल फल प्रभु मन भाए ॥
 सो०—प्रभु आसन आसीन भरि लोचन सौंभा निरखि ।

मुनिवर परम प्रवीन जोरि पानि अस्तुति करत ॥ ३ ॥

छं०—नमामि भक्त वत्सलं । कृपालु शील कोमलं ॥

भजामि ते पदांबुजं । अकामिनां स्वधामदं ॥

निकाम श्याम सुंदरं । भवाम्बुनाथ मंदरं ॥
 प्रफुल्ल कंज लोचनं । मदादि दोष मोचनं ॥
 प्रलंब बाहु विक्रमं । प्रभोऽप्रमेय वैभवं ॥
 निषंग चाप सायकं । धरं त्रिलोक नायकं ॥
 दिनेश वंश मंडनं । महेश चाप खंडनं ॥
 मुनींद्र संत रंजनं । सुरारि वृंद भंजनं ॥
 मनोज वैरि वंदितं । अजादि देव सेवितं ॥
 विशुद्ध बोध विग्रहं । समस्त दूषणापहं ॥
 नमामि इंदिरा पतिं । सुखाकरं सतां गतिं ॥
 भजे सशक्ति सानुजं । शची पति प्रियानुजं ॥
 त्वदंग्रि मूल ये नराः । भजंति हीन मत्सराः ॥
 पतंति नो भवार्णवे । वितर्क वीचि संकुले ॥
 विविक्त वासिनः सदा । भजंति मुक्तये मुदा ॥
 निरस्य इंद्रियादिकं । प्रयांति ते गतिं स्वकं ॥
 तमेकमद्भुतं प्रभुं । निरीहमीश्वरं विभुं ॥
 जगद्गुरुं च शाश्वतं । तुरीयमेव केवलं ॥
 भजामि भाव बल्लभं । कुयोगिनां सुदुर्लभं ॥
 स्वभक्त कल्प पादपं । समं सुसेव्यमन्वहं ॥
 अनूप रूप भूपतिं । ततोऽहमुर्विजा पतिं ॥
 प्रसीद मे नमामि ते । पदाब्ज भक्तिदेहि मे ॥

पठन्ति ये स्तवं इदं । नरादरेण ते पदं ॥

व्रजन्ति नात्र संशयं । त्वदीय भक्तिसंयुताः ॥

दो०—बिनती करि मुनि नाइ सिरु कह कर जोरि बहोरि ।

चरन सरोरुह नाथ जनि कबहुँ तजै मति मोरि ॥ ४ ॥

अनुसुइया के पद गहि सीता । मिली बहोरि सुसील विनीता ॥
 रिषिपतिनी मन सुख अधिकार्ई । आसिष देइ निकट बैठाई ॥
 दिव्य बसन भूषन पहिराए । जे नित नूतन अमल सुहाए ॥
 कह रिषिबधू सरस मृदु बानी । नारिधर्म कछु व्याज बखानी ॥
 मातु पिता भ्राता हितकारी । मितप्रद सब सुनु राजकुमारी ॥
 अमित दानि भर्ता बयदेही । अधम सो नारि जो सेव न तेही ॥
 धीरज धर्म मित्र अरु नारी । आपद काल परिखिअहिं चारी ॥
 बृद्ध रोगबस जड़ धनहीना । अंध ग्रधिर क्रोधी अति दीना ॥
 ऐसेहु पति कर वि.एँ अपमाना । नारि पाव जमपुर दुख नाना ॥
 एकइ धर्म एक व्रत नेमा । कायँ बचन मन पति पद प्रेमा ॥
 जग पतिव्रता चारिबिधि अहहीं । बेद पुरान संत सब कहहीं ॥
 उत्तम के अस बस मनमाहीं । सपनेहुँ आन पुरुष जग नाहीं ॥
 मध्यम परपति देखइ कैसैं । भ्राता पिता पुत्र निज जैसैं ॥
 धर्म बिचारि समुझि कुल रहई । सो निकिष्ट त्रिय श्रुति अस कहई ॥
 बिनु अवसर भय तें रह जोई । जानेहु अधम नारि जग सोई ॥
 पति बंचक परपति रति करई । रौरव नरक कल्प सत परई ॥

छन सुख लागि जनम सत कोटी । दुख न समुझ तेहि सम को खोटी
बिनु श्रम नारि परम गति लहई । पतिव्रत धर्म छाड़ि छल गहई ॥
पति प्रतिकूल जनम जहँ जाई । बिधवा होइ पाइ तरुनाई ॥

सो०—सहज अपावनि नारि पति सेवत सुभ गति लहइ ।

जसु गावत श्रुति चारि अजहुँ तुलसिका हरिहि प्रिय ॥५(क)॥

सुनु सीता तव नाम सुमिरि नारि पतिव्रत करहिं ।

तोहि प्रानप्रिय राम कहिउँ कथा संसार हित ॥५(ख)॥

सुनि जानकीं परम सुख पावा । सादर तासु चरन सिरु नावा ॥
तब मुनि सन कह कृपा निधाना । आयसु होइ जाउँ बन आना ॥
संतत मो पर कृपा करेहू । सेवक जानि तजेहु जनि नेहू ॥
धर्म धुरंधर प्रभु कै बानी । सुनि सप्रेम बोले मुनि ग्यानी ॥
जासु कृपा अज सिव सनकादी । चहत सकल परमारथ वादी ॥
ते तुम्ह राम अकाम पिआरे । दीन बंधु मृदु बचन उचारे ॥
अब जानी मैं श्री चतुराई । भजी तुम्हहि सब देव बिहाई ॥
जेहि समान अतिसय नहिं कोई । ता कर सील कसन अस होई ॥
केहि बिधि कहौं जाहु अब स्वामी । कहहु नाथ तुम्ह अंतरजामी ॥
अस कहि प्रभु त्रिलोकि मुनि धीरा । लोचन जल बह पुलक सरीरा ॥

सं०—तब पुलक निर्भर प्रेम पूजन तपन सुख संकस विप्र ।

मन ग्यान गुन गोतीत प्रभु मैं दीख जप तप का किए ॥

जप जोग धर्म समूह तें नर भगति अनुपम पावई ।
रघुबीर चरित पुनीत निसि दिन दास तुलसी गावई ॥

दो०—कलिमल समन दमन मन राम सुजस सुखमूल ।

सादर सुनहिं जे तिन्हपर राम रहहिं अनुकूल ॥६(क)॥

सो०—कठिन काल मल कोस धर्म न ग्यान न जोग जप ।

परिहरि सकल भरोस रामहि भजहिं ते चतुर नर ॥६(ख)॥

मुनि पद कमल नाइ करि सीसा । चले बनहि सुर नर मुनि ईसा ॥
आगें राम अनुज पुनि पाछें । मुनि घर बेध बने अति काछें ॥
उभय घीच श्री सोहइ कैसी । ब्रह्म जीव विच माया जैसी ॥
सरिता बन गिरि अंवघट घाटा । पति पहिचानि देहिं बर बाटा ॥
जहँ जहँ जाहिं देव रघुराया । करहिं मेघ तहँ तहँ नभ छाया ॥
मिला असुर बिराध मग जाता । आवतहीं रघुबीर निपाता ॥
तुरतहिं रुंचिर रूप तेहिं पावा । देखि दुखी निज धाम पठावा ॥
पुनि आए जहँ मुनि सरभंगा । सुंदर अनुज जानकी संगी ॥
दो०—देखि राम मुख पंकज मुनिबर लोचन भृंग ।

सादर पान करत अति धन्य जन्म सरभंग ॥ ७ ॥

कह मुनि सुनु रघुबीर कृपाला । संकर मानस राजमराला ॥
जात रहेउँ बिरंचि के धामा । सुनेउँ श्रवन बन ऐहहिं रामा ॥
चितवत पंथ रहेउँ दिन राती । अब प्रभु देखि जुड़ानी छाती ॥
नाथ सकल साधन में हीना । कीन्ही कृपा जानि जन दीना ॥

सो कछु देव न मोहि निहोरा । निज पन राखेउ जन मन चोरा ॥
 तब लगि रहहु दीन हित लागी । जब लगि मिलौं तुम्हहि तनु त्यागी
 जोग जग्य जप तप व्रत कीन्हा । प्रभु कहँ देइ भगति बर लीन्हा ॥
 एहि विधि सर रचि मुनि सरभंगा । बैठे हृदयँ छाड़ि सब संग्गा ॥

दो०—सीता अनुज समेत प्रभु नील जलद तनु स्याम ।

मम हियँ बसहु निरंतर सगुनरूप श्रीराम ॥ ८ ॥

अस कहि जोग अगिनि तनु जारा । राम कृपाँ बैकुण्ठ सिधारा ॥
 ताते मुनि हरि लीन न भयऊ । प्रथमहिं भेद भगति बर लयऊ ॥
 रिषि निकाय मुनिबर गति देखी । सुखी भए निज हृदयँ बिसेषी ॥
 अस्तुति करहिं सकल मुनि बृन्दा । जयति प्रनत हित करुना कंदा ॥
 पुनि रघुनाथ चले बन आगे । मुनिबर बृन्द विपुल सँग लागे ॥
 अस्थि समूह देखि रघुराया । पूछी मुनिन्ह लागि अति दाया ॥
 जानतहूँ पूछिअ कस स्वामी । सबदरसी तुम्ह अंतरजामी ॥
 निसिचर निकर सकल मुनि खाए । सुनि रघुवीर नयन जल छाए ॥

दो०—निसिचर हीन करउँ महि भुज उठाइ पन कीन्ह ।

सकल मुनिन्ह के आश्रमन्हि जाइ जाइ सुख दीन्ह ॥ ९ ॥

मुनि अगस्ति कर सिष्य सुजाना । नाम सुतीछन रति भगवाना ॥
 मन क्रम वचन राम पद सेवक । सपनेहुँ आन भरोस न देवक ॥

प्रभु आगवनु श्रवन सुनि पावा । करत मनोरथ आतुर धावा ॥

हे विधि दीनबंधु रघुराया । मो से सठ पर करिहहिं दाया ॥

सहित अनुज मोहिं राम गोसाई । मिलिहहिं निज सेवक की नाई ॥
 मोरे जियँ भरोस दृढ़ नाहीं । भगति विरति न ग्यान मन माहीं
 नहिं सतसंग जोग जप जागा । नहिं दृढ़ चरन कमल अनुरागा ॥
 एक बानि करुनानिधान की । सो प्रिय जाकें गति न आन की ॥
 होइहैं सुफल आजु मम लोचन । देखि बदन पंकज भव मोचन ॥
 निर्भर प्रेम मगन मुनि ग्यानी । कहि न जाइ सो दसा भवानी ॥
 दिसि अरु बिदिसि पंथ नहिं सूझा । को मैं चलेउँ कहाँ नहिं बूझा ॥
 कबहुँक फिरि पाछें पुनि जाई । कबहुँक नृत्य करइ गुन गाई ॥
 अबिरल प्रेम भगति मुनि पाई । प्रभु देखैं तरु ओट लुकाई ॥
 अतिसय प्रीति देखि रघुबीरा । प्रगटे हृदयँ हरन भव भीरा ॥
 मुनि मग माझ अचल होइ बैसा । पुलक सरीर पनस फल जैसा ॥
 तब रघुनाथ निकट चलि आए । देखि दसा निज जन मन भाए ॥
 मुनिहि राम बहु भौंति जगावा । जाग न ध्यान जनित सुख पावा ॥
 भूप रूप तब राम दुरावा । हृदयँ चतुर्भुज रूप देखावा ॥
 मुनि अकुलाइ उठा तब कैसें । बिकल हीन मनि फनिबर जैसें ॥
 आगें देखि राम तन स्यामा । सीता अनुज सहित सुख धामा ॥
 परेउ लकुट इव चरनन्हि लागी । प्रेम मगन मुनिबर बड़भागी ॥
 भुज बिसाल गहि लिए उठाई । परम प्रीति राखे उर लाई ॥
 मुनिहि मिलत अस सोह कृपाला । कनक तरुहि जनु भेंट तमाला ॥
 राम बदन बिलोक मुनि ठाढ़ा । मानहुँ चित्र माझ लिखि काढ़ा ॥

दो०—तब मुनि हृदयँ धीर धरि गहि पद बारहिं बार ।

निज आश्रम प्रभु आनि करि पूजा विविध प्रकार ॥१०॥

कह मुनि प्रभु सुनु बिनती मोरी । अस्तुति करौं कवन विधि तोरी ॥
 महिमा अमित मोरि मति थोरी । रवि सन्मुख खद्योत अँजोरी ॥
 श्याम तामरस दाम शरीरं । जटा मुकुट परिधन मुनि चीरं ॥
 पाणि चाप शर कटि तूणीरं । नौमि निरंतर श्रीरघुवीरं ॥
 मोह विपिन घन दहन कृशानुः । संत सरोरुह कानन भानुः ॥
 निशिचर करि बरूथ मृगराजः । त्रातु सदा नो भव खग बाजः ॥
 अरुण नयन राजीव सुवेशं । सीता नयन चक्रोर निशेशं ॥
 हर हृदि मानस बाल मरालं । नौमि राम उर बाहु विशालं ॥
 संशय सर्प ग्रसन उरगादः । शमन सुकर्कश तर्क विषादः ॥
 भव भंजन रंजन सुर यूथः । त्रातु सदा नो कृपा बरूथः ॥
 निर्गुण सगुण विषम सम रूपं । ज्ञान गिरा गोतीतमनूपं ॥
 अमलमखिलमनवद्यमपारं । नौमि राम भंजन महि भारं ॥
 भक्त कल्पपादप आरामः । तर्जन क्रोध लोभ मद कामः ॥
 अति नागर भव सागर सेतुः । त्रातु सदा दिनकर कुल केतुः ॥
 अतुलित भुज प्रताप बल धामः । कलि मल विपुल विभंजन नामः ॥
 धर्म वर्म नर्मद गुण ग्रामः । संतत शं तनोतु मम रामः ॥
 जदपि बिरज व्यापक अविनासी । सब के हृदयँ निरंतर बासी ॥
 तदपि अनुज श्री सहित खरारी । बसतु मनसि सम काननचारी ॥
 जे जानहिं ते जानहु स्वामी । सगुन अगुन उर अंतरजामी ॥

जो कोसलपति राजिव नयना । करउ सो राम हृदय मम अयना
अस अभिमान जाइ जनि भोरे । मैं सेवक रघुपति पति मोरे ॥
मुनि मुनि बचन राम मन भाए । बहुरि हरषि मुनिवर उर लाए ॥
परम प्रसन्न जानु मुनि मोही । जो बर मागहु देउँ सो तोही ॥
मुनि कह मैं बर कबहुँ न जाचा । समुझि न परइ झूठ का साचा ॥
तुम्हहि नीक लागै रघुराई । सो मोहि देहु दास सुखदाई ॥
अबिरल भगति विरति बिग्याना । होहु सकल गुन ग्यान निधाना ॥
प्रभु जो दीन्ह सो बर मैं पावा । अब सो देहु मोहि जो भावा ॥

दो०—अनुज जानकी सहित प्रभु चाप बान धर राम ।

मम हिय गगन इंदु इव बसहु सदा निहकाम ॥११॥

एवमस्तु करि रमानिवासा । हरषि चले कुंभज रिषि पासा ॥
बहुत दिवस गुर दरसन पाएँ । भर मोहि एहि आश्रम आएँ ॥
अब प्रभु संग जाउँ गुर पाहीं । तुम्ह कहँ नाथ निहोरा नाहीं ॥
देखि कृपानिधि मुनि चतुराई । लिए संग बिहँसे द्रौ भाई ॥
पंथ कहत निज भगति अनूपा । मुनि आश्रम पहुँचे सुरभूपा ॥
तुरत सुतीछन गुर पहिँ गयऊ । करि दंडवत कहत अस भयऊ ॥
नाथ कोसलाधीस कुमारा । आए मिलन जगत आधारा ॥
राम अनुज समेत बयदेही । निसि दिनु देव जपत हहु जेही ॥
मुनत अगस्ति तुरत उठि धाए । हरि बिलोकि लोचन जल छाए ॥
मुनि पद कमल परे द्रौ भाई । रिषि अति प्रीति लिए उर लाई ॥

सादर कुसल पूछि मुनि ग्यानी । आसन बर बैठारे आनी ॥
 पुनि करि बहु प्रकार प्रभु पूजा । मोहि सम भाग्यवंत नहिँ दूजा ॥
 जहँ लगि रहे अपर मुनि वृंदा । हरषे सब बिलोकि सुखकंदा ॥
 दो०—मुनि समूह महँ बैठे सन्मुख सब की ओर ।

सरद इंदु तन चितवत मानहुँ निकर चकोर ॥१२॥

तब रघुवीर कहा मुनि पाहीं । तुम्ह सन प्रभु दुराव कछु नाहीं ॥
 तुम्ह जानहु जेहि कारन आयउँ । ताते तात न कहि समुझायउँ ॥
 अब सो मंत्र देहु प्रभु मोही । जेहि प्रकार मारौं मुनिद्रोही ॥
 मुनि मुसुकाने सुनि प्रभु बानी । पूछेहु नाथ मोहि का जानी ॥
 तुम्हरेई भजन प्रभाव अधारी । जानउँ महिमा कछुक तुम्हारी ॥
 ऊमरि तरु विसाल तव माया । फल ब्रह्मांड अनेक निकाया ॥
 जीव चराचर जंतु समाना । भीतर बसहिँन जानहिँ आना ॥
 ते फल भच्छक कठिन कराला । तव भयँ डरत सदा सोउ काला ॥
 ते तुम्ह सकल लोकपति साई । पूँछेहु मोहि मनुज की नाई ॥
 यह बर मागउँ कृपानिकेता । बसहु हृदयँ श्री अनुज समेता ॥
 अबिरल भगति बिरति सतसंगा । चरन सरोरुह प्रीति अभंगा ॥
 जद्यपि ब्रह्म अखंड अनंता । अनुभव गम्य भजहिँ जेहि संता ॥
 अस तव रूप बखानउँ जानउँ । फिरि फिरि सगुन ब्रह्म रति मानउँ ॥
 संतत दासह देहु ब्रह्माई । लातें मोहि पूँछेहु रघुराई ॥
 है प्रभु परम मनोहर टाऊँ । पावन पंचवटी तेहि नाऊँ ॥

एहि विधि गए कछु क दिन वीती । कहत विराग ग्यान गुन नीती ॥
 सूपनखा रावन कै ग्रहिनी । दुष्ट हृदय दारुन जस अहिनी ॥
 पंचवटी सो गइ एक बारा । देखि बिकल भइ जुगल कुमारा ॥
 भ्राता पिता पुत्र उरगारी । पुरुष मनोहर निरखत नारी ॥
 होइ बिकल सक मनहि न रोकी । जिमि रविमनि द्रव रविहि विलोकी ॥
 रुचिर रूप धरि प्रभु पहिं जाई । बोली बचन बहुत मुसुकाई ॥
 तुम्ह सम पुरुष न मो सम नारी । यह सँजोग बिधि रचा बिचारी ॥
 मम अनुरूप पुरुष जग माहीं । देखेउँ खोजि लोक तिहु नाहीं ॥
 तातैं अब लगि रहिउँ कुमारी । मनु माना कछु तुम्हहि निहारी ॥
 सीतहि चितइ कही प्रभु बाता । अहइ कुआर मोर लघु भ्राता ॥
 गइ लछिमन रिपु भगिनी जानी । प्रभु विलोकि बोले मृदु बानी ॥
 सुंदरि सुनु मैं उन्ह कर दासा । पराधीन नहिं तोर सुपासा ॥
 प्रभु समर्थ कोसलपुर राजा । जो कछु करहिं उनहि सब छाजा ॥
 सेवक सुख चह मान भिखारी । व्यसनी धन सुभ गति बिभिचारी ॥
 लोभी जसु चह चार गुमानी । नभ दुहि दूध चहत ए प्राणी ॥
 पुनि फिरि राम निकट सो आई । प्रभु लछिमन पहिं बहुरि पठाई ॥
 लछिमन कहा तोहि सो बरई । जो तून तोरि लाज परिहरई ॥
 तव खिसिआनि राम पहिं गई । रूप भयंकर प्रगटत भई ॥
 सीतहि सभय देखि रघुराई । कहा अनुज सन सयन बुझाई ॥
 दो०—लछिमन अति लाघवँ सो नाक कान बिनु कीन्हि ।

नाक कान विनु भइ बिकरारा । जनु स्रव सैल गेरु कै धारा ॥
 खर दूषन पहिं गइ बिलपाता । धिग धिग तव पौरुष बल भ्राता ॥
 तेहिं पूछा सब कहेसि बुझाई । जातुधान सुनि सेन बनाई ॥
 धाए निसिचर निकर बरूथा । जनु सपच्छ कजल गिरिजूथा ॥
 नाना वाहन नानाकारा । नानायुध धर घोर अपारा ॥
 सूपनखा आगें करि लीनी । असुभ रूप श्रुति नासा हीनी ॥
 असगुन अमित होहिं भयकारी । गनहिं न मृत्यु बिबस सब झारी ॥
 गर्जहिं तर्जहिं गगन उड़ाहीं । देखि कटकु भट अति हरषाहीं ॥
 कोउ कह जिअत धरहु द्वौ भाई । धरि मारहु तिय लेहु छड़ाई ॥
 धूरि पूरि नभ मंडल रहा । राम बोलाइ अनुजसन कहा ॥
 लै जानकिहि जाहु गिरि कंदर । आवा निसिचर कटकु भयंकर ॥
 रहेहु सजग सुनि प्रभु कै बानी । चले सहित श्री सर धनु पानी ॥
 देखि राम रिपुदल चलि आवा । विहसि कठिन कोदंड चढ़ावा ॥

छं०—कोदंड कठिन चढ़ाइ सिर जट जूट बाँधत सोह क्यों ।
 मरकत सयल पर लरत दामिनि कोटि सों जुग भुजग ज्यों ॥
 कटि कसि निषंग बिसाल भुज गहि चाप बिसिख सुधारि कै
 चितवत मनहुँ मृगराज प्रभु गजराज घटा निहारि कै ॥

सो०—आइ गए बगमेल धरहु धरहु धावत सुभट ।

जथा बिलोकि अकेल बाल रबिहि घेरत दनुज ॥१८॥

प्रभु बिलोकि सरस कहिं न डारी । थकित भई रजनीचर धारी ॥

सचिव बोलि बोले खर दूषन । यह कोउ नृपबालक नर भूषन ॥
 नाग असुर सुर नर मुनि जेते । देखे जिते हते हम केते ॥
 हम भरि जन्म सुनहु सब भाई । देखी नहिं असि सुंदरताई ॥
 जद्यपि भगिनी कीन्हि कुरूपा । बध लायक नहिं पुरुष अनूपा ॥
 देहु तुरत निज नारि दुराई । जीअत भवन जाहु द्वौ भाई ॥
 मोर कहा तुम्ह ताहि सुनावहु । तासु बचन सुनि आतुर आवहु ॥
 दूतन्ह कहा राम सन जाई । सुनत राम बोले मुसुकाई ॥
 हम छत्री मृगया वन करहीं । तुम्ह से खल मृग खोजत फिरहीं ॥
 रिपु बलवंत देखि नहिं डरहीं । एक बार कालहु सन लरहीं ॥
 जद्यपि मनुज दनुज कुल घालक । मुनि पालक खल सालक बालक ॥
 जौं न होइ बल घर फिरि जाहू । समर विमुख मैं हतउँ न काहू ॥
 रनं चढ़ि करिअ कपट चतुराई । रिपु पर कृपा परम कदराई ॥
 दूतन्ह जाइ तुरत सब कहेऊ । सुनि खर दूषन उर अति दहेऊ ॥

छं०—उर दहेऊ कहेऊ कि धरहु धाए बिकट भट रजनीचरा ।
 सर चाप तोमर सक्ति सूल कृपान परिघ परसु धरा ॥
 प्रभु कीन्हि धनुष टकोर प्रथम कडोर घोर भयावहा ।
 भए बधिर व्याकुल जातुधान न ग्यान तेहि अवसर रहा ॥

द्वौ०—सावधान होइ धाए जानि सबल आराति ।

लागे बरषन राम पर अछ सख बहु भौति ॥ १९ (क) ॥

तिन्ह के आयुध तिल सम करि काटे रघुवीर ।

तानि सरासन श्रवन लगि पुनि छाँड़े निज तीर ॥ १९ (ख) ॥

छं०—तब चले बान कराल । फुंकरत जनु बहु ब्याल ॥
 कोपेउ समर श्रीराम । चले बिसिख निसित निकाम ॥
 अवलोकि खरतर तीर । मुरि चले निसिचर बीर ॥
 भए क्रुद्ध तीनिउ भाइ । जो भागि रन ते जाइ ॥
 तेहि बधब हम निज पानि । फिरे मरन मन महुँ ठानि ॥
 आयुध अनेक प्रकार । सनमुख ते करहिं प्रहार ॥
 रिपु परम कोपे जानि । प्रभु धनुष सर संधानि ॥
 छाँड़े बिपुल नाराच । लगे कटन बिकट पिसाच ॥
 उर सीस भुज कर चरन । जहँ तहँ लगे महि परन ॥
 चिक्करत लागत बान । धर परत कुधर समान ॥
 भट कटत तन सत खंड । पुनि उठत करि पाषंड ॥
 नभ उड़त बहु भुज मुंड । विनु मौलि धावत रुंड ॥
 खग कंक काक सृगाल । कटकटहिं कठिन कराल ॥

छं०—कटकटहिं जंबुक भूत प्रेत पिसाच खरपर संचहीं ।
 बेताल बीर कपाल ताल बजाइ जोगिनि नंचहीं ॥
 रघुवीर बान प्रचंड खंडहिं भटन्ह के उर भुज सिरा ।
 जहँ तहँ परहिं उठि लरहिं धर धरु धरु करहिं भयकर गिरा ॥

अंतावरीं गहि उड़त गीध पिसाच कर गहि धावहीं ।
 संग्राम पुर बासी मनहुँ बहु बाल गुड़ी उड़ावहीं ॥
 मारे पछारे उर बिदारे बिपुल भट कहँरत परे ।
 अवलोकि निज दल बिकल भट तिसिरादि खर दूषन फिरे ॥
 सर सक्ति तोमर परसु सूल कृपान एकहि बारहीं ।
 करि कोप श्रीरघुबीर पर अगनित निसाचर डारहीं ॥
 प्रभु निमिष महुँ रिपु सर निवारि पचारि डारे सायका ।
 दस दस बिसिख उर माझ मारे सकल निसिचर नायका ॥
 सहि परत उठि भट भिरत मरत न करत माया अति घनी ।
 सुर डरत चौदह सहस प्रेत बिलोकि एक अवध धनी ॥
 सुर मुनि सभय प्रभु देखि मायानाथ अति कौतुक करयो ।
 देखहि परसपर राम करि संग्राम रिपुदल लरि मरयो ॥

दो०—राम राम कहि तनु तजहि पावहि पद निर्बान ।

करि उपाय रिपु मारे छन महुँ कृपानिधान ॥२०(क)॥

हरषित बरषहि सुमन सुर बाजहि गगन निसान ।

अस्तुति करि करि सब चले सोभित बिबिध बिमान ॥२०(ख)॥

जब रघुनाथ समर रिपु जीते । सुर नर मुनि सब के भय वीते ॥

तब लछिमन सीतहि लै आए । प्रभु पद परत हरषि उर लाए ॥

सीता चितव स्याम मृदु गाता । परम प्रेम लोचन न अघाता ॥

पंचवटी बसि श्रीरघुनायक । करत चरित सुर मुनि सुखदायक

धुआँ देखि खरदूषन केरा । जाइ सुपनखाँ रावन प्रेरा ॥
 बोली वचन क्रोध करि भारी । देस कोस कै सुरति विसारी ॥
 करसि पान सोवसि दिनु राती । सुधि नहिं तव सिर पर आराती ॥
 राज नीति विनु धन विनु धर्मा । हरिहि समर्पे विनु सतकर्मा ॥
 विद्या विनु विवेक उपजाएँ । श्रम फल पढ़ेँ किएँ अरु पाएँ ॥
 संग तैं जती कुमंत्र ते राजा । मान ते ग्यान पान तैं लाजा ॥
 प्रीति प्रनय विनु मद ते गुनी । नासहिं वेगि नीति अस सुनी ॥
 सो०—रिपु रुज पावक पाप प्रभु अहि गनिअ न छोट करि ।

अस कहि बिबिध बिलाप करि लागी रोदन करन ॥ २१ (क) ॥

दो०—सभा माझ परि व्याकुल बहु प्रकार कह रोइ ।

तोहि जिअत दसकंधर मोरि कि असि गति होइ ॥ २१ (ख) ॥

सुनत सभासद उठे अकुलाई । समुझाई गहि वाँह उठाई ॥
 कह लंकेस कहसि निज वाता । केई तव नासा कान निपाता ॥
 अवध नृपति दसरथ के जाए । पुरुष सिंघ वन खेलन आए ॥
 समुझि परी मोहि उन्ह कै करनी । रहित निसाचर करिहि धरनी ॥
 जिन्ह कर भुजबल पाइ दसानन । अभय भए बिचरत मुनि कानन
 देखत बालक काल समाना । परम धीर धन्वी गुन नाना ॥
 अतुलित बल प्रताप द्वौ भ्राता । खल बध रत सुर मुनि सुख दाता ॥
 सोभा भाम राम अस नाम । तिन्ह के संग नारि एक साथ ॥
 रूप रासि विधि नारि सँवारी । रति सत कोटि तासु बलिहारी ॥

तासु अनुज काटे श्रुति नासा । सुनि तव भगिनि करहिं परिहासा ॥
 खर दूषन सुनि लगे पुकारा । छन महुँ सकल कटक उन्ह मारा ॥
 खर दूषन तिसिरा कर घाता । सुनि दससीस जरे सब गाता ॥
 दो०—सूपनखहि समुझाइ करि बल बोलेसि बहु भाँति ।

गयउ भवन अति सोच बस नीद परइ नहिं राति ॥२२॥
 सुर नर असुर नाग खग माहीं । मोरे अनुचर कहँ कोउ नाहीं ॥
 खर दूषन मोहि सम बलवंता । तिन्हहि को मारइ बिनु भगवंता ॥
 सुर रंजन भंजन महि भारा । जाँ भगवंत लीन्ह अवतारा ॥
 तौ मैं जाइ बैरु हठि करऊँ । प्रभु सर प्रान तजै भव तरऊँ ॥
 होइहि भजनु न तामस देहा । मन क्रम वचन मंत्र दृढ़ एहा ॥
 जाँ नररूप भूपसुत कोऊ । हरिहउँ नारि जीति रन दोऊ ॥
 चला अकेल जान चढ़ि तहवाँ । बस मारीच सिंधु तट जहवाँ ॥
 इहाँ राम जसि जुगुति बनाई । सुनहु उमा सो कथा सुहाई ॥
 दो०—लछिमन गए बनहिं जब लेन मूल फल कंद ।

जनकसुता सन बोले बिहसि कृपा सुख वृंद ॥२३॥

✓ सुनहु प्रिया व्रत रुचिर सुसीला । मैं कछु करबि ललित नरलीला ॥
 तुम्ह पावक महुँ करहु निवासा । जौ लागि करौं निसाचर नासा ॥
 जबहिं राम सब कहा बखानी । प्रभु पद धरिहियँ अनल समानी ॥
 निज प्रतिबिंब राखि तहँ सीता । तैसइ सील रूप सुबिनीता ॥
 लछिमनहूँ यह मरमु न जाना । जौ कछु चरित रचा भगवाना ॥

दसमुख गयउ जहाँ मारीचा । नाइ माथ स्वारथ रत नीचा ॥
 नवनि नीच कै अति दुखदाई । जिमि अंकुसधनु उरग बिलाई ॥
 भयदायक खल कै प्रिय बानी । जिमि अकाल के कुसुम भवानी ॥
 दो०—करि पूजा मारीच तब सादर पूछी बात ।

कवन हेतु मन व्यग्र अति अकसर आयहु तात ॥२४॥

दसमुख सकल कथा तेहि आगें । कही सहित अभिमान अभागें ॥
 होहु कपट मृग तुम्ह छलकारी । जेहि विधि हरि आनौं नृपनारी ॥
 तेहिं पुनि कहा सुनहु दससीसा । ते नररूप चराचर ईसा ॥
 तासों तात वयरु नहिं कीजै । मारें मरिअ जिआएँ जीजै ॥
 मुनि मख राखन गयउ कुमारा । विनु फर सर रघुपति मोहि मारा ॥
 सत जोजन आयउँ छन माहीं । तिन्ह सन वयरु किऐँ भल नाहीं ॥
 भइ मम कीट भृंग की नाई । जहँ तहँ मैं देखउँ दोउ भाई ॥
 जौ नर तात तदपि अति सूरा । तिन्हहि बिरोधि न आइहि पूरा ॥
 दो०—जेहिं ताड़का सुबाहु हति खंडेउ हर कोदंड ।

खर दूषन तिसिरा बधेउ मनुज कि अस बरिबंड ॥२५॥

जाहु भवन कुल कुसल बिचारी । सुनत जरा दीन्हिसि बहु गारी ॥
 गुरुजिमि मूढ़ करसिमम बोधा । कहु जग मोहि समान को जोधा ॥
 तब मारीच हृदयँ अनुमाना । नवहि बिरोधें नहिं कल्याना ॥
 सखी समीप प्रभु लख भनी । पैद पाँदे प्राप्ति भागवत गुनी ॥
 उभय भाँति देखा निज मरना । तब ताकिसि रघुनायक सरना ॥

उतर देत मोहि बधव अभागैं। कस न मरौ रघुपति सर लागैं॥
अस जियँ जानि दसानन संग। चला राम पद प्रेम अभंगा॥
मन अति हरष जनाव न तेही। आजु देखिहउँ परम सनेही॥

छं०—निज परम प्रीतम देखि लोचन सुफल करि सुख पाइहौं ।

श्री सहित अनुज समेत कृपानिकेत पद मन लाइहौं ॥

निर्बान दायक क्रोध जा कर भगति अबसहि बसकरी ।

निज पानि सर संधानि सो मोहि बधिहि सुखसागर हरी ॥

दो०—मम पाछें धर धावत धरें सरासन बान ।

फिरि फिरि प्रभुहि बिलोकिहउँ धन्य नमो सम आन ॥ २६ ॥

तेहि बन निकट दसानन गयऊ। तब मारीच कपटमृग भयऊ ॥

अति विचित्र कछु बरनि न जाई। कनक देह मनि रचित बनाई ॥

सीता परम रुचिर मृग देखा। अंग अंग सुमनोहर बेषा ॥

सुनहु देव रघुबीर कृपाला। एहि मृग कर अति सुंदर छाला ॥

सत्यसंध प्रभु बधि करि एही। आनहु चर्म कहति बैदेही ॥

तब रघुपति जानत सब कारन। उठे हरषि सुर काजु सँवारन ॥

मृग बिलोकि कटि परिकर बाँधा। करतल चाप रुचिर सर साँधा ॥

प्रभु लछिमनहि कहा समुझाई। फिरत बिपिन निसिचर बहु भाई ॥

सीता केरि करेहु रखवारी। बुधि विवेक बल समय विचारी ॥

प्रभुहि बिलोकि चला मृग भाजी। घाए रामु सरासन साजी ॥

निगम नेति सिव ध्यान न पावा। मायामृग पाछें सो धावा ॥

कवहुँ निकट पुनि दूरि पराई । कवहुँक प्रगटइ कवहुँ छपाई ॥
 प्रगटत दुरत करत छल भूरी । एहि विधि प्रभुहि गयउ लै दूरी ॥
 तब तकि राम कठिन सर मारा । धरनि परेउ करि घोर पुकारा ॥
 लछिमन कर प्रथमहि लै नामा । पाछें सुमिरेसि मन महुँ रामा ॥
 प्रान तजत प्रगटेसि निज देहा । सुमिरेसि रामु समेत सनेहा ॥
 अंतर प्रेम तासु पहिचाना । मुनि दुर्लभ गति दीन्हि सुजाना ॥
 दो०—बिपुल सुमन सुर बरषाहि गावहि प्रभु गुन गाथ ।

निज पद दीन्ह असुर कहुँ दीनबंधु रघुनाथ ॥२७॥

खल बधि तुरत फिरे रघुवीरा । सोह चाप कर कटि तूनीरा ॥
 आरत गिरा सुनी जव सीता । कह लछिमन सन परम समीता ॥
 जाहु बेगि संकट अति भ्राता । लछिमन विहसि कहा सुनु माता ॥
 भृकुटि बिलास सृष्टि लय होई । सपनेहुँ संकट परइ कि सोई ॥
 मरम वचन जव सीता बोला । हरि प्रेरित लछिमन मन डोला ॥
 बन दिसि देव सौंपि सब काहू । चले जहाँ रावन ससि राहू ॥
 सून बीच दसकंधर देखा । आवा निकट जती कें बेषा ॥
 जाकें डर सुर असुर डेराहीं । निसि न नीद दिन अन्न न खाहीं ॥
 सो दससीस स्वान की नाई । इत उत चितइ चला भड़िहाई ॥
 इमि कुपंथ पग देत खगेसा । रह न तेज तन बुधि बल लेसा ॥
 नामा विधि करि कथा सुहाई । राजसीसि प्रिय प्रीति देखी ॥
 कह सीता सुनु जती गोसाई । बोलेहु वचन दुष्ट की नाई ॥

* अरण्यकाण्ड *

तब रावन निज रूप देखावा । भई समय जब नाम सु-
 कह सीता धरि धीरजु गाढ़ा । आइ गयउ प्रभु रहु खल ठाढ़ा ॥
 जिमि हरिवधुहि छुद्र सस चाहा । भएसि काल्यस निसिचर नाहा ॥
 सुनत वचन दससीस रिसाना । मन महुँ चरन बंदि सुख माना ॥

दो०—क्रोधवंत तब रावन लीन्हिसि रथ बैठाइ ।

चला गगनपथ आतुर भयँ रथ हाँकि न जाइ ॥२८॥

हा जग एक वीर रघुराया । केहि अपराध बिसारेहु दाय़ा ॥
 आरति हरन सरन सुखदायक । हा रघुकुल सरोज दिननायक ॥
 हा लछिमन तुम्हार नहिं दोसा । सो फलु पायउँ कीन्हेउँ रोसा ॥
 विविध बिलाप करति बैदेही । भूरि कृपा प्रभु दूरि सनेही ॥
 बिपति मोरि को प्रभुहि सुनावा । पुरोडास चह रासम खावा ॥
 सीता कै बिलाप सुनि भारी । भए चराचर जीव दुखारी ॥
 गीधराज सुनि आरत बानी । रघुकुल तिलक नारि पहिचानी ॥
 अधम निसाचर लीन्हैं जाई । जिमि मलेछ बस कपिला गाई ॥
 सीते पुत्रि करसि जनि त्रासा । करिहउँ जातुधान कर नासा ॥
 धावा क्रोधवंत खग कैसैं । छूटइ पवि परबत कहूँ जैसैं ॥
 रे रे दुष्ट ठाढ़ किन होही । निर्भय चलेसि न जानेहि मोही ॥
 आवत देखि कृतांत समाना । फिरि दसकंधर कर अनुमाना ॥
 की मैनाक कि खगपति होई । मम बल जान सहित पति सोई ॥
 जाना जरठ जटायू एहा । मम कर तीरथ छाड़िहि देहा ॥

सुनत गीध क्रोधातुर धावा । कह सुनु रावन मोर सिखावा ॥
 तजि जानकिहि कुसल गृह जाहू । नाहिं त अस होइहि बहुबाहू ॥
 राम रोष पावक अति घोरा । होइहि सकल सलम कुल तोरा ॥
 उतरु न देत दसानन जोधा । तबहिं गीध धावा करि क्रोधा ॥
 धरि कच विरथ कीन्ह महि गिरा । सीतहि राखि गीध पुनि फिरा ॥
 चोचन्ह मारि बिदारेसि देही । दंड एक भइ मुरुछा तेही ॥
 तब सक्रोध निसिचर खिसिआना । काढ़ेसि परम कराल कृपाना ॥
 काटेसि पंख परा खग धरनी । सुभिरि राम करि अदभुत करनी ॥
 सीतहि जान चढ़ाइ बहोरी । चला उताइल त्रास न थोरी ॥
 करति बिलाप जाति नभ सीता । व्याध विवस जनु मृगी समीता ॥
 गिरि पर बैठे कपिन्ह निहारी । कहि हरि नाम दीन्ह पट डारी ॥
 एहि बिधि सीतहि सो लै गयऊ । वन असोक महुँ राखत भयऊ ॥
 दो०—हारि परा खल बहु बिधि भय अरु प्रीति देखाइ ।

तब असोक पादप तर राखिसि जतन कराइ ॥ २९ (क) ॥

नवाह्नपारायण, छठा विश्राम

जेहि बिधि कपट कुरंग सँग धाइ चले श्रीराम ।

सो छबि सीता राखि उर रटति रहति हरिनाम ॥ २९ (ख) ॥

रघुपति अनुजहि आवत देखी । बाहिज चिंता कीन्ह बिसेयी ॥

जगजमुखा परिहरिहु अकैली । आषट्पुलात बचन मम वेली ॥

निसिचर निकर फिरहिं बन माहीं । मम मन सीता आश्रम नाहीं ॥

गहि पद कमल अनुज कर जोरी । कहेउ नाथ कछु मोहि न खोरी ॥
 अनुज समेत गए प्रभु तहवाँ । गोदावरि तट आश्रम जहवाँ ॥
 आश्रम देखि जानकी हीना । भए बिकल जस प्राकृत दीना ॥
 हा गुन खानि जानकी सीता । रूप सील व्रत नेम पुनीता ॥
 लछिमन समुझाए बहु भाँती । पूछत चले लता तरु पाँती ॥
 हे खग मृग हे मधुकर श्रेणी । तुम्ह देखी सीता मृगनैनी ॥
 लंजन सुक कपोत मृग मीना । मधुप निकर कोकिला प्रवीना ॥
 कुंद कली दाड़िम दामिनी । कमल सरद ससि अहिभामिनी ॥
 बरुन पास मनोज धनु हंसा । गज केहरि निज सुनत प्रसंसा ॥
 श्रीफल कनक कदलि हरषाहीं । नेकु न संक सकुच मन माहीं ॥
 सुनु जानकी तोहि बिनु आजू । हरषे सकल पाइ जनु राजू ॥
 किमि सहि जात अनख तोहि पाहीं । प्रिया बेगि प्रगटसि कस नाहीं ॥
 एहि विधि खोजत बिलपत स्वामी । मनहुँ महा बिरही अति कामी ॥
 पूरन काम राम सुख रासी । मनुज चरित कर अज अबिनासी ॥
 आगें परा गीधपति देखा । सुमिरत राम चरन जिन्ह रेखा ॥

दो०—कर सरोज सिर परसेउ कृपासिंधु रघुबीर ।

निरखि राम छवि धाम मुख बिगत भई सब पीर ॥३०॥

तब कह गीध बचन धरि धीरा । सुनहु राम भंजन भव भीरा ॥
 नाथ दसानन यह गति कीन्ही । तेहि खल जनक सुता हरि लीन्ही ॥
 लं दच्छिन दिसि गयेउ गोसाई । बिलपति अति कुररी कोनाई ॥

दरस लागि प्रभु राखेउँ प्राणा । चलन चहत अब कृपानिधाना ॥
 राम कहा तनु राखहु ताता । मुख मुसुकाइ कही तेहिं बाता ॥
 जाकर नाम मरत मुख आवा । अधमउ मुकुत होइ श्रुति गावा ॥
 सो मम लोचन गोचर आगें । राखौं देह नाथ केहि खाँगें ॥
 जल भरि नयन कहहिं रघुराई । तात कर्म निज तें गति पाई ॥
 परहित बस जिन्ह के मन माहीं । तिन्ह कहूँ जग दुर्लभ कछु नाहीं ॥
 तनु तजि तात जाहु मम धामा । देउँ काह तुम्ह पूरन कामा ॥

दो०—सीता हरन तात जनि कहहु पिता सन जाइ ।

जौं मैं राम त कुल सहित कहिहि दसानन आइ ॥३१॥

गीध देह तजि धरि हरि रूपा । भूषन बहु पट पीत अनूपा ॥
 स्याम गात बिसाल भुज चारी । अस्तुति करत नयन भरि बारी ॥

छं०—जय राम रूप अनूप निर्गुन सगुन गुन प्रेरक सही ।

दससीस बाहु प्रचंड खंडन चंड सर मंडन मही ॥

पाथोद गात सरोज मुख राजीव आयत लोचनं ।

नित नौमि रामु कृपाल बाहु बिसाल भव भय मोचनं ॥१॥

बलमप्रमेयमनादिमजमव्यक्तमेकमगोचरं ।

गोविंद गोपर द्वंद्वहर विग्यानघन धरनीधरं ॥

जे राम मंत्र जपंत संत अतंत जन मन रंजनं ।

नित नौमि राम अकाम प्रिय कामादि खल दल गंजनं ॥२॥

जेहि श्रुति निरंजन ब्रह्म व्यापक विरज अज कहि गावहीं ।
 करि ध्यान ग्यान विराग जोग अनेक मुनि जेहि पावहीं ॥
 सो प्रगट करुना कंद सोभा वृंद अग जग मोहई ।
 मम हृदय पंकज भृंग अंग अनंग बहु छवि सोहई ॥३॥
 जो अगम सुगम सुभाव निर्मल असम सम सीतल सदा ।
 पस्यंति जं जोगी जतन करि करत मन गो बस सदा ॥
 सो राम रमा निवास संतत दास बस त्रिभुवन धनी ।
 मम उर बसउ सो समन संसृति जासु कीरति पावनी ॥४॥
 दो०—अबिरल भगति मागि बर गीध गयउ हरिधाम ।

तेहि की क्रिया जथोचित निज कर कीन्ही राम ॥३२॥
 कोमल चित अति दीनदयाला । कारन बिनु रघुनाथ कृपाला ॥
 गीध अधम खग आमिष भोगी । गति दीन्ही जो जाचत जोगी ॥
 सुनहु उमा ते लोग अभागी । हरि तजि होहिं विषय अनुरागी ॥
 पुनि सीताहि खोजत द्वौ भाई । चले विलोकत वन बहुताई ॥
 संकुल लता बिटप घन कानन । बहु खग मृग तहँ गज पंचानन ॥
 आवत पंथ कबंध निपाता । तेहिं सब कही साप कै बाता ॥
 दुरवासा मोहि दीन्ही सापा । प्रभु पद पेखि मिटा सो पापा ॥
 सुनु गंधर्व कहउँ मैं तोही । मोहि न सोहाइ ब्रह्मकुल द्रोही ॥

दो०—मन क्रम बचन कपट तजि जो कर भूसुर सेव ।

सापत ताड़त परुष कहंता । विप्र पूज्य अस गावहिं संता ॥
 पूजिअ विप्र सील गुन हीना । सुद नगुन गन ग्यान प्रबीना ॥
 कहि निज धर्म ताहि समुझावा । निज पद प्रीति देखि मन भावा ॥
 रघुपति चरन कमल सिरु नाई । गयउ गगन आपनि गति पाई ॥
 ताहि देइ गति राम उदारा । सबरी कें आश्रम पगु धारा ॥
 सबरी देखि राम गृहँ आए । मुनि के बचन समुझि जियँ भाए ॥
 सरसिज लोचन बाहु बिसाला । जटा मुकुट सिर उर बनमाला
 स्याम गौर सुंदर दोउ भाई । सबरी परी चरन लपटाई ॥
 प्रेम मगन मुख बचन न आवा । पुनि पुनि पद सरोज सिर नावा ॥
 सादर जल लै चरन पखारे । पुनि सुंदर आसन बैठारे ॥
 दो०—कंद मूल फल सुरस अति दिष्ट राम कहँ आनि ।

प्रेम सहित प्रभु खाए बारंबार बखानि ॥३४॥

पानि जोरि आगें भइ ठाढ़ी । प्रभुहि बिलोकि प्रीति अति बाढ़ी ॥
 केहि विधि अस्तुति करौं तुम्हारी । अधम जाति मैं जड़मति भारी ॥
 अधम ते अधम अधम अति नारी । तिन्ह महँ मैं मति मंद अघारी ॥
 कह रघुपति सुनु भामिनि बाता । मानउँ एक भगति कर नाता ॥
 जाति पाँति कुल धर्म बड़ाई । धन बल परिजन गुन चतुराई ॥
 ✓ भगति हीन नर सोहइ कैसा । विनु जल बारिद देखिअ जैसा ॥
 ✓ नवधा भगति कहँ उँ तोहि पाहीं । सावधान सुनु धरु मन साहीं ॥
 प्रथम भगति संतन्ह कर संगी । दूसरि रति मम कथा प्रसंगी ॥

दो०—गुर पद पंकज सेवा तीसरि भगति अमान ।

चौथि भगति मम गुन गन करइ कपट तजि गान ॥३५॥

मंत्र जाप मम दृढ़ विस्वासा । पंचम भजन सो बेद प्रकासा ॥
छठ दम सील बिरति बहु करमा । निरत निरंतर सज्जन धरमा ॥
सातवैं सम मोहि मय जग देखा । मोतैं संत अधिक करि लेखा ॥
आठवैं जथालाभ संतोषा । सपनेहुँ नहि देखइ परदोषा ॥
नवम सरल सब सन छलहीना । मम भरोस हियैं हरषन दीना ॥
✓नव महुँ एकउ जिन्ह कैं होई । नारि पुरुष सचराचर कोई ॥
सोइ अतिसय प्रिय भामिनि मोरैं । सकल प्रकार भगति दृढ़ तोरैं ॥
जोगि बृंद दुरलभ गति जोई । तो कहूँ आजु सुलभ भइ सोई ॥
मम दरसन फल परम अनूपा । जीव पाव निज सहज सरूपा ॥
जनकसुता कह सुधि भामिनी । जानहि कहु करिबरगामिनी ॥
पंपा सरहि जाहु रघुराई । तहँ होइहि सुग्रीव मिताई ॥
सो सब कहिहि देव रघुबीरा । जानतहूँ पूछहु मतिधीरा ॥
बार बार प्रभु पद सिरु नाई । प्रेम सहित सब कथा सुनाई ॥

छं०—कहि कथा सकल बिलोकि हरि मुख हृदयँ पद पंकज धरे ।

तजि जोग पावक देह हरि पद लीन भइ जहँ नहि फिरे ॥

नर बिबिध कर्म अधर्म बहु मत सोकप्रद सब त्यागहु ।

बिस्वास करि कह दास तुलसी राम पद अनुरागहु ॥

दो०—जाति हीन अघ जन्म महि मुक्त कीन्हि असि नारि ।

महामंद मन सुख चहसि ऐसे प्रभुहि बिसारि ॥३६॥

चले राम त्यागा बन सोऊ । अतुलित बल नर केहरि दोऊ ॥
 बिरही इव प्रभु करत बिषादा । कहत कथा अनेक संवादा ॥
 लछिमन देखु बिपिन कइ सोभा । देखत केहि कर मन नहिं छोभा
 नारि सहित सब खग मृग बृंदा । मानहुँ मोरि करत हहिं निंदा ॥
 हमहि देखि मृग निकर पराहीं । मृगीं कहहिं तुम्ह कहँ भय नाहीं ॥
 तुम्ह आनंद करहु मृग जाए । कंचन मृग खोजन ए आए ॥
 संग लाइ करिनीं करि लेहीं । मानहुँ मोहि सिखावनु देहीं ॥
 सास्त्र सुचिंतित पुनि पुनि देखिअ । भूप सुसेवित बस नहिं लेखिअ
 राखिअ नारि जदपि उर माहीं । जुवती सास्त्र नृपति बस नाहीं ॥
 देखहु तत बसंत सुहावा । प्रिया हीन मोहि भय उपजावा ॥
 दो०—बिरह बिकल बलहीन मोहि जानेसि निपट अकेल ।

सहित बिपिन मधुकर खग मदन कीन्ह बगमेल ॥३७(क)॥

देखि गयउ भ्राता सहित तासु दूत सुनि बात ।

डैरा कीन्हेउ मनहुँ तब कटकु हटकि मन जात ॥३७(ख)॥

बिटप बिसाल लता अरुझानी । विविध बितान दिए जनु तानी ॥

कदलि ताल वर धुजा पताका । देखि न मोह धीर मन जाका ॥

विविध भाँति फूले तरु ताना । जनु बानैत बने बहु बाना ॥

कहुँ कहुँ सुंदर बिटप सुहाए । जनु भट बिलग बिलग होइ छाए

कूजत पिक मानहुँ गज माते। ढेक महोख ऊँट विसराते॥
 मोर चकोर कीर वर बाजी। पारावत मराल सब ताजी॥
 तीतिर लावक पदचर जूथा। वरनि न जाइ मनोज बरूथा॥
 रथ गिरि सिला दुंदुभीं झरना। चातक बंदी गुन गन बरना॥
 मधुकर मुखर भेरि सहनाई। त्रिविध बयारि बसीठीं आई॥
 चतुरंगिनी सेन सँग लीन्हें। विचरत सबहि चुनौती दीन्हें॥
 लछिमन देखत काम अनीका। रहहिं धीर तिन्ह कै जग लीका॥
 एहि कैं एक परम बल नारी। तेहि तैं उबर सुभट सोइ भारी॥
 दो०—तात तीनि अति प्रबल खल काम क्रोध अरु लोभ।

मुनि बिग्यान धाम मन करहिं निमिष महुँ छोभा॥ ३८(क)॥

लोभ कैं इच्छा दंभ बल काम कैं केवल नारि।

क्रोध कैं परुष वचन बल मुनिबर कहहिं बिचारि॥ ३८(ख)॥

गुनातीत सचराचर स्वामी। राम उमा सब अंतरजामी॥
 कामिन्ह कै दीनता देखाई। धीरन्ह कैं मन बिरति दृढ़ाई॥
 क्रोध मनोज लोभ मद माया। छूटहिं सकल राम कीं दायी॥
 सो नर इंद्रजाल नहिं भूला। जा पर होइ सो नट अनुकूला॥
 उमा कहउँ मैं अनुभव अपना। सत हरि भजनु जगत सब सपना॥
 पुनि प्रभु गए सरोवर तीरा। पंपा नाम सुभग गंभीरा॥
 संत हृदय जस निर्मल बारी। बाँधे घाट मनोहर चारी॥
 जहँ तहँ पिछहिं त्रिविध मृग नीरा। जनु उदार रह जाचक मीरा॥

दो०—पुरइनि सघन ओट जल बेगि न पाइअ मर्म ।

मायाछन्न न देखिये जैसे निर्गुन ब्रह्म ॥३९(क)॥

सुखी मीन सब एक रस अति अगाध जल माहिं ।

जथा धर्मसीलन्ह के दिन सुख संशुत जाहिं ॥३९(ख)॥

बिकसे सरसिज नाना रंगा । मधुर मुखर गुंजत बहु भृंगा ॥

बोलत जलकुक्कुट कलहंसा । प्रभु बिलोकि जनु करत प्रसंसा ॥

चक्रवाक वक खग समुदाई । देखत बनइ बरनि नहिं जाई ॥

सुंदर खग गन गिरा सुहाई । जात पथिक जनु लेत बोलाई ॥

ताल समीप मुनिन्ह गृह छाए । चहु दिसि कानन बिटप सुहाए ॥

चंपक वकुल कदंब तमाला । पाटल पनस परास रसाला ॥

नव पल्लव कुसुमित तरु नाना । चंचरीक पटली कर गाना ॥

सीतल मंद सुगंध सुभाऊ । संतत बहइ मनोहर बाऊ ॥

कुहू कुहू कोकिल धुनि करहीं । सुनिरव सरस ध्यान मुनि टरहीं ॥

दो०—फल भारन नमि बिटप सब रहे भूमि निअराइ ।

पर उपकारी पुरुष जिमि नवहिं सुसंपति पाइ ॥४०॥

देखि राम अति रुचिर तलावा । मज्जनु कीन्ह परम सुख पावा ॥

देखी सुंदर तरुवर छाया । बैठे अनुज सहित रघुराया ॥

तहँ पुनि सकल देव मुनि आए । अस्तुति करि निज धाम सिधाए ॥

बैठे परम प्रसन्न कृपाला । कहत अनुज सन कथा रसाला ॥

बिगबंत भगवंतहि देखी । नारद मन भा सोच बिसैषी ॥

मोर साप करि अंगीकारा। सहत राम नाना दुख भारा ॥
 ऐसे प्रभुहि बिलोकउँ जाई। पुनि न बनिहि अस अवसर आई ॥
 यह विचारि नारद कर बीना। गए जहाँ प्रभु सुख असीना ॥
 गावत राम चरित मृदु बानी। प्रेम सहित बहु भाँति बखानी ॥
 करत दंडवत लिए उठाई। राखे बहुत बार उर लाई ॥
 स्वागत पूँछि निकट बैठारे। लछिमन सादर चरन पखारे ॥

दो०—नाना विधि बिनती करि प्रभु प्रसन्न जियँ जानि ।

नारद बोले बचन तब जोरि सरोरुह पानि ॥४१॥

सुनहु उदार सहज रघुनायक। सुंदर अगम सुगम बर दायक ॥
 देहु एक बर मागउँ स्वामी। जद्यपि जानत अंतरजामी ॥
 जानहु मुनि तुम्ह मोर सुभाऊ। जन सन कबहुँ कि करउँ दुराऊ ॥
 ✓ कवन वस्तु असि प्रिय मोहि लागी। जो मुनिवर न सकहु तुम्ह मागी ॥
 जन कहुँ कछु अदेय नहिँ मोरें। अस बिस्वास तजहु जनि मोरें ॥
 तब नारद बोले हरषाई। अस बर मागउँ करउँ ढिठाई ॥
 जद्यपि प्रभु के नाम अनेका। श्रुति कह अधिक एक तैं एका ॥
 राम सकल नामन्ह ते अधिका। होउ नाथ अघ खग गन बधिका ॥

✓ दो०—राका रजनी भगति तव राम नाम सोइ सोम ।

अपर नाम उडगन बिमल बसहुँ भगत उर व्योम ॥४२(क)॥

एवमस्तु मुनि सन कहेउ कृपासिंधु रघुनाथ ।

तब नारद मन हरष अति प्रभु पद नाथ उ माथ ॥४२(ख)॥

अति प्रसन्न रघुनाथहि जानी । पुनि नारद बोले मृदु बानी ॥
 राम जबहिं प्रेरेउ निज माया । मोहेहु मोहि सुनहु रघुराया ॥
 तब बिबाह मै चाहउँ कीन्हा । प्रभु केहि कारन करै न दीन्हा ॥
 सुनु मुनि तोहि कहउँ सहरोसा । भजहिं जे मोहितजि सकल भरोसा
 करउँ सदा तिन्ह कै रखवारी । जिमि बालक राखइ महतारी ॥
 गह सिंसु बच्छ अनल अहि धाई । तहँ राखइ जननी अरगाई ॥
 प्रौढ़ भएँ तेहि सुत पर माता । प्रीति करइ नहिं पाछिलि बाता ॥
 मोरे प्रौढ़ तनय सम ग्यानी । बालक सुत सम दास अमानी ॥
 जनहि मोर बल निज बल ताही । दुहु कहँ काम क्रोध रिपु आही ॥
 यह विचारि पंडित मोहि भजहीं । पाएहुँ ग्यान भगति नहिं तजहीं ॥

दो०—काम क्रोध लोभादि मद प्रबल मोह कै धारि ।

तिन्ह महँ अति दारुन दुखद मायारूपी नारि ॥४३॥

सुनु मुनि कह पुरान श्रुति संता । मोह विपिन कहँ नारि बसंता ॥
 जप तप नेम जलश्रय झारी । होइ ग्रीषम सोषइ सब नारी ॥
 काम क्रोध मद मत्सर भेका । इन्हहि हरषप्रद वरषा एका ॥
 दुर्वासना कुमुद समुदाई । तिन्ह कहँ सरद सदा सुखदाई ॥
 धर्म सकल सरसीरुह बृंदा । होइ हिम तिन्हहि दहइ सुख मंदा ॥
 पुनि ममता जवास बहुताई । पलुहइ नारि सिसिर रितु पाई ॥
 पाप उलूक निकर सुखकारी । नारि निविड रजनी अँधियारी ॥
 बुधि बल सील सत्य सब मीना । बनसी सम त्रिय कहहिं प्रबीना ॥

दो०—अवगुन मूल सूलप्रद प्रमदा सब दुख खानि ।

ताते कीन्ह निवारन मुनि मैं यह जियँ जानि ॥४४॥

मुनि रघुपति के वचन सुहाए । मुनि तन पुलक नयन भरि आए ॥
कहहु कवन प्रभु कै असि रीती । सेवक पर ममता अरु प्रीती ॥
जे न भंजहिँ अस प्रभु भ्रम त्यागी । ग्यान रंक नर मंद अभागी ॥
पुनि सादर बोले मुनि नारद । सुनहु राम विग्यान विसारद ॥
संतन्ह के लच्छन रघुबीरा । कहहु नाथ भव भंजन भीरा ॥
सुनु मुनि संतन्ह के गुन कहँऊँ । जिन्ह ते मैं उन्ह कँ बस रहँऊँ ॥
षट विकार जित अनघ अकामा । अचल अकिंचन सुचि सुखधामा ॥
अमितबोध अनीह मितभोगी । सत्यसार कवि कोविद जोगी ॥
सावधान मानद मदहीना । धीर धर्म गति परम प्रवीना ॥

दो०—गुनागार संसार दुख रहित बिगत संदेह ।

तजि मम चरन सरोज प्रिय तिन्ह कहँ देह नगेह ॥४५॥

निज गुन श्रवन सुनत सकुचार्हीं । पर गुन सुनत अधिक हरषार्हीं ॥
सम सीतल नहिँ त्यागहिँ नीती । सरल सुभाउ सवहि सन प्रीती ॥
जप तप व्रत दम संजम नेमा । गुरु गोविंद विप्र पद प्रेमा ॥
श्रद्धा छमा मयत्री दाया । मुदिता मम पद प्रीति अमाया ॥
विरति विवेक विनय विग्याना । बोध जथारथ वेद पुराना ॥
दंभ मान मद करहिँ न काऊ । भूलिन देहिँ कुमारग पाऊ ॥
गावहिँ सुनहिँ सदा मम लीला । हेतु रहित परहित रत सीला ॥

मुनि सुनु साधुन्ह के गुन जेते । कहि न सकहिं सारद श्रुति तेते ॥

छं०—कहि सक न सारद सेष नारद सुनत पद पंकज गहे ।
 अस दीनबंधु कृपाल अपने भगत गुन निज मुख कहे ॥
 सिरु नाइ बारहिं बार चरनन्हि ब्रह्मपुर नारद गए ।
 ते धन्य तुलसीदास आस बिहाइ जे हरि रँग रँग ॥

दो०—रावनारि जसु पावन गावहिं सुनहिं जे लोग ।
 राम भगति दृढ़ पावहिं बिनु बिराग जप जोग ॥४६(क)॥
 दीप सिखा सम जुबति तन मन जनि होसि पतंग ।
 भजहि राम तजि काम मद करहि सदा सतसंग ॥४६(ख)॥

मासपारायण, चाईसवाँ विश्राम

इति श्रीमद्रामचरितमानसे सकलकलिकलुषविध्वंसने

तृतीयः सोपानः समाप्तः ।

(अरण्यकाण्ड समाप्त)




॥ श्रीरामाय नमः ॥

श्रीरामचरितमानस

किष्किन्धाकाण्ड



भगवान् रामकी सुग्रीवसे मैत्री



सखा सोच त्यागहु बल मोरें ।

सब विधि घटव काज मैं तोरें ॥

श्रीगणेशाय नमः

श्रीजानकीवल्लभो विजयते

श्रीरामचरितमानस

चतुर्थ सोपान
(किष्किन्धाकाण्ड)

श्लोक

कुन्देन्दीवरसुन्दरावतिबलौ विज्ञानधामाबुभौ
शोभाढ्यौ वरधन्विनौ श्रुतिनुतौ गोविप्रवृन्दप्रियौ ।
मायामानुषरूपिणौ रघुवरौ सद्धर्मवर्मौ हितौ
सीतान्वेषणतत्परौ पथिगतौ भक्तिप्रदौ तौ हि नः ॥ १ ॥
ब्रह्माग्नीधिसमुद्भवं कलिमलप्रध्वंसनं चान्ययं
श्रीमच्छम्भुमुखेन्दुसुन्दरवरैः संशोभितं सर्वदा ।

संसारामयमेषजं सुखकरं श्रीजानकीजीवनं
धन्यास्ते कृतिनः पिबन्ति सततं श्रीरामनामामृतम् ॥ २ ॥

सो०—मुक्ति जन्म महि जानि ग्यान खानि अघ हानि कर ।
जहँ बस संभु भवानि सो कासी सेइअ कस न ॥
जरत सकल सुर बृंद बिषम गरल जेहि पान किय ।
तेहि न भजसि मन मंद को कृपाल संकर सरिस ॥

आगें चले बहुरि रघुराया । रिध्यमूक पर्वत निअराया ॥
तहँ रह सचिव सहित सुग्रीवा । आवत देखि अतुल बल सींवा ॥
अति सभीत कह सुनु हनुमाना । पुरुष जुगल बल रूप निधाना ॥
धरि बटु रूप देखु तैं जाई । कहेसु जानि जियँ सयन बुझाई ॥
पठए बालि होहिं मन मैला । भागौं तुरत तजौं यह सैला ॥
बिप्र रूप धरि कपि तहँ गयऊ । माथ नाइ पूछत अस भयऊ ॥
को तुम्ह स्यामल गौर सरीरा । छत्री रूप फिरहु वन बीरा ॥
कठिन भूमि कोमल पद गामी । कवन हेतु विचरहु वन स्वाभी ॥
मृदुल मनोहर सुंदर गाता । सहत दुसह वन आतप बाता ॥
की तुम्ह तीनि देव महँ कोऊ । नर नारायन की तुम्ह दोऊ ॥
दो०—जग कारन तारन / भव भंजन धरनी भार ।

की तुम्ह अखिल भुवन पति लीन्ह मनुज अवतार ॥ १ ॥

कोसलेस दसरथ के जाए । हम पितु वचन मानि बन आए ॥
नाम राम लछिमन दोउ भाई । संग नारि सुकुमारि सुहाई ॥

इहाँ हरी निसिचर व्रैदेही । विप्र फिरहिं हम खोजत तेही ॥
 आपन चरित कहा हम गाई । कहहु विप्र निज कथा बुझाई ॥
 प्रभु पहिचानि परेउ गहि चरना । सो सुख उमा जाइ नहिं बरना ॥
 पुलकिततन मुख आव न वचना । देखत रुचिर वेष कै रचना ॥
 पुनि धीरजु धरि अस्तुति कीन्ही । हरष हृदयँ निज नाथहि चीन्ही
 मोर न्याउ मैं पूछा साई । तुम्ह पूछहु कस नर की नाई ॥
 तव माया बस फिरउँ भुलाना । ता ते मैं नहिं प्रभु पहिचाना ॥

दो०—एकु मैं मंड मोहबस कुटिल हृदय अग्यान ।

पुनि प्रभु मोहि बिसारेउ दीनबंधु भगवान ॥ २ ॥

जदपि नाथ बहु अवगुन मोरें । सेवक प्रभुहि परै जनि मोरें ॥
 नाथ जीव तव मायाँ मोहा । सो निस्तरइ तुम्हारेहिं छोहा ॥
 ता पर मैं रघुबीर दोहाई । जानउँ नहिं कछु भजन उपाई ॥
 सेवक सुत पति मातु भरोसैं । रहइ असोच बनइ प्रभु पोसैं ॥
 अस कहि परेउ चरन अकुलाई । निज तनु प्रगटि प्रीति उर छाई ॥
 तव रघुपति उठाइ उर लावा । निज लोचन जल सींचि जुड़ावा ॥
 सुनु कपि जियँ मानसि जनि ऊना । तैं मम प्रिय लछिमन ते दूना ॥
 समदरसी मोहि कह सत्र कोऊ । सेवक प्रिय अनन्य गति सोऊ ॥

दो०—सो अनन्य जाकें असि मति न टरइ हनुमंत ।

मैं सेवक सचराचर रूप स्वामि भगवंत ॥ ३ ॥

देखि पवनसुत पति अनुकूल । हृदय हरष वीत्ती सत्र सूला ॥

नाथ सैल पर कपिपति रहई। सो सुग्रीव दास तव अहई ॥
 तेहि सन नाथ मयत्री कीजे। दीन जानि तेहि अभय करीजे ॥
 सो सीता कर खोज कराइहि। जहँ तहँ मरकट कोटि पठाइहि ॥
 एहि विधि सकल कथा समुझाई। लिए दुऔ जन पीठि चढ़ाई ॥
 जब सुग्रीवँ राम कहूँ देखा। अतिसय जन्म धन्य करि लेखा ॥
 सादर मिलेउ नाइ पद माथा। भेंटेउ अनुज सहित रघुनाथा ॥
 कपि कर मन विचार एहि रीती। करिहहिं विधि मो सन ए प्रीती ॥
 दो०—तब हनुमंत उभय दिसि की सब कथा सुनाइ ।

पावक साखी देइ करि जोरो प्रीति दृढ़ाइ ॥ ४ ॥

कीन्हि प्रीति कछु बीच न राखा। लछिमन राम चरित सब भाषा ॥
 कह सुग्रीव नयन भरि वारी। मिलिहि नाथ भिथिलेस कुमारी ॥
 मंत्रिन्ह सहित इहाँ एक वारा। बैठ रहेउँ मैं करत विचारा ॥
 गगन पंथ देखी मैं जाता। परवस परी बहुत बिलपाता ॥
 राम राम हा राम पुकारी। हमहि देखि दीन्हेउ पट डारी ॥
 मागा राम तुरत तेहिं दीन्हा। पट उर लाइ सोच अति कीन्हा ॥
 कह सुग्रीव सुनहु रघुवीरा। तजहु सोच मन आनहु धीरा ॥
 सब प्रकार करिहउँ सेवकाई। जेहि विधि मिलिहि जानकी आई ॥
 दो०—सखा बचन सुनि हरषे कृपासिंधु बलसोंव ।

कारन कवन बसहु बन मोहि कहहु सुग्रीव ॥ ५ ॥

नाथ वालि अरु मैं द्वौ भाई। प्रीति रही कछु वरनि न जाई ॥

मय सुत मायावी तेहि नाऊँ। आवा सो प्रभु हमरें गाऊँ॥
 अर्ध राति पुर द्वार पुकारा। बाली रिपु बल सहै न पारा॥
 धावा बालि देखि सो भागा। मैं पुनि गयउँ बंधु सँग लगा॥
 गिरिबर गुहाँ पैठ सो जाई। तब वाली मोहि कहा बुझाई॥
 परिखेसु मोहि एक पखवारा। नहिं आवौं तब जानेसु मारा॥
 मास दिवस तहँ रहेउँ खरारी। निसरी रुधिर धार तहँ भारी॥
 बालि हतेसि मोहि मारिहि आई। सिला देइ तहँ चलेउँ पराई॥
 मंत्रिन्ह पुर देखा बिनु साई। दीन्हेउ मोहि राज वरिआई॥
 बाली ताहि मारि गृह आवा। देखि मोहि जियँ भेद बढ़ावा॥
 रिपु सम मोहि मारेसि अति भारी। हरि लीन्हेसि सर्वसु अरु नारी॥
 तार्के भय रघुवीर कृपाला। सकल भुवन मैं फिरेउँ बिहाला॥
 इहाँ साप बस आवत नाहीं। तदपि समीत रहउँ मन माहीं॥
 सुनि सेवक दुख दीनदयाला। फरकि उठीं द्वै भुजा विसाला॥
 दो०—सुनु सुग्रीव मारिहउँ बालिहि एकहिँ बान ।

ब्रह्म रुद्र सरनागत गएँ न उबरिहिँ प्रान ॥ ६ ॥

✓ जे न मित्र दुख होहिँ दुखारी। तिन्हहि बिलोकत पातक भारी॥
 निज दुख गिरि सम रज करि जाना। मित्रक दुख रज मेरु समाना॥
 जिन्ह कें असि मति सहज न आई। ते सठ कत हठि करत मितआई॥
 कुपथ निवारि सुपंथ चलावा। गुन प्रगटै अवगुनन्हि दुरावा॥
 देत लेत मम संक न बसई। बल अनुमान सदा दित करई॥

विपति काल कर सतगुन नेहा । श्रुति कह संत मित्र गुन एहा ॥
 आगें कह मृदु वचन बनाई । पाछें अनहित मन कुटिलाई ॥
 जाकर चित अहि गति सम भाई । अस कुमित्र परिहरेहिं भलाई ॥
 ✓ सेवक सठ नृप कृपन कुनारी । कपटी मित्र सूल सम चारी ॥
 सखा सोच त्यागहु बल मोरें । सब विधि घटव काज मैं तोरें ॥
 कह सुग्रीव सुनहु रघुवीरा । बालि महाबल अतिरनधीरा ॥
 दुंदुभि अस्थि ताल देखराए । विनु प्रयास रघुनाथ ढहाए ॥
 देखि अमित बल बाढ़ी प्रीती । बालि बधव इन्ह भइ परतीती ॥
 बार बार नावइ पद सीसा । प्रभुहि जानि मन हरष कपीसा ॥
 उपजा ग्यान वचन तब बोला । नाथ कृपाँ मन भयउ अलोला ॥
 सुख संपति परिवार बढ़ाई । सब परिहरि करिहउँ सेवकाई ॥
 ए सब रामभगति के बाधक । कहहिं संत तव पद अवराधक ॥
 सत्रु मित्र सुख दुख जग माहीं । माया कृत परमारथ नाहीं ॥
 बालि परम हित जासु प्रसादा । मिलेहु राम तुम्ह समन विषादा ॥
 सपनैं जेहि सन होइ लराई । जागें समुझत मन सकुचाई ॥
 अब प्रभु कृपा करहु एहि भाँती । सब तजि भजनु करौं दिन राती ॥
 सुनि विराग संजुत कपि वानी । बोले विहँसि राम धनुपानी ॥
 जो कछु कहेहु सत्य सब सोई । सखा वचन मम मृषा न होई ॥
 नट मरकट इव सबहि नचावत । राम खगेस बेद अस गावत ॥
 लै सुग्रीव संग रघुनाथा । चले चाप सायक गहि हाथा ॥
 तब रघुपति सुग्रीव पठावा । गर्जेसि जाइ निकट बल पावा ॥

सुनत बालि क्रोधातुर धावा । गहि कर चरन नारिसमुझावा ॥
 सुनु पति जिन्हहि मिलेउ सुग्रीवा । ते द्वौ बंधु तेज बल सींवा ॥
 कोसलेस सुत लछिमन रामा । कालहु जीति सकहि संग्रामा ॥
 दो०—कह बाली सुनु भीरु प्रिय समदरसी रघुनाथ ।

जौं कदाचि मोहि मारहि तौ पुनि होउँ सनाथ ॥ ७ ॥
 अस कहि चला महा अभिमानी । तृन समान सुग्रीवहि जानी ॥
 भिरे उभौ बाली अति तर्जा । मुठिका मारि महाधुनि गर्जा ॥
 तब सुग्रीव विकल होइ भागा । मुष्टि प्रहार बज्र सम लगा ॥
 मैं जो कहा रघुवीर कृपाला । बंधु न होइ मोर यह काला ॥
 एकरूप तुम्ह भ्राता दोऊ । तेहि भ्रम तैं नहि मारेउँ सोऊ ॥
 कर परसा सुग्रीव सरीरा । तनु भा कुलिस गई सब पीरा ॥
 मेली कंठ सुमन कै माला । पठवा पुनि बल देइ बिसाला ॥
 पुनि नाना विधि भई लराई । बिटप ओट देखहि रघुराई ॥
 दो०—बहु छल बल सुग्रीव कर हियँ हारा भय मानि ।

मारा बालि राम तब हृदय माझ सर तानि ॥ ८ ॥
 परा विकल महि सर के लागें । पुनि उठि बैठ देखि प्रभु आगें
 स्याम गात सिर जटा बनाएँ । अरुन नयन सर चाप चढ़ाएँ ॥
 पुनि पुनि चितइ चरन चित दीन्हा । सुफल जन्म माना प्रभु चीन्हा
 हृदयँ प्रीति मुख बचन कठोरा । बोला चितइ राम की ओरा ॥
 धर्म हेतु अवतरहु गोसाई । मारहु मोहि ब्याध की नाई ॥

मैं बैरी सुग्रीव पिआरा । अबगुन कवन नाथ मोहि मारा ॥
 अनुज बधू भगिनी सुत नारी । सुनु सठ कन्या सम ए चारी ॥
 इन्हहि कुदृष्टि बिलोकइ जोई । ताहि बधैं कछु पाप न होई ॥
 मूढ़ तोहि अतिसय अभिमाना । नारि सिखावन करसि न काना ॥
 मम भुजबल आश्रित तेहि जानी । मारा चहसि अधम अभिमानी ॥
 दो०—सुनहु राम स्वामी सन चल न चातुरी मोरि ।

प्रभु अजहूँ मैं पापी अंतकाल गति तोरि ॥ ९ ॥
 सुनत राम अति कोमल बानी । बालि सीस परसेउ निज पानी ॥
 अचल करौं तनु राखहु प्राणा । बालि कहा सुनु कृपानिधाना ॥
 जन्म जन्म मुनि जतनु कराहीं । अंत राम कहि आवत नाहीं ॥
 जासु नाम बल संकर कासी । देत सबहि सम गति अविनासी ॥
 मम लोचन गोचर सोइ आवा । बहुरि कि प्रभु अस बनिहि बनावा ॥
 छं०—सो नयन गोचर जासु गुन नित नेति कहि श्रुति गावहीं ।
 जिति पवन मन गो निरस करि मुनि ध्यान कबहुँक पावहीं ॥
 मोहि जानि अति अभिमान बस प्रभु कहेउ राखु सरिरही ।
 अस कवन सठ हठि काटि सुरतरु बारि करिहि बदूरही ॥ १ ॥
 अब नाथ करि करुना बिलोकहु देहु जो बर मागऊँ ।
 जेहि जोनि जन्मौं कर्म बस तहँ राम पद अनुरागऊँ ॥
 यह तनय मम सम बिनयबल कल्याणप्रद प्रभु लीजिये ।
 गहि बाँह सुर नर नाह आपन दास अगद कीजिये ॥ २ ॥

दो०—राम चरन इद प्रीति करि बालि कीन्ह तनु त्याग ।

सुमन माल जिमि कंठ ते गिरत न जानइ नाग ॥१०॥

राम बालि निज धाम पठावा । नगर लोग सब ब्याकुल धावा ॥

नाना विधि बिलाप कर तारा । छूटे केस न देह सँभारा ॥

तारा बिकल देखि रघुराया । दीन्ह ग्यान हरि लीन्ही माया ॥

छिति जल पावक गगन समीरा । पंच रचित अति अधम सरीरा ॥

प्रगट सो तनु तव आगें सोवा । जीव नित्य केहि लागि तुम्ह रोवा ॥

उपजा ग्यान चरन तब लागी । लीन्हेसि परम भगति वर मागी ॥

उमा दारु जोषित की नाई । सबहि नचावत रामु गोसाई ॥

तब सुग्रीवहि आयसु दीन्हा । मृतक कर्म विधिवत सब कीन्हा ॥

राम कहा अनुजहि समुझाई । राज देहु सुग्रीवहि जाई ॥

रघुपति चरन नाइ करि माथा । चले सकल प्रेरित रघुनाथा ॥

दो०—लछिमन तुरत बोलाए पुरजन बिप्र समाज ।

राज दीन्ह सुग्रीव कहँ अंगद कहँ जुबराज ॥११॥

उमा राम सम हित जग माहीं । गुरु पितु मातु बंधु प्रभु नाहीं ॥

सुर नर मुनि सब कै यह रीती । स्वारथ लागि करहि सब प्रीती ॥

बालि त्रास ब्याकुल दिन राती । तन बहु व्रन चिंताँ जरछाती ॥

सोइ सुग्रीव कीन्ह कपिराऊ । अति कृपाल रघुवीर सुभाऊ ॥

जानतहुँ अस प्रभु परिहरहीं । काहे न बिपति जाल नर परहीं ॥

पुनि सुग्रीवहि लीन्ह बोलाई । बहु प्रकार नृपनीति सिखाई ॥

कह प्रभु सुनु सुग्रीव हरीसा। पुर न जाउँ दस चारि बरीसा ॥
 गत ग्रीष्म वरषा रितु आई। रहिहउँ निकट सैल पर छाई ॥
 अंगद सहित करहु तुम्ह राजू। संतत हृदयँ धरेहु मम काजू ॥
 जब सुग्रीव भवन फिरि आए। रामु प्रवरषन गिरि पर छाए ॥
 दो०—प्रथमहिं देवन्ह गिरि गुहा राखेउ रुचिर बनाइ ।

राम कृपानिधि कछु दिन बास करहिंगे आइ ॥१२॥
 सुंदर बन कुसुमित अति सोभा। गुंजत मधुप निकर मधु लोभा ॥
 कंद मूल फल पत्र सुहाए। भए बहुत जब ते प्रभु आए ॥
 देखि मनोहर सैल अनूपा। रहेतहँ अनुज सहित सुर भूपा ॥
 मधुकर खग मृग तनु धरि देवा। करहिं सिद्ध मुनि प्रभु कै सेवा ॥
 मंगलरूप भयउ बन तव ते। कीन्ह निवास रमापति जब ते ॥
 फटिक सिला अति सुभ्र सुहाई। सुख आसीन तहाँ द्वौ भाई ॥
 कहत अनुज सन कथा अनेका। भगति विरति नृपनीति विवेका ॥
 वरषा काल मेघ नभ छाए। गरजत लागत परम सुहाए ॥

✓ दो०—लछिमन देखु मोर गन नाचत बारिद पेखि ।

गृही विरति रत हरष जस बिष्णुभगत कहूँ देखि ॥१३॥
 घन घमंड नभ गरजत घोरा। प्रिया हीन डरपत मन मोरा ॥
 दामिनि दमक रह न घन माहीं। खल कै प्रीति जथा थिर नाहीं ॥
 बरषहिं जलद भूमि निअराएँ। जथा नवहिं बुध बिद्या पाएँ ॥
 बूँद अघात सहहिं गिरि कैसैं। खल के बचन संत सह जैसैं ॥

छुद्र नदीं भरि चलीं तोराई। जस थोरेहुँ धन खल इतराई॥
भूमि परत भा ढावर पानी। जनु जीवहि माया लपटानी॥
समिति समिति जल भरहिं तलावा। जिमि सदगुन सजन पहिं आवा
सरिता जल जलनिधि महुँ जाई। होइ अचल जिमि जिव हरि पाई॥

दो०—हरित भूमि तृन संकुल समुझि परहिं नहिं पंथ ।

जिमि पाखंड बाद तें गुप्त होहिं सदग्रंथ ॥१४॥

दादुर धुनि चहु दिसा सुहाई। वेद पढ़हिं जनु वटु समुदाई॥
नव पल्लव भए बिटप अनेका। साधक मन जस मिलें विवेका॥
अर्क जवास पात बिनु भयऊ। जस सुराज खल उद्यम गयऊ॥
खोजत कतहुँ मिलइ नहिं धूरी। करइ क्रोध जिमि धरमहि दूरी॥
ससि संपन्न सोह महि कैसी। उपकारी कै संपति जैसी॥
निसि तम धन खद्योत विराजा। जनु दंभिन्ह करमिला समाजा॥
महावृष्टि चलि फूटि किआरीं। जिमि सुतंत्र भएँ विगरहिं नारीं॥
कृषी निरावहिं चतुर किसाना। जिमि बुध तजहिं मोह मद माना॥
देखिअत चक्रवाक खग नाहीं। कलिहि पाइ जिमि धर्म पराहीं॥
ऊपर वरषइ तृन नहिं जामा। जिमि हरिजन हियँ उपज न कामा॥
विविध जंतु संकुल महि भ्राजा। प्रजा बाद जिमि पाइ सुराजा॥
जहँ तहँ रहे पथिक थकि नाना। जिमि इंद्रिय गन उपजें ग्याना॥

दो०—कबहुँ प्रबल बह मारुत जहँ तहँ मेघ बिलाहि ।

जिमि कपूत के उपजें कुल सद्धर्म नसाहि ॥१५(क)॥

कबहुँ दिवस महँ निबिड़ तम कबहुँक प्रगाट पतंग ।

बिनसइ उपजइ ग्यान जिमि पाइ कुसंग सुसंग ॥ १५ (ख) ॥

बरषा विगत सरद रितु आई । लछिमन देखहु परम सुहाई ॥
 फूलें कास सकल महि छाई । जनु बरषाँ कृत प्रगाट बुढ़ाई ॥
 उदित अगस्ति पंथ जल सोषा । जिमि लोभहि सोषइ संतोषा ॥
 सरिता सर निर्मल जल सोहा । संत हृदय जस गत मद मोहा ॥
 रस रस सूख सरित सर पानी । ममता त्याग करहिं जिमि ग्यानी
 जानि सरद रितु खंजन आए । पाइ समय जिमि सुकृत सुहाए ॥
 पंक न रेनु सोह असि धरनी । नीति निपुन नृप कै जसि करनी ॥
 जल संकोच विकल भई मीना । अबुध कुटुंबी जिमि धनहीना ॥
 बिनु घन निर्मल सोह अकासा । हरिजन इव परिहरि सब आसा ॥
 कहूँ कहूँ बृष्टि सारदी थोरी । कोउ एक पाव भगति जिमि मोरी ॥

दो०—चले हरषि तजि नगर नृप तापस बनिक भिखारि ।

जिमि हरि भगति पाइ श्रम तजहिं आश्रमी चारि ॥ १६ ॥

सुखी मीन जे नीर अगाधा । जिमि हरि सरन न एकउ बाधा ॥
 फूलें कमल सोह सर कैसा । निर्गुन ब्रह्म सगुन भएँ जैसा ॥
 गुंजत मधुकर मुखर अनूपा । सुंदर खग रव नाना रूपा ॥
 चक्रबाक मन दुख निसि पेखी । जिमि दुर्जन पर संपति देखी ॥
 चातक रटत तृषा अति ओही । जिमि सुख लहइ न संकर दोही ॥
 सरदातप निसि ससि अपहरई । संत दरस जिमि पातक दरई ॥

देखि इंदु चकोर समुदाई । चितवहिं जिमि हरिजन हरि पाई ॥
मसक दंस बीते हिम त्रासा । जिमि द्विज द्रोह किएँ कुल नासा ॥

दो०—भूमि जीव संकुल रहे गए सरद रितु पाइ ।

सदगुर मिलें जाहिं जिमि संसय भ्रम समुदाइ ॥१७॥

बरषा गत निर्मल रितु आई । सुधि न तात सीता कै पाई ॥
एक बार कैसेहुँ सुधि जानौं । कालहु जीति निमिष महुँ आनौं ॥
कहतहुँ रहउ जौ जीवति होई । तात जतन करि आनउँ सोई ॥
सुग्रीवहुँ सुधि मोरि बिसारी । पावा राज कोस पुर नारी ॥
जेहिं सायक मारा मैं बाली । तेहिं सर हतौं मूढ़ कहँ काली ॥
जासु कृपाँ छूटहिं मद मोहा । ता कहुँ उमा कि सपनेहुँ कोहा ॥
जानहिं यह चरित्र मुनि ग्यानी । जिन्ह रघुबीर चरन रति मानी ॥
लछिमन क्रोधवंत प्रसु जाना । धनुष चढ़ाइ गहे कर बाना ॥

दो०—तब अनुजहि समुझावा रघुपति करुना सीव ।

भय देखाइ लै आवहु तात सखा सुग्रीव ॥१८॥

इहाँ पवनसुत हृदयँ विचारा । राम काज सुग्रीवँ बिसारा ॥
निकट जाइ चरनन्हि सिरु नावा । चारिहु बिधि तेहि कहि समुझावा ॥
सुनि सुग्रीवँ परम भय माना । बिषयँ मोर हरि लीन्हेउ ग्याना ॥
अब मारुतसुत दूत समूहा । पठवहु जहँ तहँ बानर जूहा ॥
कहतु पावस महुँ आवव जोई । मोरें कर सा कर बध होई ॥
तब हनुमंत बोलाए दूता । सब कर करि सनमान बहुता ॥

भय अरु प्रीति नीति देखराई । चले सकल चरनन्हि सिर नाई ॥
 एहि अवसर लछिमन पुर आए । क्रोध देखि जहँ तहँ कांपे धाए ॥
 दो०—धनुष चढ़ाइ कहा तब जारि करउँ पुर छार ।

व्याकुल नगर देखि तब आयउ बालिकुमार ॥ १९ ॥

चरन नाइ सिरु बिनती कीन्ही । लछिमन अभय बाँह तेहि दीन्ही ॥
 क्रोधवंत लछिमन मुनि काना । कह कपीस अति भयँ अकुलाना ॥
 सुनु हनुमंत संग लै तारा । करि बिनती समुझाउ कुमारा ॥
 तारा सहित जाइ हनुमाना । चरन बंदि प्रभु सुजस बखाना ॥
 करि बिनती मंदिर लै आए । चरन पखारि पलंग बैठाए ॥
 तब कपीस चरनन्हि सिरु नावा । गहि भुज लछिमन कंठ लगावा ॥
 नाथ बिषय सम मद कछु नाहीं । मुनि मन मोह करइ छन माहीं ॥
 सुनत बिनती बचन सुख पावा । लछिमन तेहि बहु बिधि समुझावा
 पवन तनय सब कथा सुनाई । जेहि बिधि गए दूत समुदाई ॥

दो०—हरषि चले सुग्रीव तब अंगदादि कपि साथ ।

रामानुज आगें करि आए जहँ रघुनाथ ॥ २० ॥

नाइ चरन सिरु कह कर जोरी । नाथ मोहि कछु नाहिन खोरी ॥
 अतिसय प्रबल देव तब माया । छूटइ राम करहु जौं दाया ॥
 बिषय बस्य सुरनर मुनि स्वामी । मैं पावँर पसु कपि अति कामी ॥

नारि नखन सर न्नाहि न लाया । घोर क्रोध तम निति जो जाग्य ॥

लोभ पाँस जेहिं गर न बँधायो । सो नर तुम्ह समान रघुराया ॥

यह गुन साधन तैं नहिं होई । तुम्हरी कृपाँ पाव कोइ कोई ॥
तब रघुपति बोले मुसुकाई । तुम्ह प्रिय मोहि भरत जिमि भाई ॥
अब सोइ जतनु करहु मन लाई । जेहि बिधि सीता कै सुधि पाई ॥

दो०—एहि बिधि होत बतकही आए बानर जूथ ।

नाना बरन सकल दिसि देखिअ कीस बरूथ ॥२१॥

बानर कटक उमा मै देखा । सो मूरुख जो करन चह लेखा ॥
आइ राम पद नावहिं माया । निरखि बदन सव होहिं सनाया ॥
अस कपि एक न सेना माहीं । राम कुसल जेहि पूछी नाहीं ॥
यह कछु नहिं प्रभु कइ अधिकाई । विस्वरूप व्यापक रघुराई ॥
ठाढ़े जहँ तहँ आयसु पाई । कह सुग्रीव सबहि समुझाई ॥
राम काजु अरु मोर निहोरा । बानर जूथ जाहु चहुँ ओरा ॥
जनकसुता कहँ खोजहु जाई । मास दिवस महँ आएहु भाई ॥
अवधि मेटि जो बिनु सुधि पाएँ । आवइ बनिहि सो मोहि मराएँ ॥

दो०—बचन सुनत सब बानर जहँ तहँ चले तुरंत ।

तब सुग्रीवँ बोलाए अंगद नल हनुमंत ॥२२॥

सुनहु नील अंगद हनुमाना । जामवंत मतिधीर सुजाना ॥
सकल सुभट मिलि दन्छिन जाहू । सीता सुधि पूँछेहु सब काहू ॥
मन क्रम बचन सो जतन बिचारेहु । रामचंद्र कर काजु सँवारेहु ॥

मानु पीढ़ि सेइअ उर आग्री । स्वामिहि सर्व पावछल त्यागी ॥
तजि माया सेइअ परलोका । मिटहिं सकल भवसंभव सोका ॥

देह घरे कर यह फलु भाई । भजिअ राम सब काम बिहाई ॥

सोइ गुनग्य सोई बड़ भागी । जो रघुवीर चरन अनुरागी ॥

आयसु मागि चरन सिरु नाई । चले हरषि सुमिरत रघुराई ॥

✓ पाछें पवन तनय सिरु नावा । जानि काज प्रभु निकट बोलावा ॥

✓ परसा सीस सरोरुह पानी । करमुद्रिका दीन्हि जन जानी ॥

बहु प्रकार सीतहि समुझाएहु । कहि बल बिरह बेगि तुम्ह आएहु ॥

हनुमत जन्म सुफल करि माना । चलेउ हृदयँ धरि कृपा निधाना ॥

जद्यपि प्रभु जानत सब बाता । राजनीति राखत सुरत्राता ॥

दो०—चले सकल बन खोजत सरिता सर गिरि खोह ।

राम काज लयलीन मन बिसरा तन कर छोह ॥२३॥

कतहुँ होइ निसिचर सैं भेटा । प्रान लेहिँ एक एक चपेटा ॥

बहु प्रकार गिरि कानन हेरहिं । कोउ मुनि मिलइ ताहि सब घेरहिं

लागि तृषा अतिसय अकुलाने । मिलइ न जल घन गहन भुलाने ॥

मन हनुमान कीन्ह अनुमाना । मरन चहत सब बिनु जल पाना ॥

चढ़ि गिरि सिखर चहुँ दिसि देखा । भूमि बिबर एक कौतुक पेखा ॥

चक्रवाक बक हंस उड़ाहीं । बहुतक खग प्रबिसहिं तेहि माहीं ॥

गिरि ते उतरि पवनसुत आवा । सब कहूँ लै सोइ बिबर देखावा ॥

आगें कै हनुमंतहि लीन्हा । पैठे बिबर बिलंबु न कीन्हा ॥

CC-0. Mumukshu Bhawan Varanasi Collection. Digitized by eGangotri

दो०—झीख जाइ उपवन बर सर विपसित धनु कंज ।

मंदिर एक रुचिर तहँ बैठि नारि तप पुंज ॥२४॥

दूरि ते ताहि सबन्हि सिरु नावा । पूछें निज वृत्तांत सुनावा ॥
 तेहि तव कहा करहु जल पाना । खाहु सुरस सुंदर फल नाना ॥
 मजनु कीन्ह मधुर फल खाए । तासु निकट पुनि सब चलि आए
 तेहि सब आपनि कथा सुनाई । मैं अब जाव जहाँ रघुराई ॥
 मूदहु नयन विवर तजि जाहू । पैहहु सीतहि जनि पछिताहू ॥
 नयन मूदि पुनि देखहिं बीरा । ठाढ़े सकल सिंधु कें तीरा ॥
 सो पुनि गई जहाँ रघुनाथा । जाइ कमल पद नाएसि माथा ॥
 नाना भाँति विनय तेहि कीन्ही । अनपायनी भगति प्रभु दीन्ही ॥
 दो०—बदरीबन कहूँ सो गई प्रभु अग्या धरि सीस ।

उर धरि राम चरन जुग जे बंदत अज ईस ॥२५॥

इहाँ विचारहिं कपि मन माहीं । बीती अवधि काज कछु नाहीं ॥
 सब मिलि कहहिं परस्पर बाता । विनु सुधि लएँ करव का भ्राता ॥
 कह अंगद लोचन भरि बारी । दुहुँ प्रकार भइ मृत्यु हमारी ॥
 इहाँ न सुधि सीता कै पाई । उहाँ गएँ मारिहि कपिराई ॥
 पिता बधे पर मारत मोही । राखा राम निहोर न ओही ॥
 पुनि पुनि अंगद कह सब पाहीं । मरन भयउ कछु संसय नाहीं ॥
 अंगद वचन सुनत कपि बीरा । बोलि न सकहिं नयन बह नीरा ॥
 छन एक सोच मगन होइ रहे । पुनि अस वचन कहत सब भए ॥
 हम सीता कै सुधि लीन्हें विना । नहिं जैहैं जुवराज प्रवीना ॥
 अस कहि लवन सिंधु तट जाई । बैठे कपि सब दर्भ डसाई ॥

जामवंत अंगद दुख देखी । कहीं कथा उपदेस बिसेषी ॥
 तात राम कहूँ नर जनि मानहु । निर्गुन ब्रह्म अजित अज जानहु ॥
 हम सब सेवक अति बड़भागी । संतत सगुन ब्रह्म अनुरागी ॥
 दो०—निज इच्छाँ प्रभु अवतरइ सुर महि गो द्विज लागि ।

सगुन उपासक संग तहँ रहहिँ मोच्छ सब त्यागि ॥ २६ ॥

✓ एहि विधि कथा कहहिँ बहु भाँती । गिरि कंदराँ सुनी संपाती ॥
 बाहेर होइ देखि बहु कीसा । मोहि अहार दीन्ह जगदीसा ॥
 आजु सबहि कहँ भच्छन करऊँ । दिन बहु चले अहार विनु मरऊँ ॥
 कबहुँ न मिल भरि उदर अहारा । आजु दीन्ह विधि एकहिँ बारा ॥
 डरपे गीध वचन सुनि काना । अब भा मरन सत्य हम जाना ॥
 कपि सब उठे गीध कहँ देखी । जामवंत मन सोच बिसेषी ॥
 ✓ कह अंगद विचारि मन माहीं । धन्य जटायू सम कोउ नाहीं ॥
 राम काज कारन तनु त्यागी । हरि पुर गयउ परम बड़भागी ॥
 सुनि खग हरष सोक जुत बानी । आवा निकट कपिन्ह भय मानी ॥
 तिन्हहि अभय करि पूछेसि जाई । कथा सकल तिन्ह ताहि सुनाई ॥
 सुनि संपाति बंधु कै करनी । रघुपति महिमा बहुविधि बरनी ॥

✓ दो०—मोहि लै जाहु सिंधुतट देउँ तिलांजलि ताहि ।

वचन सहाइ करबि मैं पैहहु खोजहु जाहि ॥ २७ ॥

अनुज किया करि सागर तीरा । कहि निज कथा सुनहु कपि वीरा ॥
 हम दौ बंधु प्रथम तरुनाई । गगन गए रवि निकट उड़ाई ॥

तेज न सहि सक सो फिरि आवा । मैं अभिमानी रवि निअरावा ॥
जरे पंख अति तेज अपारा । परेउँ भूमि करि घोर चिकारा ॥
मुनि एक नाम चंद्रमा ओही । लागी दया देखि करि मोही ॥
बहु प्रकार तेहिं ग्यान सुनावा । देह जनित अभिमान छड़ावा ॥
त्रेता ब्रह्म मनुज तनु धरिही । तासु नारि निसिचर पति हरिही ॥
तासु खोज पठइहि प्रभु दूता । तिन्हहि मिलें तैं होव पुनीता ॥
जमिहहि पंख करसि जनि चिंता । तिन्हहि देखाइ देहेसु तैं सीता ॥
मुनि कइ गिरा सत्य भइ आजू । सुनि मम वचन करहु प्रभु काजू ॥
गिरि त्रिकूट ऊपर बस लंका । तहँ रह रावन सहज असंका ॥
तहँ असोक उपवन जहँ रहई । सीता बैठि सोच रत अहई ॥
दो०—मैं देखउँ तुम्ह नाहीं गीधहि दृष्टि अपार ।

बूढ़ भयउँ न त करतेउँ कछुक सहाय तुम्हार ॥ २८ ॥

जो नाघइ सत जोजन सागर । करइ सो राम काज मति आगर ॥
मोहि बिलोकि धरहु मन धीरा । राम कृपाँ कस भयउ सरीरा ॥
पापिउ जा कर नाम सुमिरहीं । अति अपार भवसागर तरहीं ॥
तासु दूत तुम्ह तजि कदराई । राम हृदयँ धरि करहु उपाई ॥
अस कहि गरुड़ गीध जब गयऊ । तिन्ह कै मन अति बिसमय भयऊ ॥
निज निज बल सब काहूँ भाषा । पार जाइ कर संसय राखा ॥
जरठ भयउँ अब कहइ रिलेसा । नहिं तन रहा प्रथम बल लेसा ॥
जबहिं त्रिविक्रम गए खरारी । तब मैं तरुन रहेउँ बल भारी ॥

दो०—बलि बाँधत प्रभु बाढ़ेउ सो तनु वरनि न जाइ ।

उभय घरी महुँ दीन्हैं सात प्रदच्छिन धाइ ॥२९॥

✓ अंगद कहइ जाउँ मैं पारा । जियँ संसय कछु फिरती वारा ॥

जामवंत कह तुम्ह सब लायकं । पठइअ किमि सबही कर नायक ॥

✓ कहइ रीछपति सुनु हनुमाना । का चुप साधि रहेहु बलवाना ॥

पवन तनय बल पवन समाना । बुधि बिबेक बिग्यान निधाना ॥

कवन सो काज कठिन जग माहीं । जो नहिं होइ तात तुम्ह पाहीं ॥

राम काज लगि तव अवतारा । सुनतहिं भयउ पर्वताकारा ॥

कनक बरन तन तेज विराजा । मानहुँ अपर गिरिन्ह कर राजा ॥

सिंहनाद करि वारहिं वारा । लीलहिं नाघउँ जलनिधि खारा ॥

सहित सहाय रावनहि मारी । आनउँ इहाँ त्रिकूट उपारी ॥

जामवंत मैं पूँछउँ तोही । उचित सिखावनु दीजहु मोही ॥

✓ एतना करहु तात तुम्ह जाई । सीतहि देखि कहहु सुधि आई ॥

तब निज भुज बल राजिव नैना । कौतुक लागि संग कपि सेना ॥

छं०—कपि सेन संग सँघारि निसिचर रामु सीतहि आनिहैं ।

त्रैलोक पावन सुजसु सुर मुनि नारदादि बखानिहैं ॥

जो सुनत गावत कहत समुझत परम पद नर पावई ।

रघुबीर पद पाथोज मधुकर दास तुलसी गावई ॥

दो०—भव भेषज रघुनाथ जसु सुनहिं जे नर अरु नारि ।

तिन्ह कर सकल मनोरथ सिद्ध करहिं त्रिसिरारि ॥ ३० (क) ॥

लो०—नीलोत्पल तन स्याम काम कोटि सोभा अधिक ।

सुनिभ तासु गुन ग्राम जासु नाम अघ खग बधिक ॥ ३० (ख)

मासपारायण, तेईसवाँ विश्राम

इति श्रीमद्रामचरितमानसे सकलकलिकलुषविध्वंसने

चतुर्थः सोपानः समाप्तः ।

(किष्किन्धाकाण्ड समाप्त)



शरणागत विभीषण



अवन मुजसु सुनि आयउँ प्रभु भंजन भव भीर ।
त्राहि त्राहि आरति हरन सरन सुखद रघुबीर ॥

श्रीगणेशाय नमः

श्रीजानकीवल्लभो विजयते

श्रीरामचरितमानस



पञ्चम सोपान

(सुन्दरकाण्ड)



श्लोक

शान्तं शाश्वतमप्रमेयमनघं निर्वाणशान्तिप्रदं
ब्रह्माशम्भुफणीन्द्रसेव्यमनिशं वेदान्तवेद्यं विभुम् ।
रामाख्यं जगदीश्वरं सुरगुरुं मायामनुष्यं हरिं
वन्देऽहं करुणाकरं रघुवरं भूपालचूडामणिम् ॥ १ ॥

नान्या स्पृहा रघुपते हृदयेऽस्मादीये

सत्यं वदामि च भवानखिलान्तरात्मा ।

भक्ति प्रयच्छ रघुपुङ्गव निर्भरां मे

कामादिदोषरहितं कुरु मानसं च ॥ २ ॥

अतुलितबलधामं हेमशैलाभदेहं

दनुजवनकृशानुं ज्ञानिनामग्रगण्यम् ।

सकलगुणनिधानं

वानराणामधीशं

रघुपतिप्रियभक्तं वातजातं नमामि ॥ ३ ॥

- ✓ जामवंत के बचन सुहाए । सुनि हनुमंत हृदय अति भाए ॥
 तब लगि मोहि परिखेहु तुम्ह भाई । सहि दुख कंद मूल फल खाई ॥
 जब लगि आवौं सीतहि देखी । होइहि काजु मोहि हरष बिसेषी ॥
 यह कहि नाइ सवन्हि कहूँ माथा । चलेउ हरषि हियँ धरि रघुनाथा
 सिंधु तीर एक भूधर सुंदर । कौतुक कूदि चढ़ेउ ता ऊपर ॥
 बार बार रघुवीर सँभारी । तरकेउ पवनतनय बल भारी ॥
 जेहि गिरि चरन देइ हनुमंता । चलेउ सो गा पाताल तुरंता ॥
 जिमि अमोघ रघुपति कर बाना । एही भाँति चलेउ हनुमाना ॥ ✓
- ✓ जलनिधि रघुपति दूत बिचारी । तैं मैनाक होहि श्रमहारी ॥
- दो०—हनूमान तेहि परसा कर पुनि कीन्ह प्रनाम ।
 राम काजु कीन्हें बिनु मोहि कहाँ बिश्राम ॥ १ ॥
- ✓ जात पवनसुत देवन्ह देखा । जानैं कहूँ बल बुद्धि बिसेषा ॥
 सुरसा ताम अहिन्ह कै साखा । पाइइन्हि आइ कही तेहिं बाखा ॥
 आजु सुरन्ह मोहि दीन्ह अहारा । सुनत बचन कह पवनकुमारा ॥

राम काजु करि फिरि मैं आवौ । सीता कह सुधि प्रभुहि सुनावौ ॥
 तव तव बदन पैठिहउँ आई । सत्य कहउँ मोहि जान दे माई ॥
 कवनेहुँ जतन देइ नहिँ जाना । अससि न मोहि कहेउ हनुमाना ॥
 जोजन भरि तेहिँ बदनु पसारा । कपि तनु कीन्ह दुगुन बिस्तारा ॥
 सोरह जोजन मुख तेहिँ ठयऊ । तुरत पवनसुत बत्तिस भयऊ ॥
 जस जस सुरसा बदनु बढ़ावा । तासु दून कपि रूप देखावा ॥
 सत जोजन तेहिँ आनन कीन्हा । अति लघु रूप पवनसुत लीन्हा ॥
 बदन पइठि पुनि बाहेर आवा । मागा बिदा ताहि सिरु नावा ॥
 मोहि सुरन्ह जेहि लागि पठावा । बुधि बल मरमु तोर मैं पावा ॥
 दो०—राम काजु सबु करिहहु तुम्ह बल बुद्धि निधान ।

आसिष देइ गई सो हरषि चलेउ हनुमान ॥ २ ॥

निसिचरि एक सिंधु महुँ रहई । करि माया नभु के खग गहई ॥
 जीव जंतु जे गगन उड़ाहीं । जल बिलोकि तिन्ह कै परिछाहीं ॥
 गहइ छाहँ सक सो न उड़ाई । एहि विधिसदा गगनचर खाई ॥
 सोइ छल हनूमान कहँ कीन्हा । तासु कपटु कपि तुरतहिँ चीन्हा ॥
 ताहि मारि मारुतसुत बीरा । बारिधि पार गयउ मतिधीरा ॥
 तहाँ जाइ देखी बन सोभा । गुंजत चंचरीक मधु लोभा ॥
 नाना तरु फल फूल सुहाए । खग मृग बृंद देखि मन भाए ॥
 सैल बिसाल देखि एक आगें । ता पर धाइ चढेउ भय त्यागें ॥
 उमान कछु कपि कै अधिकार । प्रभु प्रताप जो कालहि खाई ॥

गिरि पर चढ़ि लंका तेहि देखी । कहि न जाइ अति दुर्ग विसेषी ॥
अति उतंग जलनिधि चहुपासा । कनक कोट कर परम प्रकासा ॥

छ०—कनक कोट बिचित्र मनि कृत सुंदरायतना घना ।
चउहट्ट हट्ट सुवट्ट बीथीं चारु पुर बहु बिधि बना ॥
गज बाजि खच्चर निकर पदचर रथ बरुथन्हि को गनै ।
बहुरूप निसिचर जूथ अतिबल सेन वरनत नहिं बनै ॥१॥
बन बाग उपवन बाटिका सर कूप वापीं सोहहीं ।
नर नाग सुर गंधर्व कन्या रूप मुनि मन मोहहीं ॥
कहुँ माल देह बिसाल सैल समान अतिबल गर्जहीं ।
नाना अखारेन्ह भिरहिं बहुबिधि एक एकन्ह तर्जहीं ॥२॥
करि जतन भट कोटिन्ह बिकट तन नगर चहुँ दिसि रच्छहीं ।
कहुँ महिष मानुष धेनु खर अज खल निसाचर भच्छहीं ॥
एहि लागि तुलसीदास इन्ह की कथा कछु एक है कही ।
रघुबीर सर तीरथ सरीरन्हि त्यागि गति पैहहिं सही ॥३॥

दो०—पुर रखवारे देखि बहु कपि मन कीन्ह बिचार ।

अति लघु रूप धरौं निसि नगर करौं पइसार ॥ ३ ॥

मसक समान रूप कपि धरी । लंकहि चलेउ सुमिरि नरहरी ॥
नाम लंकिनी एक निसिचरी । सो कह चलेस मोहि निंदरी ॥
जानेहि नहीं मरमु सठ मोरा । मोर अहार जहाँ लगि चोरा ॥
मुठिका एक महा कपि हनी । रुधिर बमत धरनीं ढनमनी ॥

पुनि संभारि उठी सो लंका। जोरि पानि कर विनय ससंका॥
जय रावनहि ब्रह्म वर दीन्हा। चलत विरंचि कहा मोहि चीन्हा॥
विकल होसि तैं कपि कै मारे। तव जानेसु निसिचर संघारे॥
तात मोर अति पुन्य बहूता। देखेउँ नयन राम कर दूता॥

दो०—तात स्वर्ग अपवर्ग सुख धरिअ तुला एक अंग।

तूल न ताहि सकल मिलि जो सुख लव सतसंग ॥ ४ ॥

प्रविसि नगर कीजे सत्र काजा। हृदयँ राखि कोसलपुर राजा॥
गरल सुधा रिपु करहिं मिताई। गोपद सिंधु अनल सितलाई॥
गरुड़ सुमेरु रेनु सम ताही। राम कृपा करि चितवा जाही॥
अति लघु रूप धरेउ हनुमाना। पैठा नगर सुमिरि भगवाना॥
मंदिर मंदिर प्रति करि सोधा। देखे जहँ तहँ अगनित जोधा॥
गयउ दसानन मंदिर माहीं। अति विचित्र कहि जात सो नाहीं॥
सयन किएँ देखा कपि तेही। मंदिर महुँ न दीखि बैदेही॥
भवन एक पुनि दीख सुहावा। हरि मंदिर तहँ भिन्न बनावा॥
दो०—रामायुध अंकित गृह सोभा बरनि न जाइ।

नव तुलसिका वृंद तहँ देखि हरष कपिराइ ॥ ५ ॥

लंका निसिचर निकर निवासा। इहाँ कहाँ सजन कर वासा॥
मन महुँ तरक करै कपि लागा। तेहीं समय विभीषनु जागा॥
राम राम तेहिं सुमिरन कीन्हा। हृदयँ हरष कपि सजन चीन्हा॥
एहि सन हठि करिहउँ पहिचानी। साधु ते होइ न कारज हानी॥

विप्र रूप धरि बचन सुनाए । सुनत विभीषन उठि तहँ आए ॥
 करि प्रनाम पूँछी कुसलाई । विप्र कहहु निज कथा बुझाई ॥
 की तुम्ह हरि दासन्ह महुँ कोई । मोरें हृदय प्रीति अति होई ॥
 की तुम्ह रामु दीन अनुरागी । आयहु मोहि करन वड़भागी ॥

दो०—तब हनुमंत कही सब राम कथा निज नाम ।

सुनत जुगल तन पुलक मन मगन सुमिरि गुन ग्राम ॥ ६ ॥
 सुनहु पवनसुत रहनि हमारी । जिमि दसनन्हि महुँ जीम विचारी
 तात कबहुँ मोहि जानि अनाथा । करिहहि कृपा भानुकुल नाथा ॥
 तामस तनु कछु साधन नाहीं । प्रीति न पद सरोज मनमाहीं ॥
 अब मोहि भा भरोस हनुमंता । विनु हरि कृपा मिलहि नहि संता ॥
 जौ रघुवीर अनुग्रह कीन्हा । तौ तुम्ह मोहि दरसु हठि दीन्हा ॥
 सुनहु विभीषन प्रभु कै रीती । करहि सदा सेवक पर प्रीती ॥
 कहहु कवन मैं परम कुलीना । कपि चंचल सबहीं विधि हीना ॥
 प्रात लेइ जो नाम हमारा । तेहि दिन ताहि न मिलै अहारा ॥

दो०—अस मैं अधम सखा सुनु मोहू पर रघुवीर ।

कीन्ही कृपा सुमिरि गुन भरे बिलोचन नीर ॥ ७ ॥
 जानतहुँ अस स्वामि बिसारी । फिरहिं ते काहे न होहिं दुखारी ॥
 एहि विधि कहत राम गुन ग्रामा । पावा अनिर्वाच्य विश्रामा ॥
 पुनि सब कथा विभीषन कही । जेहि विधि जनकसुता तहँ रही ॥
 तब हनुमत कहा सुनु भ्राता । देखी चहुँ जानकी माता ॥

जुगुति विभीषन सकल सुनाई। चलेउ पवनसुत विदा कराई ॥
करि सोइ रूप गयउ पुनि तहवाँ। वन असोक सीता रह जहवाँ ॥
देखि मनहि महुँ कीन्ह प्रनामा। बैठेहिं वीति जात निसि जामा ॥
कृस तनु सीस जटा एक बेनी। जपति हृदयँ रघुपति गुन श्रेणी ॥

दो०—निज पद नयन दिऐँ मन राम पद कमल लीन ।

परम दुखी भा पवनसुत देखि जानको दीन ॥ ८ ॥

तरु पल्लव महुँ रहा लुकाई। करइ विचार करौं का भाई ॥
तेहि अवसर रावनु तहँ आवा। संग नारि बहु किएँ बनावा ॥
बहु विधि खल सीतहि समुझावा। साम दान भय भेद देखावा ॥
कह रावनु सुनु सुमुखि सयानी। मंदोदरी आदि सब रानी ॥
तव अनुचरीं करउँ पन मोरा। एक बार विलोकु मम ओरा ॥
तुन धरि ओट कहति बैदेही। सुमिरि अवधपति परम सनेही ॥
सुनु दसमुख खद्योत प्रकासा। क्यहुँ कि नलिनी करइ बिकासा ॥
अस मन समुझ कहति जानकी। खलसुधि नहिं रघुबीर बान की ॥
सठ सूनै हरि आनेहि मोही। अधम निलज लाज नहिं तोही ॥
दो०—आपुहि सुनि खद्योत सम रामहि भानु समान ।

परुष बचन सुनि कादि असि बोला अति खिसिआन ॥ ९ ॥

सीता तैं मम कृत अपमाना। कटिहउँ तव सिर कठिन कृपाना ॥
नाहिं त सपदि मानु मम बानी। सुमुखि होति न त जीवन हानी ॥
ह्याम सरोज दाम सम सुंदरी प्रसु मुज करि कर सम दसकंधरा ॥

सो भुज कंठ कि तव असि घोरा । सुनु सठ अस प्रवान पन मोरा ॥

✓ चंद्रहास हरु मम परितापं । रघुपति विरह अनल संजातं ॥

सीतल निसित बहसि बर धारा । कह सीता हरु मम दुख भारा ॥

सुनत बचन पुनि मारन धावा । मयतनयाँ कहि नीति बुझावा ॥

कहेसि सकल निसिचरिन्ह बोलाई । सीतहि बहु विधि त्रासहु जाई ॥

✓ मास दिवस महुँ कहा न माना । तौ मैं मारवि काढ़ि कृपाना ॥

दो०—भवन गयउ दसकंधर इहाँ पिसाचिनि बृंद ।

सीतहि त्रास देखावहिं धरहिं रूप बहु मंद ॥१०॥

✓ त्रिजटा नाम राच्छसी एका । राम चरन रति निपुन विवेका ॥

सबन्हौ बोलि सुनाएसि सपना । सीतहि सेइ करहु हित अपना ॥

सपनें वानर लंका जारी । जातुधान सेना सब मारी ॥

खर आरूढ़ नगन दससीसा । मुंडित सिर खंडित भुज बीसा ॥

एहि विधि सो दच्छिन दिसि जाई । लंका मनहुँ विभीषन पाई ॥

नगर फिरी रघुवीर दोहाई । तब प्रभु सीता बोलि पठाई ॥

यह सपना मैं कहउँ पुकारी । होइहि सत्य गएँ दिन चारी ॥

तासु बचन सुनि ते सब डरीं । जनकसुता के चरनन्हि परीं ॥✓

दो०—जहँ तहँ गई सकल तब सीता कर मन सोच ।

मास दिवस बीते मोहि मारिहि निसिचर पोच ॥११॥

त्रिजटा सन बोलैं कर जोरी । मातु विपति संगिनि तैं मोरी ॥

तजौ देह कर वागि उपाई । दुसह विरहु अब नाह सहि जाई ॥

आनि काठ रचु चिता बनाई। मातु अनल पुनि देहि लगाई॥
 सत्य करहि मम प्रीति सयानी। सुनै को श्रवन सूख सम बानी॥
 सुनत बचन पद गहि समुझाएसि। प्रभु प्रताप बल सुजसु सुनाएसि
 निसि न अनल मिल सुनु सुकुमारी। अस कहि सों निज भवन सिवारी
 कह सीता विधि भा प्रतिकूल। मिलिहि न पावक मिटिहि न सूख
 देखिअत प्रगट गगन अंगारा। अवनि न आवत एकउ तारा॥
 पावकमय ससि खवत न आगी। मानहुँ मोहि जानि हतभागी॥
 ✓ सुनहि विनय मम बिटप असोका। सत्य नाम करु हरु मम सोका॥
 नूतन किसलय अनल समाना। देहि अगिनि जनि करहि निदाना
 देखि परम विरहाकुल सीता। सो छन कपिहि कल्प सम बीता॥

सो०—कपि करि हृदयँ विचार दीन्हि मुद्रिका डारि तब ।✓

जनु असोक अंगार दीन्ह हरषि ऊठि कर गहेउ ॥१२॥

✓ तब देखी मुद्रिका मनोहर। राम नाम अंकित अति सुंदर॥
 चकित चितव मुदरी पहिचानी। हरष विषाद हृदयँ अकुलानी॥
 जीति को सकइ अजय रघुराई। माया तें असि रचि नहिं जाई॥
 सीता मन विचार कर नाना। मधुर बचन बोलेउ हनुमाना॥
 रामचंद्र गुन बरनै लगा। सुनतहिं सीता कर दुख भागा॥
 लागीं सुनै श्रवन मन लाई। आदिहु तें सब कथा सुनाई॥
 श्रवनामृत जेहिं कथा सुहाई। कही सो प्रगट होति किन भाई॥
 तब हनुमत निकट चलि गयउ। पिरि बैठी मम विसमय भवउ॥

राम दूत मैं मातु जानकी। सत्य सपथ करुनानिधान की ॥
 यह मुद्रिका मातु मैं आनी। दीन्हि राम-तुम्ह कहँ सहिदानी ॥
 नर बानरहि संग कहु कैसैं। कही कथा भइ संगति जैसे ॥
 दो०—कपि के बचन सप्रेम सुनि उपजा मन बिस्वास ।

जाना मन क्रम बचन यह कृपासिंधु कर दास ॥१३॥

हरिजन जानि प्रीति अति गाढ़ी। सजल नयन पुलकावलि बाढ़ी ॥
 बूझत विरह जलधि हनुमाना। भयहु तात मो कहँ जलजाना ॥
 अब कहु कुसल जाउँ बलिहारी। अनुज सहित सुख भवन खरारी ॥
 कोमलचित कृपाल रघुराई। कपि केहि हेतु धरी निठुराई ॥
 सहज बानि सेवक सुख दायक। कबहुँक सुरति करत रघुनायक ॥
 कबहुँ नयन मम सीतल ताता। होइहहिं निरखि स्याम मृदु गाता ॥
 बचनु न आव नयन भरे बारी। अहह नाथ हौं निपट बिसारी ॥
 देखि परम विरहाकुल सीता। बोला कपिमृदु बचन बिनीता ॥
 मातु कुसल प्रभु अनुज समेता। तव दुख दुखी सुकृपा निकेता ॥
 जनिजननी मानहु जियँ ऊना। तुम्ह ते प्रेम रामु कैं दूना ॥
 दो०—रघुपति कर संदेसु अब सुनु जननी धरि धीर ।

अस कहि कपि गदगद भयउ भरे बिलोचन नीर ॥१४॥
 कहेउ राम बियोग तव सीता। मो कहँ सकल भए बिपरीता ॥
 नव तरु किसलय मनहुँ कृसानू। काल निसा सम निसि ससि भानू ॥
 कुबलय बिपिन कुत बन सरिसा। बारिद तपत तेल जनु बरिसा ॥

जे हित रहे करत तेइ पीरा । उरग स्वास सम त्रिविध समीरा ॥
 कहेहु तैं कछु दुख घटि होई । काहि कहौ यह जान न कोई ॥
 तत्व प्रेम कर मम अरु तोरा । जानत प्रिया एकु मनु मोरा ॥
 सो मनु सदा रहत तोहि पाहीं । जानु प्रीति रसु एतनेहि माहीं ॥
 प्रभु संदेसु सुनत बैदेही । मगन प्रेम तन सुधि नहिं तेही ॥
 कह कपि हृदयँ धीर धरु माता । सुमिरु राम सेवक सुखदाता ॥
 उर आनहु रघुपति प्रभुताई । सुनि मम बचन तजहु कदराई ॥
 दो०—निसिचर निकर पतंग सम रघुपति बान कृसानु ।

जननी हृदयँ धीर धरु जरे निसाचर जानु ॥१५॥
 जौ रघुबीर होति सुधि पाई । करते नहिं बिलंबु रघुराई ॥
 राम बान राबि उएँ जानकी । तम बरूथ कहँ जातुधान की ॥
 अबहिं मातु मैं जाउँ लवाई । प्रभु आयसु नहिं राम दोहाई ॥
 कछुक दिवस जननी धरु धीरा । कपिन्ह सहित अइहहिं रघुबीरा ॥
 निसिचर मारि तोहि लै जैहहिं । तिहुँ पुर नारदादि जसु गैहहिं ॥
 हैं सुत कपि सब तुम्हहि समाना । जातुधान अति भट बलवाना ॥
 मोरें हृदय परम संदेहा । सुनि कपि प्रगट कीन्हि निज देहा ॥
 कनक भूधराकार सरीरा । समर भयंकर अतिबल बीरा ॥
 सीता मन भरोस तब भयऊ । पुनि लघु रूप पवनसुत लयऊ ॥

दो०—सुनु माता साखामृग नहिं बल बुद्धि बिसाल ।

मन संतोष सुनत कपि बानी । भगति प्रताप तेज बल सानी ॥
 ✓ आसिष दीन्हि राम प्रिय जाना । होहु तात बल सील निधाना ॥
 अजर अमर गुननिधि सुत होहु । करहुँ बहुत रघुनायक छोहु ॥
 करहुँ कृपा प्रभु अस सुनि काना । निर्भर प्रेम मगन हनुमाना ॥
 बार बार नाएसि पद सीसा । बोला बचन जोरि कर कीसा ॥
 अब कृतकृत्य भयउँ मैं माता । आसिष तव अमोघ बिख्याता ॥ ✓
 सुनहु मातु मोहि अतिसय भूखा । लागि देखि सुंदर फल रूखा ॥
 सुनु सुत करहिं विपिन रखवारी । परम सुभट रजनीचर भारी ॥
 तिन्ह कर भय माता मोहि नहिं । जौं तुम्ह सुख मानहु मन माहिं ॥
 दो०—देखि बुद्धि बल निपुन कपि कहेउ जानकी जाहु ।

रघुपति चरन हृदयँ धरि तात मधुर फल खाहु ॥ १७ ॥

चलेउ नाइ सिरु पैठेउ बागा । फल खाएसि तरु तोरैं लागा ॥
 रहे तहाँ बहु भट रखवारे । कछु मारेसि कछु जाइ पुकारे ॥
 ✓ नाथ एक आवा कपि भारी । तेहिं असोक बाटिका उजारी ॥
 खाएसि फल अरु बिटप उपारे । रच्छक मर्दि मर्दि महि डारे ॥
 सुनि रावन पठए भट नाना । तिन्हहि देखि गर्जेउ हनुमाना ॥
 सब रजनीचर कपि संघारे । गए पुकारत कछु अधमारे ॥
 पुनि पठयउ तेहिं अच्छकुमारा । चला संग लै सुभट अपारा ॥
 आवत देखि बिटप गहि तर्जा । ताहि निपाति महाधुनि गर्जा ॥
 दो०—कछु मारेसि कछु मर्देसि कछु मिलएसि धरि धूरि ।

सुनि सुत बध लंकेस रिसाना। पठएसि मेघनाद बलवाना ॥
 मारसि जनि सुत बाँधेसु ताही। देखिअ कपिहि कहाँ कर आही ॥
 चला इंद्रजित अतुलित जोधा। बंधु निधन सुनि उपजा क्रोधा ॥
 कपि देखा दारुन भट आवा। कटकटाइ गर्जा अरु धावा ॥
 अति बिसाल तरु एक उपारा। विरथ कीन्ह लंकेस कुमार ॥
 रहे महाभट ताके संग ॥ गहि गहि कपि मर्दइ निज अंगा ॥
 तिन्हहि निपाति ताहि सन बाजा। भिरे जुगल मानहुँ गजराजा ॥
 मुठिका मारि चढ़ा तरु जाई। ताहि एक छन मुरुछा आई ॥
 उठि बहोरि कीन्हिसि बहु माया। जीति न जाइ प्रभंजन जाया ॥
 दो०—ब्रह्म अस्त्र तेहिँ साँधा कपि मन कोन्ह बिचार । ✓

जौं न ब्रह्मसर मानउँ सहिमा मिटइ अपार ॥ १९ ॥

ब्रह्मवान कपि कहूँ तेहिँ मारा। परतिहुँ बार कटकु संधारा ॥
 तेहिँ देखा कपि मुरुछित भयऊ। नागपास बाँधेसि लै गयऊ ॥
 ✓ जासु नाम जपि सुनहु भवानी। भव बंधन काटहिँ नर ग्यानी ॥
 तासु दूत कि बंध तरु आवा। प्रभु कारज लागि कपिहिँ बँधावा ॥
 कपि बंधन सुनि निसिचर धाए। कौतुक लागि सभाँ सब आए ॥
 दसमुख सभा दीखि कपि जाई। कहि न जाइ कछु अति प्रभुताई ॥
 कर जोरें सुर दिसिप बिनीता। भृकुटि बिलोकत सकल समीता ॥
 देखि प्रताप न कपि मन संका। जिमि अहिगन महुँ गरुड़ असंका ॥
 दो०—कपिहि बिलोकि दसानन बिहसा कहि दुर्वाद । ✓

कह लंकेस कवन तैं कीसा । केहि कैंबल घालेहि नन खीसा ॥
 की धौं श्रवन सुनेहि नहिं मोही । देखउँ अति असंक सठ तोही ॥
 मारे निसिचर केहिं अपराधा । कहु सठ तोहि न प्रान कइ बाधा ॥
 सुनु रावन ब्रह्मांड निकाया । पाइ जासु बल बिरचति माया ॥
 जाकैं बल बिरंचि हरि ईसा । पालत सृजत हरत दससीसा ॥
 जा बल सीस धरत सहसानन । अंडकोस समेत गिरि कानन ॥
 धरइ जो विविध देह सुरत्राता । तुम्ह से सठन्ह सिखावनु दाता ॥
 हर कोदंड कठिन जेहिं भंजा । तेहि समेत नृप दल मद गंजा ॥
 खर दूषन त्रिसिरा अरु बाली । बधे सकल अतुलित बलसाली ॥

दो०—जाके बल लवलेस तैं जितेहु चराचर क्षारि ।

तासु दूत मैं जा करि हरि आनेहु प्रिय नारि ॥२१॥

✓ जानउँ मैं तुम्हारि प्रभुताई । सहसबाहु सन परी लराई ॥
 समर बालि सन करि जसु पावा । सुनि कपि बचन बिहसि बिहरावा
 खायउँ फल प्रभु लागी भूँखा । कपि सुभाव तैं तोरेउँ रूखा ॥
 सब कैं देह परम प्रिय स्वामी । मारहिं मोहि कुमारग गामी ॥
 जिन्ह मोहि मारा ते मैं मारे । तेहि पर बाँधेउँ तनयँ तुम्हारे ॥
 मोहि न कछु बाँधे कइ लाजा । कीन्ह चहउँ निज प्रभु कर काजा
 बिनती करउँ जोरि कर रावन । सुनहु मान तजि मोर सिखावन ॥
 देखहु तुम्ह निज कुलहि बिचारी । भ्रम तजि भजहु भगत भयहारी
 जाकैं हर अति काल डेराई । जो सुर असुर चराचर लराई ॥

तासों वयर कवहुँ नहिं कीजै। मोरे कहें जानकी दीजै॥

दो०—प्रनतपाल रघुनायक करुनासिंधु खरारि ।

गएँ सरन प्रभु राखिहैं तव अपराध बिसारि ॥ २२ ॥

राम चरन पंकज उर धरहू। लंका अचल राजु तुम्ह करहू ॥

✓ रिषि पुलस्ति जसु बिमल मयंका। तेहि ससि महुँ जनि होहु कलंका॥

राम नाम बिनु गिरा न सोहा। देखु बिचारि त्यागि मद मोहा ॥

बसन हीन नहिं सोह सुरारी। सब भूषन भूषित वर नारी ॥

राम बिमुख संपति प्रभुताई। जाइ रही पाई बिनु पाई ॥

सजल मूल जिन्ह सरितन्ह नाहीं। वरषि गएँ पुनि तबहिं सुखाहीं ॥

सुनु दसकंठ कहउँ पन रोपी। बिमुख राम त्राता नहिं कोपी ॥

संकर सहस बिष्णु अज तोही। सकहिं न राखि राम करद्रोही ॥ ✓

दो०—मोहमूल बहु सूल प्रद त्यागहु तम अभिमान ।

भजहु राम रघुनायक कृपा सिंधु भगवान ॥ २३ ॥

जदपि कही कपि अति हित बानी। भगति विवेक विरति नय सानी ॥

✓ बोला बिहसि महा अभिमानी। मिला हमहि कपि गुर बड़ ग्यानी

मृत्यु निकट आई खल तोही। लागेसि अधम सिखावन मोही ॥

उलटा होइहि कह हनुमाना। मतिभ्रम तोर प्रगट मैं जाना ॥

सुनि कपि बचन बहुत खिसिआना। बेगि न हरहु मूढ़ कर प्राणा ॥

सुनत निसाचर मारन धाए। सचिवन्ह सहित बिभीषनु आए ॥

✓ माइ सीस करि बिषय बहूत। सीति विशेष न मारिज दूता ॥

आन दंड कछु करिअ गोसाँई। सबहीं कहा मंत्र भल भाई॥
 सुनत बिहसि बोला दसकंधर। अंग भंग करि पठइअ बंदर॥

दो०—कपि कै ममता पूँछ पर सबहि कहउँ समुझाइ । ✓

तेल बोरि पट बाँधि पुनि पावक देहु लगाइ ॥ २४ ॥

पूँछहीन बानर तहँ जाइहि। तब सठ निज नाथहि लइ आइहि
 जिन्ह कै कीन्हिसि बहुत बड़ाई। देखउँ मैं तिन्ह कै प्रभुताई॥

वचन सुनत कपि मन मुसुकाना। भइ सहाय सारद मैं जाना॥
 जातुधान सुनि रावन वचना। लागे रचैं मूढ़ सोइ रचना॥

✓ रहा न नगर बसन घृत तेला। बाढ़ी पूँछ कीन्ह कपि खेला॥
 कौतुक कहँ आए पुरवासी। मारहिं चरन करहिं बहु हाँसी॥

बाजहिं ढोल देहिं सब तारी। नगर फेरि पुनि पूँछ प्रजारी॥

✓ पावक जरत देखि हनुमंता। भयउ परम लघु रूप तुरंता॥
 निबुकि चढ़ेउ कपि कनक अटारीं। भईं समीत निसाचर नारीं॥

दो०—हरि प्रेरित तेहि अवसर चले मरुत उनचास ।

अट्टहास करि गर्जा कपि बढ़ि लाग अकास ॥ २५ ॥

देह बिसाल परम हरुआई। मंदिर तैं मंदिर चढ़ धाई॥
 जरइ नगर भा लोग बिहाला। झपट लपट बहु कोटि कराला॥

तात मातु हा सुनिअ पुकारा। एहिं अवसर को हमहि उबारा॥

हम जो कहा यह कपि नहिं होई। बानर रूप धरें सुर कोई॥

साधु अवग्या कर फलु ऐसा। जरइ नगर अनाथ कर जैसा॥

- ✓ जारा नगर निमिष एक माहीं । एक विभीषन कर गृह नाहीं ॥
ता कर दूत अनल जेहिं सिरिजा । जरा न सो तेहि कारन गिरिजा ॥
उलटि पलटि लंका सब जारी । कूदि परा पुनि सिंधु मझारी ॥ ✓
- ✓ दो०—पूँछ बुझाइ खोइ श्रम धरि लघु रूप बहोरि ।
जनकसुता केँ आगेँ ठाढ़ भयउ कर जोरि ॥२६॥
- ✓ मातु मोहि दीजे कछु चीन्हा । जैसेँ रघुनायक मोहि दीन्हा ॥
चूड़ामनि उतारि तब दयऊ । हरष समेत पवनसुत लयऊ ॥
कहेहु तात अस मोर प्रनामा । सब प्रकार प्रभु पूरनकामा ॥
दीन दयाल विरिदु संभारी । हरहु नाथ मम संकट भारी ॥
तात सकसुत कथा सुनाएहु । बान प्रताप प्रभुहिं समुझाएहु ॥
मास दिवस महुँ नाथु न आवा । तौ पुनि मोहि जिअत नहिं पावा ॥
कहु कपि केहि विधि राखौ प्राणा । तुम्हहू तात कहत अब जाना ॥
तोहि देखि सीतालं भइ छाती । पुनि मो कहूँ सोइ दिनु सो राती ॥ ✓
- दो०—जनकसुतहि समुंझाइ करि बहु बिधि धीरजु दीन्ह ।
चरन कमल सिरु नाइ कपि गवनु राम पहिं कीन्ह ॥२७॥
- चलत महाधुनि गर्जेसि भारी । गर्भ स्रवहिं सुनि निसिचर नारी ॥
नाधि सिंधु एहि पारहि आवा । सबद किलिकिला कपिन्ह सुनावा ॥
हरषे सब विलोकि हनुमाना । नूतन जन्म कपिन्ह तब जाना ॥
मुख प्रसन्न तन तेज विराजा । कीन्हेसि रामचंद्र कर काजा ॥
मिले सकल अति भए सुखारी । तलफत मीन पाव जिमि बारी ॥

चले हरषि रघुनायक पासा। पूँछत कहत नवल इतिहासा ॥
तब मधुवन भीतर सब आए। अंगद संमत मधु फल खाए ॥
रखवारे जब बरजन लागे। मुष्टि प्रहार हनत सब भागे ॥

दो०—जाइ पुकारे ते सब बन उजार जुबराज ।

सुनि सुग्रीव हरष कपि करि आए प्रभु काज ॥२८॥

जौं न होति सीता सुधि पाई। मधुवन के फल सकहिं कि खाई ॥
एहि विधि मन विचार कर राजा। आइ गए कपि सहित समाजा ॥
आइ सबन्हि नावा पद सीसा। मिलेउ सबन्हि अति प्रेम कपीसा ॥
पूँछी कुसल कुसल पद देखी। राम कृपाँ भा काजु बिसेषी ॥
नाथ काजु कीन्हेउ हनुमाना। राखे सकल कपिन्ह के प्राना ॥
सुनि सुग्रीव बहुरि तेहि मिलेऊ। कपिन्ह सहित रघुपति पहिं चलेऊ ॥
राम कपिन्ह जब आवत देखा। किँएँ काजु मन हरष बिसेषा ॥
✓फटिक सिला बैठे द्वौ भाई। परे सकल कपि चरनन्हि जाई ॥

दो०—प्रीति सहित सब भेटे रघुपति करुना पुंज ।

पूँछी कुसल नाथ अब कुसल देखि पद कंज ॥२९॥

जामवंत कह सुनु रघुराया। जा पर नाथ करहु तुम्ह दाया ॥
ताहि सदा सुभ कुसल निरंतर। सुर नर मुनि प्रसन्न ता ऊपर ॥
सोइ बिजई बिनई गुन सागर। तासु सुजसु त्रैलोक उजागर ॥
प्रभु की कृपा भयउ सब काज। जन्म हमार सुफल भा आज ॥
नाथ पवनसुत कीन्हि जो करनी। सहसहुँ मुख न जाइ सो बरनी ॥

पवनतनय के चरित सुहाए। जामवंत रघुपतिहि सुनाए ॥

सुनत कृपानिधि मन अति भाए। पुनि हनुमान हरषि हियँ लाए ॥

✓ कहहु तात केहि भाँति जानकी। रहति करति रच्छा स्वप्राण की ॥

✓ दो०—नाम पाहरू दिवस निसि ध्यान तुम्हार कपाट ।

लोचन निज पद जंत्रित जाहिँ प्राण केहिँ बाट ॥३०॥

चलत मोहि चूड़ामनि दीन्ही। रघुपति हृदयँ लाइ सोइ लीन्ही ॥

नाथ जुगल लोचन भरि बारी। बचन कहे कछु जनककुमारी ॥

अनुज समेत गहेहु प्रभु चरना। दीन बंधु प्रनतारति हरना ॥

मन क्रम बचन चरन अनुरागी। केहिँ अपराध नाथ हौँ त्यागी ॥

अवगुन एक मोर मैं माना। बिछुरत प्राण न कीन्ह पयाना ॥

नाथ सो नयनन्हि को अपराधा। निसरत प्राण करहिँ हठि बाधा ॥

✓ बिरह अगिनि तनु तूल समीरा। स्वास जरइ छन माहिँ सरीरा ॥

नयन स्रवहिँ जलु निज हित लागी। जरै न पाव देह बिरहागी ॥

सीता कै अति विपति बिसाला। बिनहिँ कहैं भलि दीनदयाला ॥ ✓

✓ दो०—निमिष निमिष करुनानिधि जाहिँ कलप सम बीति ।

बेगि चलिअ प्रभु आनिअ भुज बल खल दल जीति ॥३१॥

सुनि सीता दुख प्रभु सुख अयना। भरि आए जल राजिव नयना ॥

बचन कायँ मन मम गति जाही। सपनेहुँ बूझिअ विपति किताही ॥

कह हनुमंत विपति प्रभु सोई। जब तव सुमिरन भजन न होई ॥

कैतिक बात प्रभु जातुधान की। रिपुहि जीति आनिबी जानकी ॥

सुनु कपि तोहि समान उपकारी । नहिं कोउ सुरनर सुनि तनुधारी ॥
 प्रति उपकार करौं का तोरा । सनमुख होइ न सकत मन मोरा ॥
 सुनु सुत तोहि उरिन मैं नाहीं । देखेउँ करि विचार मन माहीं ॥
 पुनि पुनि कपिहि चितव सुरत्राता । लोचन नीर पुलक अति गाता ॥

✓ दो०—सुनि प्रभु वचन विलोकि मुख गात हरषि हनुमंत ।

चरन परेउ प्रेमाकुल त्राहि त्राहि भगवंत ॥३२॥

बार बार प्रभु चहइ उठावा । प्रेम मगन तोहि उठव न भावा ॥
 प्रभु कर पंकज कपि कैं सीसा । सुमिरि सो दसा मगन गौरीसा ॥
 सावधान मन करि पुनि संकर । लागे कहन कथा अति सुंदर ॥
 कपि उठाइ प्रभु हृदयँ लगावा । कर गहि परम निकट बैठावा ॥
 कहु कपि रावन पालित लंका । केहि विधि दहेउ दुर्ग अति वंका ॥
 प्रभु प्रसन्न जाना हनुमाना । बोला वचन विगत अभिमाना ॥
 साखामृग कै बड़ि मनुसाई । साखा तैं साखा पर जाई ॥
 नाधि सिंधु हाटकपुर जारा । निसिचर गन बधि त्रिपिन उजारा ॥
 सो सब तव प्रताप खुराई । नाथ न कछू मोरि प्रभुताई ॥

दो०—ता कहूँ प्रभु कछु अगम नहिं जा पर तुम्ह अनुकूल ।

तव प्रभावं बड़वानलहि जारि सकइ खलु तूल ॥३३॥

नाथ भगति अति सुखदायनी । देहु कृपा करि अनपायनी ॥

सुनि प्रभु परम सरल कपि बानी । एवमस्तु तब कहेउ भवानी ॥

उमा राम सुभाउ जेहिं जाना । ताहि भजनु तजि भाव न आना ॥

यह संवाद जासु उर आवा। रघुपति चरन भगति सोइ पावा॥
 सुनि प्रभु वचन कहहिं कपि वृन्दा। जय जय जय कृपाल सुख कंदा॥
 ✓ तवरघुपति कपिपतिहि बोलावा। कहा चलैं कर करहु बनावा॥
 अय बिलंबु केहि कारन कीजे। तुरत कपिन्ह कहूँ आयसु दीजे॥
 कौतुक देखि सुमन बहु वरषी। नभ तैं भवन चले सुर हरषी॥

दो०—कपिपति बेगि बोलाए आए जूथप जूथ।

नाना वरन अतुल बल बानर भालु बरूथ ॥३४॥

प्रभु पद पंकज नावहिं सीसा। गर्जहिं भालु महाबल कीसा॥
 देखी राम सकल कपि सेना। चितइ कृपा करि राजिव नैना॥
 राम कृपा बल पाइ कापदा। भए पच्छजुत मनहुँ गिरिदा॥
 हरषि राम तब कीन्ह पयाना। सगुन भए सुंदर सुभ नाना॥
 जासु सकल मंगलमय कीती। तासु पयान सगुन यह नीती॥
 ✓ प्रभु पयान जाना बैदेहीं। फरकि वाम अँग जनु कहि देहीं॥
 जोइ जोइ सगुन जानकिहि होई। असगुन भयउ रावनहि सोई॥ ✓
 चला कटकु को वरनैं पारा। गर्जहिं बानर भालु अपारा॥
 नख आयुध गिरि पादपधारी। चले गगन महि इच्छाचारी॥
 केहरिनाद भालु कपि करहीं। डगमगाहिं दिग्गज चिक्करहीं॥

छं०—चिक्करहिं दिग्गज डोल महि गिरि लोल सागर खरभरे।

मन हरष सम गधब सुर मुनि नाग किनर दुख टरे॥

कटकटहिं मर्कट बिकट भट बहु कोटि कोटिन्ह धावहीं ।
 जय राम प्रबल प्रताप कोसलनाथ गुन गन गावहीं ॥
 सहि सक न भार उदार अहिपति बार बारहिं मोहई ।
 गह दसन पुनि पुनि कमठ पृष्ठ कठोर सो किमि सोहई ॥
 रघुबीर रुचिर प्रयान प्रस्थिति जानि परम सुहावनी ।
 जनु कमठ खर्पर सर्पराज सो लिखत अबिचल पावनी ॥

दो०—एहि बिधि जाइ कृपानिधि उत्तरे सागर तीर ।

जहँ तहँ लागे खान फल भालु बिपुल कपि बीर ॥ ३५ ॥

उहाँ निसाचर रहहिं ससंका । जब तैं जाँरि गयउ कपि लंका ॥
 निज निज गृहँ सब करहिं विचारा । नहिं निसिचर कुल केर उबारा ॥
 जासु दूत बल बरनि न जाई । तेहि आएँ पुर कवन भलाई ॥
 दूतिन्ह सन सुनि पुरजन बानी । मंदोदरी अधिक अकुलानी ॥
 रहसि जोरि कर पति पग लागी । बोली बचन नीति रस पागी ॥
 कंत करष हरि सन परिहरहू । मोर कहा अति हित हियँ धरहू ॥
 समुझत जासु दूत कह करनी । सबहिं गर्भ रजनीचर घरनी ॥
 तासु नारि निज सचिव बोलाई । पठवहु कंत जो चहहु भलाई ॥
 तव कुल कमल विपिन दुखदाई । सीता सीत निसा सम आई ॥
 सुनहु नाथ सीता विनु दीन्हें । हित न तुम्हार संभु अज कीन्हें ॥

दो०—राम बान अहि गन सरिस निकर निसाचर भेक ।

जब लगि असत न तब लगि जतनु करहु तजि टेक ॥ ३६ ॥

श्रवन सुनी सठ ता करि बानी । विहसा जगत विदित अभिमानी ॥
 समय सुभाउ नारि कर साचा । मंगल महुँ भय मन अति काचा ॥
 जौ आवइ मर्कट कटकाई । जिअहिं विचारे निसिचर खाई ॥
 कंपहिं लोकप जाकीं त्रासा । तासु नारि समीत बड़ि हासा ॥
 अस कहि विहसि ताहि उरलाई । चलेउ सभाँ ममता अधिकाई ॥
 मंदोदरी हृदयँ कर चिंता । भयउ कंत पर विधि विपरीता ॥
 बैठेउ सभाँ खबरि असि पाई । सिंधु पार सेना सब आई ॥
 बूझेसि सचिव उचित मत कहहू । ते सब हँसे मष्ट करि रहहू ॥
 जितेहु सुरासुर तब श्रम नाहीं । नर बानर केहि लेखे माहीं ॥

दो०—सचिव बैद गुर तीनि जौं प्रिय बोलहिं भय आस ।

राज धर्म तन तीनि कर होइ बेगिहीं नास ॥३७॥

सोइ रावन कहूँ बनी सहाई । अस्तुति करहिं सुनाइ सुनाई ॥
 अवसर जानि विभीषनु आवा । भ्राता चरन सीसु तेहिं नावा ॥
 पुनि सिरु नाइ बैठ निज आसन । बोला वचन पाइ अनुसासन ॥
 जौ कृपाल पूँछिहु मोहि बाता । मति अनुरूप कहउँ हित ताता ॥
 जो आपन चाहै कल्याना । सुजसु सुमति सुभ गति सुख नाना ॥
 सो परनारि लिलार गोसाई । तजउ चउथि के चंद कि नाई ॥
 चौदह भुवन एक प्रति होई । भूलगोइ तिष्ठ नहिं सोई ॥
 गुन सागर नागर नर जोऊ । अल्प लोभ भल कहइ न कोऊ ॥

दो०—काम क्रोध मद लोभ सब नाथ नरक के पंथ ।

सब परिहरि रघुबीरहि भजहु भजहिं जेहि संत ॥३८॥

तात राम नहिं नर भूपाला । भुवनेश्वर कालहु कर काला ॥

ब्रह्म अनामय अज भगवंता । व्यापक अजित अनादि अनंता ॥

गो द्विज धेनु देव हितकारी । कृपा सिंधु मानुष तनुधारी ॥

जन रंजन भंजन खल ब्राता । वेद धर्म रच्छक सुनु भ्राता ॥

ताहि वयरु तजि नाइअ माथा । प्रनतारति भंजन रघुनाथा ॥

देहु नाथ प्रभु कहूँ बैदेही । भजहु राम विनु हेतु सनेही ॥

सरन गएँ प्रभु ताहु न त्यागा । विस्व द्रोह कृत अब जेहि लागा ॥

जासु नाम त्रय ताप नसावन । सोइ प्रभु प्रगट समुझु जियँ रावन ॥

दो०—बार बार पद लागउँ विनय करउँ दससीस ।

परिहरि मान मोह मद भजहु कोसलाधीस ॥३९ (क)॥

मुनि पुलस्ति निज सिष्य सन कहि पठई यह बात ।

तुरत सो मैं प्रभु सन कही पाइ सुभवसरु तात ॥३९ (ख)॥

माल्यवंत अति सचिव सयाना । तासु वचन सुनि अति सुख माना ॥

तात अनुज तव नीति विभूषन । सो उर धरहु जो कहत विभीषन ॥

रिपु उतकरष कहत सठ दोऊ । दूरि न करहु इहाँ हइ कोऊ ॥

माल्यवंत गृह गयउ बहोरी । कहइ विभीषनु पुनि कर जोरी ॥

सुमति कुमति सब के उर रहही । नाथ पुरान मित्रांस अस कहही ॥

जहाँ सुमति तहाँ संपति नाना । जहाँ कुमति तहाँ विपति निदाना ॥

तव उर कुमति बसी बिपरीता । हित अनहित मानहु रिपु प्रीता ॥
कालराति निसिचर कुल केरी । तेहि सीता पर प्रीति घनेरी ॥
दो०—तात चरन गहि मागउँ राखहु मोर दुलार ।

सीता देहु राम कहूँ अहित न होइ तुम्हार ॥४०॥
बुध पुरान श्रुति संमत बानी । कही विभीषन नीति बखानी ॥
सुनत दसानन उठा रिसाई । खल तोहि निकट मृत्यु अब आई ॥
जिअसि सदा सठ मोर जिआवा । रिपु कर पच्छ मृद तोहि भावा ॥
कहसि न खल अस को जग माहीं । भुज बल जाहि जिता मैं नाहीं ॥
मम पुर बसित पसिन्ह पर प्रीती । सठ मिलु जाइ तिन्हहि कहु नीती ॥
अस कहि कीन्हसि चरन प्रहारा । अनुज गहे पद बारहि वारा ॥
उमा संत कहइ इहइ बड़ाई । मंद करत जो करइ भलाई ॥
तुम्ह पितु सरिस भलेहि मोहि मारा । राम भजै हित नाथ तुम्हारा ॥
सचिव संग लै नभ पथ गयऊ । सबहि सुनाइ कहत अस भयऊ ॥
दो०—रामु सत्यसंकल्प प्रभु सभा कालबस तोरि ।

मैं रघुबीर सरन अब जाउँ देहु जनि खोरि ॥४१॥
अस कहि चला विभीषनु जवहीं । आयूहीन भए सब तवहीं ॥
साधु अवग्या तुरत भवानी । कर कल्याण अखिल कै हानी ॥
रावन जवहि विभीषन त्यागा । भयउ विभव विनु तवहि अभागा ॥
देखिहउँ जाइ चरन जलजाता । अरुन मृदुल सेवक सुखदाता ॥

जे पद परसि तरी रिषिनारी । दंडक कानन पावनकारी ॥
 जे पद जनकसुताँ उर लाए । कपट कुरंग संग धर धाए ॥
 हर उर सर सरोज पद जेई । अहोभाग्य मैं देखिहउँ तेई ॥
 दो०—जिन्ह पायन्ह के पादुकन्हि भरतु रहे मन लाइ ।

ते पद आजु बिलोकिहउँ इन्ह नयनन्हि अब जाइ ॥४२॥
 एहि बिधि करत सप्रेम विचारा । आयउ सपदि सिंधु एहि पारा ॥
 कपिन्ह विभीषनु आवत देखा । जाना कोउ रिपु दूत विशेषा ॥
 ताहि राखि कपीस पहिँ आए । समाचार सब ताहि सुनाए ॥
 कह सुग्रीव सुनहु रघुराई । आवा मिलन दसानन भाई ॥
 कह प्रभु सखा बूझिऐ काहा । कहइ कपीस सुनहु नरनाहा ॥
 जानि न जाइ निसाचर माया । कामरूप केहि कारन आया ॥
 भेद हमार लेन सठ आवा । राखिअ बाँधि मोहिअस भावा ॥
 सखा नीति तुम्ह नीकि विचारी । मम पन सरनागत भयहारी ॥
 सुनि प्रभु वचन हरष हनुमाना । सरनागत वच्छल भगवाना ॥
 दो०—सरनागत कहूँ जे तजहिँ निज अनहित अनुमानि ।

ते नर पावँर पापमय तिन्हहि बिलोकत हानि ॥४३॥
 कोटि विप्र बध लागहिँ जाहू । आएँ सरन तजउँ नहिँ ताहू ॥
 सनमुख होइ जीव मोहि जयहीं । जन्म कोटि अघ नासहिँ तबहीं ॥
 दो०—पापबन्त कर सहज सुमाँआ भजनु मोर तेहि मान न काज ॥
 जौ पै दुष्टहृदय सोइ होई । मोरें सनमुख आव कि सोई ॥

निर्मल मन जन सो मोहि पावा । मोहि कपट छल छिद्र न भावा ॥
भेद लेन पठवा दससीसा । तबहुँ न कछु भयहानि कपीसा ॥
जग महुँ सखा निसाचर जेते । लछिमनु हनइ निमिष महुँ तेते
जौं समीत आवा सरनाई । रखिहउँ ताहि प्रान की नाई ॥
दो०—उभय भाँति तेहि आनहु हँसि कह कृपानिकेत ।

जय कृपाल कहि कपि चले अंगद हनू समेत ॥४४॥
सादर तेहि आगें करि बानर । चले जहाँ रघुपति करुनाकर ॥
दूरिहि ते देखे द्वौ भ्राता । नयनानंद दान के दाता ॥
बहुरि राम छबिधाम बिलोकी । रहेउ ठटुकि एकटक पल रोकी
भुज प्रलंब कंजारुन लोचन । स्यामल गात प्रनत भय मोचन ॥
सिंघ कंध आयत उर सोहा । आनन अमित मदन मन मोहा ॥
नयन नीर पुलकित अति गाता । मन धरि धीर कही मृदु बाता ॥
नाथ दसानन कर मैं भ्राता । निसिचर बंस जनम सुर बाता ॥
सहज पापप्रिय तामस देहा । जथा उलूकहि तम पर नेहा ॥
दो०—श्रवन सुजसु सुनि आयउँ प्रभु भंजन भव भीर ।

त्राहि त्राहि आरति हरन सरन सुखद रघुबीर ॥४५॥
अस कहि करत दंडवत देखा । तुरत उठे प्रभु हरष विसेषा ॥
दीन बचन सुनि प्रभु मन भावा । भुज बिसाल गहि हृदयँ लगावा ॥
अनुज सहित मिलि दिग बैठारी । बोले बचन भगत भयहारी ॥
कहु लंकेस सहित परिवारा । कुसल कुठाहर बास तुम्हारा ॥

खल मंडलीं बसहु दिनु राती । सखा धरम निबहइ केहि भाँती ॥
 मैं जानउँ तुम्हारि सय रीती । अति नय निपुन न भाव अनीती ॥
 बरु भल बास नरक कर ताता । दुष्ट संग जनि देइ विधाता ॥
 अब पद देखि कुसल रघुराया । जौं तुम्ह कीन्हि जानि जन दाया ॥

दो०—तब लागि कुसल न जीव कहूँ सपनेहुँ मन विश्राम ।

जब लागि भजत न राम कहूँ सोक धाम तजि काम ॥४६॥
 तब लागि हृदयँ बसत खल नाना । लोभ मोह मच्छर मद माना ॥
 जब लागि उर न बसत रघुनाथा । धरें चाप सायक कटि भाथा ॥
 ममता तरुन तमी अँधिआरी । राग द्वेष उलूक सुखकारी ॥
 तब लागि बसति जीव मन माहीं । जब लागि प्रभु प्रताप रवि नाहीं ॥
 अब मैं कुसल मिटे भय भारे । देखि राम पद कमल तुम्हारे ॥
 तुम्ह कृपाल जा पर अनुकूल । ताहि न व्याप त्रिविध भवसूला ।
 मैं निशिचर अति अधम सुभाऊ । सुभ आचरनु कीन्ह नहिं काऊ
 जासु रूप मुनि ध्यान न आवा । तेहिं प्रभु हरषि हृदयँ मोहि लावा
 दो०—अहोभाग्य मम अमित अति राम कृपा सुख पुंज ।

देखेउँ नयन बिरंचि सिव सेव्य जुगल पद कंज ॥४७॥
 सुनहु सखा निज कहउँ सुभाऊ । जान भुसुंडि संभु गिरिजाऊ ॥
 जौं नर होइ चराचर द्रोही । आवै समय सरन तकि मोही ॥
 तजि मद मोह धमल छल माना । करउँ सय तेहि साधु समाया ॥
 जननी जनक बंधु सुत दारा । तनु धनु भवन सुहृद परिवारा ॥

सब कै ममता ताग बटोरी । मम पद मनहि बाँध बरि डोरी ॥
 समदरसी इच्छा कछु नहिँ । हरष सोक भय नहिँ मन माहीं ॥
 अस सजन मम उर बस कैसैं । लोभी हृदयँ बसइ धनु जैसैं ॥
 तुम्ह सारिखे संत प्रिय मोरैं । धरउँ देह नहिँ आन निहोरैं ॥
 दो०—सगुन उपासक परहित निरत नीति दृढ़ नेम ।

ते नर प्राण समान मम जिन्ह कैं द्विज पद प्रेम ॥४८॥
 सुनु लंकेस सकल गुन तोरैं । तातैं तुम्ह अतिसय प्रिय मोरैं ॥
 राम वचन सुनि वानर जूथा । सकल कहहिँ जय कृपा बरूथा ॥
 सुनत बिभीषनु प्रभु कै बानी । नहिँ अघात श्रवनामृत जानी ॥
 पद अंबुज गहि बाराहिँ बारा । हृदयँ समात न प्रेमु अपारा ॥
 सुनहु देव सचराचर स्वामी । प्रनतपाल उर अंतरजामी ॥
 उर कछु प्रथम वासना रही । प्रभु पद प्रीति सरित सो बही ॥
 अब कृपालनिज भगति पावनी । देहु सदा सिव मन भावनी ॥
 एवमस्तु कहि प्रभु रनधीरा । मागा तुरत सिंधु कर नीरा ॥
 जदपि सखा तव इच्छा नहिँ । मोर दरसु अमोघ जग माहीं ॥
 अस कहि राम तिलक तेहि सारा । सुमन वृष्टि नभ भई अपारा ॥
 दो०—रावन क्रोध अनल निज स्वास समीर प्रचंड ।

जरत बिभीषनु राखेउ दीन्हैउ राजु अखंड ॥४९(क)॥

जो संपति सिव रावनहि दीन्हि दिअँ दस माथ ।

सोइ संपदा बिभीषनहि सकुचि दीन्हि रघुनाथ ॥४९(ख)॥

अस प्रभु छाड़ि भजहिं जे आना । ते नर पसु विनु पूँछ विषाना ॥
 निज जन जानि ताहि अपनावा । प्रभु सुभाव कपि कुल मन भावा
 पुनि सर्वग्य सर्व उर बासी । सर्वरूप सब रहित उदासी ॥
 बोले वचन नीति प्रतिपालक । कारन मनुज दनुज कुल घालक ॥
 सुनु कपीस लंकापति वीरा । केहि विधि तरिअ जलधि गंभीरा ॥
 संकुल मकर उरग झष जाती । अति अगाध दुस्तर सब भौंती ॥
 कह लंकैस सुनहु रघुनायक । कोटि सिंधु सोषक तव सायक ॥
 जद्यपि तदपि नीति असिगाई । विनय करिअ सागर सन जाई ॥
 दो०—प्रभु तुम्हार कुलगुर जलधि कहिहि उपाय विचारि ।

बिनु प्रयास सागर तरिहि सकल भालु कपि धारि ॥५०॥

सखा कही तुम्ह नीकि उपाई । करिअ दैव जौं होइ सहाई ॥
 मंत्रन यह लछिमन मन भावा । राम वचन सुनि अति दुख पावा ॥
 नाथ दैव कर कवन भरोसा । सोषिअ सिंधु करिअ मन रोसा ॥
 कादर मन कहूँ एक अधारा । दैव दैव आलसी पुकारा ॥
 सुनत बिहसि बोले रघुबीरा । ऐसेहिं करव धरहु मन धीरा ॥
 अस कहि प्रभु अनुजहि समुझाई । सिंधु समीप गए रघुराई ॥
 प्रथम प्रनाम कीन्ह सिरु नाई । बैठे पुनि तट दर्भ डसाई ॥
 जबहिं विभीषन प्रभु पहिं आए । पाछें रावन दूत पठाए ॥

दो०—सकल चरित निन्द्य देखे धरौं काय कपि देख ॥

प्रभु गुन हृदयँ सराहिं सरनागत पर नेह ॥५१॥

प्रगट बखानहिं राम सुभाऊ । अति सप्रेम गा विसरि दुराऊ ॥
रिपु के दूत कपिन्ह तव जाने । सकल बाँधि कपीस पहिं आने ॥
कह सुग्रीव सुनहु सब वानर । अंग भंग करि पठवहु निसिचर ॥
सुनि सुग्रीव वचन कपि धाए । बाँधि कटक चहु पास फिराए ॥
बहु प्रकार मारन कपि लागे । दीन पुकारत तदपि न त्यागे ॥
जो हमार हर नासा काना । तेहि कोसलाधीस कै आना ॥
सुनि लछिमन सब निकट बोलाए । दया लागि हँसि तुरत छोड़ाए ॥
रावन कर दीजहु यह पाती । लछिमन वचन बाचु कुलघाती ॥

दो०—कहेहु सुखागर मूढ़ सन मम संदेसु उदार ।

सीता देखि मिलहु न त आवा कालु तुम्हार ॥५२॥

तुरत नाइ लछिमन पद माथा । चले दूत बरनत गुन गाथा ॥
कहत राम जसु लंकाँ आए । रावन चरन सीस तिन्ह नाए ॥
बिहसि दसानन पूँछी बाता । कहसिन सुक आपनि कुसलाता ॥
पुनि कहु खबरि बिभीषन केरी । जाहि मृत्यु आई अति नेरी ॥
करत राज लंका सठ त्यागी । होइहि जव कर कीट अमागी ॥
पुनि कहु भालु कीस कटकाई । कठिन काल प्रेरित चलि आई ॥
जिन्ह के जीवन कर रखवारा । भयउ मृदुल चित सिंधु बिचारा ॥
कहु तपसिन्ह कै बात बहोरी । जिन्ह के हृदयँ त्रास अति मोरी ॥

नाथ कृपा करि पूँछेहु जैसें । मानहु कहा क्रोध तजि तैसें ॥
 मिला जाइ जव अनुज तुम्हारा । जातहिं राम तिलक तेहि सारा ॥
 रावन दूत हमहि सुनि काना । कपिन्ह बाँधि दीन्हें दुख नाना ॥
 श्रवन नासिका काटैं लागे । राम सपथ दीन्हें हम त्यागे ॥
 पूँछिहु नाथ राम कटकाई । बदन कोटि सत बरनि न जाई ॥
 नाना बरन भालु कपि धारी । बिकटानन विसाल भयकारी ॥
 जेहिं पुर दहेउ हतेउ सुत तोरा । सकल कपिन्ह महुँ तेहि बलु थोरा ॥
 अमित नाम भट कठिन कराला । अमित नाग बल विपुल विसाला ॥

दो०—द्विविद मयंद नील नल अंगद गद बिकटासि ।

दधिमुख केहरि निसठ सठ जामवंत बलरासि ॥५४॥

ए कपि सब सुग्रीव समाना । इन्ह सम कोटिन्ह गनइ को नाना ॥
 राम कृपाँ अतुलित बल तिन्हहीं । तून समान त्रैलोकहिं गनहीं ॥
 अस मैं सुना श्रवन दसकंधर । पदुम अठारह जूथप बंदर ॥
 नाथ कटक महुँ सो कपि नाहीं । जो न तुम्हहि जीतै रन माहीं ॥
 परम क्रोध मीजहिं सब हाथा । आयसु पै न देहिं रघुनाथा ॥
 सोषहिं सिंधु सहित झष ब्याला । पूरहिं न त भरि कुधर बिसाला ॥
 मर्दि गर्द मिलवहिं दससीसा । ऐसेइ वचन कहहिं सब कीसा ॥
 गर्जहिं तर्जहिं सहज असंका । मानहुँ असन चहत हहिं लंका ॥

राम तेज बल बुधि विपुलाई । सेष सहस सत सकहिं न गाई ॥
 सक सर एक सोषि सत सागर । तव भ्रातहि पूँछेउ नय नागर ॥
 तासु बचन सुनि सागर पाहीं । मागत पंथ कृपा मन माहीं ॥
 सुनत बचन विहसा दससीसा । जौं असि मति सहाय कृत कीसा ॥
 सहज भीरु कर बचन दृढ़ाई । सागर सन ठानी मचलाई ॥
 मूढ़ मृषा का करसि बढ़ाई । रिपु बल बुद्धि थाह मैं पाई ॥
 सचिव समीत विभीषन जाकें । विजय विभूति कहाँ जग ताकें ॥
 सुनि खल बचन दूत रिस बाढ़ी । समय त्रिचारि पत्रिका काढ़ी ॥
 रामानुज दीन्ही यह पाती । नाथ बचाइ जुड़ावहु छाती ॥
 विहसि बाम कर लीन्ही रावन । सचिव बोलि सठ लाग बचावन ॥
 दो०—बातन्ह मनहि रिझाइ सठ जनि घालसि कुल खीस ।

राम बिरोध न उबरसि सरन विष्णु अज ईस ॥५६(क)॥

की तजि मान अनुज इव प्रभु पद पंकज भृंग ।

होहि कि राम सरानल खल कुल सहित पतंग ॥५६(ख)॥

सुनत समय मन मुख मुसुकाई । कहत दसानन सगहि सुनाई ॥
 भूमि परा कर गहत अकासा । लघु तापस कर बाग बिलासा ॥
 कह सुक नाथ सत्य सब बानी । समुझहु छाड़ि प्रकृति अभिमानी ॥
 सुनहु बचन मम परिहरि क्रोधा । नाथ राम सन तजहु विरोधा ॥
 अति कोमल सुखी सुभास । जगणि अखिल लोक कर रास ॥
 मिलत कृपा तुम्ह पर प्रभु करिही । उर अपराध न एकउ धरिही ॥

जनकसुता रघुनाथहि दीजे। एतना कहा मोर प्रभु कीजे॥
 जब तेहि कहा देन बैदेही। चरन प्रहार कीन्ह सठ तेही॥
 नाइ चरन सिरु चला सो तहाँ। कृपासिंधु रघुनायक जहाँ॥
 करि प्रनामु निज कथा सुनाई। राम कृपाँ आपनि गति पाई॥
 रिषि अगस्ति कीं साप भवानी। राछस भयउ रहा मुनि ग्यानी॥
 बंदि राम पद बारहिं बारा। मुनि निज आश्रम कहूँ पगु धारा॥
 दो०—बिनय न मानत जलधि जड़ गए तीनि दिन बीति ।

बोले राम सकोप तब भय बिनु होइ न प्रीति ॥५७॥

लछिमन बान सरासन आनू। सोषौं बारिधि बिसिख कृसानू॥
 सठ सन बिनय कुटिल सन प्रीती। सहज कृपन सन सुंदर नीती॥
 ममता रत सन ग्यान कहानी। अति लोभी सन विरति बखानी॥
 क्रोधिहि सम कामिहि हरि कथा। ऊसर बीज बएँ फल जथा॥
 अस कहि रघुपति चाप चढ़ावा। यह मत लछिमन के मन भावा॥
 संधानेउ प्रभु बिसिख कराला। उठी उदधि उर अंतर ज्वाला॥
 मकर उरग क्षप गन अकुलाने। जरत जंतु जलनिधि जब जाने॥
 कनक थार भरि मनि गन नाना। बिप्र रूप आयउ तजि माना॥
 दो०—काटेहि पइ कदरी फरइ कोटि जतन कोउ सँच ।

बिनय न मान खगेस सुनु डाटेहि पइ नव नीच ॥५८॥

समय सिंधु गहरे पद प्रभु कोरे। छमहु साथ सब अवगुन सेवे॥
 गगन समीर अनल जल धरनी। इन्ह कह नाथ सहज जड़ करनी॥

तव प्रेरित मायाँ उपजाए। सृष्टि हेतु सब ग्रंथनि गाए ॥
 प्रभु आयसु जेहि कहँ जस अहई। सो तेहि भाँति रहे सुख लहई ॥
 प्रभु भल कीन्ह मोहि सिख दीन्ही। मरजादा पुनि तुम्हरी कीन्ही ॥
 ढोल गवाँर सूद्र पसु नारी। सकल ताड़ना के अधिकारी ॥
 प्रभु प्रताप मैं जाब सुखाई। उतरिहि कटकु न मोरि बड़ाई ॥
 प्रभु अग्या अपेल श्रुति गाई। करौं सो बेगि जो तुम्हहि सोहाई ॥

दो०—सुनत विनीत बचन अति कह कृपाल मुसुकाइ ।

जेहि बिधि उतरै कपि कटकु तात सो कहहु उपाइ ॥५९॥

नाथ नील नल कपि द्वौ भाई। लरिकाई रिषि आसिय पाई ॥
 तिन्ह कें परस किएँ गिरि भारे। तरिहहिँ जलधि प्रताप तुम्हारे ॥
 मैं पुनि उर धरि प्रभु प्रभुताई। करिहुँ उँ बल अनुमान सहाई ॥
 एहि बिधि नाथ पयोधि बँधाइअ। जेहिँ यह सुजसु लोक तिहुँ गाइअ
 एहिँ सर मम उत्तर तटबासी। हतहु नाथ खल नर अधरासी ॥
 सुनि कृपाल सागर मन पीरा। तुरतहिँ हरी राम रनधीरा ॥
 देखि राम बल पौरुष भारी। हरषि पयोनिधि भयउ सुखारी ॥
 सकल चरित कहि प्रभुहि सुनावा। चरन बंदि पाथोधि सिधावा ॥

छं०—निज भवन गवनेउ सिंधु श्रीरघुपतिहि यह मत भायऊ ।

यह चरित कलि मलहर जथामति दास तुलसी गायऊ ॥

सुख भवन संसार समस्त हवन विषाद रघुपति गुन मना ।

तजि सकल आस भरोस गावहि सुनहि संतत सठ मना ॥

दो०—सकल सुमंगल दायक रघुनायक गुन गान ।

सादर सुनहिं ते तरहिं भव सिंधु बिना जल जान ॥६०॥

मासपारायण, चौबीसवाँ विश्राम

इति श्रीमद्रामचरितमानसे सकलकलिकलुषविध्वंसने

पञ्चमः सोपानः समाप्तः ।

(सुन्दरकाण्ड समाप्त)




॥ श्रीरामाय नमः ॥

श्रीरामचरितमानस

लंकाकाण्ड



रामके लिये देव-रथ



तेजपुंज रथ दिव्य अनूपा ।

हरषि चढे कोसलपुर भूपा ॥

श्रीगणेशाय नमः

श्रीजानकीवल्लभो विजयते

श्रीरामचरितमानस

षष्ठ सोपान

(लंकाकाण्ड)

श्लोक

रामं कामारिसेव्यं भवभयहरणं कालमत्तेभसिंहं
योगीन्द्रं ज्ञानगम्यं गुणनिधिमजितं निर्गुणं निर्विकारम् ।
मायातीतं सुरेशं खलवधनिरतं ब्रह्मवृन्दैकदेवं
वन्दे कन्दावदातं सरसिजनयनं देवमुर्वीशरूपम् ॥ १ ॥
शङ्खेन्द्राभमतीवसुन्दरतनुं शार्दूलचर्माम्बरं
कालव्यालकरालभूषणधरं वज्राशक्तिप्रियम् ॥

काशीशं कलिकल्मषौघशमनं कल्याणकल्पद्रुमं
 नौमीड्यं गिरिजापतिं गुणनिधिं कन्दर्पहं शङ्करम् ॥ २ ॥
 यो ददाति सतां शम्भुः कैवल्यमपि दुर्लभम् ।
 खलानां दण्डकृद्योऽसौ शङ्करः शं तनोतु मे ॥ ३ ॥

दो०—लव निमेष परमानु जुग बरष कल्प सर चंड ।
 भजसि न मन तेहि राम को कालु जासु कोदंड ॥

सो०—सिंधु बचन सुनि राम सचिव बोलि प्रभु अस कहेउ ।
 अब बिलंबु केहि काम करहु सेतु उतरै कटक ॥
 सुनहु भानुकुल केतु जामवंत कर जोरि कह ।
 नाथ नाम तव सेतु नर चढ़ि भव सागर तरहिं ॥

यह लघु जलधि तरत कति बारा । अस सुनि पुनि कह पवनकुमारा ॥
 प्रभु प्रताप बड़वानल भारी । सोषेउ प्रथम पयोनिधि बारी ॥
 तव रिपु नारि रुदन जल धारा । भरेउ बहोरि भयउ तेहिं खारा ॥
 सुनि अति उकुति पवनसुत केरी । हरषे कपि रघुपति तन हेरी ॥
 जामवंत बोले दोउ भाई । नल नीलहि सब कथा सुनाई ॥
 राम प्रताप सुमिरि मन माहीं । करहु सेतु प्रयास कछु नाहीं ॥
 बोलि लिए कपि निकर बहोरी । सकल सुनहु विनती कछु मोरी ॥
 राम चरन पंकज उर धरहू । कौतुक एक भालु कपि करहू ॥
 धावहु मर्कट विकट बरूथा । आनहु बिटप गिरिन्ह के जूथा ॥
 सुनि कपि भालु चले करि हूहा । जय रघुवीर प्रताप समूहा ॥

दो०—अति उत्तंग गिरि पादप लीलहिं लेहिं उठाइ ।

आनि देहिं नल नीलहि रचहिं ते सेतु बनाइ ॥ १ ॥

सैल विसाल आनि कपि देहीं । कंदुक इव नल नील ते लेहीं ॥
देखि सेतु अति सुंदर रचना । विहसि कृपानिधि बोले वचना ॥
परम रम्य उत्तम यह धरनी । महिमा अभित जाइ नहिं बरनी ॥
करिहउँ इहाँ संभु थापना । मोरे हृदयँ परम कल्पना ॥
मुनि कपीस बहु दूत पठाए । मुनिबर सकल बोलि लै आए ॥
लिंग थापि विधिवत करि पूजा । सिव समान प्रिय मोहि न दूजा ॥
सिव द्रोही मम भगत कहावा । सो नर सपनेहुँ मोहि न पावा ॥
संकर विमुख भगति चह मोरी । सो नारकी मूढ़ मति थोरी ॥

दो०—संकरप्रिय मम द्रोही सिव द्रोही मम दास ।

ते नर करहिं कल्प भरि घोर नरक महुँ बास ॥ २ ॥

जे रामेस्वर दरसन करिहहिं । ते तनु तजि मम लोक सिधरिहिं ॥
जो गंगाजलु आनि चढ़ाइहि । सो साजुज्य मुक्ति नर पाइहि ॥
होइ अकाम जो छल तजि सेइहि । भगति मोरि तेहि संकर देइहि ॥
मम कृत सेतु जो दरसन करिही । सो बिनु श्रम भवसागर तरिही ॥
राम बचन सब के जिय भाए । मुनिबर निज निज आश्रम आए ॥
गिरिजा रघुपति कै यह रीती । संतत करहिं प्रनत पर प्रीती ॥
बाँधा सेतु नील नल नागर । राम कृपाँ जसु भयउ उजागर ॥
बूझि आनिहि घोरहिं जेई । माए उपल बोझि सब वेई ॥

महिमा यह न जलधि कइ बरनी । पाहन गुन न कपिन्ह कइ करनी ॥

दो०—श्री रघुबीर प्रताप ते सिंधु तरे पाषाण ।

ते मतिमंद जे राम तजि भजहिं जाइ प्रभुआन ॥ ३ ॥

बाँधि सेतु अति सुदृढ़ बनावा । देखि कृपानिधि के मन भावा ॥
चली सेन कछु बरनि न जाई । गर्जहिं मर्कट भट समुदाई ॥
सेतुबंध ढिग चढ़ि रघुराई । त्रितव कृपाल सिंधु बहुताई ॥
देखन कहूँ प्रभु करुना कंदा । प्रगट भए सब जलचर वृंदा ॥
मकर नक्र नाना शेष व्याला । सत जोजन तन परम बिसाला ॥
अइसेउ एक तिन्हहि जे खाहीं । एकन्ह कै डर तेपि डेराहीं ॥
प्रभुहि बिलोकहिं टरहिं न टारे । मन हरषित सब भए सुखारे ॥
तिन्ह की ओट न देखिअ वारी । मगन भए हरि रूप निहारी ॥
चला कटकु प्रभु आयसु पाई । को कहि सक कपि दल विपुलाई ॥

दो०—सेतुबंध भइ भीर अति कपि नभ पंथ उड़ाहि ।

अपर जलचरन्ह ऊपर चढ़ि चढ़ि पारहि जाहिं ॥ ४ ॥

अस कौतुक बिलोकि द्वौ भाई । विहँसि चले कृपाल रघुराई ॥
सेन सहित उतरे रघुबीरा । कहि न जाइ कपिं जूथप भीरा ॥
सिंधु पार प्रभु डेरा कीन्हा । सकल कपिन्ह कहूँ आयसु दीन्हा ॥
खाहु जाइ फल मूल सुहाए । सुनत भालु कपि जहँ तहँ घाए ॥
सब तरु फरे राम हित लागी । रितु अरु कुरितु काल गति त्यागी ॥
खाहि मधुर फल बिटप हलावहि । लंका सन्मुख सिखर चलावहि ॥

जहँ कहँ फिरत निसाचर पावहिं । घेरि सकल बहु नाच नचावहिं ॥
दसनन्हि काटि नासिका काना । कहि प्रभु सुजसु देहिं तव जाना ॥
जिन्ह कर नासा कान निपाता । तिन्ह रावनहि कही सब बाता ॥
सुनत श्रवन बारिधि बंधाना । दसमुख बोलि उठा अकुलाना ॥
दो०—बाँध्यो बननिधि नोरनिधि जलधि सिंधु बारीस ।

सत्य तोयनिधि कंपति उदधि पयोधि नदीस ॥ ५ ॥

निज विकलता बिचारि बहोरी । बिहँसि गयउ गृह करि भय भोरी ॥
मंदोदरीं सुन्यो प्रभु आयो । कौतुकीं पायोधि बँधायो ॥
कर गहि पतिहि भवन निज आनी । बोली परम मनोहर बानी ॥
चरन नाइ सिरु अंचलु रोपा । सुनहु बचन पिय परिहरि कोपा ॥
नाथ बयरु कीजे ताही सों । बुधि बल सकिअ जीति जाही सों ॥
तुम्हहि रघुपतिहि अंतर कैसा । खलु खद्योत दिनकरहि जैसा ॥
अतिबल मधु कैटभ जेहिं मारे । महावीर दितिसुत संघारे ॥
जेहिं बलि बाँधि सहसभुज मारा । सोइ अवतरेउ हरन महि मारा ॥
तासु विरोध न कीजिअ नाथा । काल करम जिव जाकें हाथा ॥

दो०—रामहि सौँपि जानकी नाइ कमल पद माथ ।

सुत कहँ राज समर्पि बन जाइ भजिअ रघुनाथ ॥ ६ ॥

नाथ दीनदयाल रघुराई । बाधउ सनमुख गएँ न खाई ॥
चाहिअ करन सो सब करि बीते । तुम्ह सुर असुर चराचर जीते ॥
सत कहहि अति नीति दसानन । जौ थप्य जाइहि नृप कवन ॥

तासु भजनु कीजिअ तहँ भर्ता। जो कर्ता पालक संहर्ता ॥
 सोइ रघुवीर प्रनत अनुरागी। भजहु नाथ ममता सब त्यागी ॥
 मुनिवरजतनु करहिं जेहि लागी। भूप राजु तजि होहिं बिरागी ॥
 सोइ कोसलाधीस रघुराया। आयउ करन तोहि पर दाया ॥
 जौं पिय मानहु मोर सिखावन। सुजसु होइ तिहुँ पुर अति पावन ॥
 दो०—अस कहि नयन नीर भरि गहि पद कंपित गात ।

नाथ भजहु रघुनाथहि अचल होइ अहिवात ॥ ७ ॥

तब रावन मयसुता उटाई। कहै लाग खल निज प्रभुताई ॥
 सुनु तैं प्रिया वृथा भय माना। जग जोधा को मोहि समाना ॥
 बरुन कुवेर पवन जम काला। भुज बल जितेउँ सकल दिगपाला ॥
 देव दनुज नर सब बस मोरें। कवन हेतु उपजा भय तोरें ॥
 नाना विधि तोहि कहेसि बुझाई। सभा बहोरि बैठ सो जाई ॥
 मंदोदरी हृदयँ अस जाना। काल बस्य उपजा अभिमाना ॥
 सभाँ आइ मंत्रिन्ह तेहिं वूझा। करब कवन विधि रिपु सैं जूझा ॥
 कहहिं सचिव सुनु निसिचर नाहा। बार बार प्रभु पूछहु काहा ॥
 कहहु कवन भय करिअ बिचारा। नर कपि भालु अहार हमारा ॥

दो०—सब के बचन श्रवन सुनि कह प्रहस्त कर जोरि ।

नीति बिरोध न करिअ प्रभु मंत्रिन्ह मति अति थोरि ॥ ८ ॥

कहहिं सचिव सठ ठकुर सोहाती। नाथ न पूर आव एहि भाँती ॥
 बारिधि नाधि एक कपि आवा। तासु चरित मन महु सबु गावा ॥

छुधा न रही तुम्हहि तव काहू । जारत नगरु कस न धरि खाहू ॥
 सुनत नीक आगें दुख पावा । संचिवन अस मत प्रभुहि सुनावा ॥
 जेहि वारीस बँधायउ हेल। उतरेउ सैन समेत सुबेला ॥
 सो भनु मनुज खाव हम भाई । बचन कहहिं सब गाल फुलाई ॥
 तात बचन मम सुनु अति आदर । जनि मन गुनहु मोहि करि कादर
 प्रिय बानी जे सुनिहिं जे कहहीं । ऐसे नर निकाय जग अहहीं ॥
 बचन परम हित सुनत कठोरे । सुनिहिं जे कहहिं ते नर प्रभु थोरे ॥
 प्रथम बसीठ पठउ सुनु नीती । सीता देख करहु पुनि प्रीती ॥

दो०—नारि पाइ फिरि जाहिं जौं तौ न बढाइअ रारि ।

नाहिं तसन्मुख समर महि तात करिअ हठिमारि ॥ ९ ॥

यह मत जौं मानहु प्रभु मोरा । उभय प्रकार सुजसु जग तोरा ॥
 सुत सन कह दसकंठ रिसाई । अक्षि मति सठ केहिं तोहि सिखाई
 अवहीं ते उर संसय होई । वेनुमूल सुत भयहु घमोई ॥
 सुनि पितु गिरा परुष अति घोरा । चला भवन कहि बचन कठोरा ॥
 हित मत तोहि न लागत कैसैं । काल त्रिवस कहूँ भेषज जैसैं ॥
 संध्या समय जानि दससीसा । भवन चलेउ निरखत भुज बीसा
 लंका सिखर उपर आगारा । अति विचित्र तहँ होइ अखारा ॥
 बैठ जाइ तेहि मंदिर रावन । लागे किंनर गुन गन गावन ॥
 बाजहि ताल पखाउज बाना । दूत्य कहिं अपहरा प्रवीना ॥

दो०—सुनासीर सत सरिस सो संतत करइ बिलास ।

परम प्रबल रिपु सीस पर तद्यपि सोच न त्रास ॥१०॥

इहाँ सुबेल सैल रघुवीरा । उतरे सेन सहित अति भीरा ॥
 सिखर एक उतंग अति देखी । परम रम्य सम सुभ्र विसेषी ॥
 तहँ तरु किसलय सुमन सुहाए । लछिमन रचि निज हाथ डसाए ॥
 तापर रुचिर मृदुल मृगछाला । तेहिँ आसन आसीन कृपाला ॥
 प्रभु कृत सीस कपीस उछंगा । वाम दहिन दिसि चाप निषंगा ॥
 दुहुँ कर कमल सुधारत बाना । कह लंकेस मंत्र लगि काना ॥
 बड़भागी अंगद हनुमाना । चरन कमल चापत विधि नाचा ॥
 प्रभु पाछें लछिमन वीरासन । कटि निषंग कर बान सरासन
 दो०—एहि विधि कृपा रूप गुन धाम रामु आसीन ।

धन्य ते नर एहिँ ध्यान जे रहत सदा लयलीन ॥११(क)॥

पूरब दिसा बिलोकि प्रभु देखा उदित मयंक ।

कहत सबहि देखहु ससिहि मृगपति सरिस असंक ॥११(ख)॥

पूरव दिसि गिरि गुहा निवासी । परम प्रताप तेज बल रासी ॥
 मत्त नाग तम कुंभ विदारी । ससि केसरी गगन बन चारी ॥
 विथुरे नभ मुकुताहल तारा । निसि सुंदरी केर सिंगारा ॥
 कह प्रभु ससि महुँ मेचकताई । कहहु काह निज निज मति भाई ॥
 कह सुग्रीव सुनहु रघुराई । ससि महुँ प्रगट भूमि कै झाँई ॥
 मारेउ राहु ससिहि कह कोइ । उर महँ परी स्यामता सोई ॥

कोउ कह जव विधि रति मुख कीन्हा । सार भाग ससि कर हरि लीन्हा
छिद्र सो प्रगट इंदु उर माहीं । तेहि मग देखिअ नभ परिछाहीं॥
प्रभु कह गरल बंधु ससि केरा । अति प्रिय निज उर दीन्ह बसेरा॥
बिष संजुत कर निकर पसारी । जारत बिरहवंत नर नारी ॥
दो०—कह हनुमंत सुनहु प्रभु ससि तुम्हार प्रिय दास ।
तव मूरति बिधु उर बसति सोइ स्यामता अभास ॥१२(क)॥

नवाह्नपारायण, सातवाँ विश्राम

पवन तनय के बचन सुनि बिहँसे रामु सुजान ।
दच्छिन दिसि अवलोकि प्रभु बोले कृपानिधान ॥१२(ख)॥
देखु त्रिभीषन दच्छिन आसा । घन घमंड दामिनी बिलासा ॥
मधुर मधुर गरजइ घन घोरा । होइ वृष्टि जनि उपल कठोरा ॥
कहत त्रिभीषन सुनहु कृपाला । होइ न तड़ित न बारिद माला ॥
लंका सिखर उपर आगारा । तहँ दसकंधर देख अखारा ॥
छत्र मेघडंबर सिर धारी । सोइ जनु जलद घटा अति कारी॥
मंदोदरी श्रवन ताटंका । सोइ प्रभु जनु दामिनी दमंका ॥
बाजहिं ताल मृदंग अनूपा । सोइ रव मधुर सुनहु सुरभूपा ॥
प्रभु मुसुकान समुझि अभिमाना । चाप चढ़ाइ धान संधाना ॥

दो०—छत्र मुकुट ताटंक तब हते एकहीं बान ।

सब के देखत माहि पर मरमु न कोऊ जान ॥१३(क)॥

अस कौतुक करि राम सर प्रबिसेउ आइ निपंग ।

रावन सभा ससंक सब देखि महा रसभंग ॥१३ (ख) ॥

कंप न भूमि न मरुत बिसेषा । अस्त्र सस्त्र कछु नयन न देखा ॥

सोचहिं सब निज हृदय मझारी । असगुन भयउ भयंकर भारी ॥

दसमुख देखि सभा भय पाई । बिहसि बचन कह जुगुति बनाई

सिरउ गिरे संतत सुभ जाही । मुकुट परे कस असगुन ताही ॥

सयन करहु निज निज गृह जाई । गवने भवन सकल सिर नाई ॥

मंदोदरी सोच उर बसेऊ । जय ते श्रवनपूर महि खसेऊ ॥

सजल नयन कह जुग कर जोरी । सुनहु प्रानपति विनती मोरी ॥

कंत राम विरोध परिहरहू । जानि मनुज जनि हठ मन धरहू ॥

दो०—बिस्वरूप रघुवंस मनि करहु बचन बिस्वासु ।

लोक कल्पना वेद कर अंग अंग प्रति जासु ॥१४॥

पद पाताल सीस अज धामा । अपरलोक अँग अँग विश्रामा ॥

भृकुटि बिलास भयंकर काला । नयन दिवाकर कच घन माला ॥

जासु घान अस्विनीकुमारा । निसि अरु दिवस निमेष अपारा ॥

श्रवन दिसा दस वेद बखानी । मारुत स्वास निगम निज बानी ॥

अधर लोभ जम दसन कराला । माया हास बाहु दिगपाला ॥

आनन अनल अंबुपति जीहा । उत्तपति पालन प्रलय समीहा ॥

रोम राजि अष्टादस भारा । अस्थि सैल सरिता नस जारा ॥

उदर उदधि अधगो जातना । जगमय प्रभु का बहु कल्पना ॥

दो०—अहंकार सिव बुद्धि अज मन ससि चित्त महान ।
मनुज वास सचराचर रूप राम भगवान ॥ १५ (क) ॥
अस बिचारि सुनु प्रानपति प्रभु सन बयरु बिहाइ ।
प्रीति करहु रघुबीर पद मम अहिवात न जाइ ॥ १५ (ख) ॥
बिहँसा नारि वचन सुनि काना । अहो मोह महिमा बलवाना ॥
नारि सुभाउ सत्य सब कहहीं । अवगुन आठ सदा उर रहहीं ॥
साहस अनृत चपलता माया । भय अबिवेक असौच अदाया ॥
रिपु कर रूप सकल तैं गावा । अति बिसाल भय मोहि सुनावा ॥
सो सब प्रिया सहज बस मोरें । समुझि परा प्रसाद अव तोरें ॥
जानिउँ प्रिया तोरि चतुराई । एहि बिधि कहहु मोरि प्रभुताई ॥
तव बतकही गूढ़ मृगलोचनि । समुझत सुखद सुनत भय मोचनि
मंदोदरि मन महुँ अस ठयऊ । पियहि काल बस मतिभ्रम भयऊ

दो०—एहि बिधि करत विनोद बहु प्रात प्रगट दसकंध ।
सहज असंक लंकपति सभाँ गयउ मद अंध ॥ १६ (क) ॥
सो०—फूलइ फरइ न वेत जदपि सुधा बरषहि जलद ।
मूरुख हृदयँ न चेत जौँ गुर मिलहिं बिरंचि सम ॥ १६ (ख) ॥
इहाँ प्रात जागे रघुराई । पूछा मत सब सचिव बोलाई ॥
कहहु बेगि का करिअ उपाई । जामवंत कह पद सिरु नाई ॥
सुनु सर्वग्य सकल उर वासी । बुधि बल तेज धर्म मुन रासी ॥
मंत्र कहउँ निज मति अनुसार । दूत पठाइअ बालिकुमारा ॥

नीक मंत्र सब के मन माना । अंगद सन कह कृपानिधाना ॥
 बालितनय बुधि बल गुन धामा । लंका जाहु तात मम कामा ॥
 बहुत बुझाइ तुम्हहि का कहउँ । परम चतुर मैं जानत अहउँ ॥
 काजु हमार तासु हित होई । गिपु सन करेहु वतकही सोई ॥

सो०—प्रभु भग्या धरि सीस चरन बंदि अंगद उठेउ ।

सोइ गुन सागर ईस राम कृपा जा पर करहु ॥१७(क)॥

स्वयंसिद्ध सब काज नाथ मोहि आदरु दियउ ।

अस बिचारि जुबराज तन पुलकित हरषित हियउ ॥१७(ख)॥

बंदि चरन उर धरि प्रभुताई । अंगद चलेउ सबहिसि रुनाई ॥

प्रभु प्रताप उर सहज असंका । रन बाँकुरा बालिसुत बंका ॥

पुर पैठत रावन कर बेटा । खेलत रहा सो होइ गै भेटा ॥

बातहिं बात करष बढि आई । जुगल अतुल बल पुनि तरुनाई ॥

तेहिं अंगद कहूँ लात उठाई । गहि पद पटकेउ भूमि भवाँई ॥

निसिचर निकर देखि भट भारी । जहँ तहँ चले न सकहिं पुकारी ॥

एक एक सन मरमु न कहहीं । समुझि तासु बध चुप करि रहहीं ॥

भयउ कोलाहल नगर मझारी । आवा कपि लंका जेहिं जारी ॥

अब धौं कहा करिहि करतारा । अति समीत सब करहिं बिचारा ॥

बिनु पूछें मगु देहिं दिखाई । जेहि बिलोक सोइ जाइ सुलाई ॥

सो०—नयउ समी देखार सब सुमिरि राम पद कँज ।

सिंह ठवनि इत उत चितव धीर बीर बल पुंज ॥१८॥

तुरत निसाचर एक पठावा । समाचार रावनहि जनावा ॥
 सुनत बिहँसि बोला दससीसा । आनहु बोलि कहाँ कर कीसा ॥
 आयसु पाइ दूत बहु धाए । कपिकुंजरहि बोलि लै आए ॥
 अंगद दीख दसानन बैसैं । सहित प्रान कजलगिरि जैसैं ॥
 भुजा धिटप सिर संग समाना । रोमावली लता जनु नाना ॥
 मुख नासिका नयन अरु काना । गिरि कंदरा खोह अनुमाना ॥
 गयउ सभाँ मन नेकु न मुरा । बालितनय अतिबल बाँकुरा ॥
 उठे सभासद कपि कहूँ देखी । रावन उर भा क्रोध विशेषी ॥

दो०—जथा मत्त गज जूथ महुँ पंचानन चलि जाइ ।

राम प्रताप सुमिरि मन बैठ सभाँ सिरु नाइ ॥ १९ ॥

कह दसकंठ कवन तैं बंदर । मैं रघुवीर दूत दसकंधर ॥
 मम जनकहि तोहि रही मिताई । तव हित कारन आयउँ भाई ॥
 उत्तम कुल पुलस्ति कर नाती । सिव विरंचि पूजेहु बहु भाँती ॥
 बर पायहु कीन्हेहु सब काजा । जीतेहु लोकपाल सब राजा ॥
 नृप अभिमान मोह बस किंवा । हरि आनिहु सीता जगदंबा ॥
 अब सुभ कहा सुनहु तुम्ह मोरा । सब अपराध छमिहि प्रभु तोरा ॥
 दसन गहहु तृन कंठ कुठारी । परिजन सहित संग निज नारी ॥
 सादर जनकसुता करि आगैं । एहि विधि चलहु सकल भय त्यागैं ॥

दो०—प्रताप बल रघुवंसमजि नहि चहि अन मोहि ।

आरत गिरा सुनत प्रभु अभय करैगो तोहि ॥ २० ॥

रे कपिपोत बोलु संभारी । मूढ़ न जानेहि मोहि सुरारी ॥
 कहु निज नाम जनक करभाई । केहि नातें मानिए मिताई ॥
 अंगद नाम वालि कर बेटा । तासों कयहुँ भई ही भेटा ॥
 अंगद वचन सुनत सकुचाना । रहा वालि वानर मैं जाना ॥
 अंगद तहीं वालि कर बालक । उपजेहु बंस अनल कुल घालक ॥
 गर्भ न गयहु व्यर्थ तुम्ह जायहु । निज मुख तापस दूत कहायहु ॥
 अब कहु कुसल वालि कहैं अहई । विहँसि वचन तब अंगद कहई ॥
 दिन दस गएँ वालि पंहि जाई । बूझेहु कुसल सखा उर लाई ॥
 राम विरोध कुसल जसि होई । सो सब तोहि सुनाइहि सोई ॥
 सुनु सठ भेद होइ मन ताकैं । श्रीरघुवीर हृदय नहिं जाकैं ॥

दो०—हम कुल घालक सत्य तुम्ह कुल पालक दससीस ।

अंधउ बधिर न अस कहहिं नयन कान तब बीस ॥ २१ ॥

सिव विरंचि सुर मुनि समुदाई । चाहत जासु चरन सेवकाई ॥
 तासु दूत होइ हम कुल बोरा । अइसिहुँ मति उर बिहरन तोरा ॥
 सुनि कठोर वानी कपि केरी । कहत दसानन नयन तरेरी ॥
 खल तव कठिन वचन सब सहजैं । नीति धर्म मैं जानत अहजैं ॥
 कह कपि धर्मसीलता तोरी । हमहुँ सुनी कृत पर त्रिय चोरी ॥
 देखी नयन दूत रखवारी । बूढ़ि न मरहु धर्म व्रतधारी ॥
 कान नाकविनु मगिनि निहारी । छमा कीन्हि तुम्ह धर्म बिचारी ॥
 धर्मसीलता तव जग जागी । पावा दरसु हमहुँ बड़भागी ॥

दो०—जनि जल्पसि जड़ जंतु कपि सठ बिलोकु मम बाहु ।
 लोकपाल बल विपुल ससि ग्रसन हेतु सब राहु ॥ २२(क) ॥
 पुनि नभ सर मम कर निकर कमलन्हि पर करि बास ।
 सोभत भयउ मराल इव संभु सहित कैलास ॥ २२(ख) ॥

तुम्हरे कटक माझ सुनु अंगद । मो सन भिरिहि कवन जोधा बद
 तव प्रभु नारि विरहँ बलहीना । अनुज तासु दुख दुखी मलीना ॥
 तुम्ह सुग्रीव कूलद्रुम दोऊ । अनुज हमार भीरु अति सोऊ ॥
 जामवंत मंत्री अति बूढ़ा । सो कि होइ अब समरारूढ़ा ॥
 सिल्पि कर्म जानहिं नल नीला । है कपि एक महा बलसीला ॥
 आवा प्रथम नगरु जेहिं जारा । सुनत बचन कह बालिकुमारा ॥
 सत्य बचन कहु निसिचर नाहा । साँचेहुँ कीस कीन्ह पुर दाहा ॥
 रावन नगर अल्प कपि दहई । सुनि अस बचन सत्य को कहई ॥
 जो अति सुभट सराहेहु रावन । सो सुग्रीव केर लघु धावन ॥
 चलइ बहुत सो बीर न होई । पठवा खबरि लेन हम सोई ॥

दो०—सत्य नगरु कपि जारेउ बिनु प्रभु आयसु पाइ ।
 फिरि न गयउ सुग्रीव पहिं तेहिं भय रहा लुकाइ ॥ २३(क) ॥
 सत्य कहहि दसकंठ सब मोहि न सुनि कछु कोह ।
 कोउ न हमारें कटक अस तो सन लरत जो सोह ॥ २३(ख) ॥
 प्रीति विरोध समान सन करिअ नीति असि आहि ।
 जौं मृगपति बध मेडुकन्हि भल कि कहइ कोउ ताहि ॥ २३(ग) ॥

जद्यपि लघुता राम कहूँ तोहि बधेँ बड़ दोष ।
 तदपि कठिन दसकंठ सुनु छत्र जाति कर रोष ॥२३(घ)॥
 बक्र उक्ति धनु बचन सर हृदय दहेउ रिपु कीस ।
 प्रतिउत्तर सड़सिन्ह मनहु काढ़त भट दससीस ॥२३(ङ)॥
 हँसि बोलेउ दसमौलि तब कपि कर बड़ गुन एक ।
 जो प्रतिपालइ तीसु हित करइ उपाय अनेक ॥२३(च)॥

धन्य कीस जो निज प्रभु काजा । जहँ तहँ नाचइ परिहरि लाजा ॥
 नाचि कूदि करि लोग रिझाई । पति हित करइ धर्म निपुनाई ॥
 अंगद स्वामिभक्त तब जाती । प्रभु गुन कसन कहसि एहि भाँती
 मैं गुन गाहक परम सुजाना । तव कटुरटनि करउँ नहिँ काना ॥
 कह कपि तव गुन गाहकताई । सत्य पवनसुत मोहि सुनाई ॥
 वन विधंसि सुत बधि पुर जारा । तदपि न तेहिँ कछु कृत अपकारा ॥
 सोइ विचारि तव प्रकृति सुहाई । दसकंधर मैं कीन्हि ढिठाई ॥
 देखेउँ आइ जो कछु कपि भाषा । तुम्हरें लाज न रोष न माखा ॥
 जौँ असि मति पितु खाए कीसा । कहि अस बचन हँसा दससीसा ॥
 पितहि खाइ खातेउँ पुनि तोही । अबहीं समुझि परा कछु मोही ॥
 बालि त्रिमलजस भाजन जानी । हतउँ न तोहि अधम अभिमानी ॥
 कहु रावन रावन जग केते । मैं निज श्रवन सुने सुनु जेते ॥
 बलिहि नितन एक मयउ प्रताप । राखेऊ बाँधि सिमुह हवसका ॥
 खेलहि बालक मारहि जाई । दया लागि बलि दीन्ह छोड़ाई ॥

एक बहोरि सहस्रभुज देखा। धाइ धरा जिमि जंतु बिसेषा ॥
कौतुक लागि भवन लै आवा। सो पुलस्ति मुनि जाइ छोड़ावा ॥

दो०—एक कहत मोहि सकुच अति रहा बालि कीं काँख।

इन्ह महुँ रावन तैं कवन सत्य बदहि तजि माख ॥२४॥

सुनु सठ सोइ रावन बलसीला। हरगिरि जान जासु भुज लीला ॥
जान उमापति जासु सुराई। पूजेउँ जेहि सिर सुमन चढ़ाई ॥
सिर सरोज निज करन्हि उतारी। पूजेउँ अमित बार त्रिपुरारी ॥
भुज विक्रम जानहिं दिगपाला। सठ अजहूँ जिन्ह कैं उर साला ॥
जानहिं दिग्गज उर कठिनाई। जय जय भिरउँ जाइ बरिआई ॥
जिन्ह के दसन कराल न फूटे। उर लागत मूलक इव दूटे ॥
जासु चलत डोलति इमि धरनी। चढ़त मत्त गज जिमि लघु तरनी ॥
सोइ रावन जग विदित प्रतापी। सुनेहि न श्रवन अलीक प्रलापी ॥

दो०—तेहि रावन कहँ लघु कहसि नर कर करसि बखान।

रे कपि बर्बर खर्ब खल अब जाना तव ग्यान ॥२५॥

मुनि अंगद सकोप कह बानी। बोलु सँभारि अधम अभिमानी ॥
सहस्रबाहु भुज गहन अपारा। दहन अनल सम जासु कुठारा ॥
जासु परसु सागर खर धारा। बूढ़े नृप अगनित बहु बारा ॥
तासु गर्ब जेहि देखत भागा। सो नर क्यों दससीस अभागा ॥
राम मनुज कस रे सठ बंगा। धन्वी कामु नदी पुनि गंगा ॥
पसु सुरधेनु कल्पतरु रूखा। अन्न दान अरु रस पीयूषा ॥

बैनतेय खग अहि सहसानन । चिंतामनि पुनि उपल दसानन ॥
 सुनु मतिमंद लोक बैकुंठा । लाभ किरघुपति भगति अकुंठा ॥
 दो०—सेन सहित तव मान मथि बन उजारि पुर जारि ।

कस रे सठ हनुमान कपि गयउ जो तव सुत मारि ॥२६॥

सुनु रावन परिहरि चतुराई । भजसि न कृपासिंधु रघुराई ॥
 जौ खल भएसि राम करद्रोही । ब्रह्म रुद्र सक राखि न तोही ॥
 मूढ़ बृथा जनि मारसि गाला । राम वयर अस होइहि हाला ॥
 तव सिर निकर कपिन्ह के आगें । परिहहि धरनि राम सर लागें ॥
 ते तव सिर कंदुक सम नाना । खेलिहहि भालु कीस चौगाना ॥
 जबहिं समर कोपिहि रघुनायक । छुटिहहि अति कराल बहु सायक ॥
 तब किंचलिहि अस गाल तुम्हारा । अस बिचारि भजु राम उदारा ॥
 सुनत बचन रावन परजरा । जरत महानल जनु घृत परा ॥
 दो०—कुंभकरन अस बंधु मम सुत प्रसिद्ध सकारि ।

मोर पराक्रम नहिं सुनेहि जितेउं चराचर द्वारि ॥२७॥

सठ साखामृग जोरि सहाई । बाँधा सिंधु इहइ प्रभुताई ॥
 नाघहिं खग अनेक बारीसा । सूर न होहिं ते सुनु सब कीसा ॥
 मम भुज सागर बल जल पूरा । जहँ बूड़े बहु सुर नर सूरा ॥
 बीस पयोधि अगाध अपारा । को अस वीर जो पाइहि पारा ॥
 दिगपालन्ह मैं नीर भरावा । आप सुजस खल सोहि सुनावा ॥
 जौ पै समर सुभट तव नाथा । पुनि पुनि कहसि जासु गुन गाथा ॥

तौ बसीठ पठवत केहि काजा । रिपु सन प्रीति करत नहिं लाजा ॥
हरगिरि मथन निरखु मम बाहु । पुनि सठ कपि निज प्रमुहि सराहु
दो०—सूर कवन रावन सरिस स्वकर काटि जेहिं सीस ।

हुने अनल अति हरष बहु बार साखि गौरीस ॥२८॥
जरत विलोकेउँ जवहिं कपाला । बिधि के लिखे अंक निज भाला ॥
नर कैं कर आपन बध बाँची । हसेउँ जानि बिधि गिरा असाँची ॥
सो मन समुझि त्रास नहिं मोरें । लिखा विरंचि जरठ मति भोरें ॥
आन बीर बल सठ मम आगें । पुनि पुनि कहसि लाज पति त्यागें
कह अंगद सलज्ज जग माहीं । रावन तोहि समान कोउ नाहीं ॥
लाजवंत तव सहज सुभाऊ । निज मुख निज गुन कहसि न काऊ
सिर अरु सैल कथा चित रही । ताते बार बीस तैं कही ॥
सो भुजबल राखेहु उर घाली । जीतेहु सहसबाहु बलि बाली ॥
सुनु मतिमंद देहि अब पूरा । काटैं सीस कि होइअ सूर ॥
इंद्रजालि कहूँ कहिअ न बीरा । काटइ निज कर सकल सरीरा ॥
दो०—जरहिं पतंग मोह बस भार बहहिं खर वृंद ।

ते नहिं सूर कहावहिं समुझि देखु मतिमंद ॥२९॥
अब जनि बतबदाव खल करही । सुनु मम बचन मान परिहरही ॥
दसमुख मैं न बसीठीं आयउँ । अस विचारि रघुबीर पठायउँ ॥
बार बार अस कहइ कृपाला । नहिं गजारि जसु बधैं सुकाला ॥
मन महु समुझि बचन प्रमु करे । सहेउँ कठोर बचन सठ तेरे ॥

नाहिं त करि मुख भंजन तोरा । लै जातेउँ सीतहि बरजोरा ॥
 जानेउँ तव बल अधम सुरारी । सूनें हरि आनिहि परनारी ॥
 तैं निसिचर पति गर्व बहूता । मैं रघुपति सेवक कर दूता ॥
 जौं न राम अपमानहि डरउँ । तोहि देखत अस कौतुक करउँ ॥
 दो०—तोहि पटक महि सेन हति चौपट करि तव गाउँ ।

तव जुबतिन्ह समेत सठ जनकसुतहि लै जाउँ ॥३०॥
 जौं अस करौं तदपि न बड़ाई । मुएहि वधें नहिं कछु मनुसाई ॥
 कौल कामवस कृपिन विमूढ़ा । अति दरिद्र अजसी अति बूढ़ा ॥
 सदा रोगवस संतत क्रोधी । विष्णु विमुख श्रुति संत विरोधी ॥
 तनु पोषक निंदक अघ खानी । जीवत सब सम चौदह प्राणी ॥
 अस विचारिखल बधउँ न तोही । अब जनि रिस उपजावसि मोही ॥
 सुनि सकोप कह निसिचर नाथा । अधर दसन दसि मीजत हाथा ॥
 रे कपि अधम मरन अब चहसी । छोटे बदन यात बड़ि कहसी ॥
 कटु जल्पसि जड़ कपि बल जाकैं । बल प्रताप बुधि तेज न ताकैं ॥
 दो०—अगुन अमान जानि तेहि दीन्ह पिता बनबास ।

सो दुख अरु जुबती बिरह पुनि निसि दिन मम त्रास ॥३१(क)॥
 जिन्ह के बल कर गर्व तोहि अइसे मनुज अनेक ।
 खाहिं निसाचर दिवस निसि मूढ़ समुझु तजि टेक ॥३१(ख)॥

जब तेहिं कीन्ह राम कै निंदा । क्रोधवंत अति भयउ कपिंदा ॥
 हरि हर निंदा सुनइ जो काना । होइ पाप गोघात समाना ॥

कटकटान कपिकुंजर भारी। दुहु भुजदंडतमकि महि मारी॥
 डोलत धरनि सभासद खसे। चले भाजि भय मारुत ग्रसे॥
 गिरत सँभारि उठा दसकंधर। भूतल परे मुकुट अति सुंदर॥
 कछु तेहिं लैनज सिरन्हि सँवारे। कछु अंगद प्रभु पास पबारे॥
 आवत मुकुट देखि कपि भागे। दिनहीं लूक परन बिधि लागे॥
 की रावन करि कोप चलाए। कुलिस चारि आवत अति धाए॥
 कह प्रभु हँसि जनि हृदयँ डेराहू। लूक न असनि केतु नहिं राहू॥
 ए किरीट दसकंधर केरे। आवत बालितनय के प्रेरे॥
 दो०—तरकि पवनसुत कर गहे आनि धरे प्रभु पास।

कौतुक देखहिं भालु कपि दिनकर सरिस प्रकास ॥ ३२(क) ॥

उहाँ सकोपि दसानन सब सन कहत रिसाइ।

धरहु कपिहि धरि मारहु सुनि अंगद मुसुकाइ ॥ ३२(ख) ॥

एहि बधि बेगि सुभट सब धावहु। खाहु भालु कपि जहँ जहँ पावहु
 मर्कटहीन करहु महि जाई। जिअत धरहु तापस द्वौ भाई॥
 पुनि सकोप बोलेउ जुबराजा। गाल बजावत तोहि न लाजा॥
 मरु गर काटि निलज कुलघाती। बल बिलोकि बिहरति नहिं छाती
 रे त्रिय चोर कुमारग गामी। खल मल रासि मंदमति कामी॥
 सन्यपात जल्पसि दुर्बादा। भएसि कालबस खल मनुजादा॥
 याको फलु पावहिगो आगें। बानर भालु चपेटन्हि लागें॥
 रामु मनुज बोलत असि बानी। गिरहिं न सव समाजहि मानी॥

गिरिहिं रसना संसय नहिं । सिरन्हि समेत समर महि माहीं ॥

सो०—सो नर क्यों दसकंध बालि बध्यो जेहिं एक सर ।

बीसहुँ लोचन अंध धिग तव जन्म कुजाति जड़ ॥३३(क)॥

तव सोनित कीं प्यास तृषित राम सायक निकर ।

तजउँ तोहि तेहि त्रास कटु जल्पक निसिचर अधम ॥३३(ख)॥

मैं तव दसन तोरिबे लायक । आयसु मोहि न दीन्ह रघुनायक ॥

असि रिस होति दसउ मुख तोरौं । लंका गहि समुद्र महुँ बोरौं ॥

गूलरि फल समान तव लंका । बसहु मध्य तुम्ह जंतु असंका ॥

मैं बानर फल खात न बारा । आयसु दीन्ह न राम उदारा ॥

जुगुति सुनत रावन मुसुकाई । मूढ़ सिखिहि कहँ बहुत छुठाई ॥

बालि न कबहुँ गाल अस मारा । मिलि तपसिन्ह तैं भएसि लवारा ॥

साँचेहुँ मैं लवार भुज बीहा । जौं न उपारिउँ तव दस जीहा ॥

समुझि राम प्रताप कपि कोपा । सभा माझ पन करि पद रोपा ॥

जौं मम चरन सकसि सठ टारी । फिरहिं रामु सीता मैं हारी ॥

सुनहु सुभट सब कह दससीसा । पद गहि धरनि पछारहु कीसा ॥

इंद्रजीत आदिक बलवाना । हरषि उठे जहँ तहँ भट नाना ॥

झपटहिं करि बल विपुल उपाई । पद न टरइ बैठहिं सिरु नाई ॥

पुनि उठि झपटहिं सुर आराती । टरइ न कीस चरन एहि भाँती ॥

पुरुष कुजागी जिमि उरगारी । मोह बिटप नहिं सकहिं उपारी ॥

दो०—कोटिन्ह मेघनाद सम सुभट उठे हरषाइ ।

झपटहिं टरै न कपि चरन पुनि बैठहिं सिर नाइ ॥३४(क)॥

भूमि न छाँड़त कपि चरन देखत रिपु मद भाग ।

कोटि विघ्न ते संत कर मन जिमि नीति न त्याग ॥३४(ख)॥

कपि बल देखि सकल हियँ हारे । उठा आपु कपि कै परचारे ॥

गहत चरन कह बालिकुमारा । मम पद गहँ न तोर उबारा ॥

गहसि न राम चरन सठ जाई । सुनत फिरा मन अति सकुचाई ॥

भयउ तेजहत श्री सब गई । मध्य दिवस जिमि ससि सोहई ॥

सिंघासन बैठेउ सिर नाई । मानहुँ संपति सकल गँवाई ॥

जगदातमा प्रानपति रामा । तासु विमुख किमि लह विश्रामा ॥

उमा राम की भृकुटि बिलासा । होइ बिस्व पुनि पावइ नासा ॥

तृन ते कुलिसकुलिस तृन करई । तासु दूत पन कहु किमि टरई ॥

पुनि कपि कही नीति विधि नाना । मान न ताहि कालु निअराना ॥

रिपु मद मथि प्रभु सुजसु सुनायो । यह कहि चल्यो बालि नृप जायो

हतौ न खेत खेलाइ खेलाई । तोहि अबहिं का करौ बड़ाई ॥

प्रथमहिं तासु तनय कपि मारा । सो सुनि रावन भयउ दुखारा ॥

जातुधान अंगद धन देखी । भय व्याकुल सब भए बिसेषी ॥

दो०—रिपु बल धरषि हरषि कपि बालितनय बल पुंज ।

पुलक सरौर नयन जल गह राम पद कज ॥३५(क)॥

साँझ जानि दसकंधर भवन गयउ बिलखाइ ।

मंदोदरीं रावनहि बहुरि कहा समुझाइ ॥३५(ख)॥

कंत समुझि मन तजहु कुमतिही । सोह न समर तुम्हहि रघुपतिही ॥
 रामानुज लघु रेख खचाई । सोउ नहिं नाघेहु असि मनुसाई ॥
 पिय तुम्ह ताहि जितय संग्रामा । जाके दूत केर यह कामा ॥
 कौतुक सिंधु नाघि तव लंका । आयउ कपि केहरी असंका ॥
 रखवारे हति विपिन उजारा । देखत तोहि अच्छ तेहिं मारा ॥
 जारि सकल पुर कीन्हैसि छारा । कहाँ रहा बल गर्व तुम्हारा ॥
 अब पति मृषा गालजनि मारहु । मोर कहा कछु हृदयँ विचारहु ॥
 पति रघुपतिहि नृपति जनि मानहु । अग जग नाथ अतुलबल जानहु
 बान प्रताप जान मारीचा । तासु कहा नहिं मानेहि नीचा ॥
 जनक सभाँ अगनित भूपाला । रहे तुम्हउ बल अतुल विसाला ॥
 भंजि धनुष जानकी विआही । तव संग्राम जितेहु किन ताही ॥
 सुरपति सुत जानइ बल योरा । राखा जिअत आँखि गहि फोरा ॥
 सूपनखा कै गति तुम्ह देखी । तदपि हृदयँ नहिं लाज बिसेषी ॥
 दो०—बधि बिराध खर दूषनहि लीलाँ हत्यो कबंध ।

बालि एक सर मारयो तेहि जानहु दसकंध ॥३६॥

जेहिं जलनाथ बँधायउ हेल । उतरे प्रभु दल सहित सुबेल ॥
 कारुनीक दिनकर कुल केतु । दूत पठायउ तव हित हेतु ॥
 समा माझ जेहिं तव बल मथा । करि बरूथ महु मृगपति जथा ॥

अंगद हनुमत अनुचर जाके। रन बाँकुरे वीर अति बाँके ॥
तेहि कहँ पिय पुनि पुनि नर कहहू। मुधा मान ममता मद बहहू ॥
अहह कंत कृत राम विरोधा। काल विवस मन उपजन बोधा ॥
काल दंड गहि काहु न मारा। हरइ धर्म बल बुद्धि विचारा ॥
निकट काल जेहि आवत साई। तेहि भ्रम होइ तुम्हारिहि नाई ॥

दो०—दुइ सुत मरे दहेउ पुर अजहुँ पूर पिय देहु।

कृपासिंधु रघुनाथ भजि नाथ विमल जसु लेहु ॥३७॥

नारि वचन सुनि विसिख समाना। सभाँ गयउ उठि होत विहाना ॥
बैठ जाइ सिंघासन फूली। अति अभिमान त्रास सब भूली ॥
इहाँ राम अंगदहि बोलावा। आइ चरन पंकज सिरु नावा ॥
अति आदर समीप बैठारी। बोले बिहँसि कृपाल खरारी ॥
बालितनय कौतुक अति मोही। तात सत्य कहु पूछउँ तोही ॥
रावनु जातुधान कुल टीका। भुजबल अतुल जासु जग लीका ॥
तासु मुकुट तुम्ह चारि चलाए। कहहु तात कवनी विधि पाए ॥
सुनु सर्वग्य प्रनत सुखकारी। मुकुट न होहिं भूप गुन चारी ॥
साम दान अरु दंड विभेदा। नृप उर वसहिं नाथ कह वेदा ॥
नीति धर्म के चरन सुहाए। अस जियँ जानि नाथ पहिं आए ॥

दो०—धर्महीन प्रभु पद बिमुख काल विवस दससीस।

तेहि परिहारि गुन आए सुनहु कीसलाधारी ॥३८॥ (क)

परम चतुरता श्रवन सुनि बिहँसे राम उदार ।

समाचार पुनि सब कहे गढ़ के बालिकुमार ॥३८(ख)॥

रिपु के समाचार जब पाए । राम सचिव सब निकट बोलाए ॥
 लंका बाँके चारि दुआरा । केहि विधि लागिअ करहु विचारा ॥
 तब कपीसरिच्छेस विभीषन । सुमिरि हृदयँ दिनकर कुल भूषन ॥
 करि विचार तिन्ह मंत्र ददावा । चारि अनी कपि कटक बनावा ॥
 जथाजोग सेनापति कीन्हे । जूथप सकल बोलि तब लीन्हे ॥
 प्रभु प्रताप कहि सय समुझाए । सुनि कपि सिंघनाद करि धाए ॥
 हरषित राम चरन सिर नावहिं । गहि गिरि सिखर बीर सब धावहिं ॥
 गर्जहिं तर्जहिं भालु कपीसा । जय रघुबीर कोसलाधीसा ॥
 जानत परम दुर्ग अति लंका । प्रभु प्रताप कपि चले असंका ॥
 घटाटोप करि चहुँ दिसि घेरी । मुखहिं निसान बजावहिं भेरी ॥
 दो०—जयति राम जय लछिमन जय कपीस सुग्रीव ।

गर्जहिं सिंघनाद कपि भालु महाबल सीव ॥३९॥

लंकाँ भयउ कोलाहल भारी । सुना दसानन अति अहँकारी ॥
 देखहु वनरन्ह केरि ढिठाई । बिहँसि निसाचर सेन बोलाई ॥
 आए कीस काल के प्रेरे । छुधावंत सब निसिचर मेरे ॥
 अस कहि अट्टहास सठ कीन्हा । यह बैठै अहार विधि दीन्हा ॥
 सुभट सकल चारिहुँ दिसि जाह । धरि धरि भालु कीस सब खाह ॥
 उमा रावनाहि अस अभिमाना । जिमि टिटिभ खग सूत उताना ॥

चले निसाचर आयसु मागी । गहि कर भिंडिपाल वर साँगी ॥
तोमर मुद्गर परसु प्रचंडा । सूल कृपान परिघ गिरि खंडा ॥
जिमि अरुनोपल निकर निहारी । धावहिं सठ खग मांस अहारी ॥
चोंच भंग दुख तिन्हहि न सूझा । तिमि धाए मनुजाद अबूझा ॥

दो०—नानायुध सर चाप धर जातुधान बल बीर ।

कोट कँगूरन्हि चढ़ि गए कोटि कोटि रनधीर ॥ ४० ॥
कोट कँगूरन्हि सोहहिं कैसे । मेरु के संगनि जनु घन बैसे ॥
बाजहिं ढोल निसान जुझाऊ । सुनि धुनि होइ भटन्हि मन चाऊ ॥
बाजहिं मेरि नफीरि अपारा । सुनि कादर उर जाहिं दरारा ॥
देखिन्ह जाइ कपिन्ह के ठट्टा । अति बिसाल तनु भालु सुभट्टा ॥
धावहिं गनहिं न अवघट घाटा । पर्वत फोरि करहिं गहि बाटा ॥
कटकटाहिं कोटिन्ह भट गर्जहिं । दसन ओठ काटहिं अति तर्जहिं ॥
उत रावन इत राम दोहाई । जयति जयति जय परी लराई ॥
निसिचर सिखर समूह ढहावहिं । कूदि धरहिं कपि फेरि चलावहिं ॥

छं०—धरि कुधर खंड प्रचंड मर्कट भालु गढ़ पर डारहीं ।
झपटहिं चरन गहि पटक महि भजि चलत बहुरि पचारहीं ॥
अति तरल तरुन प्रताप तरपहिं तमकि गढ़ चढ़ि चढ़ि गए ।
कपि भालु चढ़ि मंदिरन्ह जहँ तहँ राम जसु गावत भए ॥
दो०—एकु एकु निसिचर गहि पुनि कपि चले पराइ ।

राम प्रताप प्रबल कपिजूथा । मर्दहिं निसिचर सुभट बरूथा ॥
 चढ़े दुर्ग पुनि जहँ तहँ बानर । जय रघुवीर प्रताप दिवाकर ॥
 चले निसाचर निकर पराई । प्रबल पवन जिमि घन समुदाई ॥
 हाहाकार भयउ पुर भारी । रोवहिं बालक आतुर नारी ॥
 सब मिलि देहिं रावनहिं गारी । राज करत एहिं मृत्यु हँकारी ॥
 निज दल बिचल सुनी तेहिं काना । फेरि सुभट लंकेस रिसाना ॥
 जो रन विमुख सुना मैं काना । सो मैं हतब कराल कृपाना ॥
 सर्वसु खाइ भोग करि नाना । समर भूमि भए बल्लभ प्राना ॥
 उग्र वचन सुनि सकल डेराने । चले क्रोध करि सुभट लजाने ॥
 सन्मुख मरन वीर कै सोभा । तब तिन्ह तजा प्रान करलोभा ॥

दो०—बहु आयुध धर सुभट सब भिरहिं पचारि पचारि ।

ब्याकुल किए भालु कपि परिघ त्रिसूलन्हि मारि ॥४२॥

भय आतुर कपि भागन लागे । जद्यपि उमा जीतिहहिं आगे ॥
 कोउ कह कहँ अंगद हनुमंता । कहँ नल नील दुबिद बलवंता ॥
 निज दल बिकल सुना हनुमाना । पच्छिम द्वार रहा बलवाना ॥
 मेघनाद तहँ करइ लराई । दूट न द्वार परम कठिनाई ॥
 पवनतनय मन भा अति क्रोधा । गजेंउ प्रबल काल सम जोधा ॥
 कूदि लंक गढ़ ऊपर आवा । गहि गिरि मेघनाद कहूँ धावा ॥
 मंजेउ रथ सारथी निपाता । ताहि हृदय महुँ मारेसि लाता ॥
 दुसरें सूत बिकल तैहि जाना । स्यदन घालि तुरत गृह आना ॥

दो०—अंगद सुना पवनसुत गढ़ पर गयउ अकेल ।

रन बाँकुरा बालिसुत तरकि चढ़ेउ कपि खेल ॥४३॥

जुद्ध विरुद्ध क्रुद्ध द्वौ बंदर । राम प्रताप सुमिरि उर अंतर ॥

रावन भवन चढ़े द्वौ धाई । करहिं कोसलाधीस दोहाई ॥

कलससहित गहि भवनु ढहावा । देखि निसाचरपति भय पावा ॥

नारि वृंद कर पीठहिं छाती । अब दुइ कपि आए उतपाती ॥

कपिलीला करि तिन्हहि डेरावहिं । रामचंद्र कर सुजसु सुनावहिं ॥

पुनि कर गहि कंचन के खंभा । कहेन्हि करिअ उतपात अरंभा ॥

गर्जि परे रिपु कटक मझारी । लागे मदैं भुजबल भारी ॥

काहुहि लात चपेटन्हि केहू । भजहु न रामहि सो फल लेहू ॥

दो०—एक एक सों मर्दहिं तोरि चलावहिं मुंड ।

रावन आगें परहिं ते जनु फूटहिं दधि कुंड ॥४४॥

महा महा मुखिआ जे पावहिं । ते पद गहि प्रभु पास चलावहिं ॥

कहइ बिभीषनु तिन्ह के नामा । देहिं राम तिन्हहू निज धामा ॥

खल मनुजाद द्विजामिष भोगी । पावहिं गति जो जाचत जोगी ॥

उमा राम मृदुचित करुनाकर । वयर भाव सुमिरत मोहि निसिचर ॥

देहिं परम गति सो जियँ जानी । अस कृपाल को कहहु भवानी ॥

अस प्रभु सुनि न भजहिं भ्रम त्यागी । नर मतिमंद ते परम अभागी ॥

अंगद अरु हनुमंत प्रवेसा । कीन्ह दुर्ग अस कह अवधेसा ॥

लंका द्वौ कपि सोहहि कैसे । मरहिं सिंधु दुइ मंदर जैसे ॥

दो०—भुज बलरिपु दल दलमलि देखि दिवस कर अंत ।

कूदे जुगल बिगत श्रम आए जहँ भगवंत ॥४५॥

प्रभु पद कमल सीस तिन्ह नाए । देखि सुभट रघुपति मन भाए ॥

राम कृपा करि जुगल निहारे । भए बिगतश्रम परम सुखारे ॥

गए जानि अंगद हनुमाना । फिरे भालु मर्कट भट नाना ॥

जातुधान प्रदोष बल पाई । धाए करि दससीस दोहाई ॥

निसिंचर अनी देखि कपि फिरे । जहँ तहँ कटकटाइ भट भिरे ॥

द्वौ दल प्रबल पचारि पचारी । लरत सुभट नहिँ मानहिँ हारी ॥

महावीर निसिंचर सब कारे । नाना बरन बलीमुख भारे ॥

सबल जुगलदल समबल जोधा । कौतुक करत लरत करि क्रोधा ॥

प्राबिट सरद पयोद घनेरे । लरत मनहुँ मारुत के प्रेरे ॥

अनिप अकंपन अरु अतिकाया । विचलत सेन कीन्हि इन्ह माया ॥

भयउ निमिष मँ अति अँधिआरा । वृष्टि होइ रुधिरोपल छारा ॥

दो०—देखि निबिड़ तम दसहुँ दिसि कपि दल भयउ खभार ।

एकहि एक न देखई जहँ तहँ करहिँ पुकार ॥४६॥

सकल मरमु रघुनायक जाना । लिए बोलि अंगद हनुमाना ॥

समाचार सब कहि समुझाए । सुनत कोपि कपिकुंजर धाए ॥

पुनि कृपाल हँसि चाप चढ़ावा । पावक सायक सपदि चलावा ॥

भयउ प्रकास कतहुँ तम नाहीं । ग्यान उदयँ जिमि संसय जाहीं ॥

भालु बलीमुख पाइ प्रकासा । धाए हरष बिगत श्रम त्रासा ॥

हनूमान अंगद रन गाजे। हाँक सुनत रजनीचर भाजे ॥
भागत भट पटकहिं धरि धरनी। करहिं भालु कपि अद्भुत करनी ॥
गहि पद डारहिं सागर माहीं। मकर उरग झष धरि धरिखार्हीं ॥
दो०—कछु मारे कछु घायल कछु गढ़ चढ़े पराइ ।

गर्जहिं भालु बलीमुख रिपु दल बल बिचलाइ ॥४७॥
निसा जानि कपि चारिउ अनी। आए जहाँ कोसला धनी ॥
राम कृपा करि चितवा सवही। भए विगतश्रम वानर तबही ॥
उहाँ दसानन सचिव हँकारे। सव सन कहेसि सुभट जे मारे ॥
आधा कटकु कपिन्ह संघारा। कहहु बेगि का करिअ विचारा ॥
माल्यवंत अति जरठ निसाचर। रावन मातु पिता मंत्री बर ॥
बोला वचन नीति अति पावन। सुनहु तात कछु मोर सिखावन ॥
जब ते तुम्ह सीता हरि आनी। असगुन होहिं न जाहिं बखानी ॥
बेद पुरान जासु जसु गायो। राम विमुख काहुँ न सुख पायो ॥
दो०—हिरन्याच्छ भ्राता सहित मधुकैटभ बलवान ।

जेहिं मारे सोइ अवतरेउ कृपासिंधु भगवान ॥४८(क)॥

मासपारायण, पचीसवाँ विश्राम

कालरूप खल बन दहन गुनागार घनबोध ।

सिव बिरंचि जेहि सेवहिं तासों कवन बिरोध ॥४८(ख)॥

परिहरि वयर देहु बैदेही। भजहु कृपानिधि परम सनेही ॥

ताके वचन बान सम लागे। करिआ मुह करिजाहि अमाये ॥

बूढ़ भएसि न त मरतेउँ तोही । अब जनि नयन देखावसि मोही ॥
 तेहिं अपने मन अस अनुमाना । बध्यो चहत एहि कृपानिधाना ॥
 सो उठि गयउ कहत दुर्वादा । तब सक्रोप बोलेउ घननादा ॥
 कौतुक प्रात देखिअहु मोरा । करिहउँ बहुत कहौं का थोरा ॥
 सुनि सुत बचन भरोसा आवा । प्रीति समेत अंक बैठावा ॥
 करत बिचार भयउ भिनुसारा । लागे कपि पुनि चहूँ दुआरा ॥
 कोपि कपिन्ह दुर्घट गढ़ घेरा । नगर कोलाहलु भयउ घनेरा ॥
 बिबिधायुध धर निसिचर धाए । गढ़ ते पर्वत सिखर ढहाए ॥

छं०—ढाहे महीधर सिखर कोटिन्ह बिबिध बिधि गोला चले ।
 घहरात जिमि पबिपात गर्जत जनु प्रलय के बादले ॥
 मर्कट बिकट भट जुटत कटत न लटत तन जर्जर भए ।
 गहि सैल तेहि गढ़ पर चलावहिं जहँ सो तहँ निसिचर हए ॥

दो०—मेघनाद सुनि श्रवन अस गढ़ पुनि छेंका आइ ।

उतरयो बीर दुर्ग तें सन्मुख चलयो बजाइ ॥४९॥

कहँ कोसलाधीस द्वौ भ्राता । धन्वी सकल लोक विख्याता ॥
 कहँ नल नील दुविद सुग्रीवा । अंगद हनूमंत बल सींवा ॥
 कहाँ विभीषनु भ्राताद्रोही । आजु सबहि हठि मारउँ ओही ॥
 अस कहि कठिन वान संधाने । अतिसय क्रोध श्रवन लागि ताने ॥

सर समूह सो काँदै लग्या । जनु सपन्न धावहिं बहु नारा ॥
 जहँ तहँ परत देखिअहिं वानर । सन्मुख होइ न सके तेहि अवसर ॥

जहँ तहँ भागि चले कपि रीछा । बिसरी सबहि जुद्ध कै ईछा ॥
सो कपि भालु न रन महुँ देखा । कीन्हैसि जेहि न प्रान अवसेषा ॥
दो०—दस दस सर सब मारेसि परे भूमि कपि बीर ।

सिंहनाद करि गर्जा मेघनाद बल धीर ॥५०॥

देखि पवनसुत कटक विहाला । क्रोधवन्त जनु धायउ काला ॥
महासैल एक तुरत उपारा । अति रिस मेघनाद पर डारा ॥
आवत देखि गयउ नभ सोई । रथ सारथी तुरग सब खोई ॥
बार बार पचार हनुमाना । निकटन आव मरमु सो जाना ॥
रघुपति निकट गयउ घननादा । नाना भाँति करेसि दुर्वादा ॥
अस्त्र सस्त्र आयुध सब डारे । कौतुकीं प्रभु काटि निवारे ॥
देखि प्रताप मूढ़ खिसिआना । करै लाग माया विधि नाना ॥
जिमि कोउ करै गरुड़ सैं खेला । डरपावै गहि स्वरूप सपेला ॥

दो०—जासु प्रबल माया बस सिव बिरंचि बड़ छोट ।

ताहि दिखावइ निसिचर निज माया मति खोट ॥५१॥

नभ चढ़ि बरष विपुल अंगारा । महि ते प्रगट होहिं जलधारा ॥
नाना भाँति पिसाच पिसाची । मारु काटु धुनि बोलहिं नाची ॥
विष्टा पूय रुधिर कच हाड़ा । बरषइ कबहुँ उपल बहु छाड़ा ॥
बरषि धूरि कीन्हैसि अँधिआरा । सूझ न आपन हाथ पसारा ॥
कपि अकुलाने माया देखें । सब कर मरन बना एहि लेखें ॥
कौतुक देखि राम मुसुकाने । भए समीत सकल कपि जाने ॥

एक बान काटी सब माया । जिमि दिनकर हरतिमिरनिकाया ।
 कृपादृष्टि कपि भालु विलोके । भए प्रवल रन रहहिं न रोके ॥
 दो०—आयसु मागि राम पहिं अंगदादि कपि साथ ।

लछिमन चले क्रुद्ध होइ बान सरासन हाथ ॥५२॥

छतज नयन उर बाहु विसाल । हिमगिरि निभतनु कछु एकलाल ।
 इहाँ दसानन सुभट पठाए । नाना अस्त्र सस्त्र गहि धाए ॥
 भूधर नख बिटपायुध धारी । धाए कपि जय राम पुकारी ॥
 भिरे सकल जोरहि सन जोरी । इत उत जय इच्छा नहिं थोरी ॥
 मुठिकन्ह लातन्ह दातन्ह काटहिं । कपि जयसील मारि पुनि डाटहिं
 मारु मारु धरु धरु धरु मारु । सीस तोरि गहि भुजा उपारु ॥
 असि रव पूरि रही नव खंडा । धावहिं जहँ तहँ रुंड प्रचंडा ॥
 देखहिं कौतुक नभ सुर वृंदा । कवहुँक विसमय कवहुँ अनंदा ॥

दो०—रुधिर गाढ़ भरि भरि जम्यो ऊपर धूरि उड़ाइ ।

जनु अंगार रासिन्ह पर मृतक धूम रह्यो छाड़ ॥५३॥

घायल वीर विराजहिं कैसे । कुसुमित किंसुक के तरु जैसे ॥
 लछिमन मेघनाद द्वौ जोधा । भिरहिं परसपर करि अतिक्रोधा ॥
 एकहि एक सकइ नहिं जीती । निसिचर छल बल करइ अनीती ॥
 क्रोधवंत तव भयउ अनंता । भंजेउ रथ सारथी तुरंता ॥
 नाना विधि प्रहार कर सेवा राख्यो भयउ प्राण अवसेवा ॥
 रावन सुत निज मन अनुमाना । संकठ भयउ हरिहि मम प्राणा ॥

वीरघातिनी छाड़िसि साँगी। तेज पुंज लछिमन उर लागी ॥
 मुरछा भई सक्ति के लागें। तव चलि गयउ निकट भय त्यागें ॥
 दो०—मेघनाद सम कोटि सत जोधा रहे उठाइ।

जगदाधार सेष किमि उठै चले खिसिआइ ॥५४॥

सुनु गिरिजा क्रोधानल जासू। जारइ भुवन चारि दस आसू ॥
 सक संग्राम जीति को ताही। सेवहिं सुर नर अग जग जाही ॥
 यह कौतूहल जानइ सोई। जा पर कृपा राम कै होई ॥
 संध्या भइ फिरि द्वौ बाहनी। लगे सँभारन निजनिज अनी ॥
 व्यापक ब्रह्म अजित भुवनेस्वर। लछिमन कहाँ बूझ करुनाकर ॥
 तव लगि लै आयउ हनुमाना। अनुज देखि प्रभु अति दुख माना ॥
 जामवंत कह वैद सुषेना। लंकाँ रहइ को पठई लेना ॥
 धरि लघु रूप गयउ हनुमंता। आनेउ भवन समेत तुरंता ॥

दो०—राम पदारविंद सिर नायउ आइ सुषेन।

कहा नाम गिरि औषधी जाहु पवनसुत लेन ॥५५॥

राम चरन सरसिज उर राखी। चला प्रभंजनसुत बल भाषी ॥
 उहाँ दूत एक मरमु जनावा। शवनु कालनेमि गृह आवा ॥
 दसमुख कहा मरमु तेहिं सुना। पुनि पुनि कालनेमि सिर धुना ॥
 देखत तुम्हहि नगर जेहिं जारा। तासु पंथ को रोकन पारा ॥
 माजि राखि कहु दित आपना। छाँड़हु नाथ मृगा जल्पना ॥
 नील कंज तनु सुंदर स्यामा। हृदयँ राखु लोचनाभिरामा ॥

मैं तैं मोर मूढ़ता त्यागू। महा मोह निसि सूतत जागू॥
 काल व्याल कर भच्छक जोई। सपनेहुँ समर कि जीतिअ सोई॥
 दो०—सुनि दसकंठ रिसान अति तेहिं मन कीन्ह बिचार ।

राम दूत कर मरौं बरु यह खल रत मल भार॥५६॥

अस कहि चला रचिसि मग माया। सर मंदिर बर बाग बनाया
 मारुतसुत देखा सुभ आश्रम। मुनिहि बूझि जल पियौं जाइ श्रम
 राच्छस कपट वेष तहँ सोहा। मायापति दूतहि चह मोहा॥
 जाइ पवनसुत नायउ माथा। लाग सो कहै राम गुन गाथा॥
 होत महा रन रावन रामहिं। जितिहहिं राम न संसय या महिं॥
 इहाँ भएँ मैं देखउँ भाई। ग्यानदृष्टि बल मोहि अधिकाई॥
 मागा जल तेहिं दीन्ह कमंडल। कह कपि नहिं अघाउँ थोरें जल॥
 सर मजन करि आतुर आवहु। दिच्छा देउँ ग्यान जेहिं पावहु॥
 दो०—सर पैठत कपि पद गहा मकरों तब अकुलान ।

मारी सो धरि दिव्य तनु चली गगन चढ़ि जान॥५७॥

कपि तव दरस भइउँ निष्पापा। मिटा तात मुनिवर कर सापा॥
 मुनि न होइ यह निसिचर घोरा। मानहु सत्य बचन कपि मोरा॥
 अस कहि गई अपछरा जवहीं। निसिचर निकट गयउ कपि तबहीं
 कह कपि मुनि गुरदछिना लेहू। पाछें हमहि मंत्र तुम्ह देहू॥
 सिर लंगूर लघोटि पछरा। निज तनु प्रगटिसि मरसी थारा॥
 राम राम कहि छाड़ेसि प्राणा। सुनि मन हरषि चलेउ हनुमाना

देखा सैल न औषध चीन्हा । सहसा कपि उपारि गिरि लीन्हा ॥
गहि गिरि निसि नभ धावत भयऊ । अवधपुरी ऊपर कपि गयऊ ॥
दो०—देखा भरत बिसाल अति निसिचर मन अनुमानि ।

बिनु फर सायक मारेउ चाप श्रवन लगि तानि ॥५८॥

परेउ मुरुछि महि लागत सायक । सुमिरत राम राम रघुनायक ॥
सुनि प्रिय वचन भरत तब धाए । कपि समीप अति आतुर आए ॥
विकल विलोकि कीस उर लावा । जागत नहिं बहु भाँति जगावा ॥
मुख मलीन मन भए दुखारी । कहत वचन भरि लोचन वारी ॥
जेहिं बिधि राम विमुख मोहि कीन्हा । तेहिं पुनि यह दारुन दुख दीन्हा ॥
जौं मोरें मन वच अरु काया । प्रीति राम पद कमल अमाया ॥
तौ कपि होउ विगत श्रम सूला । जौं मो पर रघुपति अनुकूल ॥
सुनत वचन उठि बैठ कपीसा । कहि जय जयति कोसलाधीसा ॥
सो०—लीन्हा कपिहि उर लाइ पुलकित तनु लोचन सजल ।

प्रीति न हृदयँ समाइ सुमिरि राम रघुकुल तिलक ॥५९॥

तात कुसल कहु सुखनिधान की । सहित अनुज अरु मातृ जानकी ॥
कपि सब चरित समास ब्रखाने । भए दुखी मन महुँ पछिताने ॥
अहह दैव मैं कत जग जायउँ । प्रभुके एकहु काज न आयउँ ॥
जानि कुअवसर मन धरि धीरा । पुनि कपि सन बोले बलबीरा ॥
सात सखरु होइहि तोहि जाता । काजु नसाइहि होत प्रभाता ॥
चहु मम सायक सैल समेता । पठवौं तोहि जहँ कृपानिकेता ॥

सुनि कपि मन उपजा अभिमाना । मोरें भार चलिहि किमि वाना ॥
राम प्रभाव बिचारि बहोरी । बंदि चरन कह कपि कर जोरी ॥

दो०—तव प्रताप उर राखि प्रभु जैहउँ नाथ तुरंत ।

अस कहि आयसु पाइ पद बंदि चलेउ हनुमंत ॥६०(क)॥

भरत बाहु बल सील गुन प्रभु पद प्रीति अपार ।

मन महुँ जात सराहत पुनि पुनि पवनकुमार ॥६०(ख)॥

उहाँ राम लछिमनहि निहारी । बोले बचन मनुज अनुसारी ॥
अर्ध राति गइ कपि नहिं आयउ । राम उठाइ अनुज उर लायउ ॥
सकहु न दुखित देखि मोहि काऊ । बंधु सदा तव मृदुल सुभाऊ ॥
मम हित लागि तजेहु पितु माता । सहेहु विपिन हिम आतप बाता ॥
सो अनुराग कहाँ अब भाई । उठहु न सुनि मम बच विकलाई ॥
जौं जनतेउँ बन बंधु विछोहू । पिता बचन मनतेउँ नहिं ओहू ॥
सुत बित नारि भवन परिवारा । होहिं जाहिं जग बारहिं बारा ॥
अस विचारि जियँ जागहु ताता । मिलइ न जगत सहोदर भ्राता ॥
जथा पंख बिनु खग अति दीना । मनि बिनु फनि करिवर कर हीना ॥
अस मम जिवन बंधु बिनु तोही । जौं जड़ दैव जिआवै मोही ॥
जैहउँ अवध कौन मुहु लाई । नारि हेतु प्रिय भाइ गँवाई ॥
बरु अपजस सहतेउँ जग माहीं । नारि हानि विशेष छति नाहीं ॥
अब अपलोकु लोक सुत तीरा । ताहिहि निदुर कठोर उर मोरा ॥
निज जननी के एक कुमारा । तात तासु तुम्ह प्राण अधारा ॥

सौंपेसि मोहि तुम्हहि गहि पानी । सब विधि सुखद परम हित जानी
उतरु काह दैहउँ तेहि जाई । उठि किन मोहि सिखावहु भाई ॥
बहु विधि सोचत सोच विमोचन । खवत सलिल राजिव दल लोचन
उमा एक अखंड रघुराई । नर गति भगत कृपाल देखाई ॥

सो०—प्रभु प्रलाप सुनि कान बिकल भए बानर निकर ।

आइ गयउ हनुमान जिमि करुना महँ वीर रस ॥६१॥

हरषि राम भेटेउ हनुमाना । अति कृतग्य प्रभु परग सुजाना ॥
तुरत बैद तव कीन्हि उपाई । उठि बैठे लछिमन हरषाई ॥
हृदयँ लाइ प्रभु भेटेउ भ्राता । हरषे सकल भालु कपि ब्राता ॥
कपि पुनि बैद तहाँ पहुँचावा । जेहि विधि तवहिं ताहिलइ आवा
यह वृत्तांत दसानन सुनेऊ । अति विषाद पुनि पुनि सिर धुनेऊ
व्याकुल कुंभकरन पहिं आवा । विविध जतन करि ताहि जगावा
जागा निसिचर देखिअ कैसा । मानहुँ कालु देह धरि बैसा ॥
कुंभकरन बूझा कहु भाई । काहे तव मुख रहे सुखाई ॥
कथा कही सब तेहिं अभिमानी । जेहि प्रकार सीता हरि आनी ॥
तात कपिन्ह सब निसिचर मारे । महा महा जोधा संघारे ॥
दुर्मुख सुररिपु मनुज अहारी । भट अतिकाय अकंपन भारी ॥
अपर महोदर आदिक वीरा । परे समर महि सब रनधीरा ॥

सो०—सुनि हसकंधर बचन तब कुंभकरन बिलखान ।

जगदंबा हरि आनि अब सठ चाहत कल्याण ॥६२॥

भलन कीन्ह तै निसिचर नाहा । अब मोहि आइ जगाएहि काहा ॥
 अजहूँ तात त्यागि अभिमाना । भजेहु राम होइहि कल्याना ॥
 हैं दससीस मनुज रघुनायक । जाके हनूमान से पायक ॥
 अहह बंधु तैं कीन्ह खोटाई । प्रथमहि मोहि न सुनाएहि आई ॥
 कीन्हहु प्रभु विरोध तेहि देवक । सिव विरंचि सुर जाके सेवक ॥
 नारद मुनि मोहि ग्यान जो कहा । कहतेउँ तोहि समय निरवहा ॥
 अब भरि अंक भेंदु मोहि भाई । लोचन सुफल करौं मैं जाई ॥
 स्याम गात सरसीरुह लोचन । देखौं जाइ ताप त्रय मोचन ॥
 दो०—राम रूप गुन सुमिरत मगन भयउ छन एक ।

रावन मागेउ कोटि घट मद अरु महिष अनेक ॥६३॥
 महिष खाइ करि मदिरा पाना । गर्जा बज्राघात समाना ॥
 कुंभकरन दुर्मद रन रंगा । चला दुर्ग तजि सेन न संग्गा ॥
 देखि विभीषनु आगें आयउ । परेउ चरन निज नाम सुनायउ ॥
 अनुज उठाइ हृदयँ तेहि लायो । रघुपति भक्त जानि मन भायो ॥
 तात लात रावन मोहि मारा । कहत परम हित मंत्र विचारा ॥
 तेहिं गलानि रघुपति पहिं आयउँ । देखि दीन प्रभु के मन भायउँ ॥
 सुनु सुत भयउ कालबस रावन । सो कि मान अब परम सिखावन ॥
 धन्य धन्यतैं धन्य विभीषन । भयहु तात निसिचर कुल भूषन ॥
 बंधु वंस तैं कीन्ह उजागर । भजेहु राम सोभा सुख सागर ॥

दो०—बचन कर्म मन कपट तजि भजेहु राम रनधर ।
 जाहु न निज पर सूझ मोहि भयउँ कालबस बीर ॥६४॥

बंधु बचन सुनि चला विभीषन । आयउ जहँ त्रैलोक विभूषन ॥
 नाथ भूधराकार सरीरा । कुंभकरन आवत रनधीरा ॥
 एतना कपिन्ह सुना जब काना । किलकिलाइ धाए बलवाना ॥
 लिए उठाइ विटप अरु भूधर । कटकटाइ डारहिं ता ऊपर ॥
 कोटि कोटि गिरि सिखर प्रहारा । करहिं भालु कपि एक एक बारा ॥
 मुरथो न मनु तनु टरथो न टारथो । जिमि गज अर्क फलनिको मारथो
 तब मारुतसुत मुठिका हन्यो । परथो धरनि व्याकुल सिर धुन्यो
 पुनि उठि तेहिं मारेउ हनुमंता । घुमिंत भूतल परेउ तुरंता ॥
 पुनि नल नीलहि अवनि पछारेसि । जहँ तहँ पटक पटक भट डारेसि
 चली बलीमुख सेन पराई । अति भय त्रसित न कोउ समुहाई ॥

दो०—अंगदादि कपि मुरुछित करि समेत सुग्रीव ।

काँख दाबि कपिराज कहँ चला असित बल साँव ॥६५॥

उमा करत रघुपति नरलीला । खेलत गरुड़ जिमि अहिगन मीला ॥
 भृकुटि भंग जो कालहि खार्ह । ताहि कि सोहइ ऐसि लराई ॥
 जग पावनि कीरति बिस्तरिहहिं । गाइ गाइ भवनिधि नर तरिहहिं ॥
 मुरुछा गइ मारुतसुत जागा । सुग्रीवहि तब खोजन लागा ॥
 सुग्रीवहु कै मुरुछा बीती । निबुकि गयउ तेहि मृतक प्रतीती ॥
 काटेसि दसन नासिका काना । गरजि अकास चलेउ तेहिं जाना ॥
 गहेउ चरन गहि भूमि पछारा । अति लाचवँ उठि पुनि तेहि मारा
 पुनि आवउ प्रभु पहि बलवाना । जयति जयति जय कृपानिधान ॥

नाक कान काटे जियँ जानी । फिरा क्रोध करि भइ मन ग्लानी ॥
 सहज भीम पुनि विनु श्रुति नासा । देखत कपि दल उपजी त्रासा ॥
 दो०—जय जय जय रघुवंस मनि धाए कपि दै हूह ।

एकहि बार तासु पर छाड़ेन्हि गिरि तरु जूह ॥६६॥
 कुंभकरन रन रंग विरुद्धा । सन्मुख चला काल जनु क्रुद्धा ॥
 कोटि कोटि कपि धरि धरि खाई । जनु टीढ़ी गिरि गुहाँ समाई ॥
 कोटिन्ह गहि सरीर सन मर्दा । कोटिन्ह मीजि मिलव महि गर्दा ॥
 मुख नासा श्रवनन्हि कीं बाटा । निसरि पराहिं भालु कपि ठाटा ॥
 रन मद मत्त निसाचर दर्पा । बिस्व ग्रसिहि जनु एहि विधि अर्पा ॥
 मुरे सुमट सब फिरहिं न फेरे । सूझ न नयन सुनहिं नहिं टेरे ॥
 कुंभकरन कपि फौज बिडारी । सुनि धाई रजनीचर धारी ॥
 देखी राम बिकल कटकाई । रिपु अनीक नाना विधि आई ॥
 दो०—सुनु सुग्रीव विभीषन अनुज सँभारेहु सैन ।

मैं देखउँ खल बल दलहि बोले राजिवनैन ॥६७॥
 कर सारंग साजि कटि भाथा । अरि दल दलन चले रघुनाथा ॥
 प्रथम कीन्हि प्रभु धनुष टँकोरा । रिपु दल बधिर भयउ सुनि सोरा ॥
 सत्यसंध छाँड़े सर लच्छा । कालसर्प जनु चले सपच्छा ॥
 जहँ तहँ चले विपुल नाराचा । लगे कटन भट बिकट पिसाचा ॥
 कटहिं चरन उर सिर भुजदंडा । बहुतक धीर होहिं सत खंडा ॥
 धुमि धुमि धावत महि परही । उठि समारि सुमट पुनि लरही ॥

लागत वान जलद जिमि गाजहिं । बहुतक देखि कठिन सर भाजहिं
रुंड प्रचंड मुंड विनु धावहिं । धरु धरु मारु मारु धुनि गावहिं ॥

दो०—छन महुँ प्रभु के सायकन्हि काटे बिकट पिसाच ।

पुनि रघुवीर निषंग महुँ प्रबिसे सब नाराच ॥६८॥

कुंभकरन मन दीख बिचारी । हति छन माझ निसाचर धारी ॥
भा अति क्रुद्ध महाबल धीरा । कियो मृगनायक नाद गँभीरा ॥
कोपि महीधर लेइ उपारी । डारइ जहँ मर्कट भट भारी ॥
आवत देखि सैल प्रभु भारे । सरन्हि काटि रज सम करि डारे ॥
पुनि धनु तानि कोपि रघुनायक । छाँड़े अति कराल बहु सायक ॥
तनु महुँ प्रबिसि निसरि सर जाहीं । जिमि दामिनि धन माझ समाहीं ॥
सोनित खवत सोह तन कारे । जनु कज्जल गिरि गेरु पनारे ॥
बिकल बिलोकि भालु कपि धाए । बिहँसा जबहिं निकट कपि आए
दो०—महानाद करि गर्जा कोटि कोटि गहि कीस ।

महि पटकइ गजराज इव सपथ करइ दससीस ॥६९॥

भागो भालु बलीमुख जूथा । बृकु बिलोकि जिमि मेष वरूथा ॥
चले भागि कपि भालु भवानी । बिकल पुकारत आरत वानी ॥
यह निसिचर दुकाल सम अहई । कपिकुल देस परन अब चहई ॥
कृपा बारिधर राम खरारी । पाहि पाहि प्रनतारति हारी ॥
सकरुन बचन सुनत भगवाना । चले सुधारि सरासन बाना ॥
राम सेन निज पाछे घाली । चले सकीप महा बलसाली ॥

खैंचि धनुष सर सत संधाने। छूटे तीर सरीर समाने॥
 लागत सर धावा रिस भरा। कुधर डगमगत डोलति धरा॥
 लीन्ह एक तेहिं सैल उपाटी। रघुकुलतिलक भुजा सोइ काटी।
 धावा बाम बाहु गिरि धारी। प्रभु सोउ भुजा काटि महि पारी॥
 काटें भुजा सोह खल कैसा। पच्छहीन मंदर गिरि जैसा॥
 उग्रबिलोकनि प्रभुहि बिलोका। प्रतन चहत मानहुँ त्रैलोका॥

दो०—करि चिह्नार घोर अति धावा बदनु पसारि ।

गगन सिद्ध सुर त्रासित हा हा हेति पुकारि ॥७०॥

सभय देव करुनानिधि जान्यो। श्रवन प्रजंत सरासनु तान्यो॥
 बिसिख निकर निसिचर मुख भरेऊ। तदपि महाबल भूमि न परेऊ॥
 सरन्हि भरा मुख सन्मुख धावा। काल त्रोन सजीव जनु आवा॥
 तब प्रभु कोपि तीव्र सर लीन्हा। धर ते भिन्न तासु सिर कीन्हा॥
 सो सिर परेउ दसानन आगें। विकल भयउ जिमि फनि मनि त्यागें॥
 धरनि धसइ धर धाव प्रचंडा। तब प्रभु काटि कीन्ह दुइ खंडा॥
 परे भूमि जिमि नभ तें भूधर। हेठ दाबि कपि भालु निसाचर॥
 तासु तेज प्रभु बदन समाना। सुर मुनि सबहिं अचंभव माना॥
 सुर दुंदुभीं बजावहिं हरषहिं। अस्तुति करहिं सुमन बहु बरषहिं॥
 करि बिनती सुर सकल सिधाए। तेही समय देवरिषि आए॥
 गगनोपरि हारे गुन गन गाए। रुचिर वीरस प्रभु मन भाए॥
 बेगि हतहु खल कहि मुनि गए। राम समर महि सोभत भए॥

छं०—संग्राम भूमि बिराज रघुपति अतुल बल कोसल धनी ।
 श्रम बिंदु मुख राजीव लोचन अरुन तन सोनित कनी ॥
 भुज जुगल फेरत सर सरासन भालु कपि चहु दिसि बने ।
 कह दास तुलसी कहि न सक छबि सेष जेहि आनन घने ॥

दो०—निसिचर अधम मलाकर ताहि दीन्ह निज धाम ।
 गिरिजा ते नर मंदमति जे न भजहि श्रीराम ॥७३॥

दिन कें अंत फिरीं द्वौ अनी । समर भई सुमटन्ह श्रम घनी ॥
 राम कृपाँ कपि दल बल बाढ़ा । जिमि तृन पाइ लाग अति डाढ़ा
 छीजहिं निसिचर दिनु अरु राती । निज मुख कहें सुकृत जेहि भाँती
 बहु बिलाप दसकंधर करई । बंधु सीस पुनि पुनि उर धरई ॥
 रोवहिं नारि हृदय हति पानी । तासु तेज बल बिपुल बखानी ॥
 मेघनाद तेहि अवसर आयउ । कहि बहु कथा पिता समुझायउ ॥
 देखेहु कालि मोरि मनुसाई । अवहिं बहुत का करौ बड़ाई ॥
 इष्टदेव सैं बल रथ पायउँ । सो बल तात न तोहि देखायउँ ॥
 एहि बिधि जल्पत भयउ विहाना । चहुँ दुआर लागे कपि नाना ॥
 इत कपि भालु काल सम घीरा । उत रजनीचर अति रनधीरा ॥
 लरहिं सुमट निज निज जय हेतू । बरनि न जाइ समर खगकेतू ॥
 दो०—मेघनाद मायामय रथ चढ़ि गयउ अकास ।

गजेंड अट्टहास करि भइ कपि कटकहि त्रास ॥७२॥

डारइ परसु परिघ पाषाणा । लागेउ वृष्टि करै बहु बाना ॥
 दस दिसि रहे वान नम छाई । मानहुँ मघा मेघ झरि लाई ॥
 धरु धरु मारु सुनिअ धुनि काना । जो मारइ तेहि कोउ न जाना ॥
 गहि गिरि तरु अकास कपि धावहिं । देखहिं तेहि न दुखित फिरि आवहिं ॥
 अवघट घाट बाट गिरि कंदर । माया बल कीन्हेसि सर पंजर ॥
 जाहिं कहाँ ब्याकुल भए बंदर । सुरपति बंदि परे जनु मंदर ॥
 मारुतसुत अंगद नल नीला । कीन्हेसि विकल सकल बलसीला ॥
 पुनि लछिमन सुग्रीव बिभीषन । सरन्हि मारि कीन्हेसि जर्जर तन ॥
 पुनि रघुपति सैं जूझै लागा । सर छाँड़इ होइ लागहिं नागा ॥
 ब्याल पास बस भए खरारी । स्वबस अनंत एक अबिकारी ॥
 नट इव कपट चरित कर नाना । सदा स्वतंत्र एक भगवाना ॥
 रन सोभा लागि प्रभुहिं बँधायो । नागपास देवन्ह भय पायो ॥
 दो०—गिरिजा जासु नाम जपि मुनि काटहिं भव पास ।

सो कि बंध तर आवइ ब्यापक बिस्व निवास ॥७३॥

चरित राम के सगुन भवानी । तर्किन जाहिं बुद्धि बल वानी ॥
 अस बिचारि जे तग्य बिरागी । रामहि भजहिं तर्क सब त्यागी ॥
 ब्याकुल कटकु कीन्ह घननादा । पुनि भा प्रगट कहइ दुर्बादा ॥
 जामवंत कह खल रहु ठाढ़ा । सुनि करि ताहि क्रोध अति बाढ़ा ॥
 बूढ़ जानि सठ छाँड़ेउँ तोही । लागेसि अधम पचारै मोही ॥
 अस कहि तरल तिसूल चलायो । जामवंत कर गहि सौइ धायो ॥

मारिसि मेघनाद कै छाती। परा भूमि घुर्मित सुरघाती॥
पुनि रिसान गहि चरन फिरायो। महि पछारि निज बल देखरायो॥
बर प्रसाद सो मरइ न मारा। तब गहि पद लंका पर डारा॥
इहाँ देवरिषि गरुड़ पठायो। राम समीप सपदि सो आयो॥

दो०—खगपति सब धरि खाए माया नाग बरूथ ।

माया बिगत भए सब हरषे बानर जूथ ॥७४(क)॥

गहि गिरि पादप उपल नख धाए कीस रिसाइ ।

चले तमीचर बिकलतर गढ़ पर चढ़े पराइ ॥७४(ख)॥

मेघनाद कै मुख छा जागी। पितहि बिलोकि लाज अति लागी॥
तुरत गयउ गिरिवर कंदरा। करौं अजय मख अस मन धरा॥
इहाँ बिभीषन मंत्र विचारा। सुनहु नाथ बल अतुल उदारा॥
मेघनाद मख करइ अपावन। खल मायावी देव सतावन॥
जौं प्रभु सिद्ध होइ सो पाइहि। नाथ बेगि पुनि जीति न जाइहि॥
सुनि रघुपति अतिसय मुख माना। बोले अंगदादि कपि नाना॥
लछिमन संग जाहु सब भाई। करहु बिधंस जग्य कर जाई॥
तुम्ह लछिमन मारेहु रन ओही। देखि समय सुर दुख अति मोही॥
मारेहु तेहि बल बुद्धि उपाई। जेहिं छीजै निसिचर सुनु भाई॥
जामवंत सुग्रीव बिभीषन। सेन समेत रहेहु तीनिउ जन॥
जब रघुबीर दीन्हि अनुसासन। कटि निषंग कसिसाजि सरासन॥
प्रभु प्रताप उर धरि रनघीरा। बोलि धन इव मिरा मैमसी॥

जौं तेहि आजु बधैं विनु आवौं। तौ रघुपति सेवक न कहावौं ॥
जौं सत संकर करहिं सहाई। तदपि हतउ रघुबीर दोहाई ॥

दो०—रघुपति चरन नाइ सिरु चलेउ तुरंत अनंत ।

अंगद नील मयंद नल संग सुभट हनुमंत ॥७५॥

जाइ कपिन्ह सो देखा वैसा। आहुति देत रुधिर अरु भैंसा ॥
कीन्ह कपिन्ह सब जग्य विधंसा। जवन उठइ तब करहिं प्रसंसा ॥
तदपिन उठइ धरेन्हि कच जाई। लातन्हि हति हति चले पराई ॥
लै त्रिसूल धावा कपि भागे। आए जहँ रामानुज आगे ॥
आवा परम क्रोध कर मारा। गर्ज घोर रव बारहिं बारा ॥
कोपि मरुतसुत अंगद धाए। हति त्रिसूल उर धरनि गिराए ॥
प्रभु कहँ छाँड़ेसि सूल प्रचंडा। सर हति कृत अनंत जुग खंडा ॥
उठि बहोरि मारुति जुबराजा। हतहि कोपि तेहि घाउ न बाजा ॥
फिरे बीर रिपु मरइ न मारा। तब धावा करि घोर चिकारा ॥
आवत देखि क्रुद्ध जनु काला। लछिमन छाड़े विसिख कराला ॥
देखेसि आवत पवि सम बाना। तुरत भयउ खल अंतरधाना ॥
विविध बेष धरि करइ लराई। कबहुँक प्रगट कबहुँ दुरि जाई ॥
देखि अजय रिपु डरपे कीसा। परम क्रुद्ध तब भयउ अहीसा ॥
लछिमन मन अस मंत्र दढ़ावा। एहि पापिहि मैं बहुत खेलावा ॥
सुमिरि कोसलाधीस प्रतापा। सर संधान कीन्ह करि दापा ॥
छाड़ा बान माझ उर लगा। मरती बार कपटु सब त्यागा ॥

दो०—रामानुज कहँ रासु कहँ अस कहि छाँडेसि प्रान ।

धन्य धन्य तव जननी कह अंगद हनुमान ॥७६॥

बिनु प्रयास हनुमान उठायो । लंका द्वार राखि पुनि आयो ॥
तासु मरन सुनि सुर गंधर्वा । चढ़ि बिमान आए नभ सर्वा ॥
वरषि सुमन हुंदुर्भी बजावहिं । श्रीरघुनाथ बिमल जसु गावहिं ॥
जय अनंत जय जगदाधारा । तुम्ह प्रभु सब देवन्हि निस्तारा ॥
अस्तुति करि सुर सिद्ध सिधाए । लछिमन कृपासिंधु पहिं आए ॥
सुत बध सुना दसानन जबहीं । मुरुछित भयउ परेउ महि तबहीं ॥
मंदोदरी रुदन कर भारी । उर ताड़न बहु भाँति पुकारी ॥
नगर लोग सब व्याकुल सोचा । सकल कहँह दसकंधर पोचा ॥

दो०—तब दसकंठ बिबिधि बिधि समुझाई सब नारि ।

नस्वर रूप जगत सब देखहु हृदयँ बिचारि ॥७७॥

तिन्हहि ग्यान उपदेसा रावन । आपुन मंद कथा सुभ पावन ॥
पर उपदेस कुसल बहुतेरे । जे आचरहिं ते नर न घनेरे ॥
निसा सिरानि भयउ भिनुसारा । लगे भालु कपि चारिहुँ द्वारा ॥
सुमट बोलाइ दसानन बोला । रन सन्मुख जा कर मन डोला ॥
सो अबहीं बरु जाउ पराई । संजुग बिमुख भएँ न भलाई ॥
निज भुज बल मै बयरु बढावा । देहउँ उतरु जो रिपु चढ़ि आवा ॥
आस कहि मरुत लोग रथ साजा । बाजे सकल जुझाऊ बाजा ॥
चले बीर सब अतुलित बली । जनु कजल कै आधी चली ॥

असगुन अमित होहिं तेहि काला । गनइ न भुज बल गर्व बिसाला ॥

छं०—अति गर्व गनइ न सगुन असगुन खवहिं आयुध हाथ ते ।

भट गिरत रथ ते बाजि गज चिकरत भाजहिं साथ ते ॥

गोमाय गीघ कराल खर रव स्वान बोलहिं अति घने ।

जनु कालदूत उल्लूक बोलहिं बचन परम भयावने ॥

दो०—ताहि कि संपति सगुन सुभ सपनेहुँ मनबिश्राम ।

भूत-द्रोह रत मोहबस राम बिमुख रति काम ॥७८॥

चलेउ निसाचर कटकु अपारा । चतुरंगिनी अनी बहु धारा ॥

बिबिधि भाँति बाहन रथ जाना । विपुल बरन पताक ध्वज नाना ॥

चले मत्त गज जुथ घनेरे । प्राविट जलद मरुत जनु प्रेरे ॥

बरन बरन बिरदैत निकाया । समर सूर जानहिं बहु माया ॥

अति बिचित्र बाहिनी बिराजी । वीर वसंत सेन जनु साजी ॥

चलत कटक दिगसिंधुर डगहीं । छुमित पयोधि कुधर डगमगहीं ॥

उठी रेनु रबि गयउ छपाई । मरुत थकित बसुधा अकुलाई ॥

पनव निसान घोर रव बाजहिं । प्रलय समय के घन जनु गाजहिं ॥

मेरि नफीरि बाज सहनाई । मारू राग सुभट सुखदाई ॥

केहरि नाद वीर सब करहीं । निज निज बल पौरुष उच्चरहीं ॥

कहइ दसानन सुनहु सुमट्टा । मर्दहु भालु कपिन्ह केठट्टा ॥

हौं मारिहँ भूमि बौ भारी । अस कहि सन्मुख मोज रंगवाई ॥

यह सुधि सकल कपिन्ह जब पाई । धाए करि रघुवीर दोहाई ॥

छं०—धाए बिसाल कराल मर्कट भालु काल समान ते ।

मानहुँ सपच्छ उड़ाहिँ भूधर बृंद नाना बान ते ॥

नख दसन सैल महाद्रुमायुध सबल संक न मानहीं ।

जय राम रावन मत्त गज मृगराज सुजसु बखानहीं ॥

दो०—दुहु दिसि जय जयकार करि निज निज जोरी जानि ।

भिरे बीर इत रामहि उत रावनहि बखानि ॥७९॥

रावनु रथी विरथ रघुबीरा । देखि बिभीषन भयउ अधीरा ॥

अधिक प्रीति मन भा संदेहा । बंदि चरन कह सहित सनेहा ॥

नाथ न रथ नहिँ तन पद त्राना । केहि बिधि जितव बीर बलवाना ॥

सुनहु सखा कह कृपानिधाना । जेहिँ जय होइ सो स्यंदन आना ॥

सौरज धीरज तेहि रथ चाका । सत्य सील दृढ़ ध्वजा पताका ॥

बल विवेक दम परहित घोरे । छमा कृपा समता रजु जोरे ॥

ईस भजनु सारथी सुजाना । बिरति चर्म संतोष कृपाना ॥

दान परसु बुधि सक्ति प्रचंडा । बर विग्यान कठिन कोदंडा ॥

अमल अचल मन त्रोन समाना । समजम नियम सिलीमुख नाना ॥

कवच अभेद विप्र गुर पूजा । एहिँ सम विजय उपाय न दूजा ॥

सखा धर्ममय अस रथ जाकैं । जीतन कहँ न कतहुँ रिपु ताकैं ॥

दो०—महा अजय संसार रिपु जीति सकइ सो बीर ।

जाकैं अस रथ होइ दृढ़ सुनहु सखा मतिधीर ॥८०(क)॥

सुनि प्रभु बचन बिभीषन हरषि गहै पद कंज ।

एहि मिस मोहि उपदेसेहु राम कृपा सुख पुज ॥८०(ख)॥

उत पचार दसकंधर इत अंगद हनुमान ।

लरत निसाचर भालु कपि करि निज निज प्रभु आन ॥८०(ग)॥

सुर ब्रह्मादि सिद्ध मुनि नाना । देखत रन नभ चढ़े विमाना ।

हमहू उमा रहे तेहि संगी । देखत राम चरित रन रंगा ॥

सुभट समर रस दुहु दिसि माते । कपि जय सील राम बल ताते ॥

एक एक सन भिरहि पचारहि । एकन्ह एक मर्दि महि पारहि ॥

मारहि काटहि घरहि पछारहि । सीस तोरि सीसन्ह सन मारहि ॥

उदर बिदारहि भुजा उपारहि । गहि पद अवनि पटक भट डारहि

निसिचर भट महि गाड़हि भालू । ऊपर ढारि देहि बहु बालू ॥

वीर बलीमुख जुद्ध बिरुद्धे । देखि अत विपुल काल जनु क्रुद्धे ॥

छं०—क्रुद्धे कृतांत समान कपि तन स्रवत सोनित राजहीं ।

मर्दिहि निसाचर कटक भट बलवंत घन जिमि गाजहीं ॥

मारहि चपेटन्हि डाटि दातन्ह काटिलातन्ह मीजहीं ।

चिक्करहि मर्कट भालु छल बल करहि जेहि खल छीजहीं ॥१॥

धरि गाल फारहि उर बिदारहि गल अँतावरि मेलहीं ।

प्रह्लादपति जनु बिबिध तनु धरि समर अंगन खेलहीं ॥

धरु मारु काटु पछारु घोर गिरा गगन महि भरि रही ।

जय राम जो तृन ते कुलिस कर कुलिस ते कर तृन सही ॥२॥

दो०—निज दल बिचलत देखेसि बीस भुजाँ दस आप ।

एथ चढ़ि चलेउ दसानन फिरहु फिरहु करि दाप ॥८१॥

धायउ परम क्रुद्ध दसकंधर। सन्मुख चले हूह दै बंदर॥
 गहि कर पादप उपल पहारा। डारेन्हि ता पर एकहिं बारा॥
 लागहिं सैल वज्र तन तासू। खंड खंड होइ फूटहिं आसू॥
 चला न अचल रहा रथ रोपी। रन दुर्मद रावन अति कोपी॥
 इत उत झपटि दपटि कपि जोधा। मदै लग भयउ अति क्रोधा॥
 चले पराइ भालु कपि नाना। त्राहि त्राहि अंगद हनुमाना॥
 पाहि पाहि रघुबीर गोसाईं। यह खल खाइ काल की नाई॥
 तेहिं देखे कपि सकल पराने। दसहुँ चाप सायक संधाने॥

छं०—संधानि धनु सर निकर छाड़ेसि उरग जिमि उड़ि लागहीं।
 रहे पूरि सर धरनी गगनदिसि बिदिसि कहँ कपि भागहीं॥
 भयो अति कोलाहल विकल कपि दल भालु बोलहिं आतुरे।
 रघुबीर करुना सिंधु आरत बंधु जन रच्छक हरे॥
 दो०—निज दल विकल देखि कटि कसि निषंग धनु हाथ।

लछिमन चले क्रुद्ध होइ नाइ राम पद साथ ॥८२॥

रे खल का मारसि कपि भालू। मोहि बिलोकु तोर मैं कालू॥
 खोजत रहेउँ तोहि सुतघाती। आजु निपाति जुड़ावउँ छाती॥
 अस कहि छाड़ेसि धान प्रचंडा। लछिमन किए सकल सत खंडा॥
 कोटिन्ह आयुध रावन डारे। तिल प्रवान करि काटि निवारे॥
 पुनि निज धानन्ह कीन्ह प्रहारा। स्यंदनु भंजि सारथी मारा॥
 सत सत सर मोरे दस भाला। गिरि सुगन्ह जनु प्रविसहिं व्याला॥

पुनि सत सर मारा उर माहीं । परेउ धरनि तल सुधि कछु नाहीं ॥
उठा प्रबल पुनि मुरुछा जागी । छाड़िसि ब्रह्म दीन्हि जो साँगी ॥

छं०—सो ब्रह्म दत्त प्रचंड सक्ति अनंत उर लागी सही ।
परयो बीर बिकल उठाव दसमुख अतुल बल महिमा रही ॥
ब्रह्मांड भवन विराज जाकें एक सिर जिमि रज कनी ।
तेहि चह उठावन मूढ़ रावन जान नहि त्रिभुवन धनी ॥
दो०—देखि पवनसुत धायउ बोलत बचन कठोर ।

आवत कपिहि हन्यो तेहिं सुष्टि प्रहार प्रघोर ॥८३॥

जानु टेकि कपि भूमि न गिरा । उठा सँभारि बहुत रिस भरा ॥
मुठिका एक ताहि कपि मारा । परेउ सैल जनु बज्र प्रहारा ॥
मुरुछा गै बहोरि सो जागा । कपि बल विपुल सराहन लगा ॥
धिग धिग मम पौरुष धिग मोही । जाँ तैं जिअत रहेसि सुरद्रोही ॥
अस कहि लछिमन कहूँ कपि ल्यायो । देखि दसानन बिसमय पायो ॥
कहरघुबीर समुझु जियँ भ्राता । तुम्ह कृतांत भच्छक सुर त्राता ॥
सुनत बचन उठि बैठ कृपाला । गई गगन सो सकति कराला ॥
पुनि कोदंड बान गहि धाए । रिपु सन्मुख अति आतुर आए ॥

छं०—आतुर बहोरि बिभंजि स्यंदन सूत हति व्याकुल कियो ।
गिरयो धरनि दसकंधर बिकलतर बान सत बेध्यो हियो ॥
सारथी दूसर घालि रथ तेहि तरत लंका लै गयो ।
रघुबीर बहु प्रताप पुंज बहोरि प्रभु चरनन्हि नयो ॥

दो०—उहाँ दसानन जागि करि करै लाग कछु जग्य ।

राम विरोध विजय चह सठ हठ बस अति अग्य ॥८४॥

इहाँ बिभीषन सब सुधि पाई । सपदि जाइ रघुपतिहि सुनाई ॥
नाथ करइ रावन एक जागा । सिद्ध भएँ नहिं मरिहि अमागा ॥
पठवहु नाथ बेगि भट बंदर । करहिं बिधंस आव दसकंधर ॥
प्रात होत प्रभु सुभट पठाए । हनुमदादि अंगद सब धाए ॥
कौतुक कूदि चढ़े कपि लंका । पैठे रावन भवन असंका ॥
जग्य करत जवहीं सो देखा । सकल कपिन्ह भा क्रोध बिसेषा ॥
रन ते निलज भाजि गृह आवा । इहाँ आइ बक ध्यान लगावा ॥
अस कहि अंगद मारा लाता । चितव न सठ स्वारथ मन राता ॥

छं०—नहिं चितव लब करि कोप कपि गहि दसन लातन्ह मारहीं ।
धरि केस नारि निकारि बाहेर तेऽतिदीन पुकारहीं ॥
तब उठेउ क्रुद्ध कृतांत सम गहि चरन बानर डारई ।
एहि बीच कपिन्ह बिधंस कृत मख देखि मन महुँ हारई ॥

दो०—जग्य बिधंसि कुसल कपि आए रघुपति पास ।

चलेउ निसाचर क्रुद्ध होइ त्यागि जिवन कै आस ॥८५॥

चलत होहिं अति असुभ भयंकर । बैठहिं गीध उड़ाइ सिरन्ह पर ॥
भयउ कालबस काहु न माना । कहेसि बजावहु जुद्ध निसाना ॥

चली तमीचर अनी अपारा । बहु गज रथ पदाति असवारा ॥
प्रभु सन्मुख धाए खल कैसे । सलभ समूह अनल कह जैसे ॥

इहाँ देवतन्ह अस्तुति कीन्ही। दारुन विपति हमहि एहिं दीन्ही॥
 अब जनि राम खेलावहु एही। अतिसय दुखित होति वैदेही॥
 देव बचन सुनि प्रभु मुसुकाना। उठि रघुवीर सुधारे बाना॥
 जटा जूट दृढ़ बाँधे माथे। सोहहिं सुमन बीच बिच गाथे॥
 अरुन नयन बारिद तनु स्यामा। अखिल लोक लोचनाभिरामा॥
 कटितट परिकर कस्यो निषंगा। कर कोदंड कठिन सारंगा॥

छं०—सारंग कर सुंदर निषंग सिलीमुखाकर कटि कस्यो ।
 भुजदंड पीन मनोहरायत उर धरासुर पद लस्यो ॥
 कह दास तुलसी जबहिं प्रभु सर चाप कर फेरन लगे ।
 ब्रह्मांड दिग्गज कमठ अहि महि सिंधु भूधर डगमगे ॥
 दो०—सोभा देखि हरषि सुर बरषहिं सुमन अपार ।

जय जय जय करुनानिधि छवि बल गुन आगार ॥८६॥

एहीं बीच निसाचर अनी। कसमसात आई अति घनी॥
 देखि चले सन्मुख कपि भट्टा। प्रलयकाल के जनु घन घट्टा॥
 बहु कृपान तरवारि चमंकहिं। जनु दहँ दिसि दामिनीं दमंकहिं॥
 गज रथ तुरग चिकार कठोरा। गर्जहिं मनहुँ बलाहक घोरा॥
 कपि लंगूर विपुल नभ छाए। मनहुँ इंद्रधनु उए सुहाए॥
 उठइ धूरि मानहुँ जलधारा। बान बुंद भै वृष्टि अपारा॥
 दुहुँ दिसि पर्वत करहिं प्रहारा। अजगज जनु दवाहिं बास॥
 रघुपति कोपि बान झरि लाई। घायल भै निसिचर समुदाई॥

लागत वान वीर चिक्करहीं। घुमिं घुमिं जहँ तहँ महि परहीं॥
खवहिं सैल जनु निर्झर भारी। सोनित सरि कादर भयकारी॥

छं०—कादर भयंकर रुधिर सरिता चली परम अपावनी ।

दोड कूल दल रथ रेत चक्र अवर्त बहति भयावनी ॥

जलजंतु गज पदचर तुरग खर विविध वाहन को गने ।

सर सक्ति तोमर सर्प चाप तरंग चर्म कमठ घने ॥

दो०—वीर परहिं जनु तीर तरु मज्जा बहु बह फेन ।

कादर देखि डरहिं तहँ सुभटन्ह के मन चेन ॥८७॥

मजहिं भूत पिसाच बेताला। प्रमथ महा झोटिंग कराला॥

काक कंक लै भुजा उड़ाहीं। एक ते छीनि एक लै खाहीं॥

एक कहाँ ऐसिउ सौंघाई। सठहु तुम्हार दरिद्र न जाई॥

कहँरत भट घायल तट गिरे। जहँ तहँ मनहुँ अर्धजल परे॥

खैचहिं गीध आँत तट भए। जनु बंसी खेलत चित दए॥

बहु भट बहहिं चढ़े खग जाहीं। जनु नावरि खेलहिं सरि माहीं॥

जोगिनिभरि भरि खप्पर संचहिं। भूत पिसाच बधू नम नंचहिं॥

भट कपाल करताल वजावहिं। चामुंडा नाना विधि गावहिं॥

जंबुक निकर कटकट कट्टहिं। खाहिं हुआहिं अघाहिं दपट्टहिं॥

कोटिन्ह रुंड मुंड बिनु डोल्लहिं। सीस परे महि जय जय बोल्लहिं॥

छं०—बोल्लहिं जो जय जय मुंड रुंड प्रचंड सिर बिनु धावहीं ।

खप्परिन्ह खग अलुज्झि जुज्झहिं सुभट भटन्ह दहावहीं ॥

बानर निसाचर निकर मर्दहिं राम बल दर्पित भए ।

संग्राम अंगन सुभट सोवहिं राम सर निकरन्हि हए ॥

दो०—रावन हृदयँ बिचारा भा निसिचर संघार ।

मैं अकेल कपि भालु बहु माया करौं अपार ॥८८॥

देवन्ह प्रभुहि पयादें देखा । उपजा उर अति छोम बिसेषा ॥

सुरपति निज रथ तुरत पठावा । हरष सहित मातलि लै आवा ॥

तेज पुंज रथ दिव्य अनूपा । हरषि चढ़े कोसलपुर भूपा ॥

चंचल तुरग मनोहर चारी । अजर अमरमन सम गतिकारी ॥

रथारूढ़ रघुनाथहि देखी । धाए कपि बलु पाइ बिसेषी ॥

सही न जाइ कपिन्ह कै मारी । तब रावन माया विस्तारी ॥

सो माया रघुवीरहि वाँची । लछिमन कपिन्ह सो मानी साँची ॥

देखी कपिन्ह निसाचर अनी । अनुज सहित बहु कोसलधनी ॥

छं०—बहु राम लछिमन देखि मर्कट भालु मन अति अपडरे ।

जनु चित्र लिखित समेत लछिमन जहँ सो तहँ चितवहिं खरे ॥

निज सेन चकित बिलोकि हँसि सर चाप सजि कोसलधनी ।

माया हरी हरि निमिष महुँ हरषी सकल मर्कट अनी ॥

दो०—बहुरि राम सब तन चितइ बोले वचन गँभीर ।

द्वंद्वजुद्ध देखहु सकल श्रमित भए अति बीर ॥८९॥

असक्तद्विरथ रघुनाथ जलावा । विप्र चारन पंकज सिद्ध नावा ॥

तब लंकेस क्रोध उर छावा । गर्जत तर्जत सन्मुख घावा ॥

जीतेहु जे भट संजुग माहीं । सुनु तापस मैं तिन्ह सम नाहीं ॥
 रावन नाम जगत जस जाना । लोकप जाकें बंदीखाना ॥
 खर दूषन विराध तुम्ह मारा । वधेहु व्याध इव बालि बिचारा ॥
 निशिचर निकर सुभट संधारेहु । कुंभकरन घननादहि मारेहु ॥
 आजु बयरु सबु लेउँ निवाहौ । जौ रन भूप भाजि नहि जाही ॥
 आजु करउँ खलु काल हवाले । परेहु कठिन रावन के पाले ॥
 सुनि दुर्वचन कालवस जाना । बिहँसि बचन कह कृपानिधाना ॥
 सत्य सत्य सब तव प्रभुतार्ह । जल्पसि जनि देखाउ मनुसार्ह ॥
 छं०—जनि जल्पना करि सुजसु नासहि नीति सुनहि करहि छमा ।

संसार महुँ पूरुष त्रिविध पाटल रसाल पनस समा ॥
 एक सुमनप्रद एक सुमन फल एक फलइ केवल लागहीं ।
 एक कहहि कहहि करहि अपर एक करहि कहत न बागहीं ॥

दो०—राम बचन सुनि बिहँसा मोहि सिखावत ग्यान ।

बयरु करत नहि तब डरे अब लागे प्रिय प्रान ॥९०॥

कहि दुर्वचन क्रुद्ध दसकंधर । कुलिस समान लाग छाँड़ै सर ॥
 नानाकार सिलीमुख धाए । दिसि अरु बिदिसि गगन महि छाए
 पावक सर छाँड़ेउ रघुवीरा । छन महुँ जरे निसाचर तीरा ॥
 छाड़िसि तीव्र सक्ति खिसिआई । दान संग प्रभु फेरि चलाई ॥
 कोटिहु चक्र तिसूल पबारै । बिनु प्रयास प्रभु काटि निवारै ॥
 निफल होहि रावन सर कैसे । खल के सकल मनोरथ जैसे ॥

तव सत बान सारथी मारेसि । परेउ भूमि जय राम पुकारेसि ॥

राम कृपा करि सूत उठावा । तव प्रभु परग क्रोध कहूँ पावा ॥

छं०—भए क्रुद्ध जुद्ध बिरुद्ध रघुपति त्रोन सायक कसमसे ।

कोदंड धुनि अति चंड सुनि मनुजाद सब माखत असे ॥

मंदोदरी उर कंप कंपति कमठ भू भूधर त्रसे ।

चिक्करहिं दिग्गज दसन गहि महि देखि कौतुक सुर हँसे ॥

दो०—तानेउ चाप श्रवन लगि छाँड़े बिसिख कराल ।

राम मारगन गन चले लहलहात जनु व्याल ॥९१॥

चले बान सपच्छ जनु उरगा । प्रथमहिं हतेउ सारथी तुरगा ॥

रथ बिमंजि हति केतु पताका । गर्जा अति अंतर बल थाका ॥

तुरत आन रथ चढ़ि खिसिआना । अस्त्र सस्त्र छाँड़ेसि विधि नाना ॥

बिफल होहिं सब उद्यम ताके । जिमि परद्रोह निरत मनसा के ॥

तव रावन दस सूल चलावा । बाजि चारि महि मारि गिरावा ॥

तुरग उठाइ कोपि रघुनायक । खैंचि सरासन छाँड़े सायक ॥

रावन सिर सरोज वनचारी । चलि रघुवीर सिलीमुख धारी ॥

दस दस बान भाल दस मारे । निसरि गए चले रुधिर पनारे ॥

स्वत रुधिर धायउ बलवाना । प्रभु पुनि कृत धनु सर संधाना ॥

तीस तीर रघुवीर पवारे । भुजन्हि समेत सीस महि पारे ॥

काटतही पुनि भए नबीने । राम बहोरि भुजा सिर छीने ॥

प्रभु बहु बार बाहु सिर हए । कटत झटिति पुनि नूतन भए ॥

पुनि पुनि प्रभु काटत भुज सीसा । अति कौतुकी कोसलाधीसा ॥
रहे छाड़ नभ सिर अरु बाहू । मानहुँ अमित केतु अरु राहू ॥

छं०—जनु राहु केतु अनेक नभ पथ खवत सोनित धावहीं ।

रघुबीर तीर प्रचंड लागाहिं भूमि गिरन न पावहीं ॥

एक एक सर सिर निकर छेदे नभ उड़त हमि सोहहीं ।

जनु कोपि दिनकर कर निकर जहँ तहँ विधुंतुद पोहहीं ॥

दो०—जिमि जिमि प्रभु हर तासु सिर तिमि तिमि होहिं अपार

सेवत विषय बिबर्ध जिमि नित नित नूतन मार ॥९२॥

दसमुख देखि सिरन्ह कै बाढ़ी । विसरा मरन भई रिस गाढ़ी ॥

गर्जेउ मूढ़ महा अभिमानी । धायउ दसहु सरासन तानी ॥

समर भूमि दसकंधर कोप्यो । वरषि बान रघुपति रथ तोप्यो ॥

दंड एक रथ देखि न परेऊ । जनु निहार महुँ दिनकर दुरेऊ ॥

हाहाकार सुरन्ह जव कीन्हा । तब प्रभु कोपि कारमुक लीन्हा ॥

सर निवारि रिपु के सिर काटे । तेदिसि बिदिसि गगन महि पाटे ॥

काटे सिर नभ मारग धावहिं । जय जय धुनि करि भय उपजावहिं

कहँ लछिमन सुग्रीव कपीसा । कहँ रघुबीर कोसलाधीसा ॥

छं०—कहँ रासु कहि सिर निकर धाए देखि मर्कट भजि चले ॥

संधानि धनु रघुबंसमनि हँसि सरन्हि सिर बेधे भले ॥

खिर मालिका कर कालिका गहि बृंद बृंदन्हि बहु मिलीं ।

करि रुधिर सरि मज्जनु मनहुँ संग्राम बेट पूजन चली ॥

दो०—पुनि दसकंठ क्रुद्ध होइ छाँडी सक्ति प्रचंड ।

चली बिभीषन सन्मुख मनहुँ काल कर दंड ॥९३॥

आवत देखि सक्ति अति घोरा । प्रनतारति भंजन पन मोरा ॥
 तुरत बिभीषन पाछें मेला । सन्मुख राम सहेउ सोइ सेला ॥
 लागि सक्ति मुरुछा कछु भई । प्रभु कृत खेल सुरन्ह विकलई ॥
 देखि बिभीषन प्रभु श्रम पायो । गहि कर गदा क्रुद्ध होइ धायो ॥
 रे कुभाग्य सठ मंद कुबुद्धे । तैं सुर नर मुनि नाग बिरुद्धे ॥
 सादर सिव कहूँ सीस चढ़ाए । एक एक के कोटिन्ह पाए ॥
 तेहि कारन खल अब लागि बाँच्यो । अब तव कालु सीस पर नाख्यो ॥
 राम विमुख सठ चहसि संपदा । अस कहि हनेसि माझ उरगदा ॥

छं०—उर माझ गदा प्रहार घोर कठोर लागत सहि परथो ।
 दस बदन सोनित स्रवत पुनि संभारि धायो रिस भरथो ॥
 द्वौ भिरे अतिबल मल्लजुद्ध बिरुद्ध एकु एकहि हनै ।
 रघुबीर बल दर्पित बिभीषनु घालि नहिं ता कहूँ गनै ॥

दो०—उमा बिभीषनु रावनहि सन्मुख चितव कि काउ ।

सो अब भिरत काल ज्यों श्रीरघुबीर प्रभाउ ॥९४॥

देखा श्रमित बिभीषनु भारी । धायउ हनूमान गिरि धारी ॥
 रथ तुरंग सारथी निपाता । हृदय माझ तेहि मारेसि लाता ॥
 ठाढ़ रहा अति कंपित गाता । गयउ बिभीषनु जहँ जवनाला ॥
 पुनि रावन कपि हतेउ पचारी । चलेउ गगन कपि पूँछ पसारी ॥

गहिसि पूँछ कपि सहित उड़ाना । पुनि फिरि भिरेउ प्रबल हनुमाना
लरत अकास जुगल सम जोधा । एकहि एकु हनत करि क्रोधा ॥
सोहहिं नभ छल बल बहु करहीं । कजलगिरि सुमेरु जनु लरहीं ॥
बुधि बल निसिचर परइ न पारथो । तब मारुतसुत प्रभु संभारथो ॥

छं०—संभारि श्रीरघुबीर धीर पचारि कपि रावनु हन्यो ।
महि परत पुनि उठि लरत देवन्ह जुगल कहूँ जय जय मन्यो ॥
हनुमंत संकट देखि मर्कट भालु क्रोधातुर चले ।
रन मत्त रावन सकल सुभट प्रचंड भुज बल दलमले ॥

दो०—तब रघुबीर पचारे धाए कीस प्रचंड ।
कपि बल प्रबल देखि तेहिं कीन्ह प्रगट पाषंड ॥९५॥
अंतरधान भयउ छन एका । पुनि प्रगटे खल रूप अनेका ॥
रघुपति कटक भालु कपि जेते । जहँ तहँ प्रगट दसानन तेते ॥
देखे कपिन्ह अमित दससीसा । जहँ तहँ भजे भालु अरु कीसा ॥
भागो बानर धरहिं न धीरा । त्राहि त्राहि लछिमन रघुबीरा ॥
दहँ दिसि धावहिं कोटिन्ह रावन । गर्जहिं घोर कठोर भयावन ॥
डरे सकल सुर चले पराई । जय कै आस तजहु अव भाई ॥
सब सुर जिते एक दसकंधर । अव बहु भए तकहु गिरि कंदर ॥
रहे बिरंचि संभु मुनि ग्यानी । जिन्ह जिन्ह प्रभु महिमा कछु जानी ॥

छं०—जाना प्रताप ते रहे निर्भय कपिन्ह रिपु माने फुरे ।
चले बिचलि मर्कट भालु सकल कृपाल पाहि भयातुरे ॥

हनुमंत अंगद नील नल अतिबल लरत रन बाँकुरे ।

मर्दहिं दसानन कोटि कोटिन्ह कपट भू भट अंकुरे ॥

दो०—सुर बानर देखे बिकल हँस्यो कोसलाधीस ।

सजि सारंग एक सर हते सकल दससीस ॥९६॥

प्रभु छन महुँ माया सब काटी । जिमि रवि उएँ जाहि तम फाटी ॥

रावनु एकु देखि सुर हरषे । फिरे सुमन बहु प्रभु पर बरषे ॥

भुज उठाइ रघुपति कपि फेरे । फिरे एक एकन्ह तब टेरे ॥

प्रभु बलु पाइ भालु कपि धाए । तरल तमकि संजुग महि आए ॥

अस्तुति करत देवतन्हि देखें । भयउँ एक मैं इन्ह के लेखें ॥

सठहु सदा तुम्ह मोर मरायल । अस कहि कोपि गगन पर धायल

हाहाकार करत सुर भागे । खलहु जाहु कहँ मोरें आगे ॥

देखि बिकल सुर अंगद धायो । कूदि चरन गहि भूमि गिरायो ॥

छं०—गहि भूमि पारथोलात मारयो बालिसुत प्रभु पहिँ गयो ।

संभारि उठि दसकंठ घोर कठोर रव गर्जत भयो ॥

करि दाप चाप चढ़ाइ दस संधानि सर बहु बरषई ।

किए सकल भट घायल भयाकुल देखि निज बल हरषई ॥

दो०—तब रघुपति रावन के सीस भुजा सर चाप ।

काटे बहुत बड़े पुनि जिमि तीरथ कर पाप ॥९७॥

हिरभुज बादि देखि रिगु केरी । भालु कपिन्ह रिगु मर्द घनेरी ॥

मरत न मूढ़ कटेहुँ भुज सीसा । धाए कोपि भालु भट कीसा ॥

बालितनय मारुति नल नीला । बानरराज दुविद बलसीला ॥
 विटप महीधर करहिं प्रहारा । सोइ गिरि तरु गहि कपिन्ह सो मारा
 एक नखन्हि रिपु वपुष विदारी । भागि चलहिं एक लातन्ह मारी ॥
 तब नल नील सिरन्हि चढ़ि गयऊ । नखन्हि लिलार बिदारत भयऊ
 रुधिर देखि विषाद उर भारी । तिन्हहि धरन कहूँ भुजा पसारी ॥
 गहे न जाहिं करन्हि पर फिरहीं । जनु जुग मधुप कमल बन चरहीं ॥
 कोपि कूदि द्वौ धरेसि बहोरी । महि पटकत भजे भुजा मरोरी ॥
 पुनि सकोप दस धनु कर लीन्हे । सरन्हि मारि घायल कपि कीन्हे ॥
 हनुमदादि मुरुछित करि बंदर । पाइ प्रदोष हरष दसकंधर ॥
 मुरुछित देखि सकल कपि बीरा । जामवंत धायउ रनधीरा ॥
 संग भालु भूधर तरु धारी । मारन लगे पचारि पचारी ॥
 भयउ क्रुद्ध रावन बलवाना । गहि पद महि पटकइ भट नाना ॥
 देखि भालुपति निज दल घाता । कोपि माझ उर मारेसि लाता ॥

छं०—उर लात घात प्रचंड लागत बिकल रथ ते महि परा ।
 गहि भालु बीसहुँ कर मनहुँ कमलन्हि बसे निसि मधुकरा ॥
 मुरुछित बिलोकि बहोरि पद हति भालुपति प्रभु पहिं गयो ।
 निसि जानि स्यंदन घालि तेहि तब सूत जतनु करत भयो ॥

दो०—मुरुछा बिगत भालु कपि सब आए प्रभु पास ।

निसिचर सकल रावनहि घेरि रहे अति त्रास ॥९८॥

मासपारायण, छन्दोसर्वा विधाय

तेही निसि सीता पहि जाई । त्रिजटा कहि सब कथा सुनाई ॥
 सिर भुज बाढ़ि सुनत रिपु केरी । सीता उर भइ त्रास घनेरी ॥
 मुख मलीन उपजी मन चिंता । त्रिजटा सन बोली तब सीता ॥
 होइहि कहा कहसि किन माता । केहि विधि मरिहि बिस्व दुखदाता
 रघुपति सर सिर कटेहुँ न मरई । विधि विपरीत चरित सब करई ॥
 मोर अभाग्य जिआवत ओही । जेहिं हौं हरि पद कमल बिछोही ॥
 जेहिं कृत कपट कनक मृग झूठा । अजहुँ सो दैव मोहि पर रूठा ॥
 जेहिं विधि मोहि दुख दुसह सहाए । लछिमन कहूँ कटु बचन कहाए
 रघुपति विरह सत्रिष सर भारी । तकि तकि मार बार बहु मारी ॥
 ऐसेहुँ दुख जो राख मम प्राणा । सोइ विधि ताहि जिआव न आना
 बहु विधि कर विलाप जानकी । करि करि सुरति कृपानिधान की
 कह त्रिजटा सुनु राजकुमारी । उर सर लागत मरइ सुरारी ॥
 प्रभु ताते उर हतइ न तेही । एहि के हृदयँ बसति वैदेही ॥

छं०—एहि के हृदयँ बस जानकी जानकी उर मम बास है ।
 मम उदर भुअन अनेक लागत बान सब कर नास है ॥
 सुनि बचन हरष बिषाद मन अति देखि पुनि त्रिजटाँ कहा ।
 अब मरिहि रिपु एहि बिधि सुनहि सुंदरि तजहि संसय महा ॥

दो०—काटत सिर होइहि बिकल छुटि जाइहि तव ध्यान ।

तब रावनहि हृदय महुँ मरिहहिं रामु सुजान ॥९९॥

अस कहि बहुत भाति समझाई । पुनि त्रिजटा निज भवन सिधाई ॥

राम सुभाउ सुमिरि बैदेही । उपजी विरह बिथा अति तेही ॥
 निसिहि ससिहि निंदति बहु भाँती । जुग सम भई सिराति न राती ॥
 करति विलाप मनहिं मन भारी । राम विरहँ जानकी दुखारी ॥
 जब अति भयउ विरह उर दाहू । फरकेउ बाम नयन अरु बाहू ॥
 सगुन विचारि धरी मन धीरा । अब मिलिहहिं कृपाल रघुबीरा ॥
 इहाँ अर्धनिसि रावनु जागा । निज सारथि सन खीझन लागा ॥
 सठ रनभूमि छड़ाइसि मोही । धिग धिग अधम मंदमति तोही ॥
 तेहिं पद गहि बहुविधि समुझावा । मोरु भएँ रथ चढ़ि पुनि धावा ॥
 सुनि आगवनु दसानन केरा । कपि दल खरभर भयउ घनेरा ॥
 जहँ तहँ भूधर ब्रिटप उपारी । धाए कटकटाइ भट भारी ॥

छं०—धाए जो मर्कट बिकट भालु कराल कर भूधर घरा ।
 अति कोप करहिं प्रहार मारत भजि चले रजनीचरा ॥
 बिचलाइ दल बलवंत कीसन्ह घेरि पुनि रावनु लियो ।
 चहुँ दिसि चपेटन्ह मारि नखन्हि बिदारि तनु व्याकुल कियो

दो०—देखि महा मर्कट प्रबल रावन कीन्ह बिचार ।
 अंतरहित होइ निमिष महुँ कृत माया बिस्तार ॥१००॥

छं०—जब कीन्ह तेहिं पाषंड । भए प्रगट जंतु प्रचंड ॥
 बेताल भूत पिसाच । कर धरें धनु नाराच ॥ १ ॥
 जोगिनि गहें करबाल । एक हाथ मनुज कपाल ॥

करि सय सोनित पान । नचहिं करहिं बहु मान ॥ २ ॥

धरु मारु बोलहिं घोर । रहि पूरि धुनि चहुँ ओर ॥
 मुख बाइ धावहिं खान । तब लगे कीस परान ॥ ३ ॥
 जहँ जाहिं मर्कट भागि । तहँ बरत देखहिं आगि ॥
 भए बिकल बानर भालु । पुनि लाग बरषै बालु ॥ ४ ॥
 जहँ तहँ थकित करि कीस । गजेंउ बहुरि दससीस ॥
 लछिमन कपीस समेत । भए सकल बीर अचेत ॥ ५ ॥
 हा राम हा रघुनाथ । करि सुभट मीजहिं हाथ ॥
 एहि विधि सकल बल तोरि । तेहिं कीन्ह कपट बहोरि ॥ ६ ॥
 प्रगटेसि बिपुल हनुमान । धाए गहे पाषान ॥
 तिन्ह रामु घेरे जाइ । चहुँ दिसि बरूथ बनाइ ॥ ७ ॥
 मारहु धरहु जनि जाइ । कटकटहिं पूँछ उठाइ ॥
 दहँ दिसि लँगूर विराज । तेहिं मध्य कोसलराज ॥ ८ ॥

छं०—तेहिं मध्य कोसलराज सुंदर स्याम तन सोभा लही ।
 जनु इंद्रधनुष अनेक की वर बारि तुंग तमालही ॥
 प्रभु देखि हरष बिषाद उर सुर बढ़त जय जय जय करी ।
 रघुबीर एकहिं तीर कोपि निमेष महुँ माया हरी ॥ १ ॥
 माया बिगत कपि भालु हरषे बिटप गिरि गहि सब फिरे ।
 सर निकर छाड़े राम रावन बाहु सिर पुनि महि गिरे ॥
 श्रीराम रावन समर चरित अनेक कल्प जो गावहीं ।
 सत सेष सारद निगम कबितेउ तदपि पार न पावहीं ॥ २ ॥

दो०—ताके गुन गन कछु कहे जदमति तुलसीदास ।

जिमि निज बल अनुरूप ते माछी उडइ अकास ॥१०१(क)॥

काटे सिर भुज बार बहु मरत न भट लंकेस ।

प्रभु क्रीडत सुर सिद्ध मुनि व्याकुल देखि कलेस ॥१०१(ख)॥

काटत बढ़हिं सीस समुदाई । जिमि प्रति लाभलोभ अधिकारि ॥

मरइ न रिपु श्रम भयउ त्रिसेषा । राम विभीषन तन तब देखा ॥

उमा काल मर जाकीं ईछा । सो प्रभु जन कर प्रीति परीछा ॥

सुनु सरबग्य चराचर नायक । प्रनतपाल सुर मुनि सुखदायक ॥

नाभिकुंड पियूष बस याकें । नाथ जिअत रावनु बल ताकें ॥

सुनत विभीषन बचन कृपाला । हरषि गहे कर बान कराला ॥

असुभ होन लागे तब नाना । रोवहिं खर सुकाल बहु स्वाना ॥

बोलहिं खग जग आरति हेतू । प्रगट भए नम जहँ तहँ केतू ॥

दस दिसि दाह होन अति लागा । भयउ परब विनु रवि उपरागा ॥

मंदोदरि उर कंपति भारी । प्रतिमा खवहिं नयन मग बारी ॥

छं०—प्रतिमा रुदहिं पविपात नभ अति बात बह डोलति मही ।

बरषहिं बलाहक रुधिर कच रज असुभ अति सक को कही

उतपात अमित बिलोकि नभ सुर बिकल बोलहिं जय जए ।

सुर सभय जानि कृपाल रघुपति चाप सर जोरत भए ॥

दो०—खैचि सरासन श्रवन लागि छाढ़े सर एकतीस ।

रघुनायक सायक चले समिहु काल कबीस ॥१०२॥

सायक एक नाभि सर सोषा । अपर लगे भुज सिर करि रोषा ॥
 लै सिर बाहु चले नाराचा । सिर भुज हीन रुंड महि नाचा ॥
 धरनि धसइ धर धाव प्रचंडा । तव सर हति प्रभु कृत दुइ खंडा ॥
 गर्जेउ मरत घोर रव भारी । कहाँ रामु रन हतौं पचारी ॥
 डोली भूमि गिरत दसकंधर । छुभित सिंधु सरि दिग्गज भूधर ॥
 धरनि परेउ द्वौ खंड बढ़ाई । चापि भालु मर्कट समुदाई ॥
 मंदोदरि आगें भुज सीसा । धरि सर चले जहाँ जगदीसा ॥
 प्रविसे सब निषंग महँ जाई । देखि सुरन्ह दुंदुभी वजाई ॥
 तासु तेज समान प्रभु आनन । हरषे देखि संभु चतुरानन ॥
 जय जय धुनि पूरी ब्रह्मंडा । जय रघुवीर प्रबल भुजदंडा ॥
 वरषहिं सुमन देव मुनि बृन्दा । जय कृपाल जय जयति मुकुन्दा ॥

छं०—जय कृपा कंद मुकुंद द्वंद हरन सरन सुखप्रद प्रभो ।

खल दल विदारन परम कारन कारुनीक सदा बिभो ॥
 सुरसुमन वरषहिं हरष संकुल बाज दुंदुभि गहगही ।
 संग्राम अंगन राम अंग अनंग बहु सोभा लही ॥ १ ॥
 सिर जटा मुकुट प्रसून बिच बिच अति मनोहर राजहीं ।
 जनु नीलगिरि पर तड़ित पटल समेत उडुगन आजहीं ॥
 भुजदंड सर कोदंड फेरत रुधिर कन तन अति बने ।
 जनु रायमुनीं तमाल पर बैठीं विपुल सुख आपने ॥ २ ॥

दो०—कृपादृष्टि करि वृष्टि प्रभु अभय किए सुर बृन्दा ।

भालु कीस सब हरष जय सुखधाम मुकुंद ॥ १०३ ॥

पति सिर देखत मंदोदरी । मुरुछित विकल धरनि खसि परी ॥
 जुवति बृंद रोवत उठि धाई । तेहि उठाइ रावन पहिं आई ॥
 पति गति देखि ते करहिं पुकारा । छूटे कच नहिं बपुष सँभारा ॥
 उर ताड़ना करहिं विधि नाना । रोवत करहिं प्रताप बखाना ॥
 तव बल नाथ डोल नित धरनी । तेज हीन पावक ससि तरनी ॥
 सेष कमठ सहि सकहिं न भारा । सो तनु भूमि परेउ भरि छारा ॥
 बरुन कुवेर सुरेस समीरा । रन सन्मुख धरि काहुँ न धीरा ॥
 भुजबल जितेहु काल जम साई । आजु परेहु अनाथ क्री नाई ॥
 जगत विदित तुम्हारि प्रभुताई । सुत परिजन बल वरनि न जाई ॥
 राम विमुख अस हाल तुम्हारा । रहा न कोउ कुँ रोवनिहारा ॥
 तव बस विधि प्रपंच सब नाथा । समय दिसिप नित नावहिं माथा ॥
 अब तव सिर भुज जंबुक खाहीं । राम विमुख यह अनुचित नाहीं ॥
 काल विवस पति कहा न माना । अग जग नाथु मनुज करि जाना ॥

छं०—जान्यो मनुज करि दनुज कानन दहन पावक हरि स्वयं ।
 जेहि नमत सिव ब्रह्मादि सुर पिय भजेहु नहिं करुनामयं ॥
 आजन्म ते परद्रोह रत पापौघमय तव तनु अयं ।
 तुम्हहु दियो निज धाम राम नमामि ब्रह्म निरामयं ॥

दो०—अधुना नाथ रघुनाथ सम कृपासिंधु नहिं आन ।

जोगें बृंद दुर्लभ गति तोहि दीन्हि भगवान ॥१०४॥

अज महेस नारद सनकादी। जे मुनिवर परमारथवादी॥
 भरि लोचन रघुपतिहि निहारी। प्रेम भगन सब भए सुखारी॥
 रुदन करत देखीं सब नारी। गयउ विभीषनु मन दुख भारी॥
 बंधु दसा विलोकि दुख कीन्हा। तव प्रभु अनुजहि आयसु दीन्हा॥
 लछिमन तेहि बहु विधि समुझायो। बहुरि विभीषन प्रभु पहिं आयो
 कृपादृष्टि प्रभु ताहि विलोका। करहु क्रिया परिहरि सब सोका॥
 कीन्हि क्रिया प्रभु आयसु मानी। विधिवत देस काल जियँ जानी॥
 दो०—मंदोदरी आदि सब देइ तिलांजलि ताहि।

भवन गई रघुपति गुन गन बरनत मन माहि ॥१०५॥

आइ विभीषन पुनि सिर नायो। कृपासिंधु तव अनुज बोलायो
 तुम्ह कपीस अंगद नल नीला। जामवंत मारुति नयसीला॥
 सब मिलि जाहु विभीषन साथ। सारेहु तिलक कहेउ रघुनाथा॥
 पिता बचन मैं नगर न आवउँ। आपु सरिस कपिं अनुज पठावउँ
 दुरत चले कपिसुनि प्रभु वचना। कीन्ही जाइ तिलक की रचना॥
 सादर सिंहासन बैठारी। तिलक सारि अस्तुति अनुसारी॥
 जोरि पानि सवहीं सिर नाए। सहित विभीषन प्रभु पहिं आए॥
 तव रघुवीर बोलि कपि लीन्हे। कहि प्रिय वचन सुखी ॥ तव कीन्हे॥
 छं०—किए सुखी कहि बानी सुधा सम बल तुम्हारे रेंगु हयो।
 पायो विभीषन राज तिहुँ पुर जंसु तुम्हारे नित नयो॥

मोहि सहित सुभ कीरति तुम्हारी परम प्रीति जो गाइहैं ।

संसार सिंधु अपार पार प्रयास बिनु नर पाइहैं ॥

दो०—प्रभु के वचन श्रवण सुनि नहिं अघाहिं कपि पुंज ।

बार बार सिर नावहिं गहहिं सकल पद कंज ॥१०६॥

पुनि प्रभु बोलि लियउ हनुमाना । लंका जाहु कहेउ भगवाना ॥

समाचार जानकिहि सुनावहु । तासु कुसल लै तुम्ह चलि आवहु ॥

तब हनुमंत नगर महुँ आए । सुनि निसिचरी निसाचर धाए ॥

बहु प्रकार तिन्ह पूजा कीन्ही । जनकसुता देखाइ पुनि दीन्ही ॥

दूरिहि ते प्रनाम कपि कीन्हा । रघुपति दूत जानकीं चीन्हा ॥

कहहु तात प्रभु कृपानिकेता । कुसल अनुज कपि सेन समेता ॥

सब विधि कुसल कोसलाधीसा । मातु समर जीत्यो दससीसा ॥

अविचल राजु बिभीषन पायो । सुनि कपि वचन हरष उर छायो ॥

छं०—अति हरष मन तन पुलकलोचन सजल कह पुनि पुनि रमा

का देउं तोहि त्रैलोक महुँ कपि किमपि नहिं बानी समा ॥

सुनु मातु मैं पायो अखिल जग राजु आजु न संसयं ।

रन जीति रिपुदल बंधु जुत पस्यामि रामसनामयं ॥

दो०—सुनु सुत सदगुन सकल तब हृदयँ बसहुँ हनुमंत ।

सानुकूल कोसलपति रहहुँ समेत अनंत ॥१०७॥

अब सोइ जतनु करहु तुम्ह ताता । देखौं नयन स्याम मृदु गाता ॥

तब हनुमान राम पहि जाइ । जनकसुता के कुसल सुनाई ॥

सुनि संदेसु भानुकुलभूषन । बोलि लिए जुवराज बिभीषन ॥
 मारुतसुत के संग सिधावहु । सादर जनकसुतहि लै आवहु ॥
 तुरतहि सकल गए जहँ सीता । सेवहिं सव निसिचरिं विनीता ॥
 बेगि बिभीषन तिन्हहि सिखायो । तिन्ह बहु विधि मज्जन करवायो ॥
 बहु प्रकार भूषन पहिराए । सिबिका रुचिर साजि पुनिल्याए ॥
 ता पर हरषि चढ़ी बैदेही । सुमिरि राम सुखधाम सनेही ॥
 बेतपानि रच्छक चहु पासा । चले सकल मन परम हुलासा ॥
 देखन भालु कीस सव आए । रच्छक कोपि निवारन धाए ॥
 कह रघुवीर कहा मम मानहु । सीतहि सखा पयादें आनहु ॥
 देखहुँ कपि जननी की नाई । विहसि कहा रघुनाथ गोसाई ॥
 सुनि प्रभु बचन भालु कपि हरषे । नभ ते सुरन्ह सुमन बहु बरषे ॥
 सीता प्रथम अनल महुँ राखी । प्रगट कीन्हि चह अंतर साखी ॥
 दो०—तेहि कारन करुनानिधि कहे कछुक दुर्बाद ।

सुनत जातुधानीं सब लागीं करै बिषाद ॥१०८॥

प्रभु के बचन सीस धरि सीता । बोली मन क्रम बचन पुनीता ॥
 लछिमन होहु धरम के नेगी । पावक प्रगट करहु तुम्ह बेगी ॥
 सुनि लछिमन सीता कै बानी । विरह विवेक धरम निति सानी ॥
 लोचन सजल जोरि कर दोऊ । प्रभु सन कछु कहि सकत न ओऊ ॥
 देखि राम रुख लछिमन धाए । पावक प्रगटि काठ बहु लाए ॥
 पावक प्रबल देखि बैदेही । हृदय हरष नहि मथ कछु तेही ॥

जौं मन वच क्रम मम उर माहीं । तजिरघुबीर आन गति नाहीं ॥
तौ कृसानु सब कै गति जाना । मो कहूँ होउ श्रीखंड समाना ॥

छं०—श्रीखंड सम पावक प्रवेस कियो सुमिरि प्रभु मैथिली ।
जय कोसलेस महेस बंदित चरन रति अति निर्मली ॥
प्रतिबिंब अरु लौकिक कलंक प्रचंड पावक महुँ जरे ।
प्रभु चरित काहुँ न लखे नभ सुर सिद्ध मुनि देखहि खरे ॥
धरि रूप पावक पानि गहि श्री सत्य श्रुति जग बिनिधारे ॥
जिमि छीर सागर इंदिरा रामहि समर्पि सभु उमा ॥
सो राम बामबिभाग राजति रुचिर रुखि सदा सुभदं ॥
नव नील नीरज निकट मानहुँ एक अति गात ।

दो०—बरषहिं सुमन हरषि सुर चिन नहीं अघात ॥१११॥
तनय बिलोकि नयन जल छाए ॥
गावहिं किंनर सुरबधु न्हा । आसिरवाद पिताँ तत्र दीन्हा ॥
जनकसुता समेत प्रभाऊ । जीत्यों अजय निसाचर राऊ ॥
देखि भालु कनि अति बाढ़ी । नयन सलिल रोमावलि ठाढ़ी ॥
तत्र रघुपति अम अनुमाना । चितइ पितहि दीन्हेउ दृढ़ ग्याना ॥
आए देव सह नहिं पायो । दसरथ भेद भगति मन लायो ॥
दीन बंधु दयोच्छ न लेहीं । तिन्ह कहूँ राम भगति निज देहीं ॥
बिस्व द्रोह जेरे प्रभुहि प्रनामा । दसरथ हरषि गए सुरधामा ॥

तुम्ह समुज जानकी सहित प्रभु कुसल कोसलाधीस ।

सोभा देखि हरषि मन अस्तुति कर सुर ईस ॥११२॥

मीन कमठ सूकर नरहरी। वामन परसुराम वपु धरी॥
 जब जब नाथ सुरन्ह दुखु पायो। नाना तनु धरि तुम्हई नसायो॥
 यह खल मलिन सदा सुरद्रोही। काम लोभ मदरत अति कोही॥
 अधम सिरोमनि तव पद पावा। यह हमरें मन विसमय आवा॥
 हम देवता परम अधिकारी। स्वारथ रत प्रभु भगति बिसारी॥
 तब प्रयाहँ संतत हम परे। अब प्रभु पाहि सरन अनुसरे॥
 बेतपानि री बिनती सुर सिद्ध सब रहे जहँ तहँ कर जोरि।
 देखन भालु कीस तन पुलकि विधि अस्तुति करत बहोरि॥११०॥
 कह रघुवीर कहा मम अधाम हरे। रघुनायक सायक चाप धरे॥
 देखहुँ कपि जननी की नाशे। गुन सागर नागर नाथ बिभो॥
 सुनि प्रभु बचन भालु कपि हरषे। गुन गावत सिद्ध सुनींद्र कबी॥
 सीता प्रथम अनल महुँ राखी। प्रगटनाथ जथा करि कोप गहा॥
 दो०—तेहि कारन करुनानिधि कहे ॥ सदा प्रभु बोधमयं ॥
 विभंजन ग्यानघनं ॥
 सुनत जातुधानीं सब लागीं करे म नमामि मुदा॥
 प्रभु के बचन सीस धरि सीता। बोली मन क्रमोषन दीन रहा॥
 लछिमन होहु धरम के नेगी। पावक प्रगट करमि बिभुं बिरजं॥
 सुनि लछिमन सीता कै बानी। बिरह विवेक धरम महा कुसलं॥
 लोचन सजल जोरि कर दोऊ। प्रभु सन कछु कहि सदा सहितं॥
 देखि राम रुख लछिमन धाए। पावक प्रगटि काठ दोष जाइ॥
 पावक प्रबल देखि वैदेही। हृदय हरष नहि मय कछु तेही॥

सुखं मंदिर सुंदर श्रीरमनं । मद मार सुधा ममता समनं ॥
 अनवद्य अखंड न गोचर गो । सत्र रूप सदा सब होइ न गो ॥
 इति वेद बंदति न दंतकथा । रवि आतप भिन्नमभिन्न जथा ॥
 कृतकृत्य बिभो सब बानर ए । निरखंति तवानन सादर ए ॥
 धिग जीवन देव सरीर हरे । तव भक्ति बिना भव भूलि परे ॥
 अब दीन दयाल दया करिऐ । मति मोरि बिभेद करी हरिऐ ॥
 जेहि ते विपरीत क्रिया करिऐ । दुख सो सुख मानि सुखी चरिऐ ॥
 खल खंडन मंडन रम्य छमा । पद पंकज सेवित संभु उमा ॥
 नृप नायक दे बरदानमिदं । चरनांबुज प्रेमु सदा सुभदं ॥
 दो०—बिनय कीन्हि चतुरानन प्रेम पुलक अति गात ।

सोभासिंधु बिलोकत लोचन नहीं अघात ॥१११॥
 तेहि अवसर दसरथ तहँ आए । तनय बिलोकि नयन जल छाए ॥
 अनुज सहित प्रभु बंदन कीन्हा । आसिरवाद पिताँ तव दीन्हा ॥
 तात सकल तव पुन्य प्रभाऊ । जीत्यों अजय निसाचर राऊ ॥
 सुनि सुत बचन प्रीति अति बाढ़ी । नयन सलिल रोमावलि ठाढ़ी ॥
 रघुपति प्रथम प्रेम अनुमाना । चितइ पितहि दीन्हेउ दृढ़ ग्याना
 ताते उमा मोच्छ नहीं पायो । दसरथ भेद भगति मन लायो ॥
 सगुनोपासक मोच्छ न लेहीं । तिन्ह कहूँ राम भगति निज देहीं ॥
 बार बार करि प्रभुहि प्रनामा । दसरथ हरषि गए सुरधामा ॥

दो०—अनुज जानकी सहित प्रभु कुसल कोसलाधीस ।

सोभा देखि हरषि मन अस्तुति कर सुर ईस ॥११२॥

छं०—जय राम सोभा धाम। दायक प्रनत विश्राम ॥
 धृत त्रोन बर सर चाप। भुजदंड प्रबल प्रताप ॥ १ ॥
 जज्ञय दूषनारि खरारि। मर्दन निसाचर धारि ॥
 यह दुष्ट मारेउ नाथ। भए देव सकल सनाथ ॥ २ ॥
 जय हरन धरनी भार। महिमा उदार अपार ॥
 जय रावनारि कृपाल। किए जातुधान बिहाल ॥ ३ ॥
 लंकेस अति बल गर्ब। किए बस्य सुर गंधर्व ॥
 मुनि सिद्ध नर खग नाग। हठि पंथ सब कें लाग ॥ ४ ॥
 परद्रोह रत अति दुष्ट। पायो सो फलु पापिष्ट ॥
 अब सुनहु दीन दयाल। राजीव नयन विसाल ॥ ५ ॥
 मोहि रहा अति अभिमान। नहिं कोउ मोहि समान ॥
 अब देखि प्रभु पद कंज। गत मान प्रद दुख पुंज ॥ ६ ॥
 कोउ ब्रह्म निर्गुन ध्याव। अव्यक्त जेहि श्रुति गाव ॥
 मोहि भाव कोसल भूप। श्रीराम सगुन सरूप ॥ ७ ॥
 बैदेहि अनुज समेत। मम हृदयँ करहु निकेत ॥
 मोहि जानिए निज दास। दे भक्ति रमानिवास ॥ ८ ॥

छं०—दे भक्ति रमानिवास त्रास हरन सरन सुखदायकं ।
 सुख धाम राम नमामि काम अनेक छबि रघुनायकं ॥
 सुर बृंद रंजन वृंद भंजन मनुजतनु अनुलित बलं ।
 ब्रह्मादि संकर सेव्य राम नमामि करुना कोमलं ॥

दो०—अब करि कृपा बिलोकि मोहि आयसु देहु कृपाल ।

काह करौं सुनि प्रिय वचन बोले दीनदयाल ॥११३॥
 सुनु सुरपति कपि भालु हमारे । परे भूमि निसिचरन्हि जे मारे ॥
 मम हित लागि तजे इन्ह प्राणा । सकल जिआउ सुरेस सुजाना ॥
 सुनु खगेस प्रभु कै यह बानी । अति अगाध जानहिं मुनि ग्यानी
 प्रभु सक त्रिभुअन मारि जिआई । केवल सकहि दीन्हि बड़ाई ॥
 सुधा वरषि कपि भालु जिआए । हरषि उठे सब प्रभु पहिं आए ॥
 सुधावृष्टि भै दुहु दल ऊपर । जिए भालु कपि नहिं रजनीचर ॥
 रामाकार भए तिन्ह के मन । मुक्त भए छूटे भव बंधन ॥
 सुर अंसिक सब कपि अरु रीछा । जिए सकल रघुपति कीं ईछा ॥
 राम सरिस को दीन हितकारी । कीन्हे मुकुत निसाचर झारी ॥
 खल मल धाम काम रत रावन । गति पाई जो मुनिबर पाव न ॥
 दो०—सुमन वरषि सब सुर चले चढ़ि चढ़ि रुचिर बिमान ।

देखि सुअवसर प्रभु पहिं आयउ संभु सुजान ॥११४(क)॥

परम प्रीति कर जोरि जुग नलिन नयन भरि बारि ।

पुलकित तन गदगद गिराँ बिनय करत त्रिपुरारि ॥११४(ख)॥

छं०—मामभिरक्षय रघुकुल नायक । धृत वर चाप रुचिर कर सायक
 मोह महा घन पटल प्रभंजन । संसय बिपिन अनल सुर रंजन ॥
 अगुन सगुन गुन मंदिर सुंदर । अम तम प्रबल प्रताप दिवाकर ॥
 काम क्रोध मद राज पचानन । बसहु निरंतर जन मन कानन ॥२॥

बिषय मनोरथ पुंज कंज बन । प्रबल तुषार उदार पार मन ॥
 भव बारिधि मंदर परमं दर । बारय तारय संसृति दुस्तर ॥३॥
 स्याम गात राजीव बिलोचन । दीनबंधु प्रनतारति मोचन ॥
 अनुज जानकी सहित निरंतर । बसहु राम नृप मम उर अंतर ॥
 मुनि रंजन महि मंडल मंडन । तुलसिदास प्रभु त्रास बिलंबन ॥५॥
 दो०—नाथ जबहिं कोसलपुरीं होइहि तिलक तुम्हार ।

कृपासिंधु मैं आउब देखन चरित उदार ॥११५॥

करि विनती जय संभु सिधाए । तब प्रभु निकट विभीषनु आए ॥
 नाइ चरन सिरु कह मृदु बानी । विनय सुनहु प्रभु सारंग पानी ॥
 सकुल सदल प्रभु रावन मारयो । पावन जस त्रिभुवन विस्तारयो ॥
 दीन मलीन हीन मति जाती । मो पर कृपा कीन्हि बहु भाँती ॥
 अब जन गृह पुनीत प्रभु कीजे । मज्जनु करिअ समर श्रम छीजे ॥
 देखि कोस मंदिर संपदा । देहु कृपाल कपिन्ह कहूँ मुदा ॥
 सब विधि नाथ मोहि अपनाइअ । पुनि मोहि सहित अवधपुर जाइअ
 सुनत बचन मृदु दीनदयाला । सजल भए द्वौ नयन विसाला ॥

दो०—तोर कोस गृह मोर सब सत्य बचन सुनु आत ।

भरत दसा सुमिरत मोहि निमिष कल्प सम जात ॥११६(क)॥

तापस वेष गात कृस जपत निरंतर मोहि ।

देखौं बेगि सो जतनु करु सखा निहोरउ तोहि ॥११६(ख)॥

बीतें अवधि जाउँ जौं जिअत न पावउँ बीर ।
 सुमिरत अनुज प्रीति प्रभु पुनि पुनि पुलक सरীর ॥११६(ग)॥
 करेहु कल्प भरि राजु तुम्ह मोहि सुमिरेहु मन माहिं ।
 पुनि मम धाम पाइहहु जहाँ संत सब जाहिं ॥११६(घ)॥
 सुनत विभीषन वचन राम के । हरषि गहे पद कृपाधाम के ॥
 वानर भालु सकल हरषाने । गहि प्रभु पद गुन विमल बखाने ॥
 बहुरि विभीषन भवन सिधायो । मनिगन बसन विमान भरायो ॥
 लै पुष्पक प्रभु आगें राखा । हँसि करि कृपासिंधु तब भाषा ॥
 चढ़ि विमान सुनु सखा विभीषन । गगन जाइ बरषहु पट भूषन ॥
 नभ पर जाइ विभीषन तबही । बरषि दिए मनि अंबर सबही ॥
 जोइ जोइ मन भावइ सोइ लेहीं । मनि मुख मेलि डारि कपि देहीं ॥
 हँसे रामु श्री अनुज समेता । परम कौतुकी कृपा निकेता ॥
 दो०—मुनि जेहि ध्यान न पावहिं नेति नेति कह बेद ।
 कृपासिंधु सोइ कपिन्ह सन करत अनेक बिनोद ॥११७(क)॥
 उमा जोग जप दान तप नाना मख ब्रत नेम ।
 राम कृपा नहिं करहिं तसि जसि निष्केवल प्रेम ॥११७(ख)॥
 भालु कपिन्ह पट भूषन पाए । पहिरि पहिरि रघुपति पहिं आए ॥
 नाना जिनस देखि सब कीसा । पुनि पुनि हँसत कोसलाधीसा ॥
 चितइ सबन्हि पर कीन्ही दाया । बोले मृदुल वचन रघुराया ॥
 तुम्हरे बल मैं रावनु मारयो । तिलकं विभीषन कहँ पुनि सारयो ॥

निज निज गृह अब तुम्ह सब जाहू । सुमिरेहु मोहि डरपहु जनि काहू
 सुनत बचन प्रेमाकुल बानर । जोरि पानि बोले सब सादर ॥
 प्रभु जोइ कहहु तुम्हहि सब सोहा । हमरें होत बचन सुनि मोहा ॥
 दीन जानि कपि किए सनाथा । तुम्ह त्रैलोक ईस रघुनाथा ॥
 सुनि प्रभु बचन लाज हम मरहीं । मसक कहूँ खगपति हित करहीं ॥
 देखि राम रुख बानर रीछा । प्रेम मगन नहिं गृह कै ईछा ॥
 दो०—प्रभु प्रेरित कपि भालु सब राम रूप उर राखि ।

हरष बिषाद सहित चले विनय विविध विधि भाषि ॥११८(क)॥
 कपिपति नील रीछपति अंगद नल हनुमान ।
 सहित बिभीषन अपर जे जूथप कपि बलवान ॥११८(ख)॥
 कहि न सकहिं कछु प्रेम बस भरि भरि लोचन बारि ।

सन्मुख चितवहिं राम तन नयन निमेष निवारि ॥११८(ग)॥
 अतिसय प्रीति देखि रघुराई । लीन्हे सकल बिमान चढ़ाई ॥
 मन महुँ बिप्र चरन सिरु नायो । उत्तर दिसिहि बिमान चलायो ॥
 चलत बिमान कोलाहल होई । जय रघुवीर कहइ सबु कोई ॥
 सिंहासन अति उच्च मनोहर । श्री समेत प्रभु बैठे ता पर ॥
 राजत राम सहित भामिनी । मेरु संग जनु घन दामिनी ॥
 रुचिर बिमानु चलेउ अति आतुर । कीन्ही सुमन वृष्टि हरषे सुर ॥
 परम सुखद बलि विविध दयायी । सागर सर निर्मल वारी ॥
 सगुन होहि सुंदर चहुँ पासा । मन प्रसन्न निर्मल नभ आसा ॥

कह रघुवीर देखु रन सीता । लछिमन इहाँ हत्यो ईद्रजीता ॥
 हनूमान अंगद के मारे । रन महि परे निसाचर भारे ॥
 कुंभकरन रावन द्रौ भाई । इहाँ हते सुर मुनि दुखदाई ॥
 दो०—इहाँ सेतु बाँध्यों अरुथापेउँ सिव सुख धाम ।

सीता सहित कृपानिधि संभुहि कीन्ह प्रनाम ॥११९(क)॥

जहँ जहँ कृपासिंधु बन कीन्ह बास विश्राम ।

सकल देखाए जानकिहि कहे सबन्हि के नाम ॥११९(ख)॥

तुरत विमान तहाँ चलि आवा । दंडक बन जहँ परम सुहावा ॥
 कुंभजादि मुनिनायक नाना । गए रामु सब कें अस्थाना ॥
 सकल रिषिन्ह सन पाइ असीसा । चित्रकूट आए जगदीसा ॥
 तहँ करि मुनिन्ह केर संतोषा । चला विमानु तहाँ ते चोखा ॥
 बहुरि राम जानकिहि देखाई । जमुना कलि मल हरनि सुहाई ॥
 पुनि देखी सुरसरी पुनीता । राम कहा प्रनाम करु सीता ॥
 तीरथपति पुनि देखु प्रयागा । निरखत जन्म कोटि अघ भागा ॥
 देखु परम पावनि पुनि बेनी । हरनि सोक हरि लोक निसेनी ॥
 पुनि देखु अवधपुरी अति पावनि । त्रिविध ताप भव रोग नसावनि
 दो०—सीता सहित अवध कहूँ कीन्ह कृपाल प्रनाम ।

सजल नयन तन पुलकित पुनि पुनि हरषित राम ॥१२०(क)॥

पुनि प्रभु आइ त्रिवेनीं हरषित मज्जनु कीन्ह ।

कपिन्ह सहित बिप्रन्ह कहूँ दान विविध विधि दीन्ह ॥१२०(ख)॥

प्रभु हनुमंतहि कहा बुझाई। धरि बटु रूप अवधपुर जाई ॥
 भरतहि कुसल हमारि सुनाएहु। समाचार लै तुम्ह चलि आएहु ॥
 तुरत पवनसुत गवनत भयऊ। तब प्रभु भरद्वाज पहिं गयऊ ॥
 नाना विधि मुनि पूजा कीन्ही। अस्तुति करि पुनि आसिष दीन्ही
 मुनि पद बंदि जुगल कर जोरी। चढ़ि बिमान प्रभु चले बहोरी ॥
 इहाँ निषाद सुना प्रभु आए। नाव नाव कहँ लोग बोलाए ॥
 सुरसरि नाधि जान तब आयो। उतरेउ तट प्रभु आयसु पायो ॥
 तब सीताँ पूजी सुरसरी। बहु प्रकार पुनि चरनन्हि परी ॥
 दीन्हि असीस हरषि मन गंगा। सुंदरि तव अहिवात अभंगा ॥
 सुनत गुहा धायउ प्रेमाकुल। आयउ निकट परम सुख संकुल
 प्रभुहि सहित बिलोकि वैदेही। परेउ अवनि तन सुधि नहिं तेही
 प्रीति परम बिलोकि रघुराई। हरषि उठाइ लियो उर लाई ॥
 छं०—लियो हृदयँ लाइ कृपा निधान सुजान रायँ रमापती।
 बैठारि परम समीप बूझी कुसल सो कर बीनती ॥
 अब कुसल पद पंकज बिलोकि बिरंचि संकर सेव्य जे।
 सुख धाम पूरनकाम राम नमामि राम नमामि ते ॥ १ ॥
 सब भाँति अधम निषाद सो हरि भरत ज्यों उर लाइयो।
 मतिमंद तुलसीदास सो प्रभु मोह बस बिसराइयो ॥
 यह रावतारि चरित्र पावन राम पद रतिप्रद सुदा।
 कामादिहर बिग्यानकर सुर सिद्ध मुनि गावहिं सुदा ॥ २ ॥

दो०—समर विजय रघुबीर के चरित जे सुनहिं सुजान ।

विजय विवेक विभूति नित तिन्हहि देहिं भगवान ॥१२१(क)॥

यह कलिकाल मलायतन मन करि देखु बिचार ।

श्रीरघुनाथ नाम तजि नाहिन आन अधार ॥१२१(ख)॥

भासपारायण, सत्ताईसवाँ विश्राम


इति श्रीमद्रामचरितमानसे सकलकलिकलुषविध्वंसने

षष्ठः सोपानः समाप्तः ।

(लंकाकाण्ड समाप्त)



प्रभुका ऐश्वर्य



अमित रूप प्रगटे तेहि काला ।

जयाजोग मिले सबहि कृपाल ॥

श्रीगणेशाय नमः

श्रीजानकीवल्लभो विजयते

श्रीरामचरितमानस

सप्तम सोपान

(उत्तरकाण्ड)

श्लोक

केकीकण्ठाभनीलं सुरवरविलसद्विप्रपादाब्जचिह्नं
शोभाढ्यं पीतवस्त्रं सरसिजनयनं सर्वदा सुप्रसन्नम् ।
पाणौ नाराचचापं कपिनिकरयुतं बन्धुना सेव्यमानं
नौमीढ्यं जानकीशं रघुवरमनिशं पुष्पकारुढरामम् ॥ १ ॥
कोसलेन्द्रपदकज्जमञ्जुलौ कोमलावजमहेशवन्दितौ ।
जानकीकरसरोजलालितौ चिन्तकस्य मनमृङ्गसङ्गिनौ ॥ २ ॥

कुन्दइन्दुदरगौरसुन्दरं अम्बिकापतिमभीष्टसिद्धिदम् ।

कारुणीककलकञ्जलोचनं नौमि शङ्करमनङ्गमोचनम् ॥ ३ ॥

दो०—रहा एक दिन अवधि कर अति आरत पुर लोग ।

जहँ तहँ सोचहिं नारि नर कृस तन राम बियोग ॥

सगुन होहिं सुंदर सकल मन प्रसन्न सब केर ।

प्रभु आगवन जनाव जनु नगर रम्य चहुँ फेर ॥

कौसल्यादि मातु सब मन अनंद अस होइ ।

आयउ प्रभु श्री अनुज जुत कहन चहत अब कोइ ॥

भरत नयन भुज दच्छिन फरकत बारहिं बार ।

जानि सगुन मन हरष अति लागे करन बिचार ॥

रहेउ एक दिन अवधि अधारा । समुझत मन दुख भयउ अपारा ॥

कारन कवन नाथ नहिं आयउ । जानि कुटिल किधौं मोहि बिसरायउ

अहह धन्य लछिमन बड़भागी । राम पदारबिंदु अनुरागी ॥

कपटी कुटिल मोहि प्रभु चीन्हा । ताते नाथ संग नहिं लीन्हा ॥

जौ करनी समुझै प्रभु मोरी । नहिं निस्तार कल्प सत कोरी ॥

जन अवगुन प्रभु मान न काऊ । दीन बंधु अति मृदुल सुभाऊ ॥

मोरे जियँ भरोस दृढ़ सोई । मिलिहहिं राम सगुन सुभ होई ॥

बीतें अवधि रहहिं जौ प्राणा । अधम कवन जग मोहि समाना ॥

दो०—राम बिरह सागर महुँ भरत मगन मन होत ।

बिप्र रूप धरि पवनसुत आइ गयउ जनु पोत ॥ १(क) ॥

बैठे देखि कुसासन जटा मुकुट कृस गात ।

राम राम रघुपति जपत स्रवत नयन जलजात ॥१ (ख)॥

देखत हनूमान अति हरषेउ । पुलक गात लोचन जल वरषेउ ॥
मन महुँ बहुत भाँति सुख मानी । बोलेउ श्रवन सुधा सम बानी ॥
जासु विरहँ सोचहु दिन राती । रटहु निरंतर गुन गन पाँती ॥
रघुकुल तिलक सुजन सुख दाता । आयउ कुसल देव मुनि त्राता ॥
रिपु रन जीति सुजस सुर गावत । सीता सहित अनुज प्रभु आवत ॥
सुनत बचन विसरे सब दूखा । तृष्णावंत जिमि पाइ पियूषा ॥
को तुम्ह तात कहाँ ते आए । मोहि परम प्रिय बचन सुनाए ॥
मारुत सुत मैं कपि हनुमाना । नामु मोर सुनु कृपानिधाना ॥
दीनबंधु रघुपति कर किंकर । सुनत भरत भेटेउ उठि सादर ॥
मिलत प्रेम नहिँ हृदयँ समाता । नयन स्रवत जल पुलकित गाता ॥
कपि तव दरस सकल दुख वीते । मिले आजु मोहि राम पिरीते ॥
बार बार बूझी कुसलाता । तो कहूँ देउँ काह सुनु भ्राता ॥
एहि संदेस सरिस जग माहीं । करि विचार देखेउँ कछु नाहीं ॥
नाहिन तांत उरिन मैं तोही । अब प्रभु चरित सुनावहु मोही ॥
तव हनुमंत नाइ पद माथा । कहे सकल रघुपति गुन गाथा ॥
कहु कपि कबहुँ कृपाल गोसाई । सुमिरहिँ मोहि दास की नाई ॥

छं०—निज दास ज्यों रघुवंसभूषन कबहुँ मम सुमिरन करयो ।

सुनि भरत बचन बिनीत अति कपि पुलकितन चरनन्हि परयो ॥

रघुबीर निज मुख जासु गुन गन कहत अग जग नाथ जो ।
 काहे न होइ विनीत परम पुनीत सदगुन सिंधु सो ॥
 दो०—राम प्रानप्रिय नाथ तुम्ह सत्य वचन मम तात ।

पुनि पुनि मिलत भरत सुनि हरष न हृदयँ समात ॥ २(क) ॥

सो०—भरत चरन सिरु नाइ तुरित गयउ कपि राम पहिं ।

कही कुसल सब जाइ हरषि चलेउ प्रभु जान चढ़ि ॥ २(ख) ॥

हरषि भरत कोसलपुर आए । समाचार सब गुराहि सुनाए ॥
 पुनि मंदिर महुँ वात जनाई । आवत नगर कुसल रघुराई ॥
 सुनत सकल जननी उठि धाई । कहि प्रभु कुसल भरत समुझाई ॥
 समाचार पुरबासिन्ह पाए । नर अरु नारि हरषि सब धाए ॥
 दधि दुर्वा रोचन फल फूला । नव तुलसी दल मंगल मूला ॥
 भरि भरि हेम थार भामिनी । गावत चलिं सिंधुरगामिनी ॥
 जो जैसेहिं तैसेहिं उठि धावहिं । बाल वृद्ध कहँ संग न लावहिं ॥
 एक एकन्ह कहँ वृक्षहिं भाई । तुम्ह देखे दयाल रघुराई ॥
 अवधपुरी प्रभु आवत जानी । भई सकल सोभा कै खानी ॥
 बहइ सुहावन त्रिविध समीरा । भइ सरजू अति निर्मल नीरा ॥
 दो०—हरषित गुरं परिजन अनुज भूसुर वृंद समेत ।

चले भरत मन प्रेम अति सन्मुख कृपानिकेत ॥ ३(क) ॥

बहुतक चढ़ीं अटारिन्ह निरखहिं गगन बिमान ।

देखि मधुर सुर हरषित करहिं सुमंगल गान ॥ ३(ख) ॥

राका ससि रघुपति पुर सिंधु देखि हरषान ।

बढ़यो कोलाहल करत जनु नारितरंग समान ॥३(ग)॥

इहाँ भानुकुल कमल दिवाकर । कपिन्ह देखावत नगर मनोहर ॥

सुनु कपीस अंगद लंकेसा । पावन पुरी रुचिर यह देसा ॥

जद्यपि सब बैकुण्ठ बखाना । वेद पुरान विदित जंगु जाना ॥

अवधपुरी सम प्रिय नहिं सोऊ । यह प्रसंग जानइ कोउ कोऊ ॥

जन्मभूमि मम पुरी सुहावनि । उत्तर दिसि बह सरजू पावनि ॥

जा मजन ते विनहिं प्रयासा । मम समीप नर पावहिं बासा ॥

अति प्रिय मोहि इहाँ के बासी । मम धामंदा पुरी सुख रासी ॥

हरषे सब कपि सुनि प्रभु बानी । धन्य अवध जो राम बखानी ॥

दो०—आवत देखि लोग सब कृपासिंधु भगवान ।

नगर निकट प्रभु प्रेरेउ उतरेउ भूमि बिमान ॥४(क)॥

उतरि कहेउ प्रभु पुष्पकहि तुम्ह कुवेर पहिं जाहु ।

प्रेरित राम चलेउ सो हरषु बिरहु अति ताहु ॥४(ख)॥

आए भरत संग सब लोग । कृस तन श्रीरघुबीर ब्रियोगा ॥

बामदेव बसिष्ठ मुनिनायक । देखे प्रभु महि धरि धनु सायक ॥

धाइ धरे गुर चरन सरोरुह । अनुज सहित अति पुलक तनोरुह ॥

मेंटि कुसल बूझी मुनिराया । हमरें कुसल तुम्हारिहिं दाया ॥

सकल द्विजन्ह मिलि नायउ माथा । धर्म धुरंधर रघुकुल नाथा ॥

गहे भरत पुनि प्रभु पद पंकज । नमत जिन्हहि सुरमुनि संकर अज ॥

परे भूमि नहिं उठत उठाए । बर करि कृपासिंधु उर लाए ॥
 स्यामल गात रोम भए ठाढ़े । नव राजीव नयन जल बाढ़े ॥

छं०—राजीव लोचन स्रवत जल तन ललित पुलकावलि बनी ।
 अति प्रेम हृदयँ लगाइ अनुजहि मिले प्रभु त्रिभुवन धनी ॥
 प्रभु मिलत अनुजहि सोह मो पहिं जाति नहिं उपमा कही ।
 जनु प्रेम अरु सिंगार तनु धरि मिले बर सुषमा लही ॥ १ ॥
 बृक्षत कृपानिधि कुसल भरतहि बचन बेगि न आवई ।
 सुनु सिवा सो सुख बचन मन ते भिन्न जान जो पावई ॥
 अब कुसल कौसलनाथ आरत जानि जन दरसन दियो ।
 बृद्धत बिरह बारीस कृपानिधान मोहि कर गहि लियो ॥ २ ॥

दो०—पुनि प्रभु हरषि सन्नुहन भेंटे हृदयँ लगाइ ।
 लछिमन भरत मिले तब परम प्रेम दोउ भाइ ॥ ५ ॥
 भरतानुज लछिमन पुनि भेंटे । दुसह बिरह संभव दुख मेटे ॥
 सीता चरन भरत सिरु नावा । अनुज समेत परम सुख पावा ॥
 प्रभु बिलोकि हरषे पुरबासी । जनित बियोग बिपति सब नासी ॥
 प्रेमातुर सब लोग निहारी । कौतुक कीन्ह कृपाल खरारी ॥
 अमित रूप प्रगटे तेहि काला । जथाजोग मिले सबहि कृपाला ॥
 कृपादृष्टि रघुबीर बिलोकी । किए सकल नर नारि बिसोकी ॥
 छन महिं सबहि मिले भगवाना । उमा मरम यह काहुँ न जाना ॥
 एहि बिधि सबहि सुखी करि रामा । आगें चले सील गुन धामा ॥

कौसल्यादि मातु सब धाई। निरखि बच्छ जनु धेनु लवाई ॥

छं०—जनु धेनु बालक बच्छ तजि गृहँ चरन बन परवस गई ।

दिन अंत पुर रख स्रवत थन हुंकार करि धावत भई ॥

अति प्रेम प्रभु सब मातु भेटां बचन मृदु बहु विधि कहे ।

गइ विषम बिपति बियोग भव तिन्ह हरष सुख अगनित लहे

दो०—भेटेउ तनय सुमित्राँ राम चरन रति जानि ।

रामहि मिलत कैकई हृदयँ बहुत सकुचानि ॥६(क)॥

लछिमन सब मातन्ह मिलि हरषे आसिष पाइ ।

कैकइ कहँ पुनि पुनि मिले मन कर छोभु न जाइ ॥६(ख)॥

सामुन्ह सबनि मिली बैदेही। चरनन्हि लागि हरषु अति तेही ॥

देहिँ असीस बूझि कुसलाता। होइ अचल तुम्हार अहिवाता ॥

सब रघुपति मुख कमल विलोकहिं। मंगल जानि नयन जल रोकहिं

कनक थार आरती उतारहिं। बार बार प्रभु गात निहारहिं ॥

नाना भाँति निछावरि करहीं। परमानंद हरष उर भरहीं ॥

कौसल्या पुनि पुनि रघुबीरहि। चितवति कृपासिंधु रनधीरहि ॥

हृदयँ विचारति बारहिं बारा। कवन भाँति लंकापति मारा ॥

अति सुकुमार जुगल मेरे बारे। निसिचर सुभट महाबल भारे ॥

दो०—लछिमन अरु सीता सहित प्रभुहि बिलोकति मातु ।

परमानंद मगन मन पुनि पुनि पुलकित गातु ॥ ७ ॥

लंकापति कपीस नल नील। जामवंत अंगद सुमसील ॥

हनुमदादि सब बानर वीरा। धरे मनोहर मनुज सरीरा ॥
 भरत सनेह सील व्रत नेमा। सादर सब वरनहिं अति प्रेमा ॥
 देखि नगरबासिन्ह कै रीती। सकल सराहहिं प्रभु पद प्रीती ॥
 पुनि रघुपति सब सखा बोलाए। मुनि पद लागहु सकल सिखाए ॥
 गुर बसिष्ट कुलपूज्य हमारे। इन्ह की कृपाँ दनुज रन मारे ॥
 ए सब सखा सुनहु मुनि मेरे। भए समर सागर कहँ बेरे ॥
 मम हित लागि जन्म इन्ह हारे। भरतहु ते मोहि अधिक पिआरे ॥
 सुनि प्रभु बचन मगन सब भए। निमिष निमिष उपजत सुख नए ॥

दो०—कौसल्या के चरनन्हि पुनि तिन्ह नायउ माथ ।

आसिष दीन्है हरषि तुम्ह प्रिय मम जिमि रघुनाथ ॥८(क)॥

सुमन वृष्टि नभ संकुल भवन चले सुखकंद ।

चढ़ी अटारिन्ह देखहिं नगर नारि नर वृंद ॥८(ख)॥

कंचन कलस विचित्र सँवारे। सयहिं धरे सजि निज निज द्वारे ॥
 बंदनवार पताका केतू। सबन्हि बनाए मंगल हेतू ॥
 बीर्यो सकल सुगंध सिँचाई। गजमनिरचि बहु चौक पुराई ॥
 नाना भाँति सुमंगल साजे। हरषि नगर निसान बहु बाजे ॥
 जहँ तहँ नारि निछावरि करहीं। देहिं असीस हरष उर भरहीं ॥
 कंचन थार आरतीं नाना। जुबतीं सजें करहिं सुभ गाना ॥
 करहिं आरती आरतिहर कैं। रघुकुल कमल विपिन दिनकर कैं ॥
 पुर सोभा संपति कल्याणा। निगम सेष सारदा बखाना ॥

तेउ यह चरित देखि ठगि रहहीं । उमा तासु गुन नर किमि कहहीं॥

दो०—नारि कुमुदिनीं अवध सर रघुपति विरह दिनेस ।

अस्त भएँ बिगसत भई निरखि राम राकेस ॥९(क)॥

होहिं सगुन सुभ बिबिधि बिधि बाजहिं गगन निसान ।

पुर नर नारि सनाथ करि भवन चले भगवान ॥९(ख)॥

प्रभु जानी कैकई लजानी । प्रथम तासु गृह गए भवानी ॥

ताहि प्रबोधि बहुत सुख दीन्हा । पुनि निज भवन गवन हरि कीन्हा

कृपासिंधु जब मंदिर गए । पुर नर नारि सुखी सब भए ॥

गुर बसिष्ट द्विज लिए बुलाई । आजु सुघरी सुदिन समुदाई ॥

सब द्विज देहु हरषि अनुसासन । रामचंद्र बैठहिं सिंघासन ॥

मुनि बसिष्ट के बचन सुहाए । सुनत सकल बिप्रन्ह अति भाए ॥

कहहिं बचन मृदु बिप्र अनेका । जग अभिराम राम अभिषेका ॥

अब मुनिवर बिलंब नहिं कीजै । महाराज कहँ तिलक करीजै ॥

दो०—तब मुनि कहेउ सुमंत्र सन सुनत चलेउ हरषाइ ।

रथ अनेक बहु बाजि गज तुरत सँवारे जाइ ॥१०(क)॥

जहँ तहँ धावन पठइ पुनि मंगल द्रव्य मगाइ ।

हरष समेत बसिष्ट पद पुनि सिरु नायउ आइ ॥१०(ख)॥

नवाह्नपारायण, आठवाँ विश्राम

राम कहा सेवकन्ह बुलाई। प्रथम सखन्ह अन्हवावहु जाई॥
 सुनत बचन जहँ तहँ जन धाए। सुग्रीवादि तुरत अन्हवाए॥
 पुनि करुनानिधि भरतु हँकारे। निज कर राम जटा निरुआरे॥
 अन्हवाए प्रभु तीनिउ भाई। भगत बछल कृपाल रघुराई॥
 भरत भाग्य प्रभु कोमलताई। सेष कोटि सत सकहिं न गाई॥
 पुनि निज जटा राम बिबराए। गुर अनुसासन मागि नहाए॥
 करि मज्जन प्रभु भूषन साजे। अंग अनंग देखि सत लाजे॥

दो०—सासुन्ह सादर जानकिहि मज्जन तुरत कराइ ।

दिव्य बसन बर भूषन अँग अँग सजे बनाइ ॥११(क)॥

राम बाम दिसि सोभति रमा रूप गुन खानि ।

देखि मातु सब हरषीं जन्म सुफल निज जानि ॥११(ख)॥

सुनु खगेस तेहि अवसर ब्रह्मा सिव मुनि वृंद ।

चढ़ि बिमान आए सब सुर देखन सुखकंद ॥११(ग)॥

प्रभु विलोकि मुनि मन अनुरागा । तुरत दिव्य सिंघासन मागा ॥

रवि सम तेज सो बरनि न जाई। बैठे राम द्विजन्ह सिरु नाई॥

जनकसुता समेत रघुराई। पेखि प्रहरषे मुनि समुदाई॥

वेद मंत्र तव द्विजन्ह उचारे। नभ सुर मुनि जय जयति पुकारे॥

प्रथम तिलक बसिष्ठ मुनि कीन्हा । पुनि सब बिप्रन्ह आयसु दीन्हा॥

सुत विलोकि हरषीं महतारी। बार बार आरती उतारी॥

बिप्रन्ह दान बिबिधि विधि दीन्हे। जाचक सकल अजाचक कीन्हे॥

सिंघासन पर त्रिभुवन साईं। देखि सुरन्ह दुंदुभीं वजाई ॥

छं०—नभ दुंदुभीं बाजहिं विपुल गंधर्व किंनर गावहीं ।

नाचहिं अपहरा वृंद परमानंद सुर मुनि पावहीं ॥

भरतादि अनुज बिभीषणांगद हनुमदादि समेत ते ।

गहैं छत्र चामर व्यजन धनु अस्त्रि चर्म सक्ति विराजते ॥ १ ॥

श्री सहित दिनकर बंस भूषन काम बहु छवि सोहई ।

नव अंबुधर वर गात अंबर पीत सुर मन मोहई ॥

मुकुटांगदादि विचित्र भूषन अंग अंगनिह प्रति सजे ।

अंभोज नयन बिसाल उर भुज धन्य नर निरखंति जे ॥ २ ॥

दो०—वह सोभा समाज सुख कहत न बनइ खगेस ।

वरनहिं सारद सेष श्रुति सो रस जान महेस ॥१२(क)॥

भिन्न भिन्न अस्तुति करि गए सुर निज निज धाम ।

बंदी बेष वेद तब आए जहँ श्रीराम ॥१२(ख)॥

प्रभु सर्वग्य कीन्ह अति आदर कृपानिधान ।

लखेउ न काहूँ मरम कछु लगे करन गुन गान ॥१२(ग)॥

छं०—जयसगुन निर्गुन रूप रूप अनूप भूप सिरोमने ।

दसकंधरादि प्रचंड निसिचर प्रबल खल भुज बल हने ॥

अवतार नर संसार भार बिमंजि दारुन दुख दहे ।

जय प्रनतपाल दयाल प्रभु संजुक्त सक्ति नमामहे ॥ १ ॥

तव बिषम माया बस सुरासुर नाग नर अग जग हरे ।
 भव पंथ भ्रमत अमित दिवस निसि काल कर्म गुननि भरे ॥
 जे नाथ करि करुना बिलोके त्रिविधि दुख ते निर्वहे ।
 भव खेद छेदन दच्छ हम कहूँ रच्छ राम नमामहे ॥ २ ॥
 जे ग्यान मान बिमत्त तव भव हरनि भक्ति न आदरी ।
 ते पाइ सुर दुर्लभ पदादपि परत हम देखत हरी ॥
 बिस्वास करि सब आस परिहरि दास तव जे होइ रहे ।
 जपि नाम तव बिनु श्रम तरहिं भव नाथ सो समरामहे ॥ ३ ॥
 जे चरन सिव अज पूज्य रज सुभ परसि मुनिपतिनी तरी ।
 नख निर्गता मुनि बंदिता त्रैलोक पावनि सुरसरी ॥
 ध्वज कुलिस अंकुस कंज जुत बन फिरत कंटक किन लहे ।
 पद कंज द्वंद मुकुंद राम रमेस नित्य भजामहे ॥ ४ ॥
 अव्यक्तमूलमनादि तरु त्वच चारि निगमागम भने ।
 षट कंध साखा पंच बीस अनेक पर्न सुमन घने ॥
 फल जुगल बिधिकटु मधुर बेलि अकेलि जेहि आश्रित रहे ।
 पल्लवत फूलत नवल नित संसार बिटप नमामहे ॥ ५ ॥
 जे ब्रह्म अजमद्वैतमनुभवगम्य मनपर ध्यावहीं ।
 ते कहहुँ जानहुँ नाथ हम तव सगुन जस नित गावहीं ॥
 करुनायतन प्रभु सदगुनाकर देव यह बर मागहीं ।
 मन बचन कर्म बिकार तजि तव चरन हम अनुरागहीं ॥ ६ ॥

दो०—सब के देखत बेदन्ह बिनती कीन्ह उदार ।

अंतर्धान भए पुनि गए ब्रह्म आगार ॥१३(क)॥

बैनतेय सुनु संभु तब आए जहँ रघुबीर ।

बिनय करत गदगद गिरा पूरित पुलक सरीर ॥१३(ख)॥

छं०—जयरामरमारमनं समनं । भव ताप भयाकुल पाहि जनं ॥

अवधेस सुरेस रमेस बिभो । सरनागत मागत पाहि प्रभो ॥

दससीस बिनासन बीस भुजा । कृत दूरि महा महि भूरि रुजा ॥

रजनीचर वृंद पतंग रहे । सर पावक तेज प्रचंड दहे ॥

महि मंडल मंडन चारुतरं । दृत सायक चाप निषंग बरं ॥

मद मोह महा ममता रजनी । तम पुंज दिवाकर तेज अनी ॥

मनजात किरात निपात किए । मृग लोग कुभोग सरे न हिए ॥

हति नाथ अनाथनि पाहि हरे । विषया बन पावर भूलि परे ॥

बहु रोग बियोगनिह लोग हए । भवदंघ्रि निरादर के फल ए ॥

भव सिंधु अगाध परे नर ते । पद पंकज प्रेम न जे करते ॥

अति दीन मलीन दुखी नितहीं । जिन्ह कें पद पंकज प्रीति नहीं ॥

अवलंब भवंत कथा जिन्ह कें । प्रिय संत अनंत सदा तिन्ह कें ॥

नहि राग न लोभ न मान मदा । तिन्ह कें सम बैभव वा बिपदा ॥

एहि ते तव सेवक होत मुदा । मुनि त्यागत जोग भरोस सदा ॥

करि प्रेम निरंतर नेम लिए । पद पंकज सेवत सुद्ध हिए ॥

सम मानि निरादर आदरही । सब संत सुखी विचरति मही ॥

मुनि मानस पंकज भृंग भजे । रघुबीर महा रनधीर अजे ॥
 तव नाम जपामि नमामि हरी । भव रोग महागद मान अरी ॥
 गुन सील कृपा परमायतन । प्रनमामि निरंतर श्रीरमनं ॥
 रघुनंद निकंदय द्वंद्वघनं । महिपाल बिलोक्य दीन जनं ॥

दो०—बार बार बार मागउँ हरषि देहु श्रीरंग ।

पद सरोज अनपायनी भगति सदा सतसंग ॥१४(क)॥

बरनि उमापति राम गुन हरषि गए कैलास ।

तब प्रभु कपिन्ह दिवाए सब बिधि सुखप्रद बास ॥१४(ख)॥

सुनु खगपति यह कथा पावनी । त्रिविध ताप भव भय दावनी ॥
 महाराज कर सुभ अभिषेका । सुनत लहहिं नर बिरति विवेका ॥
 जे सकाम नर सुनहिं जे गावहिं । सुख संपति नाना बिधि पावाह ॥
 सुर दुर्लभ सुख करि जग माहीं । अंतकाल रघुपति पुर जाहीं ॥
 सुनहिं विमुक्त बिरत अरु बिषई । लहहिं भगति गति संपति नई ॥
 खगपति राम कथा मैं बरनी । स्वमति बिलास त्रास दुख हरनी ॥
 बिरति विवेक भगति दृढ़ करनी । मोह नदी कहूँ सुंदर तरनी ॥
 नित नव मंगल कौसलपुरी । हरषित रहहिं लोग सब कुरी ॥
 नित नइ प्रीति राम पद पंकज । सब केँ जिन्हहिं नमत सिव मुनि अज
 मंगन बहु प्रकार पहिराए । द्विजन्ह दान नाना बिधि पाए ॥

दो०—ब्रह्मानंद मगन कपि सब केँ प्रभु पद प्रीति ।

जात न जाने दिवस तिन्ह गए मास षट बीति ॥१५॥

बिसरे गृह सपनेहुँ सुधि नहीं। जिमि परद्रोह संत मन माहीं ॥
तब रघुपति सब सखा बोलाए। आइ सबन्हि सादर सिरु नाए ॥
परम प्रीति समीप बैठारे। भगत सुखद मृदु बचन उचारे ॥
तुम्ह अति कीन्हि मोरि सेवकाई। मुख पर केहि विधि करौ बड़ाई ॥
ताते मोहि तुम्ह अति प्रिय लागे। मम हित लागि भवन सुख त्यागे ॥
अनुज राज संपति बैदेही। देह गेह परिवार सनेही ॥
सब मम प्रिय नहीं तुम्हहि समाना। मृषा न कहउँ मोर यह बाना ॥
सब केँ प्रिय सेवक यह नीती। मोरें अधिक दास पर प्रीती ॥

दो०—अब गृह जाहु सखा सब भजेहु मोहि दृढ़ नेम ।

सदा सर्व गत सर्वहित जानि करेहु अति प्रेम ॥ १६ ॥

सुनि प्रभु बचन मगन सब भए। को हम कहाँ बिसरि तन गए ॥
एकटक रहे जोरि कर आगे। सकहि न कछु कहि अति अनुरागे ॥
परम प्रेम तिन्ह कर प्रभु देखा। कहा विविधि विधि ग्यान बिसेवा ॥
प्रभु सन्मुख कछु कहन न पारहिं। पुनि पुनि चरन सरोज निहारहिं ॥
तब प्रभु भूषन बसन मगाए। नाना रंग अनूप सुहाए ॥
सुग्रीवहि प्रथमहि पहिराए। बसन भरत निज हाथ बनाए ॥
प्रभु प्रेरित लल्लिमन पहिराए। लंकापति रघुपति मन भाए ॥
अंगद बैठ रहा नहीं डोला। प्रीति देखि प्रभु ताहि न बोला ॥

दो०—जामवंत नीलादि सब पहिराए रघुनाथ ।

हिय धरि राम रूप सब चले नाइ पद माथ ॥ १७ (क) ॥

तब अंगद उठि नाइ सिरु सजल नयन कर जोरि ।

अति विनीत बोलेउ बचन मनहुँ प्रेम रस बोरि ॥१७(ख)॥

सुनु सर्वग्य कृपा सुख सिंधो । दीन दयाकर आरत बंधो ॥
मरती बेर नाथ मोहि वाली । गयउ तुम्हारेहि कोंछें घाली ॥
असरन सरन बिरदु संभारी । मोहि जनि तजहु भगत हितकारी
मोरें तुम्ह प्रभु गुर पितु माता । जाउँ कहाँ तजि पद जलजाता ॥
तुम्हहि बिचारि कहहु नरनाहा । प्रभु तजि भवन काज मम काहा ॥
बालक ग्यान बुद्धि बल हीना । राखहु सरन नाथ जन दीना ॥
नीचि टहल गृह कै सब करिहउँ । पद पंकज बिलोकि भव तरिहउँ
अस कहि चरन परेउ प्रभु पाही । अब जनि नाथ कहहु गृह जाही ॥
दो०—अंगद बचन विनीत सुनि रघुपति करुना सीव ।

प्रभु उठाइ उर लायउ सजल नयन राजीव ॥१८(क)॥

निज उर माल बसन मनि बालि तनय पहिराइ ।

बिदा कीन्हि भगवान तब बहु प्रकार समुझाइ ॥१८(ख)॥

भरत अनुज सौमित्रि समेता । पठवन चले भगत कृत चेता ॥
अंगद हृदयँ प्रेम नहिं थोरा । फिरि फिरि चितव राम की ओरा ॥
बार बार कर दंड प्रनामा । मन अस रहन कहहिं मोहिरामा ॥
राम बिलोकनि बोलनि चलनी । सुमिरि सुमिरि सोचत हँसि मिलनी
प्रभु रुख देखि विनय बहु भाषी । चलेउ हृदयँ पद पंकज राखी ॥
अति आदर सब काय पहुचाए । भाइन्ह सहित भरत पुनि आए ॥

तव सुग्रीव चरन गहि नाना । भौंति विनय कीन्हे हनुमाना ॥
 दिन दस करि रघुपति पद सेवा । पुनि तव चरन देखिहउँ देवा ॥
 पुन्य पुंज तुम्ह पवनकुमारा । सेवहु जाइ कृपा आगारा ॥
 अस कहि कपि सब चले तुरंता । अंगद कहइ सुनहु हनुमंता ॥
 दो०—कहेहु दंडवत प्रभु सैं तुम्हहि कहउँ कर जोरि ।

बार बार रघुनायकहि सुरति कराएहु मोरि ॥१९(क)॥

अस कहि चलेउ बालिसुत फिरि आयउ हनुमंत ।

तांसु प्रीति प्रभु सन कही मगन भए भगवंत ॥१९(ख)॥

कुलिसहु चाहि कठोर अति कोमल कुसुमहु चाहि ।

चित्त खगेस राम कर समुझि परइ कहु काहि ॥१९(ग)॥

पुनि कृपाल लियो बोलि निषादा । दीन्हे भूषन बसन प्रसादा ॥

जाहु भवन मम सुमिरन करेहू । मन क्रम बचन धर्म अनुसरेहू ॥

तुम्ह मम सखा भरत सम भ्राता । सदा रहेहु पुर आवत जाता ॥

बचन सुनत उपजा सुख भारी । परेउ चरन भरि लोचन बारी ॥

चरन नलिन उर धरि गृह आवा । प्रभु सुभाउ परिजनन्हि सुनावा ॥

रघुपति चरित देखि पुरवासी । पुनि पुनि कहहिं धन्य सुखरासी ॥

राम राज बैठैं त्रैलोका । हरषित भए गए सब सोका ॥

बयरु न कर काहू सन कोई । राम प्रताप विषमता खोई ॥

दो०—बरनाश्रम निज निज धरम निरत बेद पथ लोग ।

चलहि सदा पावहिं सुखहि नहि भय सोक न रोग ॥२०॥

दैहिक दैविक भौतिक तापा । राम राज नहीं काहुहि व्यापा ॥
 सब नर करहिं परस्पर प्रीती । चलहिं स्वधर्म निरत श्रुति नीती ॥
 चारिउ चरन धर्म जग माहीं । पूरि रहा सपनेहुँ अघ नाहीं ॥
 राम भगति रत नर अरु नारी । सकल परम गति के अधिकारी ॥
 अल्पमृत्यु नहीं कवनिउ पीरा । सब सुंदर सब बिरुज सरीरा ॥
 नहीं दरिद्र कोउ दुखीन दीना । नहीं कोउ अबुध न लच्छनहीना ॥
 सब निर्दभ धर्मरत पुनी । नर अरु नारि चतुर सब गुनी ॥
 सब गुनग्य पंडित सब ग्यानी । सब कृतग्य नहीं कपट सयानी ॥

दो०—राम राज नभगेस सुनु सचराचर जग माहिं ।

काल कर्म सुभाव गुन कृत दुख काहुहि नाहिं ॥ २१ ॥

भूमि सप्त सागर मेखला । एक भूप रघुपति कोसला ॥
 भुअन अनेक रोम प्रति जासू । यह प्रभुता कछु बहुत न तासू ॥
 सो महिमा समुझत प्रभु केरी । यह बरनत हीनता घनेरी ॥
 सोउ महिमा खगेस जिन्ह जानी । फिरि एहिं चरित तिन्हहुँ रति मानी ॥
 सोउ जाने कर फल यह लीला । कहहिं महा मुनिबर दमसीला ॥
 राम राज कर सुख संपदा । बरनि न सकइ फनीस सारदा ॥
 सब उदार सब पर उपकारी । बिप्र चरन सेवक नर नारी ॥
 एकनारि व्रत रत सब ज्ञारी । ते मन बच क्रम पति हितकारी ॥

दो०—दंड जतिन्ह कर भेद जहँ नर्तक नृत्य समाज ।

जीतहु मनहि सुनिअ अस रामचंद्र के राज ॥ २२ ॥

फूलहिं फरहिं सदा तरु कानन । रहहिं एक सँग गज पंचानन ॥
 खग मृग सहज बयरु विसराई । सबन्हि परस्पर प्रीति बढ़ाई ॥
 कूजहिं खग मृग नाना वृंदा । अभय चरहिं बन करहिं अनंदा
 सीतल सुरभि पवन बह मंदा । गुंजत अलि लैचलि मकरंदा ॥
 लता विटप मार्गे मधु चवहीं । मनभावतो धेनु पय खवहीं ॥
 ससि संपन्न सदा रह धरनी । त्रेताँ भइ कृतजुग कै करनी ॥
 प्रगटीं गिरिन्ह विविधि मनि खानी । जगदातमा भूप जग जानी ॥
 सरिता सकल बहहिं बर वारी । सीतल अमल स्वाद सुखकारी ॥
 सागर निज मरजादाँ रहहीं । डारहिं रत्न तटन्हि नर लहहीं ॥
 सरसिज संकुल सकल तड़ागा । अति प्रसन्न दस दिसा विभागा ॥
 दो०—बिधु महि पूर मयूखन्हि रबि तप जेतनेहि काज ।

मार्गे बारिद देहिं जल रामचंद्र केँ राज ॥२३॥

कोटिन्ह बाजिमेध प्रभु कीन्हे । दान अनेक द्विजन्ह कहँ दीन्हे ॥
 श्रुति पथ पालक धर्म धुरंधर । गुनातीत अरु भोग पुरंदर ॥
 पति अनुकूल सदा रह सीता । सोभा खानि सुसील विनीता ॥
 जानति कृपासिंधु प्रभुताई । सेवति चरन कमल मन लाई ॥
 जद्यपि गृहँ सेवक सेवकिनी । विपुल सदा सेवा विधि गुनी ॥
 निज कर गृह परिचरजा करई । रामचंद्र आयसु अनुसरई ॥
 जेहि विधि कृपासिंधु सुख मानइ । सोइ कर श्री सेवा विधि जानइ ॥
 कौसल्यादि सासु गृह महीं । सेवइ सबन्हि मान मद नाही ॥

उमा रमा ब्रह्मादि बंदिता । जगदंबा संततमनिंदिता ॥

दो०—जासु कृपा कटाच्छु सुर चाहत चितव न सोइ ।

राम पदारबिंद रति करति सुभावहि खोइ ॥२४॥

सेवहि सानकूल सब भाई । राम चरन रति अति अधिकाई ॥

प्रभु मुख कमल बिलोकत रहहीं । कबहुँ कृपाल हमहि कछु कहहीं ॥

राम करहि भ्रातन्ह पर प्रीती । नाना भाँति सिखावहि नीती ॥

हरषित रहहि नगर के लोगा । करहि सकल सुर दुर्लभ भोगा ॥

अहनिसि विधिहि मनावत रहहीं । श्रीरघुवीर चरन रति चहहीं ॥

दुइ सुत सुंदर सीताँ जाए । लव कुस बेद पुरानन गाए ॥

दोउ बिजई विनई गुन मंदिर । हरि प्रतिबिंब मनहुँ अति सुंदर ॥

दुइ दुइ सुत सब भ्रातन्ह केरे । भए रूप गुन सील घनेरे ॥

दो०—ग्यान गिरा गोतीत अज माया मन गुन पार ।

सोइ सच्चिदानंद धन कर नर चरित उदार ॥२५॥

प्रातकाल सरऊ करि मज्जन । बैठहि सभाँ संग द्विज सज्जन ॥

बेद पुरान वसिष्ठ बखानहि । सुनहि राम जत्रपि सब जानहि ॥

अनुजन्ह संजुत भोजन करहीं । देखि सकल जननीं सुख भरहीं ॥

भरत सत्रुहन दोनउ भाई । सहित पवनसुत उपवन जाई ॥

बूझहि बैठि राम गुन गाहा । कह हनुमान सुमति अवगाहा ॥

सुनत विमल गुन अति सुख पावहि । बहुरि बहुरि करि विनय कहावहि ॥

सब केँ यह यह होहि पुस्तना । राम चरित पावम विधि नाना ॥

नर अरु नारि राम गुन गानहिं । करहिं दिवस निसि जात न जानहिं
दो०—अवधपुरी बासिन्ह कर सुख संपदा समाज ।

सहस सेष नहिं कहि सकहिं जहँ नृप राम बिराज ॥२६॥

नारदादि सनकादि मुनीसा । दरसन लागि कोसलाधीसा ॥
दिन प्रति सकल अजोध्या आवहिं । देखि नगरु बिरागु बिसरावहिं
जातरूप मनि रचित अटारीं । नाना रंग रुचिर गच ढारीं ॥
पुर चहुँ पास कोट अति सुंदर । रचे कँगूरा रंग रंग बर ॥
नव ग्रह निकर अनीक बनाई । जनु घेरी अमरावति आई ॥
महि बहु रंग रचित गच काँचा । जो विलोकि मुनिवर मन नाचा
धवल धाम ऊपर नभ चुंबत । कलस मनहुँ रवि ससि दुति निंदत ॥
बहु मनि रचित झरोखा भ्राजहिं । गृह गृह प्रति मनि दीप बिराजहिं

छं०—मनि दीप राजहिं भवन भ्राजहिं देहरों बिद्रुम रची ।

मनि खंभ भीति बिरंचि बिरची कनक मनि मरकत खची ॥

सुंदर मनोहर मंदिरायत अजिर रुचिर फटिक रचे ।

प्रति द्वार द्वार कपाट पुरट बनाइ बहु बज्रनिह खचे ॥

दो०—चारु चित्रसाला गृह गृह प्रति लिखे बनाइ ।

राम चरित जे निरख मुनि ते मन लेहि चोराइ ॥२७॥

सुमन बाटिका सबहिं लगाई । विविध भाँति करि जतन बनाई ॥

लता ललित बहु जाति सुहाई । फूलहिं सदा बसंत कि नाई ॥

गुजत मधुकर मुखर मनोहर । मारुत त्रिविधि सदा बह सुंदर ॥

नाना खग बालकन्हि जिआए । बोलत मधुर उड़ात सुहाए ॥
 मोर हंस सारस पारावत । भवननि पर सोभा अति पावत ॥
 जहँ तहँ देखहि निज परिछाहीं । बहु विधि कूजहि नृत्य कराहीं ॥
 सुक सारिका पढ़ावहि बालक । कहहु राम रघुपति जनपालक ॥
 राज दुआर सकल विधि चारु । वीथी चौहट रुचिर बजारु ॥

छं०—बाजार रुचिर न बनइ बरनत वस्तु बिनु गथ पाइए ।
 जहँ भूप रमानिवास तहँ की संपदा किमि गाइए ॥
 बैठे बजाज सराफ बनिक अनेक मनहुँ कुबेर ते ।
 सब सुखी सब सच्चरित सुंदर नारि नर सिसु जरठ जे ॥

दो०—उत्तर दिसि सरजू बह निर्मल जल गंभीर ।
 बाँधे घाट मनोहर स्वल्प पंक नहिं तीर ॥२८॥

दूरि फराक रुचिर सो घाटा । जहँ जल पिअहिं बाजि गज ठाटा
 पनिघट परम मनोहर नाना । तहाँ न पुरुष करहिं अस्नाना ॥
 राजघाट सब विधि सुंदर बर । मजहिं तहाँ बरन चारिउ नर ॥
 तीर तीर देवन्ह के मंदिर । चहुँ दिसि तिन्ह के उपवन सुंदर ॥
 कहुँ कहुँ सरिता तीर उदासी । बसहिं ग्यान रत मुनि संन्यासी ॥
 तीर तीर तुलसिका सुहाई । बृंद बृंद बहु मुनिन्ह लगाई ॥
 पुर सोभा कहुँ बरमि मज्जाई । बाहेर नगर परम रुचिराई ॥
 देखत पुरी अखिल अघ भागा । वन उपवन बापिका तड़ागा ॥

छं०—बापीं तड़ाग अनूप कूप मनोहरायत सोहहीं ।
 सोपान सुंदर नीर निर्मल देखि सुर मुनि सोहहीं ॥
 बहु रंग कंज अनेक खग कूजहिं मधुप गुंजारहीं ।
 आराम रम्य पिकादि खग रव जनु पथिक हंकारहीं ॥

दो०—रमानाथ जहँ राजा सो पुर बरनि कि जाइ ।

अनिमादिक सुख संपदा रहीं अवध सब छाइ ॥२९॥

जहँ तहँ नर रघुपति गुन गावहिं । बैठि परसपर इहइ सिखावहिं
 भजहु प्रनत प्रतिपालक रामहि । सोभा सील रूप गुन धामहि ॥
 जलज विलोचन स्यामल गातहि । पलक नयन इव सेवक त्रातहि ॥
 धृत सर रुचिर चाप दूनीरहि । संत कंज बन रवि रन धीरहि ॥
 काल कराल ब्याल खगराजहि । नमत राम अकाम ममता जहि
 लोभ मोह मृगजूथ किरातहि । मनसिज करि हरि जन सुखदातहि
 संसय सोक निबिड़ तम भानुहि । दनुज गहन घन दहन कृसानुहि ॥
 जनकसुता समेत रघुबीरहि । कस न भजहु भंजन भव भीरहि ॥
 बहु बासना मसक हिम रासिहि । सदा एकरस अज अविनासिहि ॥
 मुनि रंजन भंजन महि भारहि । तुलसिदास के प्रभुहि उदारहि ॥

दो०—एहि बिधि नगर नारि नर करहिं राम गुन गान ।

सानुकूल सब पर रहहिं संतत कृपानिधान ॥३०॥

जब ते राम प्रताप खगेसा । उदित भयउ अति प्रबल दिनेसा ॥

पूर प्रकास रहेउ तिहु लोका । बहुतेन्ह सुख बहुतेन मन सोका ॥

जिन्हहि सोक ते कहउँ बखानी । प्रथम अबिद्या निसा नसानी ॥
 अघ उलूक जहँ तहाँ लुकाने । काम क्रोध कैरव सकुचाने ॥
 विविध कर्म गुन कालसुभाऊ । एचकोर सुख लहहि न काऊ ॥
 मत्सर मान मोह मद चोरा । इन्हकर हुनर न कवनिहुँ ओरा ॥
 धरम तड़ाग ग्यान बिग्याना । ए पंकज बिकसे बिधि नाना ॥
 सुख संतोष बिराग बिबेका । बिगत सोक ए कोक अनेका ॥
 दो०—यह प्रताप रवि जाकें उर जब करइ प्रकास ।

पछिले बाढ़हिं प्रथम जे कहे ते पावहिं नास ॥३१॥

भ्रातन्ह सहित रामु एक बारा । संग परम प्रिय पवनकुमारा ॥
 सुंदर उपवन देखन गए । सब तरु कुसुमित पल्लव नए ॥
 जानि समय सनकादिक आए । तेज पुंज गुन सील सुहाए ॥
 ब्रह्मानंद सदा लयलीना । देखत बालक बहुकालीना ॥
 रूप धरें जनु चारिउ बेदा । समदरसी मुनि बिगत बिभेदा ॥
 आसा बसन ब्यसन यह तिन्हहीं । रघुपति चरित होइ तहँ सुनहीं ॥
 तहाँ रहे सनकादि भवानी । जहँ घटसंभव मुनिबर ग्यानी ॥
 राम कथा मुनिबर बहु बरनी । ग्यान जोनि पावक जिमि अरनी ॥

दो०—देखि राम मुनि आवत हरषि दंडवत कीन्ह ।

स्वागत पूछि पीत पट प्रभु बैठन कहँ दीन्ह ॥३२॥

कीन्ह दंडवत तीनिउँ भाई । सहित पवनसुत सुख अधिकाई ॥
 मुनि रघुपति छवि अतुल बिलोकी । भए मगन मन सकै न रोकी ॥

स्यामल गात सरोरुह लोचन। सुंदरता मंदिर भव मोचन ॥
 एकटक रहे निमेष न लावहिं। प्रभु कर जोरें सीस नवावहिं ॥
 तिन्ह कै दसा देखि रघुबीरा। खवत नयन जल पुलक सरीरा ॥
 करगहि प्रभु मुनिवर बैठारे। परम मनोहर बचन उचारे ॥
 आजु धन्य मैं सुनहु मुनीसा। तुम्हरेँ दरस जाहिं अघ खीसा ॥
 बड़े भाग पाइव सतसंगा। बिनहिं प्रयास होहिं भव भंगा ॥

दो०—संत संग अपवर्ग कर कामी भव कर पंथ ।

कहहिं संत कबि कोबिद श्रुति पुरान सदग्रंथ ॥३३॥
 सुनि प्रभु बचन हरषि मुनि चारी। पुलकित तन अस्तुति अनुसारी ॥
 जय भगवंत अनंत अनामय। अनघ अनेक एक करुनामय ॥
 जय निर्गुन जय जय गुन सागर। सुख मंदिर सुंदर अति नागर ॥
 जय इंदिरा रमन जय भूधर। अनुपम अज अनादि सोभाकर ॥
 ग्यान निधान अमान मानप्रद। पावन सुजस पुरान बेद बद ॥
 तग्य कृतग्य अग्यता भंजन। नाम अनेक अनाम निरंजन ॥
 सर्व सर्वगत सर्व उरालय। बससि सदा हम कहूँ परिपालय ॥
 द्वंद बिपति भव फंद बिभंजय। हृदि बसि राम काम मद गंजय ॥

दो०—परमानंद कृपायतन मन परिपूरन काम ।

प्रेम भगति अनपायनी देहु हमहि श्रीराम ॥३४॥
 देहु भगति रघुपति अति पावनि। त्रिविधि ताप भव दाप नसावनि ॥
 प्रमत्त काम सुप्रधेनु कलपतरु। होइ प्रसन्न दीजे प्रभु यह बर ॥

भव बारिधि कुंभज रघुनायक । सेवत सुलभ सकल सुख दायक ॥
 मन संभव दारुन दुख दारय । दीनबंधु समता विस्तारय ॥
 आस त्रास इरिषादि निवारक । विनय विवेक विरति विस्तारक ॥
 भूप मौलि मनि मंडन धरनी । देहि भगति संसृति सरि तरनी ॥
 मुनि मन मानस हंस निरंतर । चरन कमल बंदित अज संकर ॥
 रघुकुलकेतु सेतु श्रुति रच्छक । काल करम सुभाउ गुन भच्छक ॥
 तारन तरन हरन सब दूषन । तुलसिदास प्रभु त्रिभुवन भूषन ॥
 दो०—बार बार अस्तुति करि प्रेम सहित सिरु नाइ ।

ब्रह्म भवन सनकादि गे अति अभीष्ट बर पाइ ॥३५॥

सनकादिक विधि लोक सिधाए । भ्रातन्ह राम चरन सिरु नाए ॥
 पूछत प्रभुहि सकल सकुचार्हीं । चितवहिं सब मारुतसुत पार्हीं ॥
 सुनी चहहिं प्रभु मुख कै वानी । जो सुनि होइ सकल भ्रम हानी ॥
 अंतरजामी प्रभु सभ जाना । बूझत कहहु काह हनुमाना ॥
 जोरि पानि कह तव हनुमंता । सुनहु दीनदयाल भगवंता ॥
 नाथ भरत कछु पूँछन चहहीं । प्रसन्न करत मन सकुचत अहहीं ॥
 तुम्ह जानहु कपि मोर सुभाऊ । भरतहि मोहि कछु अंतर काऊ ॥
 सुनि प्रभु वचन भरत गहे चरना । सुनहु नाथ प्रनतारति हरना ॥
 दो०—नाथ न मोहि संदेह कछु सपनेहुँ सोक न मोह ।

केवल कृपा तुम्हारिहि कृपानंद संदोह ॥३६॥

करउ कृपानिधि एक ढिठाई । मै सेवक तुम्ह जन सुखदाई ॥

संतन्ह कै महिमा रघुराई । बहु विधि वेद पुरानन्ह गाई ॥
 श्रीमुख तुम्ह पुनि कीन्ह बड़ाई । तिन्ह पर प्रभुहि प्रीति अधिकाई
 सुना चहउँ प्रभु तिन्ह कर लच्छन । कृपासिंधु गुन ग्यान विचच्छन
 संत असंत भेद बिलगाई । प्रनतपाल मोहि कहहु बुझाई ॥
 संतन्ह के लच्छन सुनु भ्राता । अगनित श्रुति पुरान विख्याता ॥
 संत असंतन्हि कै असि करनी । जिमि कुठार चंदन आचरनी ॥
 काटइ परसु मलय सुनु भाई । निज गुन देइ सुगंध बसाई ॥
 दो०—ताते सुर सीसन्ह चढ़त जग बल्लभ श्रीखंड ।

अनल दाहि पीटत घनहिं परसु बदन यह दंड ॥ ३७ ॥
 विषय अलंपट सील गुनाकर । पर दुख दुख सुख सुख देखे पर ॥
 सम अभूतरिपु बिमद विरागी । लोभामरष हरष भय त्यागी ॥
 कोमलचित दीनन्ह पर दाया । मन बच क्रम मम भगति अमाया ॥
 सबहि मानप्रद आपु अमानी । भरत प्रान सम मम ते प्रानी ॥
 बिगत काम मम नाम परायन । सांति बिरति विनती मुदितायन ॥
 सीतलता सरलता मयत्री । द्विज पद प्रीति धर्म जनयत्री ॥
 ए सब लच्छन बसहिं जासु उर । जानेहु तात संत संतत फुर ॥
 सम दम नियम नीति नहिं डोलहिं । परुष वचन कबहुँ नहिं बोलहिं ॥
 दो०—निंदा अस्तुति उभय सम ममता मम पद कंज ।

ते सज्जन मम प्रानप्रिय गुन मंदिर सुख पुंज ॥ ३८ ॥
 सुनहु असतन्ह के सुभाऊ । भूलहु संगति करिअ न काऊ ॥

तिन्ह कर संग सदा दुखदायी । जिमि कपिलहि घालइ हरहाई ॥
 खलन्ह हृदयँ अति ताप बिसेषी । जरहिं सदा पर संपति देखी ॥
 जहँ कहँ निंदा सुनहिं पराई । हरषहिं मनहुँ परी निधि पाई ॥
 काम क्रोध मद लोभ परायन । निर्दय कपटी कुटिल मलायन ॥
 बयरु अकारन सब काहू सों । जो कर हित अनहित ताहू सों ॥
 झूठइ लेना झूठइ देना । झूठइ भोजन झूठ चबेना ॥
 बोलहिं मधुर वचन जिमि मोरा । खाइ महा अहि हृदय कठोरा ॥
 दो०—पर द्रोही पर दार रत पर धन पर अपबाद ।

ते नर पाँवर पापमय देह धरें मनुजाद ॥३९॥
 लोभइ ओढ़न लोभइ डासन । सिखोदर पर जमपुर त्रास न ॥
 काहू की जाँ सुनहिं बढ़ाई । स्वास लेहिं जनु जूड़ी आई ॥
 जब काहू कै देखहिं विपती । सुखी भए मानहुँ जग नृपती ॥
 स्वारथ रत परिवार बिरोधी । लंपट कामलोभ अति क्रोधी ॥
 मातु पिता गुर बिप्र न मानहिं । आपु गए अरु घालहिं आनहिं ॥
 करहिं मोह बस द्रोह परावा । संत संग हरि कथा न भावा ॥
 अवगुन सिंधु मंदमति कामी । बेद बिदूषक परधन स्वामी ॥
 बिप्र द्रोह पर द्रोह बिसेषा । दंभ कपट जियँ धरें सुबेषा ॥
 दो०—ऐसे अधम मनुज खल कृतजुग त्रेताँ नाहिं ।

द्वापर कछुक बृंद बहु होइहहिं कलिजुग माहिं ॥४०॥
 पर हित सरिस धर्म नहिं माई । पर पीड़ा सम नहिं अधमाई ॥

निर्नय सकल पुरान वेद कर। कहेउँ तात जानहिं कोबिद नर ॥
 नर सरीर धरि जे पर पीरा। करहिं ते सहहिं महा भव भीरा ॥
 करहिं मोह बस नर अघ नाना। स्वारथ रत परलोक नसाना ॥
 कालरूप तिन्ह कहँ मैं भ्राता। सुभ अरु असुभ कर्म फल दाता ॥
 अस विचारि जे परम सयाने। भजहिं मोहि संसृत दुख जाने ॥
 त्यागहिं कर्म सुभासुभ दायक। भजहिं मोहि सुरनर मुनि नायक ॥
 संत असंतन्ह के गुन भाषे। तेन परहिं भव जिन्ह लखि राखे ॥
 दो०—सुनहु तात माया कृत गुन अरु दोष अनेक ।

गुन यह उभय न देखिअहिं देखिअ सो अबिवेक ॥४१॥
 श्रीमुख बचन सुनत सब भाई। हरषे प्रेम न हृदयँ समाई ॥
 करहिं विनय अति बारहिं बारा। हनूमान हियँ हरष अपारा ॥
 पुनि रघुपति निज मंदिर गए। एहि विधि चरित करत नित नए ॥
 बार बार नारद मुनि आवहिं। चरित पुनीत राम के गावहिं ॥
 नित नव चरित देखि मुनि जाहीं। ब्रह्मलोक सब कथा कहाहीं ॥
 सुनि विरंचि अतिसय मुख मानहिं। पुनि पुनि तात करहु गुन गानहिं
 सनकादिक नारदहि सराहहिं। जद्यपि ब्रह्म निरत मुनि आहहिं ॥
 सुनि गुन गान समाधि बिसारी। सादर सुनहिं परम अधिकारी ॥
 दो०—जीवनमुक्त ब्रह्मपर चरितं सुनहिं तजि ध्यान ।

जे हरि कथाँ न करहिं रति तिन्ह के हिय पाषाण ॥४२॥
 एक बार रघुनाथ बोलाए। गुर द्विज पुरबासी सब आए ॥

बैठे गुर मुनि अरु द्विज सज्जन । बोले बचन भगत भव भंजन ॥
 सुनहु सकल पुरजन मम बानी । कहउँ न कछु ममता उर आनी ॥
 नहिं अनीति नहिं कछु प्रभुताई । सुनहु करहु जो तुम्हहि सोहाई ॥
 सोइ सेवक प्रियतम मम सोई । मम अनुसासन मानै जोई ॥
 जौ अनीति कछु भाषौ भाई । तौ मोहि बरजहु भय बिसराई ॥
 बड़ें भाग मानुष तनु पावा । सुर दुर्लभ सब ग्रंथन्हि गावा ॥
 साधन धाम मोच्छ कर द्वारा । पाइ न जेहिं परलोक सँवारा ॥
 दो०—सो परत्र दुख पावइ सिर धुनि धुनि पछिताइ ।

कालहि कर्महि ईस्वरहि मिथ्या दोस लगाइ ॥४३॥
 एहि तन कर फल विषय न भाई । स्वर्गउ स्वल्प अंत दुखदाई ॥
 नर तनु पाइ विषयँ मन देहीं । पलटि सुधा ते सठ विष लेहीं ॥
 ताहि कबहुँ भल कहइ न कोई । गुंजा ग्रहइ परस मनि खोई ॥
 आकर चारि लच्छ चौरासी । जोनि भ्रमत यह जिव अविनासी ॥
 फिरत सदा माया कर प्रेरा । काल कर्म सुभाव गुन घेरा ॥
 कबहुँक करि करुना नर देही । देत ईस बिनु हेतु सनेही ॥
 नर तनु भव बारिधि कहूँ वेरो । सन्मुख मरुत अनुग्रह मेरो ॥
 करनधार सदगुर दृढ़ नावा । दुर्लभ साज सुलभ करि पावा ॥
 दो०—जो न तरै भव सागर नर समाज अस पाइ ।

सो कृत निंदक मंदमति आत्माहन गति जाइ ॥४४॥
 जो परलोक इहाँ सुख चहहू । सुनि मम बचन हृदयँ दृढ़ गहहू ॥

सुलभ सुखद मारग यह भाई । भगति मोरि पुरान श्रुति गाई ॥
 ग्यान अगम प्रत्यूह अनेका । साधन कठिन न मन कहूँ टेका ॥
 करत कष्ट बहु पावइ कोऊ । भक्ति हीन मोहि प्रिय नहिँ सोऊ ॥
 भक्ति सुतंत्र सकल सुख खानी । बिनु सतसंग न पावहिँ प्रानी ॥
 पुन्य पुंज बिनु मिलहिँ न संता । सतसंगति संसृति कर अंता ॥
 पुन्य एक जग महुँ नहिँ दूजा । मन क्रम बचन विप्र पद पूजा ॥
 सानुकूल तेहि पर मुनि देवा । जो तजि कपटु करइ द्विज सेवा ॥
 दो०—औरउ एक गुप्त मत सबहि कहउँ कर जोरि ।

संकर भजन बिना नर भगति न पावइ मोरि ॥४५॥
 कहहु भगति पथ कवन प्रयासा । जोग न मख जप तप उपवासा ॥
 सरल सुभाव न मन कुटिलाई । जथा लाभ संतोष सदाई ॥
 मोर दास कहाइ नर आसा । करइ तौ कहहु कहा बिस्वासा ॥
 बहुत कहउँ का कथा बढ़ाई । एहि आचरन बस्य मैं भाई ॥
 वैर न विग्रह आस न त्रासा । सुखमय ताहि सदा सब आसा ॥
 अनारंभ अनिकेत अमानी । अनघ अरोष दच्छ बिग्यानी ॥
 प्रीति सदा सज्जन संसर्गा । तृन सम बिषय स्वर्ग अपबर्गा ॥
 भगति पच्छ हठ नहिँ सठताई । दुष्ट तर्क सब दूरि बहाई ॥
 दो०—मम गुन ग्राम नाम रत गत ममता मद मोह ।

ता कर सुख सोइ जानइ परानंद संदोह ॥४६॥

जननि जनक गुर बंधु हमारे। कृपा निधान प्रान ते प्यारे॥
 तनु धनु धाम राम हितकारी। सब विधि तुम्ह प्रनतारति हारी॥
 असि सिख तुम्ह बिनु देख न कोऊ। मातु पिता स्वारथ रत ओऊ॥
 हेतु रहित जग जुग उपकारी। तुम्ह तुम्हार सेवक असुरारी॥
 स्वारथ मीत सकल जग माहीं। सपनेहुँ प्रभु परमारथ नाहीं॥
 सब के बचन प्रेम रस साने। सुनि रघुनाथ हृदयँ हरषाने॥
 निज निज गृह गए आयसु पाई। बरनत प्रभु बतकही सुहाई॥
 दो०—उमा अवधवासी नर नारि कृतारथ रूप ।

ब्रह्म सच्चिदानंद घन रघुनायक जहँ भूप ॥४७॥
 एक बार बसिष्ट मुनि आए। जहाँ राम सुखधाम सुहाए॥
 अति आदर रघुनायक कीन्हा। पद पखारि पादोदक लीन्हा॥
 राम सुनहु मुनि कह कर जोरी। कृपासिंधु बिनती कछु मोरी॥
 देखि देखि आचरन तुम्हारा। होत मोह मम हृदयँ अपारा॥
 महिमा अमिति बेद नहिं जाना। मैं केहि भाँति कहउँ भगवाना॥
 उपरोहित्य कर्म अति मंदा। वेद पुरान सुमृति कर निंदा॥
 जब न लेउँ मैं तब विधि मोही। कहा लाभ आगें सुत तोही॥
 परमात्मा ब्रह्म नर रूपा। होइहि रघुकुल भूषन भूपा॥
 दो०—तब मैं हृदयँ बिचारा जोग जग्य व्रत दान ।

जा कहूँ करिअ सो पैहउँ धर्म न एहि सम आन ॥४८॥
 जप तप नियम जोग निज धर्मा। श्रुति संभव नाना सुभ कर्मा॥

ग्यान दया दम तीरथ मजन । जहँ लगि धर्म कहत श्रुति सजन ॥
 आगम निगम पुरान अनेका । पढ़े सुने कर फल प्रभु एका ॥
 तव पद पंकज प्रीति निरंतर । सब साधन कर यह फल सुंदर ॥
 छूटइ मल कि मलहि के धोएँ । घृत कि पाव कोइ बारि बिलोएँ ॥
 प्रेम भगति जल बिनु रघुराई । अभिअंतर मल कबहुँ न जाई ॥
 सोइ सर्वग्य तग्य सोइ पंडित । सोइ गुन गृह विग्यान अखंडित ॥
 दच्छ सकल लच्छन जुत सोई । जाकेँ पद सरोज रति होई ॥
 दो०—नाथ एक बर मागउँ राम कृपा करि देहु ।

जन्म जन्म प्रभु पद कमल कबहुँ घटै जनि नेहु ॥४९॥
 अस कहि मुनि बसिष्ठ गृह आए । कृपासिंधु के मन अति भाए ॥
 हनूमान भरतादिक भ्राता । संग लिए सेवक सुखदाता ॥
 पुनि कृपाल पुर बाहेर गए । गज रथ तुरग मगावत भए ॥
 देखि कृपा करि सकल सराहे । दिए उचित जिन्ह जिन्ह तेइ चाहे ॥
 हरन सकल श्रम प्रभु श्रम पाई । गए जहाँ सीतल अँवर्राई ॥
 भरत दीन्ह निज बसन डसाई । बैठे प्रभु सेवहिं सब भाई ॥
 मारुतसुत तब मारुत करई । पुलक वपुष लोचन जल भरई ॥
 हनूमान सम नहिं बड़भागी । नहिं कोउ राम चरन अनुरागी ॥
 गिरिजा जासु प्रीति सेवकाई । बार बार प्रभु निज मुख गाई ॥

दो०—तेहि अवसर मुनि नारद आए करतल बीन ।

गावन लगे राम कल कीरति सदा नबीन ॥५०॥

मामवलोकय पंकज लोचन । कृपा बिलोकनि सोच विमोचन ॥
 नीलतामरस स्यामकाम अरि । हृदय कंज मकरंद मधुप हरि ॥
 जातुधान बरूथ बल भंजन । मुनि सज्जन रंजन अघ गंजन ॥
 भूसुर ससि नव वृंद बलाहक । असरन सरन दीन जन गाहक ॥
 भुजबल विपुलभार महि खंडित । खर दूषन विराध बध पंडित ॥
 रावनारि सुखरूप भूपवर । जयदसरथ कुल कुमुद सुधाकर ॥
 सुजस पुरान विदित निगमागम । गावत सुर मुनि संत समागम ॥
 कारुणीक व्यलीक मद खंडन । सब बिधि कुसल कोसला मंडन ॥
 कलि मल मथन नाम ममताहन । तुलसिदास प्रभु पाहि प्रनत जन ॥
 दो०—प्रेम सहित मुनि नारद बरनि राम गुन ग्राम ।

सोभासिंधु हृदयँ धरि गए जहाँ बिधि धाम ॥५१॥

गिरिजा सुनहु बिसद यह कथा । मैं सब कही मोरि मति जथा ॥
 राम चरित सत कोटि अपारा । श्रुति सारदा न बरनै पारा ॥
 राम अनंत अनंत गुनानी । जन्म कर्म अनंत नामानी ॥
 जलसीकर महि रज गनि जाहीं । रघुपति चरित न बरनि सिराहीं ॥
 विमल कथा हरि पद दायनी । भगति होइ सुनि अनपायनी ॥
 उमा कहिउँ सब कथा सुहाई । जो भुसुंडि खगषतिहि सुनाई ॥
 कछुक राम गुन कहेउँ बखानी । अब का कहौं सो कहहु भवानी ॥
 सुनि सुभ कथा उमा हरषानी । बोली अति विनीत मूढ़ बानी ॥
 धन्य धन्य मैं धन्य पुरारी । सुनेउँ राम गुन भव भय हारी ॥

दो०—तुम्हरी कृपाँ कृपायतन अब कृतकृत्य न मोह ।

जानेऊँ राम प्रताप प्रभु चिदानंद संदोह ॥५२(क)॥

नाथ तवानन ससि स्रवत कथा सुधा रघुबीर ।

श्रवन पुटन्हि मन पान करि नहिँ अघात मतिधीर ॥५२(ख)॥

राम चरित जे सुनत अघाहीं । रस बिसेष जाना तिन्ह नाहीं ॥

जीवनमुक्त महामुनि जेऊ । हरि गुन सुनहिँ निरंतर तेऊ ॥

भव सागर चह पार जो पावा । राम कथा ता कहँ दृढ़ नावा ॥

विषइन्ह कहँ पुनि हरि गुन ग्रामा । श्रवन सुखद अरु मन अभिरामा

श्रवनवंत अस को जग माहीं । जाहि न रघुपति चरित सोहाहीं ॥

ते जड़ जीव निजात्मक घाती । जिन्हहि न रघुपति कथा सोहाती

हरिचरित्र मानस तुम्ह गावा । सुनि मै नाथ अमिति सुख पावा ॥

तुम्ह जो कही यह कथा सुहाई । कागभसुंढि गरुड़ प्रति गाई ॥

दो०—बिरति ग्यान बिग्यान दृढ़ राम चरन अति नेह ।

बायस तन रघुपति भगति मोहि परम संदेह ॥५३॥

नर सहस्र महुँ सुनहु पुरारी । कोउ एक होइ धर्म व्रतधारी ॥

धर्मसील कोटिक महुँ कोई । विषय विमुख विराग रत होई ॥

कोटि विरक्त मध्य श्रुति कहई । सम्यक ग्यान सकृत कोउ लहई ॥

ग्यानवंत कोटिक महुँ कोऊ । जीवनमुक्त सकृत जग सोऊ ॥

तिन्ह सहस्र महुँ सब सुख खानी । दुर्लभ ब्रह्म लीन विग्यानी ॥

धर्मसील विरक्त अरु ग्यानी । जीवनमुक्त ब्रह्मपर प्राणी ॥

सब ते सो दुर्लभ सुरराया । राम भगति रत गत मद माया ॥
 सो हरिभगति काग किमि पाई । बिस्वनाथ मोहि कहहु बुझाई ॥
 दो०—राम परायन ग्यान रत गुनागार मति धीर ।

नाथ कहहु केहि कारन पायउ काक सरीर ॥५४॥

यह प्रभु चरित पवित्र सुहावा । कहहु कृपाल काग कहँ पावा ॥
 तुम्ह केहि भाँति सुना मदनारी । कहहु मोहि अति कौतुक भारी ॥
 गरुड़ महाग्यानी गुन रासी । हरि सेवक अति निकट निवासी ॥
 तेहिं केहि हेतु काग सन जाई । सुनी कथा मुनि निकर बिहाई ॥
 कहहु कवन बिधि भा संवादा । दोउ हरिभगत काग उरगादा ॥
 गौरि गिरा सुनि सरल सुहाई । बोले सिव सादर सुख पाई ॥
 धन्य सती पावन मति तोरी । रघुपति चरन प्रीति नहिं थोरी ॥
 सुनहु परम पुनीत इतिहासा । जो सुनि सकल लोक भ्रम नासा ॥
 उपजइ राम चरन बिस्वासा । भव निधितरनर बिनहिं प्रयासा ॥
 दो०—ऐसिअ प्रसन्न बिहंगपति कीन्हि काग सन जाइ ।

सो सब सादर कहिहउँ सुनहु उमा मन लाइ ॥५५॥

मैं जिमि कथा सुनी भव मोचनि । सो प्रसंग सुनु सुमुखि सुलोचनि
 प्रथम दच्छ गृह तव अवतारा । सती नाम तब रहा तुम्हारा ॥
 दच्छ जग्य तब भा अपमाना । तुम्ह अति क्रोध तजे तब प्राना ॥
 मम अनुचरन्ह कीन्ह मख भंगा । जानहु तुम्ह सो सकल प्रसंगा ॥
 तब अति सोच भयउ मन मोरैं । दुखी भयउँ बियोग प्रिय तोरैं ॥

सुंदर बन गिरि सरित तड़ागा । कौतुक देखत फिरउँ बेरागा ॥
 गिरि सुमेर उत्तर दिसि दूरी । नील सैल एक सुंदर भूरी ॥
 तासु कनकमय सिखर सुहाए । चारि चारु मोरे मन भाए ॥
 तिन्ह पर एक एक बिटप बिसाला । बट पीपर पाकरी रसाला ॥
 सैलोपरि सर सुंदर सोहा । मनि सोपान देखि मन मोहा ॥
 दो०—सीतल अमल मधुर जल जलज बिपुल बहुरंग ।

कूजत कल रव हंस गन गुंजत मंजुल भृंग ॥५६॥
 तेहि गिरि रुचिर बसइ खग सोई । तासु नास कल्पांत न होई ॥
 माया कृत गुन दोष अनेका । मोह मनोज आदि अबिबेका ॥
 रहे व्यापि समस्त जग माहीं । तेहि गिरि निकट कबहुँ नहि जाहीं ॥
 तहँ बसि हरिहि भजइ जिमि कागा । सो सुनु उमा सहित अनुरागा ॥
 पीपर तरु तर ध्यान सो धरई । जाप जंग्य पाकरि तर करई ॥
 आँब छाँह कर मानस पूजा । तजि हरि भजनु काजु नहि दूजा ॥
 बर तर कह हरि कथा प्रसंगा । आवहिं सुनिहिं अनेक बिहंगा ॥
 राम चरित बिचित्र बिधि नाना । प्रेम सहित कर सादर गाना ॥
 सुनिहिं सकल मति बिमल मराला । बसहिं निरंतर जे तेहि ताला ॥
 जब मैं जाइ सो कौतुक देखा । उर उपजा आनंद विसेषा ॥
 दो०—तब कछु काल मराल तनु धरि तहँ कीन्ह निवास ।

सादर सुनि रघुपति गुन पुनि आयउँ कैलास ॥५७॥

गिरिजा कहेउँ सो सब इतिहास । मैं जेहि समय गवउँ खग पासा ॥

अब सो कथा सुनहु जेहि हेतू। गयउ काग पहिं खग कुल केतू॥
 जब रघुनाथ कीन्हि रन क्रीड़ा। समुझत चरित होति मोहि ब्रीड़ा॥
 इंद्रजीत कर आपु बँधायो। तब नारद मुनि गरुड़ पठायो॥
 बंधन काटि गयो उरगादा। उपजा हृदयँ प्रचंड विषादा॥
 प्रभु बंधन समुझत बहु भाँती। करत विचार उरग आराती॥
 व्यापक ब्रह्म बिरज बागीसा। माया मोह पार परमीसा॥
 सो अवतार सुनेउँ जग माहीं। देखेउँ सो प्रभाव कछु नाहीं॥

दो०—भव बंधन ते छूटहिं नर जपि जा कर नाम ।

खबँ निसाचर बाँधेउ नागपास सोइ राम ॥५८॥

नाना भाँति मनहि समुझावा। प्रगटन ग्यान हृदयँ भ्रम छावा॥
 खेद खिन्न मन तर्क बढ़ाई। भयउ मोहबस तुम्हरिहिं नाई॥
 व्याकुल गयउ देवरिषि पाहीं। कहेसि जो संसय निज मन माहीं॥
 सुनि नारदहि लागि अति दाया। सुनु खग प्रबल राम कै माया॥
 जो ग्यानिन्ह कर चित अपहरई। बरिआई विमोह मन करई॥
 जेहिं बहु बार नचावा मोही। सोइ व्यापी बिहंगपति तोही॥
 महामोह उपजा उर तोरें। मिटिहि न बेगि कहें खग मोरें॥
 चतुरानन पहिं जाहु खगेसा। सोइ करेहु जेहि होइ निदेसा॥

दो०—अस कहि चले देवरिषि करत राम गुन गान ।

हरि माया बल बरनत पुनि पुनि परम सुजान ॥५९॥

तब खगपति बिरचि पहिं गयऊ। निज संदेह सुनावत भयऊ॥

सुनि विरंचि रामहि सिरु नावा । समुझि प्रताप प्रेम अति छावा ॥
मन महुँ करइ बिचार बिधाता । माया बस कबि कोविद ग्याता ॥
हरि माया कर अमिति प्रभावा । बिपुल धार जेहिं मोहिनचावा ॥
अग जगमय जग मम उपराजा । नहिं आचरज मोह खगराजा ॥
तब बोले बिधि गिरा सुहाई । जान महेस राम प्रभुताई ॥
बैनतेय संकर पहिं जाहू । तात अनत पूछहु जनि काहू ॥
तहँ होइहि तब संसय हानी । चलेउ बिहंग सुनत बिधि बानी ॥

दो०—परमातुर बिहंगपति आयउ तब मो पास ।

जात रहेउँ कुवेर गृह रहिहु उमा कैलास ॥६०॥

तेहिं मम पद सादर सिरु नावा । पुनि आपन संदेह सुनावा ॥
सुनि ता करि बिनती मृदु बानी । प्रेम सहित मैं कहेउँ भवानी ॥
मिलेहु गरुड मारग महुँ मोही । कवन भाँति समुझावौं तोही ॥
तबहिं होइ सत्र संसय भंगा । जब बहु काल करिअ सतसंगा ॥
सुनिअ तहाँ हरि कथा सुहाई । नाना भाँति मुनिन्ह जो गाई ॥
जेहि महुँ आदि मध्य अवसाना । प्रभु प्रतिपाद्य राम भगवाना ॥
नित हरि कथा होत जहँ भाई । पठवउँ तहाँ सुनहु तुम्ह जाई ॥
जाइहि सुनत सकल संदेहा । राम चरन होइहि अति नेहा ॥

दो०—बिनु सतसंग न हरिकथा तेहि बिनु मोह न भाग ।

मोह गएँ बिनु राम पद होइ न इंद अनुराग ॥६१॥

मिलहिं न रघुपति बिनु अनुरागा । किएँ जोग तप ग्यान बिरागा ॥

उत्तर दिसि सुंदर गिरि नीला । तहँ रह काकभुसुंडि सुसीला ॥
 राम भगति पथ परम प्रवीना । ग्यानी गुन गृह बहु कालीना ॥
 राम कथा सो कहइ निरंतर । सादर सुनहिं विविध बिहंगवर ॥
 जाइ सुनहु तहँ हरि गुन भूरी । होइहि मोह जनित दुख दूरी ॥
 मैं जब तेहि सब कहा बुझाई । चलेउ हरषि मम पद सिरु नाई ॥
 ताते उमा न मैं समुझावा । रघुपति कृपाँ मरमु मैं पावा ॥
 होइहि कीन्ह कवहुँ अभिमाना । सो खोवै चह कृपानिधाना ॥
 कछु तेहि ते पुनि मैं नहिं राखा । समुझइ खग खगही कै भाषा ॥
 प्रभु माया बलवंत भवानी । जाहि न मोह कवन अस ग्यानी ॥

दो०—ग्यानी भगत सिरोमनि त्रिभुवनपति कर जान ।

ताहि मोह माया नर पावँर करहिं गुमान ॥६२(क)॥

मासपारायण, अट्टाईसवाँ विश्राम

सिव बिरंचि कहुँ मोहइ को है बपुरा आन ।

अस जियँ जानि भजहिं मुनि मायापति भगवान ॥६२(ख)॥

गयउ गरुड़ जहँ बसइ भुसुंडा । मति अकुंठ हरि भगति अखंडा ॥

देखि सैल प्रसन्न मन भयऊ । माया मोह सोच सब गयऊ ॥

करि तड़ाग मज्जन जलपाना । बट तर गयउ हृदयँ हरषाना ॥

बृद्ध बृद्ध बिहंग तहँ आए । सुनै राम के चरित सुहाए ॥

कथा अरंभ करै सोइ चाहा । तेही समय गयउ खगनाहा ॥

आवत देखि सकल खगराजा । हरषेउ बायस सहित समाजा ॥

अति आदर खगपति कर कीन्हा । स्वागत पूछि सुआसन दीन्हा ॥
करि पूजा समेत अनुरागा । मधुर बचन तब बोलेउ कागा ॥
दो०—नाथ कृतारथ भयउँ मैं तब दरसन खगराज ।

आयसु देहु सो करौं अब प्रभु आयहु केहि काज ॥ ६३(क) ॥

सदा कृतारथ रूप तुम्ह कह सृदु बचन खगेस ।

जेहि कै अस्तुति सादर निज मुख कीन्हि महेसा ॥ ६३(ख) ॥

सुनहु तात जेहि कारन आयउँ । सो सब भयउ दरस तब पायउँ ॥
देखि परम पावन तब आश्रम । गयउ मोह संसय नाना भ्रम ॥
अब श्रीराम कथा अति पावनि । सदा सुखद दुख पुंज नसावनि ॥
सादर तात सुनावहु मोही । बार बार बिनवउँ प्रभु तोही ॥
सुनत गरुड़ कै गिरा बिनीता । सरल सुप्रेम सुखद सुपुनीता ॥
भयउ तासु मन परम उछाहा । लग कहै रघुपति गुन गाहा ॥
प्रथमहिं अति अनुराग भवानी । रामचरित सर कहेसि बखानी ॥
पुनि नारद कर मोह अपारा । कहेसि बहुरि रावन अवतारा ॥
प्रभु अवतार कथा पुनि गाई । तबसिसु चरित कहेसि मन लाई ॥
दो०—बालचरित कहि बिबिधि बिधि मन महुँ परम उछाह ।

रिषि आगवन कहेसि पुनि श्री रघुबीर विबाह ॥ ६४ ॥

बहुरि राम अभिषेक प्रसंगा । पुनि नृप बचन राजरस भंगा ॥

पूरवासिन्ह कर बिरह बिषादा । कहेसि राम लछिमन संवादा ॥

बिपिन गवन केवट अनुरागा । सुरसार उतारि निवास प्रयागा ॥

बालमीक प्रभु मिलन बखाना । चित्रकूट जिमि बसे भगवाना ॥
 सचिवागवन नगर नृप मरना । भरतागवन प्रेम बहु बरना ॥
 करि नृप क्रिया संग पुरवासी । भरत गए जहँ प्रभु सुखरासी ॥
 पुनि रघुपति बहु बिधि समुझाए । लै पादुका अवधपुर आए ॥
 भरत रहनि सुरपति सुत करनी । प्रभु अरु अत्रि भेंट पुनि बरनी ॥
 दो०—कहि बिराध बध जेहि बिधि देह तजी सरभंग ।

बरनि सुतीछन प्रीति पुनि प्रभु अगस्ति सतसंग ॥६५॥

कहि दंडक बन पावनताई । गोध मइत्री पुनि तेहिं गाई ॥
 पुनि प्रभु पंचवटी कृत वासा । भंजी सकल मुनिन्ह की त्रासा ॥
 पुनि लछिमन उपदेस अनूपा । सूपनखा जिमि कीन्हि कुरूपा ॥
 खर दूषन बध बहुरि बखाना । जिमि सब मरमु दसानन जाना ॥
 दसकंधर मारीच बतकही । जेहि बिधि भई सो सब तेहिं कही ॥
 पुनि माया सीता कर हरना । श्रीरघुवीर विरह कछु बरना ॥
 पुनि प्रभु गोध क्रिया जिमि कीन्ही । बधि कबंध सबरिहि गति दीन्ही
 बहुरि विरह बरनत रघुवीरा । जेहि बिधि गए सरोबर तीरा ॥

दो०—प्रभु नारद संवाद कहि मारुति मिलन प्रसंग ।

पुनि सुग्रीव मिताई बालि प्रान कर भंग ॥६६ (क)॥

कपिहि तिलक करि प्रभु कृत सैल प्रवरषन बास ।

बरनन वर्षा सरद अरु राम रोष कपि त्रास ॥६६ (ख)॥

जेहि बिधि कपिपति कीस पठाए । सीता खोज सकल दिसि धाए ॥

विनर प्रवेस कीन्ह जेहि भाँती । कपिन्ह बहोरि मिला संपाती ॥
 सुनि सत्र कथा समीरकुमारा । नाघत भयउ पयोधि अपारा ॥
 लंकाँ कपि प्रवेस जिमि कीन्हा । पुनि सीतहि धीरजु जिमि दीन्हा
 वन उजारि रावनहि प्रबोधी । पुर दहि नाघेउ बहुरि पयोधी ॥
 आए कपि सत्र जहँ रघुराई । वैदेही की कुसल सुनाई ॥
 सेन समेति जथा रघुवीरा । उतरेँ जाइ वारिनिधि तीरा ॥
 मिला विभीषन जेहि विधि आई । सागर निग्रह कथा सुनाई ॥
 दो०—सेतु बाँधि कपि सेन जिमि उत्तरी सागर पार ।

रायउ बसीठी बीरवर जेहि बिधि बालिकुमार ॥६७(क)॥

निसिचर कीस लराई बरनिसि बिबिधि प्रकार ।

कुंभकरन वननाद कर बल पौरुष संघार ॥६७(ख)॥

निसिचर निकर मरन विधि नाना । रघुपति रावन समर बखाना ॥
 रावन बध मंदोदरि सोका । राज विभीषन देव असोका ॥
 सीता रघुपति मिलन बहोरी । मुरन्ह कीन्ह अस्तुति कर जोरी ॥
 पुनि पुष्पक चढ़ि कपिन्ह समेता । अवध चले प्रभु कृपा निकेता ॥
 जेहि विधि राम नगर निज आए । नायस विसद चरित सब गाए ॥
 कहेसि बहोरि राम अभिषेका । पुर वरनत नृपनीति अनेका ॥
 कथा समस्त भुसुंड बखानी । जो मैं तुम्ह सन कही भवानी ॥
 सुनि सत्र राम कथा लखनाहा । कहत बचन सन परम उछाहा ॥

सो०—गयउ मोर संदेह सुनेउँ सकल रघुपति चरित ।

भयउ राम पद नेह तव प्रसाद बायस तिलक ॥६८(क)॥

मोहि भयउ अति मोह प्रभु बंधन रन महुँ निरखि ।

चिदानंद संदोह राम बिकल कारन कवन ॥६८(ख)॥

देखि चरित अति नर अनुसारी । भयउ हृदयँ मम संसय भारी ॥

सोइ भ्रम अब हित करि मै माना । कीन्ह अनुग्रह कृपानिधाना ॥

जो अति आतप व्याकुल होई । तरु छाया सुख जानइ सोई ॥

जौ नहिँ होत मोह अति मोही । मिलतेउँ तात कवन बिधि तोही ॥

सुनतेउँ किमि हरि कथा सुहाई । अति बिचित्र बहु बिधि तुम्ह गाई

निगमागम पुरान मत एहा । कहहिँ सिद्ध मुनि नहिँ संदेहा ॥

संत विसुद्ध मिलहिँ परि तेही । चितवहिँ राम कृपा करि जेही ॥

राम कृपाँ तव दरसन भयऊ । तव प्रसाद सब संसय गयऊ ॥

दो०—सुनि बिहंगपति बानी सहित बिनय अनुराग ।

पुलक गात लोचन सजल मन हरषेउ अति काग ॥६९(क)॥

श्रोता सुमति सुसील सुचि कथा रसिक हरिदास ।

पाइ उमा अति गोप्यमपि सज्जन करहिँ प्रकास ॥६९(ख)॥

बोलेउ काकभसुंड बहोरी । नभग नाथ पर प्रीति न थोरी ॥

सब बिधि नाथ पूज्य तुम्ह मेरे । कृपापात्र रघुनायक केरे ॥

तुम्हहि न संसय मोह न माया । मो पर नाथ कीन्हि तुम्ह दाया ॥

पढ़इ मोह मिस खगमति तोही । रघुपति दीन्हि बड़ाई मोही ॥

तुम्ह निज मोह कही खग साई । सो नहिं कछु आचरज गोसाई ॥
नारद भव विरंचि सनकादी । जे मुनिनायक आतमवादी ॥
मोह न अंध कीन्ह केहि केही । को जग काम नचाव न जेही ॥
तृष्णां केहि न कीन्ह बौराहा । केहि कर हृदय क्रोध नहिं दाहा ॥

दो०—ग्यानी तापस सूर कवि कोविद गुन आगार ।

केहि कै लोभ बिडंबना कीन्ह न एहिं संसार ॥७०(क)॥

श्री मद बक्र न कीन्ह केहि प्रभुता बधिर न काहि ।

मृगलोचनि के नैन सर को अस लाग न जाहि ॥७०(ख)॥

गुन कृत सन्यपात नहिं केही । कोउ न मान मद तजेउ निवेही ॥
जोवन ज्वर केहि नहिं बलकावा । ममता केहि कर जस न नसावा ॥
मच्छर काहि कलंक न लावा । काहि न सोक समीर डोलावा ॥
चिंता साँपिनि को नहिं खाया । को जग जाहि न ब्यापी माया ॥
कीट मनोरथ दारु सरीरा । जेहि न लाग घुन को अस धीरा ॥
सुत बित लोक ईषना तीनी । केहि कै मति इन्ह कृत न मलीनी ॥
यह सब माया कर परिवारा । प्रबल अमिति को बरनै पारा ॥
सिव चतुरानन जाहि डेराहीं । अपर जीव केहि लेखे माहीं ॥

दो०—ब्यापि रहेउ संसार महुँ माया कटक प्रचंड ।

सेनापति कामादि भट दंभ कपट पाषंड ॥७१(क)॥

सो दासी रघुबीर कै समुझैं मिथ्या सोपि ।

छूट नै राम कृपा बिनु नाथ कहाँ पद रोपि ॥७१(ख)॥

जो माया सब जगहि नचावा । जासु चरित लखि काहुँ न पावा ॥
 सोइ प्रभु भू बिलास खगराजा । नाच नटी इव सहित समाजा ॥
 सोइ सच्चिदानंद घन रामा । अज विग्यान रूप बल घामा ॥
 व्यापक व्याप्य अखंड अनंता । अखिल अमोघसक्ति भगवंता ॥
 अगुन अदभ्र गिरा गोतीता । सबदरसी अनवद्य अजीता ॥
 निर्मम निराकार निरमोहा । नित्य निरंजन सुख संदोहा ॥
 प्रकृति पार प्रभु सब उर वासी । ब्रह्म निरीह बिरज अबिनासी ॥
 इहाँ मोह कर कारन नाहीं । रवि सन्मुख तम कवहुँ कि जाहीं ॥

दो०—भगत हेतु भगवान प्रभु राम धरेउ तनु भूप ।

किणु चरित पावन परम प्राकृत नर अनुरूप ॥७२(क)॥

जथा अनेक बेष धरि नृत्य करइ नट कोइ ।

सोइ सोइ भाव देखावइ आपुन होइ न सोइ ॥७२(ख)॥

असि रघुपति लीला उरगारी । दनुज विमोहनि जन सुखकारी ॥
 जेमति मलिन विषयबस कामी । प्रभु परमोह धरहिं इमि स्वामी ॥
 नयन दोष जा कहँ जब होई । पीत बरन ससि कहँ कह सोई ॥
 जब जेहि दिसि भ्रम होइ खगेसा । सो कह पच्छिम उयउ दिनेसा ॥
 नौकारूढ़ चलत जग देखा । अचल मोह बस आपुहि लेखा ॥
 बालक भ्रमहिं न भ्रमहिं गृहादी । कहहिं परस्पर मिथ्यावादी ॥
 हरि विषइक अस मोह बिहंगा । सपनेहुँ नहिं अग्यान प्रसंगा ॥
 मायाभ्रस भतिमद अभागी । हृदय जमानिका बहुविधि लागी ॥

ते सठ हठ बस संसय करहीं। निज अग्यान राम पर धरहीं॥

दो०—काम क्रोध मद लोभ रत गृहासक्त दुखरूप ।

ते किमि जानहिं रघुपतिहि मूढ़ परेतम कूप ॥७३(क)॥

निर्गुन रूप सुलभ अति सगुन जान नहिं कोइ ।

सुगम अगम नाना चरित सुनि मुनि मन भ्रम होइ ॥७३(ख)॥

सुनु खगेस रघुपति प्रभुताई । कहउँ जथामति कथा सुहाई ॥

जेहि बिधि मोह भयउ प्रभु मोही । सोउ सब कथा सुनावउँ तोही ॥

राम कृपा भाजन तुम्ह ताता । हरि गुन प्रीति मोहि सुखदाता ॥

ताते नहिं कछु तुम्हहिं दुरावउँ । परम रहस्य मनोहर गावउँ ॥

सुनहु राम कर सहज सुभाऊ । जन अभिमान न राखहिं काऊ ॥

संसृत मूल सुलप्रद नाना । सकल सोक दायक अभिमाना ॥

ताते करहिं कृपानिधि दूरी । सेवक पर ममता अति भूरी ॥

जिमि सिसु तन ब्रन होइ गोसाई । मातु चिराव कठिन की नाई ॥

दो०—जदपि प्रथम दुख पावइ रोवइ बाल अधीर ।

व्याधि नास हित जननी गनति न सो सिसु पीरा ॥७४(क)॥

तिमि रघुपति निज दास कर हरहिं मान हित लागि ।

तुलसिदास ऐसे प्रभुहि कस न भजहु भ्रम त्यागि ॥७४(ख)॥

राम कृपा आपनि जड़ताई । कहउँ खगेस सुनहु मन लाई ॥

जब जब राम मनुज तनु धरहीं । भक्त हेतु लीला बहु करहीं ॥

तब तब अवधपुरी मैं जाऊँ । बालचरित मिलोकि दूपाऊँ ॥

जन्म महोत्सव देखउँ जाई। बरष पाँच तहँ रहउँ लोभाई ॥
 इष्टदेव मम बालक रामा। सोभा वपुष कोटि सत कामा ॥
 निज प्रभु बदन निहारि निहारी। लोचन सुफल करउँ उरगारी ॥
 लघु वायस वपु धरि हरि संग। देखउँ बालचरित बहुरंगा ॥
 दो०—लरिकाई जहँ जहँ फिरहिँ तहँ तहँ संग उड़ाउँ ।

जूठनि परइ अजिर महँ सो उठाइ करि खाउँ ॥ ७५(क) ॥

एक बार अतिसय सब चरित किए रघुबीर ।

सुमिरत प्रभु लीला सोइ पुलकित भयउ सररी ॥ ७५(ख) ॥

कहइ भसुंड सुनहु खगनायक। राम चरित सेवक सुखदायक ॥
 नृप मंदिर सुंदर सब भाँती। खचित कनक मनि नाना जाती ॥
 बरनि न जाइ रुचिर अँगनाई। जहँ खेलहिँ नित चारिउ भाई ॥
 बालबिनोद करत रघुराई। विचरत अजिर जननि सुखदाई ॥
 मरकत मृदुल कलेवर स्यामा। अंग अंग प्रतिछवि बहु कामा ॥
 नव राजीव अरुन मृदु चरना। पदज रुचिर नख ससि दुति हरना
 ललित अंक कुलिसादिक चारी। नूपुर चारु मधुर रवकारी ॥
 चारु पुरट मनि रचित बनाई। कटि किंकिनि कल मुखर सुहाई ॥
 दो०—रेखा त्रय सुंदर उदर नाभी रुचिर गँभीर ।

उर आयत भ्राजत विविधि बाल बिभूषन चीर ॥ ७६ ॥

अरुन पानि नख करज मनोहर। बाहु विसाल बिभूषन सुंदर ॥
 कंध बाल केहरि दर प्रीति। चारु चिबुक आनन छवि सीवा ॥

कलवल वचन अधर अरुनारे। दुइ दुइ दसन बिसद वर बारे ॥
 ललित कपोल मनोहर नासा। सकल मुखद ससि कर सम हासा ॥
 नील कंज लोचन भव मोचन। भ्राजत भाल तिलक गोरोचन ॥
 विकट भृकुटि सम श्रवन सुहाए। कुंचित कच मेचक छवि छाए ॥
 पीत शीनि झगुली तन सोही। किलकनि चितवनि भावति मोही ॥
 रूप रासि नृप अजिर विहारी। नाचहिं निज प्रतिबिंब निहारी ॥
 मोहि सन करहिं विविधि विधि क्रीड़ा। वरनत मोहि होति अति ब्रीड़ा ॥
 किलकत मोहि धरन जय धावहिं। चलउँ भागि तव पूष देखावहिं ॥
 दो०—आवत निकट हँसहिं प्रभु भाजत रुदन करहिं ।

जाउँ समीप गहन पद फिरि फिरि चितइ पराहिं ॥७७(क)॥

प्राकृत सिसु इव लीला देखि भयउ मोहि मोह ।

कवन चरित्र करत प्रभु चिदानंद संदोह ॥७७(ख)॥

एतना मन आनत खगराया। रघुपति प्रेरित व्यापी माया ॥
 सो माया न दुखद मोहि काहीं। आन जीव इव संसृत नाहीं ॥
 नाथ इहाँ कछु कारन आना। सुनहु सो सावधान हरिजाना ॥
 ग्यान अखंड एक सीतावर। माया बस्य जीव सचराचर ॥
 जौ सब कैं रह ग्यान एकरस। ईस्वर जीवहि भेद कहहु कस ॥
 माया बस्य जीव अभिमानी। ईस बस्य माया गुन खानी ॥
 परबस जीव स्वबस भगवंता। जीव अनेक एक श्रीकंता ॥
 सुधा भेद जद्यपि कृत माया। बिनु हरि जाइ न कोटि उपाया ॥

दो०—रामचंद्र के भजन बिनु जो चह पद निर्बान ।

ग्यानवंत अपि सो नर पसु बिनु पूँछ विषान ॥७८(क)॥

राकापति षोडस उअहिं तारागन समुदाइ ।

सकल गिरिन्ह दव लाइअ बिनु रवि राति न जाइ ॥७८(ख)॥

ऐसेहिं हरि बिनु भजन खगेसा । मिटइ न जीवन्ह केर कलेसा ॥

हरि सेवकहि न व्याप अविद्या । प्रभु प्रेरित व्यापइ तेहि विद्या ॥

ताते नास न होइ दास कर । भेद भगति बाढ़इ बिहंगवर ॥

भ्रम तें चकित राम मोहि देखा । विहँसे सो सुनु चरित विसेषा ॥

तेहि कौतुक कर मरमु न काहूँ । जाना अनुज न मातु पिताहूँ ॥

जानु पानि धाए मोहि धरना । स्यामल गात अरुन कर चरना ॥

तब मैं भागि चलेउँ उरगारी । राम गहन कहँ भुजा पसारी ॥

जिमि जिमि दूर उड़ाउँ अकासा । तहँ भुज हरि देखउँ निज पासा ॥

दो०—ब्रह्मलोक लागि गयउँ मैं चितयउँ पाछ उदात ।

जुग अंगुल कर बीच सब राम भुजहि मोहि तात ॥७९(क)॥

सप्ताबरन भेद करि जहाँ लगें गति मोरि ।

गयउँ तहाँ प्रभु भुज निरखि व्याकुल भयउँ बहोरि ॥७९(ख)॥

मूदेउँ नयन त्रसित जब भयऊँ । पुनि चितवत कोसलपुर गयऊँ ॥

मोहि विलोकि राम मुसुकाहीं । विहँसत तुरत गयउँ मुख माहीं ॥

उदर माझ सुनु अंडज राया । देखेउँ बहु ब्रह्मांड निकाया ॥

असि विभिन्न तहँ लोक अनेका । रचना अधिक एक ते एका ॥

कोटिन्ह चतुरानन गौरीसा । अगनित उडगन रवि रजनीसा ॥
अगनित लोकपाल जम काला । अगनित भूधर भूमि विसाला ॥
सागर सरि सर बिपिन अपारा । नाना भाँति सृष्टि बिस्तारा ॥
सुर मुनि सिद्ध नाग नर किंनर । चारि प्रकार जीव सचराचर ॥

दो०—जो नहिँ देखा नहिँ सुना जो मनहूँ न समाइ ।

सो सब अद्भुत देखेउँ बरनि कवनि बिधि जाइ ॥८०(क)॥

एक एक ब्रह्मांड महुँ रहउँ बरष सत एक ।

एहि बिधि देखत फिरउँ मैं अंड कटाह अनेक ॥८०(ख)॥

लोक लोक प्रति भिन्न विधाता । भिन्न विष्णु सिव मनु दिसित्राता
नर गंधर्व भूत वेताला । किंनर निसिचर पसु खग ब्याला
देव दनुज गन नाना जाती । सकल जीव तहँ आनहिँ भाँती ॥
महि सरि सागर सर गिरि नाना । सब प्रपंच तहँ आनइ आना ॥
अंडकोस प्रति प्रति निज रूपा । देखेउँ जिनस अनेक अनूपा ॥
अवधपुरी प्रति भुवन निनारी । सरजू भिन्न भिन्न नर नारी ॥
दसरथ कौसल्या सुनु ताता । विविध रूप भरतादिक भ्राता ॥
प्रति ब्रह्मांड राम अवतारा । देखेउँ बालबिनोद अपारा ॥

दो०—भिन्न भिन्न मैं दीख सबु अति विचित्र हरिजान ।

अगनित भुवन फिरेउँ प्रभु राम न देखेउँ आन ॥८१(क)॥

सोइ सिसुपन सोइ सोभा सोइ कृपाल रघुबीर ।

भुवन भुवन देखत फिरउँ प्रेरित मोह समीर ॥८१(ख)॥

भ्रमत मोहि ब्रह्मांड अनेक। वीते मनहुँ कल्प सत एका॥
 फिरत फिरत निज आश्रम आयउँ। तहँ पुनि रहि कछु काल गवाँयउँ
 निज प्रभु जन्म अवध सुनि पायउँ। निर्भर प्रेम हरषि उठि घायउँ
 देखउँ जन्म महोत्सव जाई। जेहि विधि प्रथम कहा मैं गाई॥
 राम उदर देखेउँ जग नाना। देखत बनइ न जाइ बखाना॥
 तहँ पुनि देखेउँ राम सुजाना। माया पति कृपाल भगवाना॥
 करउँ बिचार बहोरि बहोरी। मोह कलिल व्यापित मति मोरी॥
 उभय घरी महँ मैं सब देखा। भयउँ भ्रमित मन मोह विसेषा॥
 दो०—देखि कृपाल बिकल मोहि बिहँसे तब रघुबीर।

बिहँसतहीं मुख बाहेर आयउँ सुनु मतिधीर॥८२(क)॥

सोइ लरिकारै मो सन करन लगे पुनि राम।

कोटि भाँति समुझावउँ मनु न लहइ विश्राम॥८२(ख)॥

देखि चरित यह सो प्रभुताई। समुझत देह दसा बिसराई॥
 घरनि परेउँ मुख आव न वाता। चाहि चाहि आरत जन त्राता॥
 प्रेमाकुल प्रभु मोहि बिलोकी। निज माया प्रभुता तब रोकी॥
 कर सरोज प्रभु मम सिर धरेऊ। दीनदयाल सकल दुख हरेऊ॥
 कीन्ह राम मोहि बिगत बिमोहा। सेवक सुखद कृपा संदोहा॥
 प्रभुता प्रथम बिचारि बिचारी। मन महँ होइ हरष अति भारी॥
 भगत बल्लता प्रभु कै देखी। उपजी मम उर प्रीति बिसेषी॥

दो०—सुनि सप्रेम मम बानी देखि दीन निज दास।

बचन सुखद गंभीर मृदु बोले रमानिवास ॥८३(क)॥

काकभसुंडि मागु बर अति प्रसन्न मोहि जानि।

अनिमादिक सिधि अपर रिधि मोच्छ सकल सुख खानि ८३(ख)

ग्यान विवेक विरति विग्याना। मुनि दुर्लभ गुन जे जग नाना ॥

आजु देउँ सब संसय नाहीं। मागु जो तोहि भाव मन माहीं ॥

सुनि प्रभु बचन अधिक अनुरागेउँ। मन अनुमान करन तब लागेउँ

प्रभु कह देन सकल सुख सही। भगति आपनी देन न कही ॥

भगति हीन गुन सब सुख ऐसे। लवन विना बहु विंजन जैसे ॥

भजन हीन सुख कवने काजा। अस विचारि बोलेउँ खगराजा ॥

जौ प्रभु होइ प्रसन्न बर देहू। मो पर करहु कृपा अरु नेहू ॥

मन भावत बर मागुँ स्वामी। तुम्ह उदार उर अंतरजामी ॥

दो०—अबिरल भगति विसुद्ध तव श्रुति पुरान जो गाव।

जेहि खोजत जोगीस मुनि प्रभु प्रसाद कोउ पाव ॥८४(क)॥

भगत कल्पतरु प्रनत हित कृपा सिंधु सुख धाम।

सोइ निज भगति मोहि प्रभु देहु दया करि राम ॥८४(ख)॥

एवमस्तु कहि रघुकुलनायक। बोले बचन परम सुखदायक ॥

सुनु बायस तैं सहज सयाना। काहे न मागसि अस बरदाना ॥

सब सुख खानि भगति तैं मागी। नहिं जग कोउ तोहि सम बड़भागी

जो मुनि कोटि जतन नहिं लहहीं। जे जग जोग अनलक्ष्य न दहहीं ॥

रीझेउँ देखि तोरि चतुराई । मागेहु भगति मोहि अति भाई ॥
 सुनु बिहंग प्रसाद अब मोरें । सब सुभ गुन बसिहहिँ उर तोरें ॥
 भगति ग्यान विग्यान बिरागा । जोग चरित्र रहस्य विभागा ॥
 जानब तैं सबही कर भेदा । मम प्रसाद नहिँ साधन खेदा ॥
 दो०—माया संभव भ्रम सब अब न व्यापिहहिँ तोहि ।

जानेसु ब्रह्म अनादि अज अगुन गुनाकर मोहि ॥८५(क)॥

मोहि भगत प्रिय संतत अस बिचारि सुनु काग ।

कायँ बचन मन मम पद करेसु अचल अनुराग ॥८५(ख)॥

अब सुनु परम विमल मम बानी । सत्य सुगम निगमादि बखानी ॥
 निज सिद्धांत सुनावउँ तोही । सुनु मन धरु सब तजि भजु मोही ॥
 मम माया संभव संसारा । जीव चराचर विविधि प्रकारा ॥
 सब मम प्रिय सब मम उपजाए । सब ते अधिक मनुज मोहि भाए ॥
 तिन्ह महुँ द्विज द्विज महुँ श्रुति धारी । तिन्ह महुँ निगम धरम अनुसारी ॥
 तिन्ह महुँ प्रिय विरक्त पुनि ग्यानी । ग्यानिहु ते अति प्रिय विग्यानी ॥
 तिन्ह ते पुनि मोहि प्रिय निज दासा । जेहि गति मोरि न दूसरि आसा ॥
 पुनि पुनि सत्य कहउँ तोहि पाहीं । मोहि सेवक सम प्रिय कोउ नाहीं ॥
 भगति हीन बिरंचि किन होई । सब जीवहु सम प्रिय मोहि सोई ॥
 भगतिवंत अति नीचउ प्राणी । मोहि प्रानप्रिय असि मम बानी ॥

दो०—सुचि सुसील सेवक सुमति प्रिय कहु काहि न लाग ।

श्रुति पुरान कह नीति असि सावधान सुनु काग ॥८६॥

एक पिता के विपुल कुमारा । होहिं पृथक् गुन सील अचारा ॥
 कोउ पंडित कोउ तापस गयाता । कोउ धनवंत सूर कोउ दाता ॥
 कोउ सर्वग्य धर्मरत कोई । सब पर पितहि प्रीति सम होई ॥
 कोउ पितु भगत वचन मन कर्मा । सपनेहुँ जान न दूसर धर्मा ॥
 सो सुत प्रिय पितु प्रान समाना । जद्यपि सो सब भाँति अयाना ॥
 एहि विधि जीव चराचर जेते । त्रिजग देव नर असुर समेते ॥
 अखिल विस्व यह मोर उपाया । सब पर मोहि बराबरि दाया ॥
 तिन्ह मँहँ जो परिहरि मद माया । भजै मोहि मन वच अरु काया ॥

दो०—पुरुष नपुंसक नारि वा जीव चराचर कोइ ।

सर्वभाव भज कपट तजि मोहि परम प्रिय सोइ ॥ ८७ (क) ॥

सो०—सत्य कहउँ खग तोहि सुचि सेवक मम प्रान प्रिय ।

अस बिचारि भजु मोहि परिहरि आस भरोस सब ॥ ८७ (ख) ॥

कबहुँ काल न ब्यापिहि तोही । सुमिरेसु भजेसु निरंतर मोही ॥
 प्रभु बचनामृत सुनि न अधाऊँ । तनु पुलकित मन अति हरषाऊँ ॥
 सो सुख जानइ मन अरु काना । नहिँ रसना पहिँ जाइ बखाना ॥
 प्रभु सोभा सुख जानहिँ नयना । कहि किमि सकहिँ तिन्हहि नहिँ बयना
 बहु विधि मोहि प्रबोधि सुख देई । लगे करन सिसु कौतुक तेई ॥
 सजल नयन कछु मुख करि रूखा । चितइ मातु लागी अति भूखा ॥
 देखि मातु आतुर उठि धाई । कहि मृदु वचन लिए उर लाई ॥
 गोद राखि कराव पय पाना । रघुपति चरित ललित कर गाना ॥

सो०—जेहि सुख लागि पुरारि असुभ बेष कृत सिव सुखद ।

अवधपुरी नर नारि तेहि सुख महुँ संतत मगन ॥८८(क)॥

सोई सुख लवलेस जिन्ह बारक सपनेहुँ लहेउ ।

ते नहिँ गनहिँ खगेस ब्रह्मसुखहि सज्जन सुमति ॥८८(ख)॥

मैं पुनि अवध रहेउँ कछु काल । देखेउँ बालबिनोद रसाला ॥

राम प्रसाद भगति बर पायउँ । प्रभुपद बंदि निजाश्रम आयउँ ॥

तब ते मोहि न व्यापी माया । जब ते रघुनायक अपनाया ॥

यह सब गुप्त चरित मैं गावा । हरि मायाँ जिमि मोहि नचावा ॥

निज अनुभव अब कहउँ खगेसा । बिनु हरि भजन न जाहिँ कलेसा ॥

राम कृपा बिनु सुनु खगराई । जानि न जाइ राम प्रभुताई ॥

जानें बिनु न होइ परतीती । बिनु परतीति होइ नहिँ प्रीती ॥

प्रीति बिना नहिँ भगति दिदाई । जिमि खगपति जल कै चिकनाई

सो०—बिनु गुर होइ कि ग्यान ग्यान कि होइ विराग बिनु ।

गावहिँ वेद पुरान सुख किलहिअ हरि भगति बिनु ॥८९(क)॥

कोउ बिश्राम कि पाव तात सहज संतोष बिनु ।

चलै कि जल बिनु नाव कोटि जतन पचि पचि मरिअ ॥८९(ख)॥

बिनु संतोष न काम नसाहीं । काम अछत सुख सपनेहुँ नाहीं

राम भजन बिनु मिटहिँ कि कामा । थल बिहीन तरु कबहुँ कि जामा

बिनु बिश्राम कि सपना आवइ । कोउ अवकास कि नभ बिनु पावइ

अद्धा बिना धर्म नहिँ होई । बिनु महि गंध कि पावइ कोई ॥

बिनु तप तेज कि कर बिस्तारा । जल बिनु रस कि होइ संसारा ॥
 सील कि मिल बिनु बुध सेवकाई । जिमि बिनु तेज न रूप गोसाँई ॥
 निज सुख बिनु मन होइ कि थीरा । परस कि होइ बिहीन समीरा ॥
 कवनिउ सिद्धि कि बिनु बिस्वासा । बिनु हरि भजन न भव भय नासा
 दो०—बिनु बिस्वास भगति नहिं तेहि बिनु द्रवहिं न रामु ।

राम कृपा बिनु सपनेहुँ जीव न लह बिश्रामु ॥९०(क)॥

सो०—अस बिचारि मतिधीर तजि कुतर्क संसय सकल ।

भजहु राम रघुबीर करुनाकर सुंदर सुखद ॥९०(ख)॥

निज मति सरिस नाथ मैं गाई । प्रभु प्रताप महिमा खगराई ॥
 कहेउँ न कछु करि जुगुति विसेषी । यह सब मैं निज नयनन्हि देखी
 महिमा नाम रूप गुन गाथा । सकल अमित अनंतर रघुनाथा ॥
 निज निज मति मुनि हरि गुन गावहिं । निगम सेव सिव पार न पावहिं
 तुम्हहि आदि खग मसक प्रजंता । नभ उड़ाहिं नहिं पावहिं अंता ॥
 तिमि रघुपति महिमा अवगाहा । तात कवहुँ कोउ पाव कि थाहा ॥
 रामु काम सत कोटि सुभग तन । दुर्गा कोटि अमित अरि मर्दन ॥
 सक्र कोटि सत सरिस बिलासा । नभ सत कोटि अमित अवकासा
 दो०—मरुत कोटि सत विपुल बल रवि सत कोटि प्रकास ।

ससि सत कोटि सुसीतल समन सकल भव त्रास ॥९१(क)॥

काल कोटि सत सरिस अति दुस्तर दुर्ग दुर्गंत ।

धूमकेतु सत कोटि सम दुराधरष भगवंत ॥९१(ख)॥

प्रभु अगाध सत कोटि पताला । समन कोटि सत सरिस कराला ॥
 तीरथ अमित कोटि सम पावन । नाम अखिल अघ पूग नसावन
 हिमगिरि कोटि अचल रघुबीरा । सिंधु कोटि सत सम गंभीरा ॥
 कामधेनु सत कोटि समाना । सकल काम दायक भगवाना ॥
 सारद कोटि अमित चतुराई । विधि सत कोटि सृष्टि निपुनाई ॥
 बिष्णु कोटि सम पालन कर्ता । रुद्र कोटि सत सम संहर्ता ॥
 धनद कोटि सत सम धनवाना । माया कोटि प्रपंच निधाना ॥
 भार धरन सत कोटि अहीसा । निरवधि निरुपम प्रभु जगदीसा ॥
 छं०—निरुपम न उपमा आन राम समान रामु निगम कहै ।
 जिमि कोटि सत खद्योत सम रवि कहत अति लघुता लहै ॥
 एहि भाँति निज निज मति बिलास मुनीस हरिहि बखानहीं ।
 प्रभु भाव गाहक अति कृपाल सप्रेम सुनि सुख मानहीं ॥
 दो०—रामु अमित गुन सागर थाह कि पावइ कोइ ।
 संतन्ह सन जस किछु सुनेउँ तुम्हहि सुनायउँ सोइ ॥९२(क)॥
 सो०—भाव बस्य भगवान सुख निधान करुना भवन ।

तजि ममता मद मान भजिअ सदा सीता रवन ॥९२(ख)॥
 सुनि मुसुंडि के वचन सुहाए । हरषित खगपति पंख फुलाए ॥
 नयन नीर मन अति हरषाना । श्रीरघुपति प्रताप उर आना ॥
 पाछिल मोह समुझि पछिताना । ब्रह्म अनादि मनुज करि माना ॥
 पुनि पुनिकाग चरन सिरुनावा । जानि राम सम प्रेम बढ़ावा ॥

गुर विनु भव निधि तरङ्ग न कोई । जौं विरंचि संकर सम होई ॥
 संसय सर्प ग्रसेउ मोहि ताता । दुखद लहरि कुतर्क बहु ब्राता ॥
 तव सरूप गारुड़ि रघुनायक । मोहि जिआयउ जन सुख दायक ॥
 तव प्रसाद मम मोह नसाना । राम रहस्य अनूपम जाना ॥

दो०—ताहि प्रसंसि विविधि विधि सीस नाइ कर जोरि ।

बचन बिनीत सप्रेम भृदु बोलेउ गरुड़ बहोरि ॥९३(क)॥

प्रभु अपने अविवेक ते बूझउँ स्वामी तोहि ।

कृपासिंधु सादर कहहु जानि दास निज मोहि ॥९३(ख)॥

तुम्ह सर्वग्य तग्य तम पारा । सुमति सुसील सरल आचारा ॥
 ग्यान बिरति विग्यान निवासा । रघुनायक के तुम्ह प्रिय दासा ॥
 कारन कवन देह यह पाई । तात सकल मोहि कहहु बुझाई ॥
 राम चरित सर सुंदर स्वामी । पायहु कहाँ कहहु नभगामी ॥
 नाथ सुना मैं अस सिव पाहीं । महा प्रलयहुँ नास तव नाहीं ॥
 मुधा बचन नहिँ ईस्वर कहई । सोउ मोरें मन संसय अहई ॥
 अग जग जीव नाग नर देवा । नाथ सकल जगु काल कलेवा ॥
 अंड कटाह अमित लय कारी । कालु सदा दुरतिक्रम भारी ॥

सो०—तुम्हहि न ब्यापत काल अति कराल कारन कवन ।

मोहि सो कहहु कृपाल ग्यान प्रभाव किजोग बल ॥९४(क)॥

दो०—प्रभु तव आश्रम आएँ सोर मोह भ्रम भाग ।

कारन कवन सो नाथ सब कहहु सहित अनुराग ॥९४(ख)॥

गरुड़ गिरा सुनि हरषेउ कागा । बोलेउ उमा परम अनुरागा ॥
 धन्य धन्य तव मति उरगारी । प्रसन्न तुम्हारि मोहि अति प्यारी ॥
 सुनि तव प्रसन्न सप्रेम सुहाई । बहुत जन्म कै सुधि मोहि आई ॥
 सब निज कथा कहउँ मैं गाई । तात सुनहु सादर मन लाई ॥
 जप तप मख सम दम व्रत दाना । विरति विवेक जोग विग्याना ॥
 सब कर फल रघुपति पद प्रेमा । तेहि बिनु कोउ न पावइ छेमा ॥
 एहिं तन राम भगति मैं पाई । ताते मोहि ममता अधिकाई ॥
 जेहि तैं कछु निज स्वारथ होई । तेहि पर ममता कर सब कोई ॥
 सो०—पन्नगारि असि नीति श्रुति संमत सज्जन कहहिं ।
 अति नीचहु सन प्रीति करिअ जानि निज परम हित ॥९५(क)॥
 पाट कीट तैं होइ तेहि तैं पाटंबर रुचिर ।
 कृमि पालइ सबु कोइ परम अपावन ग्राह सम ॥९५(ख)॥
 स्वारथ साँच जीव कहूँ एहा । मन क्रम बचन राम पद नेहा ॥
 सोइ पावन सोइ सुभग सरीरा । जो तनु पाइ भजिअ रघुबीरा ॥
 राम बिमुख लहि विधि सम देही । कबि कोविद न प्रसंसहिं तेही ॥
 राम भगति एहिं तन उर जामी । ताते मोहि परम प्रिय स्वामी ॥
 तजउँ न तन निज इच्छा मरना । तन बिनु बेद भजन नहिं बरना ॥
 प्रथम मोहूँ मोहि बहुत बिगोवा । राम बिमुख सुख कबहुँ न सोवा ॥
 नाना जन्म कर्म पुनि नाना । किए जोग जप साध मख दाना ॥
 कवन जोनि जनमेउँ जहूँ नाहीं । मैं खगोस भ्रमि भ्रमि जग माहीं ॥

देखेउँ करि सब करम गोसाईं । सुखी न भयउँ अबहिं कि नाई ॥
 सुधि मोहि नाथ जन्म बहु केरी । सिव प्रसाद मति मोहँ न घेरी ॥
 दो०—प्रथम जन्म के चरित अब कहउँ सुनहु बिहगोस ।

सुनि प्रभु पद रति उपजइ जातें मिटहिं कलैस ॥९६(क)॥

पूख कल्प एक प्रभु जुग कलिजुग मल मूल ।

नर अरु नारि अधर्म रत सकल निगम प्रतिकूल ॥९६(ख)॥

तोह कलिजुग कोसलपुर जाई । जन्मत भयउँ सूद्र तनु पाई ॥
 सिव सेवक मन क्रम अरु बानी । आन देव निंदक अभिमानी ॥
 धन मद मत्त परम बाचाला । उग्र बुद्धि उर दंभ विसाला ॥
 जदपि रहेउँ रघुपति रजधानी । तदपि न कछु महिमा तब जानी ॥
 अब जाना मैं अवध प्रभावा । निगमागम पुरान अस गावा ॥
 कवनेहुँ जन्म अवध बस जोई । राम परायन सो परि होई ॥
 अवध प्रभाव जान तब प्रानी । जब उर बसहिं रामु धनुपानी ॥
 सो कलिकाल कठिन उरगारी । पाप परायन सब नर नारी ॥

दो०—कलिमल असे धर्म सब लुप्त भए सदग्रंथ ।

दंभिन्ह निज मति कलिप करि प्रगट किए बहु पंथ ॥९७(क)॥

भए लोग सब मोहबस लोभ असे सुभ कर्म ।

सुनु हरिजान ग्यान निधि कहउँ कछुक कलिधर्म ॥९७(ख)॥

बुरन धर्म नहिं आश्रम चारी । श्रुति विरोध रत सब नर नारी ॥

द्विज श्रुति बेचक भूप प्रजासन । कोउ नहिं मान निगम अनुसासन ॥

मारग सोइ जा कहूँ जोइ भावा । पंडित सोइ जो गाल बजावा ॥
 मिथ्यारंभ दंभ रत जोई । ता कहूँ संत कहइ सब कोई ॥
 सोइ सयान जो परधन हारी । जो कर दंभ सो बड़ आचारी ॥
 जो कह झूठ मसखरी जाना । कलिजुग सोइ गुनवंत बखाना ॥
 निराचार जो श्रुति पथ त्यागी । कलिजुग सोइ ग्यानी सो बिरागी ॥
 जाकैं नख अरु जटा बिसाला । सोइ तापस प्रसिद्ध कलिकाला ॥

दो०—असुभ वेष भूषन धरें भच्छाभच्छ जे खाहिं ।

तेइ जोगी तेइ सिद्ध नर पूज्य ते कलिजुग माहिं ॥९८(क)॥

सो०—जे अपकारी चार तिन्ह कर गौरव मान्य तेइ ।

मन क्रम बचन लबार तेइ बकता कलिकाल महुँ ॥९८(ख)॥

नारि बिप्रस नर सकल गोसाईं । नाचहिं नट मर्कट की नाई ॥
 सूद्र द्विजन्ह उपदेसहिं ग्याना । मेलि जनेऊ लेहिं कुदाना ॥
 सब नर काम लोभ रत क्रोधी । देव बिप्र श्रुति संत विरोधी ॥
 गुन मंदिर सुंदर पति त्यागी । भजहिं नारि परपुरुष अभागी ॥
 सौभागिनीं विभूषन हीना । विधवन्ह के सिंगार नवीना ॥
 गुर सिष बधिर अंध कालेखा । एक न सुनइ एक नहिं देखा ॥
 हरइ सिष्य धन सोक न हरई । सो गुर घोर नरक महुँ परई ॥
 मातु पिता बालकन्ह बोलावहिं । उदर भरै सोइ धर्म सिखावहिं ॥

दो०—बड़ा ग्यान बिनु नारि नर कहहिं न दूसरि बात ।

कौड़ी लागि लोभ बस करहिं बिप्र गुर घात ॥९९(क)॥

बादहिं सूद्र द्विजन्ह सन हम तुम्ह ते कछु घाटि ।

जानइ ब्रह्म सो बिप्रवर आँखि देखावहिं डाटि ॥९९(ख)॥

पर त्रिय लंपट कपट सयाने । मोह द्रोह ममता लपटाने ॥

तेइ अभेदवादी ग्यानी नर । देखा मैं चरित्र कलिजुग कर ॥

आपु गए अरु तिन्हू घालहिं । जे कहूँ सत मारग प्रतिपालहिं ॥

कल्प कल्प भरि एक एक नरका । परहिं जे दूषहिं श्रुति करि तरका ॥

जे वरनाधम तेलि कुम्हारा । स्वपच किरात कोल कलवारा ॥

नारिं मुई गृह संपति नासी । मूढ़ मुड़ाइ होहिं संन्यासी ॥

तेविप्रन्ह सन आपु पुजावहिं । उभय लोक निज हाथ नसावहिं ॥

बिप्र निरच्छर लोलुप कामी । निराचार सठ बृषली स्वामी ॥

सूद्र करहिं जप तप व्रत नाना । बैठि बरासन कहहिं पुराना ॥

सब नर कल्पित करहिं अचारा । जाइ न बरनि अनीति अपारा ॥

दो०—भए बरन संकर कलि भिन्नसेतु सब लोग ।

करहिं पाप पावहिं दुख भय रुज सोक बियोग ॥१००(क)॥

श्रुति संमत हरि भक्ति पथ संजुत बिरति बिवेक ।

तेहिं न चलहिं नर मोह बस कल्पहिं पंथ अनेक ॥१००(ख)॥

छं०—बहु दाम सँवारहिं धाम जती । विषया हरि लीन्हि न रहि बिरती

तपसी धनवंत दरिद्र गृही । कलि कौतुक तात न जात कही ॥

कुलवर्ति निकासहिं नारि सती । गृह आनहिं चेरि निवेरि गती ॥

सुत मानहिं मातु पिता तब लौं । अबलानन दीख नहीं जब लौं ॥

ससुरारि पिआरि लगी जब तें । रिपुरूप कुटुंब भए तब तें ॥
 नृप पाप परायन धर्म नहीं । करि दंड बिडंब प्रजा नितहीं ॥
 धनवंत कुलीन मलीन अपी । द्विज चिन्ह जनेउ उधार तपी ॥
 नहिं मान पुरान न वेदहि जो । हरि सेवक संत सही कलि सो ॥
 कवि बृंद उदार दुनी न सुनी । गुन दूषक ब्रात न कोपि गुनी ॥
 कलि बारहिं बार दुकाल परै । बिनु अन्न दुखी सब लोग मरै ॥

दो०—सुनु खगोस कलि कपट हठ दंभ द्वेष पाषंड ।

मान मोह मारादि मद व्यापि रहे ब्रह्मांड ॥१०१(क)॥

तामस धर्म करहिं नर जप तप व्रत मख दान ।

देव न बरषहिं धरनीं बए न जामहिं धान ॥१०१(ख)॥

छं०—अबला कच भूषन भूरि छुधा । धनहीन दुखी ममता बहुधा
 सुख चाहहिं मूढ़ न धर्म रता । मति थोरि कठोरि न कोमलता ॥१॥
 नर पीडित रोग न भोग कहीं । अभिमान बिरोध अकारनहीं ॥
 लघु जीवन संबतु पंच दसा । कलपांत न नास गुमानु असा ॥२॥
 कलिकाल बिहाल किए मनुजा । नहिं मानत कौ अनुजा तनुजा ॥
 नहिं तोष बिचार न सीतलता । सब जाति कुजाति भए मगता ॥३॥
 इरिषा परुषाच्छर लोलुपता । भरि पूरि रही समता विगता ॥
 सब लोग बियोग बिसोक हए । बरनाश्रम धर्म अचार गए ॥४॥
 दम दान दया नहिं जानपनी । जड़ता परबं चेतनसि भवति ॥
 तनु पोषक नारि नरा सगरे । परनिंदक जे जग सो बगरे ॥५॥

दो०—सुनु व्यालारि काल कलि मल अवगुन आगार ।

गुनउ बहुत कलिजुग कर बिनु प्रयास निस्तार ॥१०२(क)॥

कृतजुग त्रेताँ द्वापर पूजा मख अरु जोग ।

जो गति होइ सो कलि हरि नाम ते पावहि लोग ॥१०२(ख)॥

कृतजुग सब जोगी विग्यानी । करि हरि ध्यान तरहि भव प्रानी ॥

त्रेताँ विविध जग्य नर करहीं । प्रभुहि समर्पि कर्म भव तरहीं ॥

द्वापर करि रघुपति पद पूजा । नर भव तरहि उपाय न दूजा ॥

कलिजुग केवल हरि गुन गाहा । गावत नर पावहि भव थाहा ॥

कलिजुग जोग न जग्य न ग्याना । एक अधार राम गुन गाना ॥

सब भरोस तजि जो भज रामहि । प्रेम समेत गाव गुन ग्रामहि ॥

सोइ भव तर कछु संसय नार्हीं । नाम प्रताप प्रगट कलि माहीं ॥

कलि कर एक पुनीत प्रतापा । मानस पुन्य होहि नहि पापा ॥

दो०—कलिजुग सम जुग आन नहि जौ नर कर बिस्वास ।

गाइ राम गुन गन बिमल भव तर बिनहि प्रयास ॥१०३(क)॥

प्रगट चारि पद धर्म के कलि महुँ एक प्रधान ।

जेन केन बिधि दीन्हें दान करइ कल्याण ॥१०३(ख)॥

नित जुग धर्म होहि सब केरे । हृदयँ राम माया के प्रेरे ॥

सुद्ध सत्य समता विग्याना । कृत प्रभाव प्रसन्न मन जाना ॥

सत्य बहुत रज कछु रति कर्मा । सब बिधि सुख तेरा कर भार्या ॥

बहु रज स्वल्प सत्व कछु तामस । द्वापर धर्म हरष भय मानस ॥

तामस बहुत रजोगुन थोरा । कलि प्रभाव विरोध चहुँ ओरा ॥
 बुध जुग धर्म जानि मन माहीं । तजि अधर्म रति धर्म कराहीं ॥
 काल धर्म नहिं व्यापहिं ताही । रघुपति चरन प्रीति अति जाही ॥
 नट कृत विकट कपट खगराया । नट सेवकहि न व्यापइ माया ॥

दो०—हरि माया कृत दोष गुन बिनु हरि भजन न जाहिं ।

भजिअ राम तजि काम सब अस विचारि मन माहिं ॥ १०४(क) ॥

तेहिं कलिकाल बरष बहु बसेउँ अवध बिहगेस ।

परेउ दुकाल विपति बस तब मैं गयउँ बिदेस ॥ १०४(ख) ॥

गयउँ उजेनी सुनु उरगारी । दीन मलीन दरिद्र दुखारी ॥

गएँ काल कछु संपति पाई । तहँ पुनि करउँ संभु सेवकाई ॥

बिप्र एक वैदिक सिव पूजा । करइ सदा तेहि काजु न दूजा ॥

परम साधु परमारथ बिंदक । संभु उपासक नहिं हरि निंदक ॥

तेहि सेवउँ मैं कपट समेता । द्विज दयाल अति नीति निकेता ॥

बाहिज नम्र देखि मोहि साई । बिप्र पढ़ाव पुत्र की नाई ॥

संभु मंत्र मोहि द्विजवर दीन्हा । सुभ उपदेस विविध विधि कीन्हा ॥

जपउँ मंत्र सिव मंदिर जाई । हृदयँ दंभ अहमिति अधिकाई ॥

दो०—मैं खल मल संकुल मति नीच जाति बस मोह ।

हरि जन द्विज देखें जरउँ करउँ बिष्णु कर द्रोह ॥ १०५(क) ॥

दो०—गुर नित मोहि प्रबोध दुखित देखि आचरण सम ।

मोहि उपजइ अति क्रोध दंभिहि नीति कि भावई ॥ १०५(ख) ॥

एक बार गुर लीन्ह बोलाई। मोहि नीति बहु भाँति सिखाई ॥
 सिव सेवा कर फल सुत सोई। अविरल भगति राम पद होई ॥
 रामहिं भजहिं तात सिव धाता। नर पावँर कै केतिक बाता ॥
 जासु चरन अज सिव अनुरागी। तासु द्रोहँ सुख चहसि अभागी ॥
 हर कहँ हरि सेवक गुर कहेऊ। सुनि खगनाथ हृदय मम दहेऊ ॥
 अधम जाति मैं विद्या पाएँ। भयउँ जथा अहि दूध पिआएँ ॥
 मानी कुटिल कुभाग्य कुजाती। गुर कर द्रोह करउँ दिनु राती ॥
 अति दयाल गुर स्वल्प न क्रोधा। पुनि पुनि मोहि सिखाव सुबोधा ॥
 जेहि ते नीच बढ़ाई पावा। सो प्रथमहिं हति ताहि नसावा ॥
 धूम अनल संभव सुनु भाई। तेहि बुझाव घन पदवी पाई ॥
 रज मग परी निरादर रहई। सब कर पद प्रहार नित सहई ॥
 मरुत उड़ाव प्रथम तेहि भरई। पुनि नृप नयन किरीटन्हि परई ॥
 सुनु खगपति अस समुझि प्रसंगा। बुध नहिं करहिं अधम कर संगा ॥
 कवि कोविद गावहिं असि नीती। खल सन कलह न भल नहिं प्रीती ॥
 उदासीन नित रहिअ गोसाईं। खल परिहरिअ स्वान की नाई ॥
 मैं खल हृदयँ कपट कुटिलाई। गुर हित कहइ न मोहि सोहाई ॥

दो०—एकवार हर मंदिर जपत रहेउँ सिव नाम ।

गुर आयउ अभिमान तें उठि नहिं कीन्ह प्रनाम ॥१०६(क)॥

सो दयाल नहिं कहेउ कहु उर न रोष लवलेस ।

अति अध गुर अपमानता सहि नहिं सके महेस ॥१०६(ख)॥

मंदिर माझ भई नम बानी। रेहतभाग्य अग्य अभिमानी ॥
 जद्यपि तव गुर कैं नहिं क्रोधा। अति कृपालचित सम्यक बोधा ॥
 तदपि साप सठ दैहउँ तोही। नीति बिरोध सोहाइ न मोही ॥
 जौ नहिं दंड करौ खल तोरा। भ्रष्ट होइ श्रुतिमारग मोरा ॥
 जे सठ गुर सन इरिषा करहीं। रौरव नरक कोटि जुग परहीं ॥
 त्रिजग जोनि पुनि धरहिं सरीरा। अयुत जन्म भरि पावहिं पीरा ॥
 बैठ रहेसि अजगर इव पापी। सर्प होहि खल मल मति व्यापी ॥
 महा बिटप कोटर महुँ जाई। रहु अधमाधम अधगति पाई ॥

दो०—हाहाकार कीन्ह गुर दारुन सुनि सिव साप ।

कंपित मोहि बिलोकि अति उर उपजा परिताप ॥१०७(क)॥

करि दंडवत सप्रेम द्विज सिव सन्मुख कर जोरि ।

बिनय करत गदगद स्वर समुझि घोर गति मोरि ॥१०७(ख)॥

नमामीशमीशान निर्वाणरूपं। विभुं व्यापकं ब्रह्म वेदस्वरूपं ॥
 निजं निर्गुणं निर्विकल्पं निरीहं। चिदाकाशमाकाशवासं भजेऽहं ॥
 निराकारमोंकारमूलं तुरीयं। गिराग्यानगोतीतमीशं गिरीशं ॥
 करालं महाकालकालं कृपालं। गुणागार संसारपारं नतोऽहं ॥
 तुषाराद्रि संकाश गौरं गभीरं। मनोभूत कोटि प्रभा श्री शरीरं ॥
 स्फुरन्मौलिकल्लोलिनी चारुंगा। लसद्भालवालेंदु कंठे भुजंगा ॥
 चक्षुःकुण्डलं भ्रू सुमेधं विशालं। प्रसन्नाननं नीलकंठं दयालं ॥
 मृगाधीशचर्माम्बरं मुण्डमालं। प्रियं शंकरं सर्वनाथं भजामि ॥

प्रचंडं प्रकृष्टं प्रगल्भं परेशं । अखंडं अजं भानुकोटिप्रकाशं ॥
 त्रयः शूल निर्मूलनं शूलपाणिं । भजेऽहं भवानीपतिं भावगम्यं ॥
 कलातीत कल्याण कल्पांतकारी । सदा सज्जनानंददाता पुरारी ॥
 चिदानंद संदोह मोहापहारी । प्रसीद प्रसीद प्रभो मन्मथारी ॥
 न यावद् उमानाथ पादारविंदं । भजंतीह लोके परे वा नराणां ॥
 न तावत्सुखं शान्ति संतापनाशं । प्रसीद प्रभो सर्वभूताधिवासं ॥
 न जानामि योगं जपं नैव पूजां । नतोऽहं सदा सर्वदा शंभु तुभ्यं ॥
 जरा जन्मदुःखौघ तातप्यमानं । प्रभो पाहि आपन्नमामीश शंभो ॥

श्लोक—रुद्राष्टकमिदं प्रोक्तं विप्रेण हरतोषये ।

ये पठन्ति नरा भक्त्या तेषां शंभुः प्रसीदति ॥ ९ ॥

दो०—सुनि विनती सर्वग्य सिव देखि विप्र अनुरागु ।

पुनि मंदिर नभवानी भइ द्विजबर बर मागु ॥१०८(क)॥

जौं प्रसन्न प्रभु मो पर नाथ दीन पर नेहु ।

निज पद भगति देइ प्रभु पुनि दूसर बर देहु ॥१०८(ख)॥

तव माया बस जीव जड़ संतत फिरइ भुलान ।

तेहि पर क्रोध न करिअ प्रभु कृपासिंधु भगवान ॥१०८(ग)॥

संकर दीनदयाल अब एहि पर होहु कृपाल ।

साप अनुग्रह होइ जेहि नाथ थोरेहीं काल ॥१०८(घ)॥

पाहि कर होइ परस कल्याण । सोइ करहु अब कृपानिधान ॥

विप्र गिरा सुनि परहित सानी । एवमस्तु इति भइ नभवानी ॥

* रामचरितमानस *

जदपि कीन्ह एहिं दारुन पापा । मैं पुनि दीन्हि कोप करि सापा ॥
तदपि तुम्हारि साधुता देखी । करिहउँ एहि पर कृपा विसेषी ॥
छमासील जे पर उपकारी । ते द्विज मोहि प्रिय जथा खरारी ॥
मोर श्राप द्विज व्यर्थ न जाइहि । जन्म सहस अवस्य यह पाइहि ॥
जनमत मरत दुसह दुख होई । एहि स्वल्पउ नहिं व्यापिहि सोई ॥
कवनेउँ जन्म मिटिहि नहिं ग्याना । सुनहि सूद्र मम बचन प्रवाना ॥
रघुपति पुरी जन्म तव भयऊ । पुनि तैं मम सेवाँ मन दयऊ ॥
पुरी प्रभाव अनुग्रह मोरें । राम भगति उपजिहि उर तोरें ॥
सुनु मम वचन सत्य अब भाई । हरितोषन व्रत द्विज सेवकाई ॥
अब जनि करहि विप्र अपमाना । जानेसु संत अनंत समाना ॥
इंद्र कुलिस मम सूल विसाला । कालदंड हरि चक्र कराला ॥
जो इन्ह कर मारा नहिं मरई । विप्र द्रोह पावक सो जरई ॥
अस बिबेक राखेहु मन माहीं । तुम्ह कहँ जग दुर्लभ कछु नाहीं ॥
औरउ एक आसिषा मोरी । अप्रतिहत गति होइहि तोरी ॥

दो०—सुनिसिव बचन हरषि गुर एवमस्तु इति भाषि ।

मोहि प्रबोधि गयउ गृह संभु चरन उर राखि ॥ १०९ (क) ॥
प्रेरित काल बिधि गिरि जाइ भयउँ मैं व्याल ।

पुनि प्रयास बिनु सो तनु तजेउँ गएँ कछु काल ॥ १०९ (ख) ॥

जोइ तनु धरउँ तजेउँ पुनि अमायास हविजान ॥

जिमि नूतन पट पहिरइ नर परिहरइ पुरान ॥ १०९ (ग) ॥

सिखँ राखी श्रुति नीति अरु मैं नहिँ पावा क्लेस ।

एहि विधि धरेउँ बिबिधि तनु ग्यान न गयउ खगेस ॥ १०९ (घ) ॥

त्रिजग देव नर जोइ तनु धरऊँ । तहँ तहँ राम भजन अनुसरऊँ ॥

एक सूल मोहि बिसर न काऊँ । गुर कर कोमल सील सुभाऊँ ॥

चरम देह द्विज कै मैं पाई । सुर दुर्लभ पुरान श्रुति गाई ॥

खेलउँ तहूँ बालकन्ह मीला । करउँ सकल रघुनायक लीला ॥

प्रौढ़ भएँ मोहि पिता पढ़ावा । समझउँ सुनउँ गुनउँ नहिँ भावा ॥

मन ते सकल वासना भागी । केवल राम चरन लय लागी ॥

कहु खगेस अस कवन अभागी । खरी सेव सुरधेनुहि त्यागी ॥

प्रेम मगन मोहि कछु न सोहाई । हारेउ पिता पढ़ाइ पढ़ाई ॥

भए कालवस जय पितु माता । मैं बन गयउँ भजन जनत्राता ॥

जहँ जहँ विपिन मुनीखर पावउँ । आश्रम जाइ जाइ सिरु नावउँ ॥

बूझउँ तिन्हहि राम गुन गाहा । कहहिँ सुनउँ हरषित खगनाहा ॥

सुनत फिरउँ हरिगुन अनुवादा । अब्याहत गति संभु प्रसादा ॥

छूटी त्रिविधि ईषना गाढ़ी । एक लालसा उर अति बाढ़ी ॥

राम चरन बारिज जय देखौ । तब निज जन्म सफल करि लेखौ ॥

जेहि पूँछउँ सोइ मुनि अस कहई । ईस्वर सर्व भूतमय अहई ॥

निर्गुन मत नहिँ मोहि सोहाई । सगुन ब्रह्म रति उर अधिकाई ॥

दो०—गुर के बचन सुरति करि राम चरन मनु लागा ।

रघुपति जस गावत फिरउँ छन छन नव अनुराग ॥ ११० (क) ॥

* रामचरितमानस *

मेरु सिखर बट छायाँ, मुनि लोमस आसीन ।

देखि चरन सिरुनायउँ बचन कहेउँ अति दीन ॥११०(ख)॥

मुनि मम बचन बिनीत मृदु मुनि कृपाल खगराज ।

मोहि सादर पूँछत भए द्विज आयहु केहि काज ॥११०(ग)॥

तब मैं कहा कृपानिधि तुम्ह सर्बग्य सुजान ।

सगुन ब्रह्म अवराधन मोहि कहहु भगवान ॥११०(घ)॥

तब मुनीस रघुपति गुन गाथा । कहे कछुक सादर खगनाथा ॥

ब्रह्मग्यान रत मुनि विग्यानी । मोहि परम अधिकारी जानी ॥

लागे करन ब्रह्म उपदेसा । अज अद्वैत अगुन हृदयेसा ॥

अकल अनीह अनाम अरूपा । अनुभव गम्य अखंड अनूपा ॥

मन गोतीत अमल अबिनासी । निर्विकार निरवधि सुख रासी ॥

सो तैं ताहि तोहि नहिं भेदा । बारि वीचि इव गावहिं वेदा ॥

विविधि भाँति मोहि मुनि समुझावा । निर्गुन मत मम हृदयँ न आवा

पुनि मैं कहेउँ नाइ पद सीसा । सगुन उपासन कहहु मुनीसा ॥

राम भ्याति जल सम मन मीना । किमि बिलगाइ मुनीस प्रवीना ॥

सोइ उपदेस कहहु करि दाया । निज नयनन्हि देखौं रघुराया ॥

भरि लोचन बिलोकि अवधेसा । तब सुनिहउँ निर्गुन उपदेसा ॥

मुनि पुनि कहि हरिकथा अनूपा । खंडि सगुन मत अगुन निरूपा ॥

तब मैं निर्गुन मत कर बूझी । सगुन निरूपउँ करि हठ भूझी ॥

उत्तर प्रतिउत्तर मैं कीन्हा । मुनि तन भए क्रोध के चीन्हा ॥

सुनु प्रभु बहुत अवग्या किएँ । उपज क्रोध ग्यानिन्ह केहिऐँ ॥
अति संघरषन जौँ कर कोई । अनल प्रगट चंदन ते होई ॥

दो०—बारं बार सकोप मुनि करइ निरूपन ग्यान ।

मैं अपनैँ मन बैठ तब करउँ बिबिधि अनुमान ॥१११(क)॥

क्रोध कि द्वैतबुद्धि बिनु द्वैत कि बिनु अग्यान ।

मायाबस परिछिन्न जड़ जीव कि ईस समान ॥१११(ख)॥

कबहुँ कि दुख सय कर हित तार्के । तेहि कि दरिद्र परस मनि जाकेँ
परद्रोही की होहिं निसंका । कामी पुनि कि रहहिं अकलंका ॥
बंस कि रह द्विज अनहित कीन्हें । कर्म कि होहिं स्वरूपहि चीन्हें ॥
काहू सुमति कि खल सँग जामी । सुभ गति पाव कि परत्रियगामी
भव कि परहिं परमात्मा बिंदक । सुखी कि होहिं कबहुँ हरिनिंदक
राजु कि रहइ नीति बिनु जानें । अघ कि रहहिं हरि चरित बखानें
पावन जस कि पुन्य बिनु होई । बिनु अघ अजस कि पावइ कोई ॥
लाभु कि किछु हरि भगति समाना । जेहि गावहिं श्रुति संत पुराना ॥
हानि कि जग एहि सम किछु भाई । भजिअ न रामहि नर तनु पाई ॥
अघ कि पिमुनता सम कछु आना । धर्म कि दया संरिस हरिजाना ॥
एहि बिधि अमिति जुगुति मन गुनऊँ । मुनि उपदेस न सादर सुनऊँ
पुनि पुनि सगुन पच्छ मैं रोपा । तब मुनि बोलेउ बचन सकोपा ॥
मूढ़ पावस सिख देखैँ न मानसि । उत्तर प्रतिउत्तर बहु आनसि ।
सत्य बचन बिस्वास न करही । बायस इव सबही ते डरही ॥

ठ स्वपच्छ तव हृदयँ विसाला । सपदि होहि पच्छी चंडाला ॥
 गीन्ह श्राप मैं सीस चढ़ाई । नहिं कछु भय न दीनता आई ॥

श्री०—तुरत भयउँ मैं काग तब पुनि मुनि पद सिरु नाइ ।

सुमिरि राम रघुवंस मनि हरषित चलेउँ उड़ाइ ॥११२(क)॥

उमा जे राम चरन रत बिगत काम मद क्रोध ।

निज प्रभुमय देखहिं जगत केहि सन करहिं बिरोध ॥११२(ख)॥

सुनु खगेस नहिं कछु रिषि दूषन । उर प्रेरक रघुवंस विभूषन ॥

कृपासिंधु मुनि मति करि भोरी । लीन्ही प्रेम परिच्छा मोरी ॥

मन बच क्रम मोहि निज जन जाना । मुनि मति पुनि फेरी भगवाना ॥

रिषि मम महत सीलता देखी । राम चरन विस्वास बिसेषी ॥

अति बिसमय पुनि पुनि पछिताई । सादर मुनि मोहि लीन्ह बोलाई ॥

मम परितोष विविधि विधि कीन्हा । हरषित राममंत्र तब दीन्हा ॥

बालकरूप राम कर ध्याना । कहेउ मोहि मुनि कृपानिधाना ॥

सुंदर सुखद मोहि अति भावा । सो प्रथमहिं मैं तुम्हहि सुनावा ॥

मुनि मोहि कछुक काल तहँ राखा । रामचरितमानस तब भाषा ॥

सादर मोहि यह कथा सुनाई । पुनि बोले मुनि गिरा सुहाई ॥

रामचरित सर गुप्त सुहावा । संभु प्रसाद तात मैं पावा ॥

निज भगत राम कर जानी । ताते मैं सब कहेउँ बखानी ॥

तजिन्ह के उर नाहीं । कबहुँ न तात कहि अतिन्ह पाहीं ॥

उ ॥ विविधि भाँति समुझावा । मैं सप्रेम मुनि पद सिरु नावा ॥

निज कर कमल परसि मम सीसा । हरषित आसिष दीन्ह मुनीसा ॥
 राम भगति अविरल उर तोरें । वसिहि सदा प्रसाद अब मोरें ॥
 दो०—सदा राम प्रिय होहु तुम्ह सुभ गुन भवन अमान ।

कामरूप इच्छामरन ग्यान बिराग निधान ॥११३(क)॥

जेहि आश्रम तुम्ह बसब पुनि सुमिरत श्रीभगवंत ।

व्यापिहि तहँ न अबिद्या जोजन एक प्रजंत ॥११३(ख)॥

काल कर्म गुन दोष सुभाऊ । कछु दुख तुम्हहि न व्यापिहि काऊ
 राम रहस्य ललित बिधि नाना । गुप्त प्रगट इतिहास पुराना ॥
 विनु श्रम तुम्ह जानब सब सोऊ । नित नव नेह राम पद होऊ ॥
 जो इच्छा करिहहु मन माहीं । हरि प्रसाद कछु दुर्लभ नाहीं ॥
 सुनि मुनि आसिष सुनु मतिधीरा । ब्रह्मगिरा भइ गगन गँभीरा ॥
 एवमस्तु तव बच मुनि ग्यानी । यह मम भगत कर्म मन बानी ॥
 सुनि नभगिरा हरष मोहि भयऊ । प्रेम मगन सब संसय गयऊ ॥
 करि विनती मुनि आयसु पाई । पद सरोज पुनि पुनि सिरु नाई ॥
 हरष सहित एहि आश्रम आयउँ । प्रभु प्रसाद दुर्लभ बर पायउँ ॥
 इहाँ बसत मोहि सुनु खग ईसा । बीते कल्प सात अरु बीसा ॥
 करउँ सदा रघुपति गुन गाना । सादर सुनहिं विहंग सुजाना ॥
 जव जव अवधपुरी रघुबीरा । घरहिं भगत हित मनुज सरीरा ॥
 तव तव जाइ राम पुर रहऊँ । सिसुलीला बिलोकि सुख लहऊँ ॥
 पुनि उर राखि राम सिसुरूपा । निज आश्रम आवउँ खगभूपा ॥
 कथा सकल मैं तुम्हहि सुनाई । काग देह जेहिं कारन पाई ॥
 कहिउँ तात सब प्रसन्न तुम्हारी । राम भगति महिमा अति भारी ॥

दो०—ताते यह तन मोहि प्रिय भयउ राम पद नेह ।

निज प्रभु दरसन पायउँ गए सकल संदेह ॥११४(क)॥

मासपारायण, उन्तीसवाँ विश्राम

भगति पच्छ हठ करि रहेउँ दीन्हि महारिषि साप ।

मुनि दुर्लभ बर पायउँ देखहु भजन प्रताप ॥११४(ख)॥

जे असि भगति जानि परिहरहीं । केवल ग्यान हेतु श्रम करहीं ॥
 ते जड़ कामधेनु गृहँ त्यागी । खोजत आकु फिरहिं पय लागी ॥
 सुनु खगेस हरि भगति विहाई । जे सुख चाहहिं आन उपाई ॥
 ते सठ महासिंधु विनु तरनी । पैरि पार चाहहिं जड़ करनी ॥
 मुनि भसुंढि के बचन भवानी । बोलेउ गरुड़ हरषि मृदु बानी ॥
 तव प्रसाद प्रभु मम उर माहीं । संसय सोक मोह भ्रम नाहीं ॥
 सुनेउँ पुनीत राम गुन ग्रामा । तुम्हरी कृपाँ लहेउँ विश्रामा ॥
 एक बात प्रभु पूँछउँ तोही । कहहु बुझाइ कृपानिधि मोही ॥
 कहहिं संत मुनि वेद पुराना । नहिं कछु दुर्लभ ग्यान समाना ॥
 सोइ मुनि तुम्ह सन कहेउ गोसाई । नहिं आदरेहु भगति की नाई ॥
 ग्यानहि भगतिहि अंतर केता । सकल कहहु प्रभु कृपा निकेता ॥
 मुनि उरगारि बचन सुख माना । सादर बोलेउ काग सुजाना ॥
 भगतिहि ग्यानहि नहिं कछु भेदा । उभय हरहिं भव संभव खेदा ॥
 साय मुनीस कहहिं कछु अंतर । सावधान सोउ सुन विहंगवर ॥
 ग्यान विराग जोग विग्याना । ए सब पुरुष सुनहु हरिजाना ॥

पुरुष प्रताप प्रबल सब भाँती । अबला अबल सहज जड़ जाती ॥
दो०—पुरुष त्यागि सक नारिहि जो बिरक्त मति धीर ।

न तु कामी बिषयाबस बिमुख जो पद रघुबीर ॥ ११५ (क) ॥
सो०—सोउ मुनि ग्याननिधान मृगनयनी बिधु मुख निरखि ।

बिबस होइ हरिजान नारिबिष्णु माया प्रगट ॥ ११५ (ख) ॥
इहाँ न पच्छपात कछु राखउँ । वेद पुरान संत मत भाषउँ ॥
मोह न नारि नारि कै रूपा । पन्नगारि यह रीति अनूपा ॥
माया भगति सुनहु तुम्ह दोऊ । नारि बर्ग जानइ सब कोऊ ॥
पुनि रघुबीरहि भगति पिआरी । माया खलु नर्तकी विचारी ॥
भगतिहि सानुकूल रघुराया । ताते तेहि डरपति अति माया ॥
राम भगति निरुपम निरुपाधी । वसइ जासु उर सदा अबाधी ॥
तेहि बिलोकि माया सकुचाई । करि न सकइ कछु निज प्रभुताई ॥
अस विचारि जे मुनि बिग्यानी । जाचहिं भगति सकल सुख खानी

दो०—यह रहस्य रघुनाथ कर बेगिन जानइ कोइ ।

जो जानइ रघुपति कृपाँ सपनेहुँ मोह न होइ ॥ ११६ (क) ॥

औरउ ग्यान भगति कर भेद सुनहु सुप्रबीन ।

जो सुनि होइ राम पद प्रीति सदा अबिछीन ॥ ११६ (ख) ॥

सुनहु तात यह अकथ कहानी । समुझत बनइ न जाइ बखानी ॥

ईसर आंस जीव अबिनासी । चेतन अमल सहज सुख ससी ॥

सो मायाबस भयउ गोसाई । बँध्यो कीर मरकट की नाँ ॥

जड़ चेतनहि ग्रंथि परि गई। जदपि मृषा छूटत कठिनई ॥
 तब ते जीव भयउ संसारी। छूट न ग्रंथि न होइ सुखारी ॥
 श्रुति पुरान बहु कहेउ उपाई। छूट न अधिक अधिक अरुझाई ॥
 जीव हृदयँ तम मोह बिसेषी। ग्रंथि छूट किमि परइ न देखी ॥
 अस संजोग ईस जब करई। तबहुँ कदाचित सो निरुअरई ॥
 सात्त्विक श्रद्धा धेनु सुहाई। जौ हरि कृपाँ हृदयँ बस आई ॥
 जप तप व्रत जम नियम अपारा। जे श्रुति कह सुभ धर्म अचारा ॥
 तेइ तृन हरित चरै जब गाई। भाव बच्छ सिसु पाइ पेन्हाई ॥
 नोइ निवृत्ति पात्र विस्वासा। निर्मल मन अहीर निज दासा ॥
 परम धर्ममय पय दुहि भाई। अवटै अनल अकाम बनाई ॥
 तोष मरुत तब छमाँ जुड़ावै। धृति सम जावनु देइ जमावै ॥
 मुदिताँ मथै विचार मथानी। दम अघार रजु सत्य सुबानी ॥
 तब मथि काढ़ि लेइ नवनीता। विमल विराग सुभग सुपुनीता ॥

दो०—जोग अगिनि करि प्रगट तब कर्म सुभासुभ लाइ ।

बुद्धि सिरावै ग्यान घृत समता मल जरि जाइ ॥ ११७ (क) ॥

तब बिग्यानरूपिनी बुद्धि बिसद घृत पाइ ।

चित्त दिआ भरि धरै दृढ़ समता दिअटि बनाइ ॥ ११७ (ख) ॥

तीनि अवस्था तीनि गुन तेहि कपास तें काढ़ि ।

तू ल तुरीय सँवारि पुनि बाती करै सुगाढ़ि ॥ ११७ (ग) ॥

सो०—एहि विधि लेसै दीप तेज रासि विग्यानमय ।

जातहिं जासु समीप जरहिं मदादिक सलभ सब ॥ ११७ (घ) ॥

सोहमस्मि इति वृत्ति अखंडा । दीप सिखा सोइ परम प्रचंडा ॥

आतम अनुभव सुख सुप्रकासा । तब भव मूल भेद भ्रम नासा ॥

प्रबल अविद्या कर परिवारा । मोह आदि तम मिटइ अपारा ॥

तब सोइ बुद्धि पाइ उँजिआरा । उर गृहँ बैठि ग्रंथि निरुआरा ॥

छोरन ग्रंथि पाव जौँ सोई । तब यह जीव कृतारथ होई ॥

छोरत ग्रंथि जानि खगराया । बिघ्न अनेक करइ तब माया ॥

रिद्धि सिद्धि प्रेरइ बहु भाई । बुद्धिहि लोभ दिखावहिं आई ॥

कल बल छल करि जाहिं समीपा । अंचल बात बुझाअहिं दीपा ॥

होइ बुद्धि जौँ परम सयानी । तिन्ह तन चितव न अनहित जानी ॥

जौँ तेहि बिघ्न बुद्धि नहिं बाधौ । तौ बहोरि सुर करहिं उपाधौ ॥

इंद्री द्वार झरोखा नाना । तहँ तहँ सुर बैठे करि थाना ॥

आवत देखहिं विषय बयारी । ते हठि देहिं कपाट उघारी ॥

जब सो प्रभंजन उर गृहँ जाई । तबहिं दीप विग्यान बुझाई ॥

ग्रंथि न छूटि मिटा सो प्रकासा । बुद्धि बिकल भइ विषय बतासा ॥

इंद्रिन्ह सुरन्ह न ग्यान सोहाई । विषय भोग पर प्रीति सदाई ॥

विषय समीर बुद्धि कृत भोरी । तेहि विधि दीप को बार बहोरी ॥

दो०—तब फिरि जीव बिबिधि विधि पावइ संसृति क्लेस ।

हरि माया अति दुस्तर तरि न जाइ बिहगोस ॥ ११८ (क) ॥

कहत कठिन समुझत कठिन साधत कठिन बिबेक ।

होइ घुनाच्छर न्याय जौ पुनि प्रत्यूह अनेक ॥११८(ख)॥

ग्यान पंथ कृपान कै धारा । परत खगेस होइ नहिं बारा ॥
जो निर्विघ्न पंथ निर्वहई । सो कैवल्य परम पद लहई ॥
अति दुर्लभ कैवल्य परम पद । संत पुरान निगम आगम ब्रह्म ॥
राम भजत सोइ मुकुति गोसाई । अनइच्छित आवइ बरिआई ॥
जिमि थल बिनु जल रहि न सकाई । कोटि भाँति कोउ करै उपाई ॥
तथा मोच्छ सुख सुनुं खगराई । रहि न सकइ हरि भगति बिहाई ॥
अस बिचारि हरि भगत सयाने । मुक्ति निरादर भगति लुभाने ॥
भगति करत बिनु जतन प्रयासा । संसृति मूल अबिद्या नासा ॥
भोजन करिअ तृपिति हित लांगी । जिमि सो असन पचवै जठरागी ॥
असि हरि भगति सुगम सुखदा । जो अस मूढ़ न जाहि सोहाई ॥
दो०—सेवक सेव्य भाव बिनु भव न तरिअ उरगारि ।

भजहु राम पद पंकज अस सिद्धांत बिचारि ॥११९(क)॥

जो चेतन कहँ जड़ करइ जड़हि करइ चैतन्य ।

अस समर्थ रघुनायकहि भजहिं जीव ते धन्य ॥११९(ख)॥

कहेउँ ग्यान सिद्धांत बुझाई । सुनहु भगति मनि कै प्रभुताई ॥

राम भगति चिंतामनि सुंदर । बसइ गरुड़ जाके उर अंतर ॥

परम प्रकास रूप दिन राती । नहिं कछु चहिअ दिया घृत बाती ॥

कै दरिद्र निकट नहिं आवा । लोभ बात नहिं ताहि बुझावा ॥